


sc. sup. 23. pl. 3.





D. LUDOVICI HABERT,
*Sacræ Facultatis Parisiensis Doctoris, Theologi
& Socii Sorbonici,*

COMPENDIUM
THEOLOGICÆ
DOGMATICÆ ET MORALIS,

Ad usum
SEMINARII CATALAUNENSIS.
*Planissima, Critica, & solidissima Methodo
conscripta,*

Nunc verò

Ad usum totius Orbis litterarii

Post Editiones Parisiensem & Venetam
in Germania denuò recusa,

a
plurimis Mendis sollicitè purgata.

TOMUS VIII.


Editio prima in Germania

Superiorum Permissu



AUGUSTÆ VINDELICORUM,
Sumptibus MATTHÆI RIEGER, Bibliopolæ,
M DCC LI.





I N D E X

CAPITUM.

PROLEGOMENA.

Caput I.	<i>De natura & proprietatibus Theologiae.</i>	Pag. 1
Cap. II.	<i>De Locis Theologicis.</i>	7
Cap. III.	<i>De Scriptura sacra.</i>	9
Cap. IV.	<i>De Traditionibus.</i>	12
Cap. V.	<i>De Ecclesia.</i>	13
Cap. VI.	<i>De objecto Theologiae.</i>	19

De Deo, divinisque ejus Attributis.

Caput I.	<i>De divinis Nominibus.</i>	21
Cap. II.	<i>De Existentia Dei.</i>	23
Cap. III.	<i>De Essentia & Unitate Dei.</i>	26
Cap. IV.	<i>De Attributis Divinis.</i>	29
Cap. V.	<i>De Attributis modificativis.</i>	31
§. I.	<i>De Perfectione Dei.</i>	ibid.
§. II.	<i>De Bonitate Dei.</i>	33
(a) 2		§. III.

INDEX CAPITUM.

§. III. <i>De Simplicitate Dei.</i>	Pag. 34
§. IV. <i>De Immutabilitate,</i>	39
§. V. <i>De Sanctitate Dei.</i>	40
§. VI. <i>De Infinitate Dei.</i>	41
§. VII. <i>De Immensitate Dei.</i>	ibid.
§. VIII. <i>De Æternitate Dei.</i>	43
§. IX. <i>De Invisibilitate & Incomprehensibilitate Dei.</i>	46
§. X. <i>Satisfit nonnullis quæstionibus circa visionem beatificam.</i>	54
Cap. VI. <i>De Attributis divinis, quæ per modum facultatis exprimuntur.</i>	59
§. I. <i>De Intellectu divino.</i>	ibid.
§. II. <i>De voluntate Dei.</i>	65
§. III. <i>De objecto & proprietatibus voluntatis divinæ.</i>	68
§. IV. <i>De Omnipotentia divina.</i>	72
Cap. VII. <i>De Attributis divinis, quæ habitum sonant.</i>	ibid.
Cap. VIII. <i>De Attributis divinis, quæ actionem significant.</i>	74
§. I. <i>De Providentia Dei.</i>	ibid.
§. II. <i>De Prædestinatione.</i>	79
§. III. <i>De Reprobatione.</i>	89

De Myſterio ſanctiſſimæ Trinitatis.

Caput I. <i>De nozione hujus Myſterii.</i>	95
Cap. II. <i>De divinis Proceſſionibus.</i>	102
Cap. III.	

INDEX CAPITUM.

Cap. III. <i>De Relationibus divinis.</i>	Pag. 108
Cap. IV. <i>De æqualitate & consubstantialitate trium Personarum.</i>	111
§. I. <i>Filius est verus Deus Patri consubstantialis.</i>	ibid.
§. II. <i>Spiritus Sanctus est æqualis & consubstantialis Patri ac Filio.</i>	117
Cap. V. <i>De Missionibus divinis.</i>	119
Cap. VI. <i>De prima Persona.</i>	121
Cap. VII. <i>De secunda Persona.</i>	122
Cap. VIII. <i>De tertia Persona.</i>	126
Cap. IX. <i>Utrum Mysterium sanctissimæ Trinitatis, ita sit supra rationem, ut ei repugnet?</i>	128
Cap. X. <i>Utrum notitia Mysteriorum sanctissimæ Trinitatis sit ad salutem necessaria?</i>	131

De Rerum Creatione.

Caput I. <i>De Creatione Mundi.</i>	133
Cap. II. <i>De Angelis.</i>	135
Cap. III. <i>De gratia & lapsu Angelorum.</i>	139
Cap. IV. <i>De numero Angelorum.</i>	142
Cap. V. <i>De primo Homine.</i>	147

INDEX CAPITUM.

De Myſterio Incarnationis.

Caput I.	<i>De ejus nomine.</i>	Pag. 155
Cap. II.	<i>De poſſibilitate Incarnationis.</i>	156
Cap. III.	<i>De exiſtentia Myſterii Incarnationis.</i>	158
§. I.	<i>Myſterium Incarnationis aſſeritur adverſus Gentiles.</i>	ibid.
§. II.	<i>Myſterium Incarnationis aſſeritur adverſus Judæos.</i>	161
Cap. IV.	<i>De nozione Myſterii Incarnationis.</i>	165
Cap. V.	<i>De neceſſitate Incarnationis.</i>	178
Cap. VI.	<i>Utrum natura humana in Chriſto præter unionem hypſtaticam aliarum gratiarum donis fuerit ornata?</i>	179
Cap. VII.	<i>De merito Chriſti.</i>	183
Cap. VIII.	<i>De Titulis Chriſti.</i>	189

De Gratia Chriſti.

Caput I.	<i>De nozione Gratiæ Chriſti.</i>	206
Cap. II.	<i>De diſiſione Gratiæ Chriſti.</i>	209
Cap. III.	<i>De neceſſitate Gratiæ actualis.</i>	213
Cap. IV.	<i>De Gratiâ efficaci.</i>	219
Cap. V.	<i>De Gratiâ ſufficiente.</i>	224
Cap. VI.	<i>De Gratiâ habituali.</i>	229
Cap. VII.	<i>Explanantur reliqua, quæ pertinent ad Gratiâ habitualem & juſtificantem.</i>	238
Cap. VIII.	<i>De effectibus Gratiæ.</i>	243
	De	

INDEX CAPITUM.

De Actibus humanis.

Caput I.	<i>De notione Actus humani.</i>	Pag. 246
§. I.	<i>De Voluntario.</i>	247
§. II.	<i>De Ignorantia.</i>	249
§. III.	<i>De Libero.</i>	254
§. IV.	<i>De Morali.</i>	258
Cap. II.	<i>De bonitate & malitia Actuum humanorum.</i>	259
Cap. III.	<i>De objecto Actuum humanorum.</i>	262
Cap. IV.	<i>De fine Actuum humanorum.</i>	267
Cap. V.	<i>De divisione finis.</i>	270
Cap. VI.	<i>De effectibus finis.</i>	275
Cap. VII.	<i>De Circumstantiis Actuum humanorum.</i>	280
Cap. VIII.	<i>De merito bonorum operum.</i>	284
Cap. IX.	<i>De merito de condigno.</i>	287
Cap. X.	<i>De merito de congruo.</i>	296
Cap. XI.	<i>De divisione Actuum humanorum.</i>	298

De Vitiis & Peccatis.

Caput I.	<i>De notione Vitii & Peccati.</i>	301
Cap. II.	<i>De divisione peccati.</i>	308
Cap. III.	<i>De peccato mortali & veniali.</i>	311
Cap. IV.	<i>De Peccati mortalis differentia à veniali.</i>	314
Cap. V.	<i>De Peccato originali.</i>	318

INDEX CAPITUM.

Cap. VI. <i>De natura & essentia Peccati originalis.</i>	Pag. 323
Cap. VII. <i>De pœnis Peccati originalis.</i>	325
Cap. VIII. <i>De causa efficiente peccati.</i>	329

De Regula Morum.

Caput unicum. <i>De ejus necessitate & existentia.</i>	330
--	-----

De Conscientia.

Caput I. <i>De notione Conscientiæ.</i>	332
Cap. II. <i>De divisione Conscientiæ.</i>	334
Cap. III. <i>De bona, malæ Conscientia.</i>	339

De Lege.

Caput I. <i>De notione Legis.</i>	344
Cap. II. <i>De divisione Legis.</i>	349
Cap. III. <i>De Lege humana.</i>	355
Cap. IV. <i>De veteri Lege divina.</i>	360
Cap. V. <i>De Lege Evangelica.</i>	366

De

INDEX CAPITUM.

De Virtutibus Theologicis, Fide, Spe, & Charitate.

Caput I.	<i>De definitione, & divisione Virtutis Theologicæ.</i>	Pag. 372
Cap. II.	<i>De Fide.</i>	375
Cap. III.	<i>De Actibus Fidei.</i>	381
Cap. IV.	<i>De peccatis Fidei oppositis.</i>	388
Cap. V.	<i>De Spe.</i>	391
Cap. VI.	<i>De Charitate.</i>	397

De Jure & Justitia.

Caput I.	<i>De Juris notione & divisione.</i>	412
Cap. II.	<i>De definitione & divisione Justitiæ.</i>	418
Cap. III.	<i>De peccatis Justitiæ oppositis.</i>	421
Cap. IV.	<i>De Contractibus in genere.</i>	428
Cap. V.	<i>De Contractibus in specie.</i>	434
§. I.	<i>De Venditione & Emptione.</i>	ibid.
§. II.	<i>De Mutuo.</i>	439
§. III.	<i>De Usura.</i>	443
§. IV.	<i>De Contractu Societatis.</i>	449
§. V.	<i>De Cambio.</i>	450
Cap. VI.	<i>De Restitutione.</i>	453

INDEX CAPITUM.

De Religione.

Caput I. <i>De definitione Religionis & ejus actibus.</i>	Pag. 459
Cap. II. <i>De Devotione.</i>	460
Cap. III. <i>De Oratione.</i>	463
Cap. IV. <i>De Voto.</i>	481
Cap. V. <i>De Juramento.</i>	488
Cap. VII. <i>De peccatis Religioni oppositis.</i>	496
§. I. <i>De ejus natura & definitione.</i>	ibid.
§. II. <i>De divisione Simoniacæ.</i>	511
§. III. <i>De pœnis Simoniacorum.</i>	515

De Sacramentis in genere.

Caput I. <i>De notione & existentia Sacramenti.</i>	519
Cap. II. <i>De materia & forma Sacramentorum novæ Legis.</i>	527
Cap. III. <i>De causa efficiente Sacramentorum novæ Legis.</i>	531
Cap. IV. <i>De effectibus Sacramentorum novæ Legis.</i>	536
Cap. V. <i>De dispositionibus ad Sacramenta recipienda requisitis.</i>	539
Cap. VI. <i>De numero Sacramentorum novæ Legis.</i>	542

De

INDEX CAPITUM.

De Baptismo.

Caput I.	<i>De notione Baptismi.</i>	Pag. 544
Cap. II.	<i>De Ministro & subiecto Baptismi.</i>	548
Cap. III.	<i>De effectibus Baptismi.</i>	552
Cap. IV.	<i>De obligationibus Baptizatorum.</i>	554

De Sacramento Confirmationis.

Caput I.	<i>De nomine , essentia & existentia Sacramenti Confirmationis.</i>	558
Cap. II.	<i>De Ministro & subiecto Confirmationis.</i>	564
Cap. III.	<i>De effectibus Sacramenti Confirmationis.</i>	567
Cap. IV.	<i>De dispositionibus requisitis ad Sacramentum Confirmationis.</i>	569

INDEX CAPITUM.

De Eucharistia.

Præmittuntur & elucidantur nonnullæ quæstiones.

Pag. 572

PRIMA PARS.

De Eucharistia quatenus est Sacramentum.

Caput I. *De ejus notione.* 577

Cap. II. *De Eucharistia spectata ut est Sacramentum in fieri.* 579

Cap. III. *De Eucharistia spectata in facto esse.* 592

Cap. IV. *De Ministro & subiecto Eucharistiæ.* 595

Cap. V. *De effectibus Sacramenti Eucharistiæ & de dispositionibus ad illud requisitis.* 597

Cap. VI. *De necessitate Sacramenti Eucharistiæ.* 603

SECUNDA PARS.

De Missa Sacrificio.

Caput I. *De Missæ notione.* 608

Cap. II. *De efficacia Sacrificii Missæ.* 619

Cap. III.

INDEX CAPITUM.

Cap. III. *De iis , pro quibus licet offerre Missæ
Sacrificium.* Pag. 623

De Sacramento Pœnitentiæ.

Caput I.	<i>De ejus notione & existentia.</i>	627
Cap. II.	<i>De Contritione.</i>	636
Cap. III.	<i>De Confessione.</i>	641
Cap. IV.	<i>De Satisfactione.</i>	645
Cap. V.	<i>De Indulgentiis.</i>	650
Cap. VI.	<i>De forma Sacramenti Pœnitentiæ.</i>	657
Cap. VII.	<i>De effectibus Sacramenti Pœnitentiæ.</i>	664
Cap. VIII.	<i>De Ministro Sacramenti Pœnitentiæ.</i>	666
Cap. IX.	<i>De necessitate Sacramenti Pœnitentiæ.</i>	676

De Sacramento Extremæ Uctionis.

681

De Sacramento Ordinis.

Caput I.	<i>De nomine , definitione , & existentia Sacramenti Ordinis.</i>	686
Cap. II.		

INDEX CAPITUM.

Cap. II. <i>De Ordinis divisione.</i>	Pag. 691
Cap. III. <i>De definitione, officio, materia & forma cujusque Ordinis seorsim spectati.</i>	697
<i>De Ostiariatu.</i>	ibid.
<i>De Lectoratu.</i>	698
<i>De Exorcistatu.</i>	699
<i>De Acolythatu.</i>	ibid.
<i>De Subdiaconatu.</i>	700
<i>De Diaconatu.</i>	701
<i>De Presbyteratu.</i>	702
<i>De Episcopatu.</i>	705
<i>De Romano Pontifice.</i>	708
Cap. IV. <i>Utrum singuli Ordines sint Sacramenta propriè dicta?</i>	714
Cap. V. <i>De Ministro Sacramenti Ordinis.</i>	716
Cap. VI. <i>De subiecto Ordinis.</i>	719
Cap. VII. <i>De effectibus Sacramenti Ordinis.</i>	721
Cap. VIII. <i>De dispositionibus ad Ordines.</i>	723
Appendix de Censuris.	731
§. I. <i>De notione Censuræ.</i>	ibid.
§. II. <i>De divisione Censuræ.</i>	735
§. III. <i>De Excommunicatione.</i>	739
§. IV. <i>De Interdicto.</i>	744
§. V. <i>De Suspensione.</i>	745
§. VI. <i>De Absolutione à Censuris.</i>	747
Appendix de Irregularitate.	750
§. I. <i>De notione & divisione Irregularitatis.</i>	ibid.
§. II. <i>De Irregularitate ex defectu animæ.</i>	753
§. III.	

INDEX CAPITUM.

§. III. <i>De Irregularitate ex defectu corporis.</i>	Pag. 754
§. IV. <i>De Irregularitate ex defectu libertatis & natalium.</i>	756
§. V. <i>De Irregularitate ex defectu obligationis & Sacramenti.</i>	758
§. VI. <i>De Irregularitate ex defectu bonæ fa- mæ.</i>	760
§. VII. <i>De Irregularitate ex defectu lenita- tis.</i>	763
§. VIII. <i>De Irregularitatibus ex delicto.</i>	767
§. IX. <i>De Irregularitate ex homicidio.</i>	ibid.
§. X. <i>De Irregularitate ex delicto in receptione & usu Ordinis.</i>	769
§. XI. <i>De Irregularitate ex iteratione Sacra- menti.</i>	772
§. XII. <i>De dispensatione in Irregularitate.</i>	ibid.

De Sacramento Matrimonii.

Caput I. <i>De varia acceptione , & vera notione Matrimonii.</i>	773
Cap. II. <i>De Matrimonii proprietatibus.</i>	778
Cap. III. <i>De Matrimonio quatenus est Sacramen- tum.</i>	783
Cap. IV. <i>De materia , forma , & Ministro Sa- cramenti Matrimonii.</i>	787

Cap. V.

INDEX CAPITUM.

Cap. V. <i>De Sponsalibus.</i>	Pag. 791
Cap. VI. <i>De impedimentis Matrimonii.</i>	794
<i>Error.</i>	795
<i>Conditio.</i>	796
<i>Votum.</i>	ibid.
<i>Cognatio.</i>	797
<i>Crimen.</i>	801
<i>Cultus Disparitas.</i>	802
<i>Vis.</i>	ibid.
<i>Ordo.</i>	803
<i>Ligamen.</i>	ibid.
<i>Honestas.</i>	805
<i>Amentia.</i>	806
<i>Affinitas.</i>	ibid.
<i>Clandestinitas.</i>	807
<i>Impotentia.</i>	809
<i>Raptus.</i>	810
Cap. VII. <i>De dispensatione circa impedimenta Matrimonii.</i>	811





COMPENDIUM THEOLOGICÆ DOGMATICÆ ET MORALIS.

PROLEGOMENA THEOLOGICÆ.

CAPUT PRIMUM.

De natura & proprietatibus Theologiæ.

Q. I. *QUID est Theologia?*

R. Secundum vim nominis Græci, est sermo de Deo.

Definitur autem, disciplina supernaturalis, quæ ex principiis divinitus revelatis Ecclesiæ, varias conclusiones tam de Deo, quam de iis, *D. Habert Theolog. Tom. VIII.* A quæ

quæ ad Deum quoquo modo spectant, certo elicit.

Dicitur 1. *disciplina supernaturalis*, propter ejus principia supernaturalia, nempe verbum Dei, & propositiones fidei, ex quibus deducit suas conclusiones; sicque distinguitur à Metaphysica, quæ quidem tractat de Deo, sed per principia naturali lumine nota; & ideo vocari potest Theologia naturalis.

Dicitur 2. *ex principiis divinitus revelatis*, hoc est ex verbo Dei, sive ex propositionibus fidei.

Dicitur 3. *revelatis Ecclesiæ*, 1. ut significetur Theologiam non elicere suas conclusiones ex privatis revelationibus, quibus aliquando viri eximie sanctitatis edocentur. 2. ut rejiciatur impius & fanaticus Calvinianorum error, quo definiunt singulis prædestinatis interius & immediate revelari genuinum Scripturarum sensum, cum tamen contestetur Deus, Malach. 2. v. 7. *labia Sacerdotis custodient scientiam, & legem requirent ex ore ejus*. Apostolus quoque Rom. 10. *fides ex auditu*: & Ephes. 4. *dedit quosdam quidem Apostolos . . . alios autem Pastores & Doctores . . . ut jam non simus parvuli fluctuantes & circumferamur omni vento doctrinæ*. Quæ planè demonstrant Dei revelationem immediatè fieri Ecclesiæ, privatis vero etiam prædestinatis mediatè tantum, scilicet per Pastorum prædicationem.

Dicitur 4. *varias conclusiones elicit*, quibus significatur Theologiam esse habitum discursivum, cum colligat unum ex alio, & eatenus distingui à fide, quæ non est discursiva, sed inclinatur ad simpliciter credendum Deo dicenti.

Dices;

Dices; est etiam discursus in fide; colligimus enim credendum Deo, quia est verax; Ergo.

Distinguo anteced. Est discursus prævius & extrinsecus fidei, Concedo: est discursus in ipso actu fidei, Nego antecedens. Infidelis quidem, priusquam credat; examinat prophetias, miracula, & alia credibilitatis motiva; tantumque ex illis naturaliter colligit credibilia esse quæ dicuntur, quibus præviis, intellectus supernaturali lumine illustratus, & roboratus elicit actum fidei.

Dicitur 5. *certo elicit*: quod denotat Theologiam proprie esse scientiam simul & sapientiam: namque 1. Illa disciplina est proprie scientia, quæ ex principiis necessariis certas elicit conclusiones: atqui talis est Theologia; ergo. 2. Illa disciplina merito vindicat sibi nomen sapientiæ, hoc est excellentioris scientiæ, quæ versatur circa res altissimas, & ex causis altissimis conclusiones suas deducit: atqui Theologia versatur circa res altissimas, nempe circa Deum, & divina ejus attributa; & ex verbo Dei conclusiones suas deducit: Ergo.

Dices: scientia proprie dicta, est cognitio certa & evidens: atqui cognitio Theologica non est evidens, cum eliciatur ex propositionibus fidei, quæ sunt inevidentes: Ergo.

Distinguo maj. scientia naturalis, de qua Philosophi, Concedo; nihil enim est naturaliter certum, nisi sit evidens: scientia supernalis, Nego majorem; quia sine evidentia fidelis habet ex verbo Dei omnem certitudinem, quæ ad scientiam requiritur.

Instabis non potest certo elici conclusio ex principio inevidenti: ergo nulla solutio.

Distinguo antecedens : ex principio ita inevidenti , ut evidenter appareat non esse credibile, Concedo : ex principio ita inevidenti , ut evidenter probetur esse credibile, Nego antecedens. Porro licet non sit nobis evidens Deum dixisse Christum Dominum esse suum Filium sibi consubstantialem, nobis tamen evidens est per motiva credibilitatis, ut vocant, hoc est, per miracula prophetias adimpletas, &c. ejusmodi propositionem esse credibilem; adeò ut genus dementiæ sit eam denegare. Unde licet Theologus non probet principia suæ disciplinæ, sed supponat vera, potest tamen & debet demonstrare ea esse evidenter credibilia, ut constet nos Religionem Christianam non amplecti, quemadmodum Mahometanos, & alios infideles suam sectam, hoc est, casu, & parentum exemplo, ac persuasione.

Ergo Theologia est certior qualibet naturali scientia; quia conclusiones suas elicit ex principiis certioribus.

Dices : Illa cognitio est certior, cui mens ita necessario adhæret, ut non possit pulsari errandi formidine : atqui mens non ita adhæret conclusioni scientificæ, & principiis lumine naturali notis, ut nulla errandi formidine pulsari possit; cum contra patiatur nonnunquam graves tentationes circa conclusiones Theologicas, & circa ipsam fidem : Ergo.

Distinguo majorem : certior est ratione subiecti, Concedo : ratione motivi, Nego majorem. Fidelis itaque, licet propter inevidentiam & obscuritatem rerum revelatarum patiatur tentationes, sitque ei liberum propositionibus fidei consentire vel dissentire, firmitus tamen illis adhæret, quam

quam principiis lumine naturali notis; quia motivum illud assentiendi est multo certius.

Ergo Theologia minus habet certitudinis, quam fides; quia principia conclusionis sunt certiora ipsa conclusione.

Ergo Theologia est nobilior & superior cunctis naturalibus disciplinis; quia propius attingit rerum omnium finem, nempe Deum, imò habet illum pro primario objecto.

Ergo inferiores disciplinæ, ut Philosophia, Politica, Jurisprudentia, & ars quælibet, Theologiam consulere debent in obscurioribus, ubi periculum est ne ab ultimo fine aberrant, & quidquam decernant, doceant & exequantur, quod repugnet fidei & legi divinæ. Unde Philosophus, qui a Theologia se abstrahere dicit, dum docet, quæ cum illa conciliari nequeunt, profitetur se docendo abstrahere à veritate & falsitate.

Ergo Theologia est omnino necessaria; quia ad confirmandam veritatem, & mores rectè instituendos, necesse est multa colligere ex iis quæ Deus dixit. Hac ratione docendi Christus sæpè usus est, ut Matth. 22. v. 21. Marci 12. vers. 26. Apostoli quoque in suis epistolis, & sancti Patres passim in suis scriptis.

Q. 2. *Quomodo dividitur Theologia?*

R. Dividitur in positivam, scholasticam, speculativam, & practicam.

Positiva ita dicitur, quia sine Dialecticæ regulis simpliciter ponit momenta ex Scripturis, Conciliis & Patribus petita ad confirmandam doctrinam Catholicam. Et hæc fuit antiquorum Theologia.

Scholastica recentior, utpote quæ parentem agnoscat Petrum Lombardum, vulgo Magistrum

Sententiarum, Episcopum Parisiensem duodecimo seculo; ope Dialecticæ res divinas Fidelibus lucentius explanat, & contra Hæreticos adeo feliciter propugnat, ut eorum odium & maledicta meruerit. Unde quamvis non sit absolute necessaria, admodum tamen utilis est Ecclesiæ.

Speculativa in contemplatione rerum divinarum quiescit.

Practica seu moralis Christianorum mores ad legis æternæ regulas exigit.

Q. 3. *Conclusio Theologica estne de fide?*

R. Si sit solum expositiva, est de fide; secus si sit illativa.

Conclusio est solum positiva, quando Theologus in conclusione simpliciter exponit & eluciddat, quæ non ita distincte & explicite revelata sunt, ut cum colligit Christum Dominum esse animal rationale, ex eo quod Deus illum dixerit hominem; sicque argumentatur: Omnis homo est animal rationale; atqui ex Scriptura Christus Dominus est homo: ergo Christus Dominus est animal rationale. Item; Deus revelavit omnia peccata lethalia post baptismum commissa, esse in confessione sacramentali exponenda: atqui circumstantiæ, quæ mutant speciem peccati lethalis, sunt peccata lethalia in uno & eodem actu moraliter distincta: ergo ejusmodi circumstantiæ in confessione sacramentali sunt explicandæ. Certum est ejusmodi conclusiones esse de fide, quia à Deo sunt immediate revelatæ, utpote quæ contineantur in propositionibus, quas solummodo explicant & elucidant.

Conclusio est illativa; quando ex propositione à Deo revelata infertur alia non revelata, sed
necef-

necessario cum priori connexa, ut in hoc exemplo : Qui Ecclesiam non audierit , sit tibi sicut ethnicus & publicanus , ut habetur Matthæi 18. v. 17. atqui Calvinianus Ecclesiam non audit : ergo Calvinianus sit tibi sicut ethnicus & publicanus. Hanc conclusionem Christus non protulit , sed necessario infertur ex præmissa ejus propositione : ergo non est de fide ; certa tamen est , & absque errore , ac suspicione hæreseos negari non potest.

Q. 4. *Unde Theologia petit sua principia?*

R. Ex Scriptura, Traditione, &c. quæ idcirco dicuntur loci Theologici ; de quibus separatim dicendum.

CAPUT II.

De locis Theologicis.

Q. 1. *Quot sunt loci Theologici?*

R. Duo ; internus & externus.

Internus is dicitur , ex quo Theologia eruit principia sibi propria, nempe propositiones à Deo revelatas.

Externus est sedes principiorum extraneorum, quæ Theologia repetit ex ratione naturali, Philosophis, Jurisperitis & Historicis , ad elucidanda, ac suadenda Religionis nostræ mysteria, & eorum consuetudines. Theologus enim utitur ratione , & auctoritate Philosophorum , Historicorum profanorum , & Jurisperitorum , tum ut suadeat Religionem Christianam nihil docere lumini naturali repugnans : tum ut veluti pretiosis Ægyptiorum spoliis sanctuarium Dei exornet ; quemadmodum scribit Sanct. Augustinus. Sed ratio natu-

ralis Theologiæ deferviat, ut ancilla, nullatenus verò in ejus schola præsit ut domina; quandoque enim negat, quod fides affirmat; atque hoc posteriori sensu Patres eam excludunt à scholis Theologicis. *Quid Athenis & Hierosolymis? Quid Academiæ? quid Ecclesiæ?* inquit Tertullianus lib. de præscript. & S. Hieron. dialogo contra Pelagianos, *non nobis curæ est, quid Aristoteles, sed quid Paulus doceat.*

Q. 2. *Quotuplex est locus internus?*

R. Triplex, nempe Scriptura, Traditio, & Ecclesia, quæ est custos & infallibilis interpres Scripturæ & Traditionis, in quibus continentur quæcunque Deus revelavit.

Ad Traditionem revocatur consensus sanctorum Patrum, & qui eos consecuti sunt, Scholasticorum in exponendis Scripturis Sacris, & Traditionibus divinis. Ubi autem Scholastici Philosophicis argutiis nituntur, nullius sunt auctoritatis & ponderis, nec ex eorum scriptis certa conclusio Theologica elici potest, ut patet ex dictis.

Ad Ecclesiam quoque reducuntur Concilia generalia; quia universalem Ecclesiam repræsentant, & Decreta summorum Pontificum, dum Ecclesiæ consensus accedit. Ex testimonio autem unius aut alterius Patris; & Concilii Provincialis aut Nationalis, Theologus non elicit conclusionem omnino certam, nisi accedat universalis Ecclesiæ auctoritas, quemadmodum accessit ad Concilium Arausicanum II. cujus canones fuerunt universaliter recepti.

CAPUT III.

De Scriptura sacra.

Q. 1. *Quid est Scriptura sacra?*

R. Est verbum Dei scriptum, Spiritu sancto afflante.

Dicitur 1. *verbum Dei*, in quo Scriptura convenit cum Traditionibus divinis, quæ sunt verbum Dei.

Dicitur 2. *Scriptum*, quo Scriptura distinguitur à Traditionibus divinis, quæ non sunt scripto traditæ, sed voce dumtaxat.

Dicitur 3. *Spiritu sancto afflante*; quibus vocibus sacra Scriptura differt à canonibus Ecclesiæ in materia fidei, qui, licet sint verbum Dei scriptum, non sunt tamen Scriptura sacra, qui canones non sunt scripti Spiritu sancto afflante, sed assistente dumtaxat.

Q. 2. *Quid significant illæ voces*, Spiritu sancto afflante.

R. Tria significant; 1. revelationem, ubi veritas rerum scribendarum sacrum Scriptorem lateret. 2. specialem assistentiam, ne laboretur Scriptor, in iis scribendis quæ vel ipse viderat vel ex Testimonio aliorum dicerat; sic S. Joannes plura scripsit, quæ propriis oculis vidit; & S. Lucas, quæ à testibus fide dignis audivit: in iis autem revelatione non indiguerunt; sed assistentia dumtaxat. 3. Inspirationem seu motionem interiorem, qua sacer Scriptor ad scribendum incitatus est.

Q. 3. *Quomodo dividitur sacra Scriptura?*

R. 1. Generatim dividitur in vetus & novum Testamentum. Vetus continet quæ Deus revelavit in veteri lege: novum vero quæ Christus

Dominus dixit. Concilium Tridentinum sess. 4. recenset septuaginta duos libros divinos & canonicos ; 45. veteris Testamenti, & 17. novi, quorum alii dicuntur protocanonici ; quia prius repositi sunt in canone, & habiti ut divini : alii Deuterocanonici, eo quod ab initio in Ecclesiæ Canonem relati non fuerint, & de eorum autoritate nonnulli Catholici dubitaverint. Illi autem libri sunt in veteri Testamento Tobias, Judith, Sapientia, Ecclesiasticus, Baruch, Epistola Hieremiæ, duo Machabæorum, nonnullæ partes Danielis & Estheris. In novo Testamento, ultimum caput Marci, Historia de sanguine Christi sudore Luc. 22. Historia de muliere adultera Joan. 8. Epistola ad Hebræos, Epistola Jacobi, secunda Epistola Petri, Joannis secunda & tertia, Epistola Judæ, & Apocalypsis ; de quibus post Concilium Tridentinum dubitare non licet. Quomodo vero Concilium ejusmodi libros in canonem potuerit referre ; dicimus tom. I. in Proleg. Theol. cap. 6. §. 3. ubi de idiomate, quo scripti sunt libri sacri, de versionibus, & quo sensu Concilium Tridentinum definierit Vulgatam, qua utitur Ecclesia latina, esse Authenticam.

R. 2. Libri sacri dividuntur in legales, qui legem divinam tradunt, ut quinque libri Moyſis, vulgò dicti Pentateucus : in historicos, qui olim gesta referunt, ut libri Regum, Actus Apostolorum, &c. in sapientiales, seu morales, qui mores informant, ut Proverbia, Ecclesiastes, Epistolæ Apostolorum : & in Propheticos, qui futura prænuntiant, & occultiora manifestant, ut libri Prophetarum, & Apocalypsis. Psalmi sunt historici. Prophetici & morales.

Q. 4. *Scriptura habetne plures sensus in una littera?*

R. Habet: *in una dictione*, inquit S. Chrysostomus hom. 37. in Gen. *plurima sæpè multitudo sensuum invenitur; divina enim sunt dogmata, non humana.*

Q. 5. *Quotuplex est sensus Scripturæ sacræ?*

R. Duplex, litteralis, & mysticus seu spiritualis. Litteralis nascitur ex littera, servata verborum proprietate: mysticus sumitur ex verbis Scripturæ ad metaphoram translatis, quomodo Apostolus Galat. 4. v. 24. quæ de duabus uxoribus Abrahæ scripta sunt, interpretatur de duobus Testamentis.

Q. 6. *Quotuplex est sensus mysticus, seu spiritualis?*

R. Triplex, nempe allegoricus, anagogicus, & moralis. Si metaphora figurat aliquod mysterium legis novæ, ut in laudato Apostoli exemplo, est sensus allegoricus: si ad patriam cœlestem transfertur, quemadmodum Apostolus Hebr. 9. per sanctuarium, in quo summus Pontifex semel in anno ingrediebatur, ipsum cœlum intelligit, in quod semel Christus introivit, æterna redemptione inventa, est sensus anagogicus: si denique metaphora ordinatur ad mores componendos, ut 2. Cor. cap. 5. vers. 8. Apostolus panes azymos significare dicit morum puritatem est sensus moralis.

Q. 7. *Potestne certo elici conclusio Theologica ex quolibet Scripturæ sensu?*

R. Potest, quando constat vel ex Scriptura, vel ex Traditione, hunc sensum fuisse à Spiritu sancto intentum; alioquin non potest.

CAPUT IV.

De Traditionibus.

Q. 1. *Quid est Traditio?*

R. Est verbum Dei sine scripto traditum.

Q. 2. *Quotuplex est Traditio?*

R. Triplex : nempe divina , quæ à Christo ortum habet ; Apostolica , quæ ab Apostolis emanat ; nonnulla enim Apostoli tanquam primi Ecclesiæ Pastores instituerunt ; & Ecclesiastica , quæ Authores habet Apostolorum successores.

Q. 3. *Quenam est nota divinæ Traditionis?*

R. Si fuerit semper , ubique & ab omnibus servata , tanquam à Christo originem ducens. Hinc observatio Quadragesimæ non est Traditionis Divinæ , sed Apostolicæ tantum ; quia Antiqui eam ad Apostolos referunt , non ad Christum. Item abstinentia ab immolato & sanguine , de qua Act. 15. non est præcepti divini , sed Apostolici ; quia nec semper , nec ubique est observata : abstinentia vero à fornicatione , de qua citato loco , est traditionis divinæ ; quia semper , ubique , & ab omnibus servata & credita , ut præcepti divini.

Q. 4. *Potestne erui propositio fidei ex triplici recensita Traditione?*

R. Non potest nisi ex divina ; quia in illa sola continetur verbum Dei , ut patet ex dictis.

Ergo articuli fidei non creverunt successu temporis , sed clarius dumtaxat explicantur ; Concilia enim generalia non expectant novam revelationem , sed consulunt Scripturam & Traditionem , & ex illis condunt suos canones.

Ergo

Ergo falsum est recentiores veteribus esse doctiores in iis quæ pertinent ad fidem, & ad naturalia seu divina morum præcepta; nihil enim fide divina credimus, nisi fuerit à Christo traditum, & per Apostolos, eorumque successores ad nos transmissum. Ergo novitas in fide est certissimum hæreseos signum.

Q. 5. *Traditio divina estne necessario agnoscenda tamquam regula fidei & morum?*

R. Affirmativè. *Tenete Traditiones*, inquit Apostolus 2. Thess. c. 2. *quas didicistis sive per sermonem, sive per epistolam nostram*: in quem locum sic scribit S. Chrysostomus; *hinc est perspicuum quod non omnia tradiderunt (Apostoli) per epistolam, sed multa etiam sine scriptis, & ea quoque sunt de fide divina. Adde quod sine Traditione non potest erui & propugnari adversus Hæreticos & Libertinos verus Scripturarum sensus; in iis quippe sunt quedam difficilia intellectu, quæ indocti & instabiles depravant ad suam ipsorum perditionem, ut habetur 2. Petri 3. Unde Vincentius Lyrinensis common. 38. Si, inquit, divinis eloquiis, sententiis, promissionibus diabolus & discipuli ejus utuntur, quid facient Catholici omnes, & matris Ecclesiæ filii? hoc scilicet facere magnopere curabunt, quod in principio commentarii istius sanctos & doctos viros nobis tradidisse scripsimus; ut divinum canonem, secundum universalis Ecclesiæ Traditiones, & juxta Catholici dogmatis regulas interpretentur.*

CAPUT V.

De Ecclesia.

Q. I. *Quid est Ecclesia?*

R. Definitor coetus Fidelium baptizato.

zatorum tam corpori reliquo, quàm suo capiti visibili in terris adhærentium.

Dicitur 1. *cætus*, illud enim sonat nomen tum Ecclesiæ, tum Synagogæ, quod est convocatio seu congregatio: societas autem Christianorum non retinuit nomen Synagogæ; quia, ut observat sanctus Augustinus, Synagoga æquè significat congregationem animalium, ac hominum; Ecclesia vero nonnisi cætum exprimit spiritualium, quales debent esse Christiani.

Dicitur 2. *Fidelium*, qua voce excluduntur ab Ecclesia Infideles & omnes Hæretici, utpote membra à corpore abscissa.

Dicitur 3. *baptizatorum*, sive illi sint iusti aut peccatores prædestinati aut reprobi; modo per fidem & communionem exterham reliquo corpori adhæreant; quia sicut per circumcisionem olim fiebat professio Religionis Mosaicæ; ita per baptismum fit professio Religionis Christianæ. Hinc baptismus in Decreto Eugenii IV. dicitur janua ad Ecclesiam.

Ergo Catechumeni, quamvis fideles, nondum sunt actu in Ecclesia, *stant in vestibulo pietatis*, inquit sanctus Gregorius Nazianzenus, *vota illorum juxta sanctum Augustinum. Sunt conceptionibus similia, non autem tantum concipi, inquit, sed & nasci necesse est.*

Dicitur 4. *adhærentium tam reliquo corpori, quàm visibili capiti*; quibus vocibus excluduntur ab Ecclesia schismatici, qui ejus membris, ac præsertim capiti non cohærent; Ecclesia enim dicitur à sancto Cypriano Epiist. 69. *plebs Sacerdoti adunata, & Pastori suo grex adhærens.* Supremum autem Ecclesia caput visibile est Romanus Pontifex.

Q. 2. *Quomodo Ecclesia constituit locum Theologicum à sacris Scripturis & divinis Traditionibus distinctum?*

R. Quatenus per eam Theologus discit 1. quanam sint libri sacri, quæve Traditio divina. 2. Quo sensu accipienda sint Scripturæ verba, præsertim ubi obscuriora sunt, & in pravos sensus detorquentur; cum enim Hæretici & peccatores eludere soleant Scripturarum & sanctorum Patrum testimonium, necesse est ut Theologus recurrat ad auctoritatem Ecclesiæ, quæ infallibili suo iudicio & suprema sua auctoritate definiat quis sit genuinus Scripturæ sensus, quæve sanctorum Patrum mens & sententia, sicque omnium controversiam dirimat, juxta illud Matth. 18. *dic Ecclesiæ: si autem Ecclesiam non audierit, sit tibi sicut ethnicus & publicanus.*

Q. 3. *Unde probatur iudicium Ecclesiæ, in iis quæ ad fidem & bonos mores pertinent, esse infallibile?*

R. Ex verbis tum Christi, tum Apostoli Jo. 14. vers. 16. *Ego rogabo Patrem, & alium Paraclitum dabit vobis, ut maneat vobiscum in æternum, Spiritum veritatis.* Vox, in æternum, denotat promissionem hanc extendere se ad Apostolorum successores, ut observat S. Hieronymus; quia Apostoli non erant in æternum victuri, sed brevi morituri. Apostolus 1. ad Timoth. c. 3. sic scribit; *hæc tibi scribo ut scias quomodo oporteat te in domo Dei conversari, quæ est Ecclesia Dei vivi;*
COLUMNA ET FIRMAMENTUM VERITATIS.

Dices in ipsa argumentandi ratione cernitur vitiosus circulus; probatur enim idem per idem, scilicet Ecclesia per scripturam, & vicissim Scriptura per Ecclesiam: Ergo.

Nego

Nego antecedens, cujus confirmationem distinguo : probatur Ecclesia per Scripturam ex concessis hæreticorum, & argumentorum ad hominem, ut ajunt, Concedo : probatur absolute & necessario, Nego. Itaque cum Hæretici Scripturam agnoscant ut verbum Dei, recte ex Scriptura adversus eos colliguntur dotes Ecclesiæ Christi propriæ, v.g. ejus visibilitas, perpetuitas, infallibilitas & autoritas in definientis propositionibus Fidei; concluditurque certo & infallibiliter eos Ecclesiam sibi vindicare non posse. Sed adversus Paganos & alios infideles, qui Scripturas sacras rejiciunt, ut Christiani Alcoranum, hoc est, ut meras fabulas; Theologus absolute probat indubitatis signis & portentis Ecclesiam Christianam esse societatem divinitus institutam, & omni fide dignam in iis quæ prædicat. Illi enim societati credendum est tamquam vera docenti, cui Deus evidens testimonium perhibet; ratio quippe naturalis evidenter demonstrat Deum non posse suo testimonio confirmare mendacium & falsitatem : atqui Deus ejusmodi testimonium perhibuit Ecclesiæ Christianæ : ergo ratio naturalis dictat doctrinæ Ecclesiæ esse deferendum, genusque esse dementiæ illi refragari. Ergo Ecclesia Christiana absolute non desumit suam auctoritatem ex scriptis Apostolorum, cum omnem suam auctoritatem habuerit, & infallibilis credita sit, priusquam illæ Scripturæ essent adornatæ; populis autem jam credentibus præbet libros sacros, in quibus scripta sunt quæ viva voce ipsos jam docuerat, quemadmodum Theologiæ Professor lectiones suas discipulis scripto tradit.

Sed

Sed cum omnes Hæreticorum sectæ veram Ecclesiam sibi vendicent, operæ pretium est inquirere quibus signis & notis vera Ecclesia à falsis discerni queat. Itaque

Q. 4. *Quibus notis vera Christi Ecclesia inter tot Hæreticorum sectas conspicua redditur?*

R. Quatuor recensentur à Conciliis Nicæno & Constantinopolitano in Symbolo, his verbis, *Unam, Sanctam, Catholicam, & Apostolicam Ecclesiam.*

1. Ecclesia una est. Joan. 10. *alias oves habeo & illas oportet me adducere & fiet unum ovile & unus Pastor.* 1. Cor. 10. *unum Corpus multi sumus.* Ephes. 4. *Unum Corpus, & unus spiritus, sicut vocati estis in una spe vocationis vestræ.* Ecclesia autem una est unitate tum doctrinæ, tum regiminis sub uno supremo Pastore, qui est caput ejus visibile, & sub aliis Pastoribus supremo subordinatis, qui omnes, tam ille quàm isti continuata successione ab Apostolis ordinati sunt. Sic nobis sensibilibiter innotescit regnum Galliæ v. g. esse unum Corpus politicum & divisum à quocumque alio, ex eo quod Galli iisdem utantur legibus sub uno supremo Principe, qui anterioribus legitime succedit.

2. Ecclesia est Sancta; 1. Petri 2. *vos autem genus electum, regale Sacerdotium, gens sancta; quia Ecclesia regitur Spiritu Sancto, non nisi sancta docet, præcipit & observat, idque in finem debitum & sanctum.*

Dices: Ecclesia plures peccatores complectitur: ergo non est sancta.

Nego consequentiam. Imo inde arguitur Ecclesiæ sanctitas, quod nullus in ea peccet, nisi quia recedit à Christi doctrina, & mandata Dei & Ecclesiæ non observat.

3. Ecclesia est Catholica, *Christianus nomen meum*, inquit Sanct. Patianus, *Catholicus cognomen: hinc nominor, inde prodor*. Et Sanct. Cyrillus Hierosolymitanus in Cathec. *quia per universum orbem divisa à finibus terræ usque ad extrema*.

4. Est Apostolica, non præcise quia doctrinam ab Apostolis acceptam fideliter custodit; sed maximè quia ejus Pastores successionem non interrupta ab Apostolis descendunt, ita ut Pastores à Christo missi alios sibi continua successionem usque ad nos ordinarint & miserint, quemadmodum enim Sequana est planè idem flumen quod decurrebat ante mille annos; quia habet eandem originem, ex qua hætenus sine intermissione decurrit, ita una & eadem Ecclesia ab Apostolis fundata per Successores eorum usque ad nostram ætatem pervenit, & successive decurret usque ad secundum Christi adventum.

Ergo sectæ Lutheranorum, Calvinianorum, & aliorum hæreticorum, non sunt vera Ecclesia; deest quippe illis unitas, Lutherani & Calviniani, v. g. non conveniunt in unum Corpus sub uno capite, deest illis sanctitas; impia docent: catholicitas, non constituunt unum Corpus per totum orbem diffusum: denique deest illis Apostolicitas, Pastores eorum non descendunt ab Apostolis per continuam successionem.

CAPUT VI.

De objecto Theologiæ.

Objectum apud Philosophos duplex est, aliud materiale, aliud formale. Rursus materiale, vel est adæquatum, seu communitatis, ut vocant, vel primum, seu attributionis. Quibus præsuppositis

Q. 1. *Quodnam est objectum materiale adæquatum Theologiæ?*

R. Est omnis propositio deducibilis ex verbo Dei, sive ex propositione fidei; quia illud est objectum adæquatum, circa quod disciplina tota versatur: atqui Theologia tota versatur circa propositiones, seu conclusiones deducendas ex verbo Dei: Ergo propositio seu conclusio deducibilis ex verbo Dei, est adæquatum Theologiæ objectum.

Ergo propositiones, seu conclusiones morales, quæ nituntur sola ratione humana, & aliorum opinione, nec repeti possunt ex verbo Dei, seu ex propositione revelata, non sunt conclusiones Theologiæ.


Q. 2. *Quodnam est objectum formale Theologiæ?*

R. Est ipsa deducibilitas propositionis ex verbo Dei; quia objectum formale cujuslibet disciplinæ est ratio, sub qua disciplina versatur circa objectum suum materiale: sic dirigibilitas v. g. actionum humanarum ad honestatem est objectum formale Ethicæ, quo distinguitur à Metaphysica, quæ illas spectat ut proprietates substantiæ spiritualis: atqui deducibilitas propositionis ex verbo Dei est ratio, sub qua Theologia

versatur circa suum objectum materiale, nempe conclusiones deducibiles ex verbo Dei: ergo ejusmodi deducibilitas est objectum formale Theologiæ.


Q. 3. *Quodnam est objectum Theologiæ primum attributionis?*

R. Deus; quia objectum attributionis dicitur quod primario spectatur in aliqua disciplina, & ad quod cætera referuntur; atqui Deus primario spectatur à Theologia, & ad illum omnes Tractatus Theologici referuntur, vel tanquam proprietates, ut divina attributa; vel tanquam effectus ad suum principium, ut creatio & conservatio creaturæ, Incarnatio, &c. vel tanquam media ad suum finem, ut gratia, virtutes, sacramenta: Ergo.





Tractatus DE DEO, DIVINISQUE EJUS ATTRIBUTIS.



CAPUT PRIMUM.

De divinis Nominibus.

Q. 1. *Quod est Dei nomen?*

R. Deus est ineffabilis, neque nomen ejus est neque opinio, inquit Author de divinis nominibus capite 1. Et Prov. 13. *Quod nomen est ejus, aut quod nomen Filii ejus si nosti?* quia cum nomina exprimant conceptus nostros, ea solum possumus nominare, quæ cognoscimus: atqui natura divina non potest à nobis in hac vita cognosci: *Deus lucem inhabitat inaccessibilem*, 1. Tim. 6. Ergo.

Q. 2. *Numquid Deus imperfecte saltem nominari potest?*

R. Potest eo modo, quo cognoscitur. Cum autem mens nostra colligat omnes perfectiones creaturarum debere existere in Deo saltem virtualiter & eminenter, utpote quæ ex ipso emanent, solemus Deo tribuere omnia nomina, quibus creaturarum perfectiones exprimimus: *Omnia possunt dici de Deo*, inquit sanctus Augustinus, *& nihil digne dicitur de Deo, nihilque locupletius hac inopia.*

Q. 3. *Omnes perfectiones, quæ sunt in creaturis possunt dici de Deo?*

R. Aliæ habent admixtam imperfectionem, ut corpus, animal, leo, &c. aliæ nullam; ut sapientia, bonitas, charitas, &c. Priores non nisi metaphoricè dicuntur de Deo: posteriores vero propriè, & quidem prius quam de creaturis; quia in Deo sunt principia, ex quibus fluunt omnes perfectiones creatæ.

Q. 4. *Quotuplicis generis sunt nomina, quæ propriè Deo tribuuntur?*

R. Duplicis; alia enim sunt negativa, ut incorporeus, infinitus, incomprehensibilis, &c. Alia positiva, ut bonus, justus, perfectus, omnipotens, &c. Priora Deum felicius exprimunt; *de Deo enim melius novimus quid non sit, quam quid sit*, inquit Author de divinis nominibus, qui ideo docet in contemplatione rerum divinarum non hærendum ideæ, quam de Deo & ejus attributis formavimus, ne idolum pro vero Deo colatur; sed semper mente ascendendum via negationis supra id quod cogitamus de ejus sapientia, misericordia, justitia, &c. negando scilicet Deum esse
illam

illam sapientiam, misericordiam, justitiam, &c. quam concipimus; sed esse quid infinitè sapientius, justius, &c. Unde sanctus Augustinus in illud Psalmi 104. *quærite faciem ejus semper*, hoc esse dicit, *ut non huic inquisitioni finem præstet inventio, sed amore crescente, inquisitio crescat inventi.*

Q. 5. *Estne aliquod nomen Dei ita proprium, ut sit incommunicabile alteri?*

R. Hoc nomen, *Deus*, etsi desumatur ab aliqua Dei operatione, (derivatur enim à verbo *dare*) præ cæteris tamen est Dei proprium: *Deus*, inquit Tertullianus, *substantiæ ejus nomen est, id est divinitatis: Dominus autem non substantiæ, sed potestatis.* Et eo sensu docet sanctus Thomas nomen illud esse incommunicabile creaturis; quia natura divina illis communicari non potest. Attamen secundum quamdam participationem & similitudinem, nomen illud creaturis aliquando tribuitur propter potestatem, quam nomine Dei exercent, ut Judices, de quibus habetur Psalmo 81. *Deus stetit in Synagoga Deorum*, id est, Judicum.

CAPUT II.

De Existentia Dei.

Q. 1. *Existit-ne Deus?*

R. Deum existere fide divina creditur, ipso dicente Exodi 3. *Ego sum qui sum*: & ratione naturali demonstratur. Hanc fidem primo loco exigit Apostolus Hebr. 11. *credere enim oportet accedentem ad Deum, quia est.* Sed & creaturæ adeo perspicuè & fortiter inclamant Deum existere, ut nemini ignorare liceat, ut habetur Psal. 18. *Cæli*

enarrant gloriam Dei.... non sunt loquelæ, neque sermones, quorum (seu quibus) non audiantur voces eorum; hoc est, non sunt populi, quantumvis linguis & moribus differentes, qui ex cœlorum aspectu ad Creatoris notitiam non trahantur. Nulla gens est, inquit Tullius lib. 1. de legibus, neque tam immanfueta, neque tam fera, quæ, etiamsi ignoret qualem Deum habere deceat, habendum tamen esse nesciat.

Dices; Fides ex Apostolo Hebr. 11. est argumentum non apparentium: ergo vel existentia Dei non est lumine naturali evidens, vel de ea fides haberi non potest.

Distinguo consequens: non est evidens sine aliqua animi contentione & rationis discursu, Concedo: non est evidens serîo attendenti & discurrenti, Nego consequentiam. Igitur illud est discrimen inter ea, quæ intuitivè cognoscuntur, & ea quæ abstractivè tantum; quod priora ita mentem occupent, ut excludant omnè credendi, vel dubitandi seu opinandi motivum, sub quo obscura & incerta esse possent. Qui v. g. oculis cernit amicum præsentem: non videtur obtemperare posse illi dicenti, ut credat se esse præsentem; nec existimaretur amicus ab altero fidem serîo exigere de sua præsentia. Sic in intellectu Beatorum fides de existentia Dei cum ejus visione intuitiva conjungi nequit, multò minus opinio; quia nulla ratione, nullove motivo obscura, aut incerta esse potest. At evidentiam existentiae Dei non habemus in hac mortali vita, nisi abstractivè per discursum & quamdam animi contentionem, obtusum ingenium, passionem, impiorum colloquia, dæmonum fallaciæ aliquando obnubilant, quo minus Deus præsentissimus cer-

natur,

natur, coguntque doctos & indoctos ad fidem recurrere, & ex animo profiteri credere se in Deum omnipotentem, creatorem cœli & terræ.

Ex hac responsione sequitur hanc propositionem, *Deus existit*, non esse per se notam quoad nos; quia non cognoscitur à nobis ex sola terminorum apprehensione: sed innotescit nobis per existentiam creaturarum, juxta illud Rom. I. *invisibilia Dei per ea, quæ facta sunt, intellecta conspiciuntur.*

Q. 2. *Quomodo demonstratur Dei existentia?*

R. Demonstratur duobus potissimum argumentis.

Primum. Illud omne, quod mundus completitur, vel factum est, vel non. Hæc propositio non potest negari etiam ab iis, qui contra fidem Catholicam contendunt mundum esse ab æterno; quia in hypothese quod daretur linea infinita, licet omnes ejus partes non possent transcurri, de ea tamen objectivè sumpta potest dici, vel tota facta est, vel non, cum non detur medium inter factum esse & non esse factum: atqui non potest dici factum esse omne, quod completitur mundus; cum enim supponatur nihil omnino esse extra, totum illud factum esset à seipso, quod implicat; quia idem esset prius & posterius seipso, cum causa sit prior saltem natura suo effectu, & effectus posterior sua causa. Ergo dicendum est aliquid esse in illa collectione rerum omnium, quod non sit factum, & à quo cætera facta sint. Porro Ens non factum, sed à seipso existens, est Deus.

Secundum petitur ex orbis dispositione; quæ certò primam aliquam causam demonstrat. Cur

enim cœli in tanta quantitate existunt? cur sol major non est? cur situm supra Saturnum non habet? cur aqua tota non eminet super terram, cum hæc gravior sit? cur terra habet concavitates & imperfectum globum? cur fontes non in vallibus, ut natura aquæ expetit; sed in locis superioribus erumpunt, ut fluant in rivulos, & flumina efforment ad societatem humanam? quis putet necessariò hæc fieri, cum videantur contra naturam suam disposita? habent itaque aliunde quàm à se, quòd ita sint. Nec recurri potest ad fortuitum concursum atomorum, ut somniarunt Democritus & Epicurus. Cur enim hoc fortuito concursu atomorum non fiunt palatia? cur non Ilias, aut Poema existit, ut argumentatur Cicero lib. de natura Deorum? Itaque ad Deum recurramus necesse est.

His adjungi potest omnium gentium consensus, quæ aliunde esse non videtur, quàm vel à natura: quæ per se ad falsum non inclinat, vel à Deo, qui probat se existere.

CAPUT III.

De Essentia & Unitate Dei.

Deum existere certò novimus, sed quid sit definire non possumus; vincit scientiam nostram, Job 36. lucem inhabitat inaccessibilem, 1. Tim. 6. variè tamen à Theologis utcumque describitur.

Q. I. *Quænam est convenientior essentiæ divinæ descriptio?*

R. Con-

R. Convenientius ad Scripturam sacram videtur describi, Ens à se existens; Exodi enim 3. Deus interroganti Moyſi quis eſſet, reſpondit, EGO SUM QUI SUM. *Sic dices filiis Iſrael: QUI EST, miſit me ad vos;* quaſi dicat: Ego ſum ipſum eſſe, non derivatum, ſed generaliſſimum, illimitatum, & in omni genere entis infinitum, à quo & ex quo immenſo entis pelago & primo eſſendi principio omnia entia creata promanarunt, quemadmodum vocabulum *calor ipſe* vel *lux ipſa*, ſignificat quidquid in genere caloris aut lucis concipi poteſt, à quo cætera per participationem dicuntur calida vel lucida, adeo ut abſque ejusmodi participatione calida aut lucida nec eſſe nec concipi poſſint. Ex quibus ſic argumentari licet: Eſſentia, ſecundum omnes Philoſophos, dicitur quod primum rem in ſuo eſſe conſtituit, ac diſtinguit à cæteris, concipiturque tanquam prima radix, ex qua fluunt cæteræ ejus perfectiones; atqui aſeitas ſeu exiſtentia à ſe eſt quid primum in Deo illum conſtituens, & diſtinguens à creaturis, concipiturque veluti radix, ex qua fluunt divina attributa & perfectiones: Ergo:

Minor probatur quoad ſingulas ejus partes.

I. Eſt quid primum in Deo, nec ſine eo Deus poteſt concipi. Quid enim conciperetur in Deo ante exiſtentiam? poſſibilitas? at nihil poſſibile concipi poteſt in Deo, niſi concipiatur exiſtens; ſiquidem poſſibile eſt quod poteſt exiſtere, aut exiſtentiam accipere: atqui nemo poteſt accipere exiſtentiam, niſi à principio exiſtente; quod enim nondum exiſtit, non poteſt operari, nec dare ſibi aut alteri exiſtentiam. Ergo exiſtentia eſt quid primum in Deo, nec ſine ea Deus con-

concipi potest, ac proinde est ejus essentia, ita ut esse & existere sint in Deo formaliter unum & idem.

2. Aseitas est prima ratio, per quam Deus differt ab omnibus creaturis: tum quia creaturæ ideo non sunt Deus, quia dependentes sunt, & ab alio existunt: tum quia existentia est ipsis accidentalis & merè contingens, cum sine ea concipi possint: æquè enim concipimus Cæsarem mortuum, ac si existeret: Deus autem sine existentia nullatenus concipi potest, ut jam observavimus.

3. Existentia à se concipitur veluti radix omnium attributorum seu perfectionum divinarum; ideo enim Deus est unus, immutabilis, infinitus in omni genere perfectionis, ut ampliùs patebit ex dicendis.

Dices: Filius & Spiritus sanctus sunt Deus, & tamen non sunt ens à se; Filius enim procedit à Patre, & Spiritus Sanctus à Patre & Filio: Ergo.

R. 1. Negando antecedens; in sententia enim plurium Theologorum, tres Personæ sanctissimæ Trinitatis non sunt tria entia, sed unum ens simpliciter tribus modis subsistens.

R. 2. Distinguendo antecedens: Filius & Spiritus sanctus non sunt ens à se, si spectentur relativè, hoc est, secundum personalitates, quæ sunt relationes, ut suo loco dicetur; Concedo: si spectentur absolutè & secundum essentiam seu naturam divinam, quæ eadem est in tribus personis, Nego antecedens: natura enim divina in Filio & Spiritu sancto æquè ac in Patre est improducta & à se existens.

Q. 2. *Quot sunt Dii?*

R. De

R. De fide est Deum esse unum: sic enim docent Scripturæ Deut. 6. *Dominus Deus noster Dominus unus est.* 1. Cor. 8. *Nullus est Deus, nisi unus.*

Q. 3. *Quare Deus est unus?*

R. 1. Quia est ipsum esse: atqui ipsum esse necessariò concipitur unum, à quo cætera entia participant: sicut *ipse calor*, aut *ipsa lux* non potest concipi nisi ut quid unum, à quo cætera habent quòd sint calida aut lucida. 2. quia Deus est ens à se, ac proinde maximè necessarium, excludens omnem potentialitatem, & illimitatum, utpote non receptum aut participans: atqui non possunt esse plura entia à se; vel enim haberent easdem perfectiones; vel non haberent; si primum, non essent necessaria: si secundum, essent limitata & finita, ac proinde nullum ex iis esset Deus. Hinc Tertullianus lib. 1. contra Mar. cap. 3. *Deus, inquit, si non unus est, non est.* Nec dicas tres esse Personas divinas; quia tres personæ sunt quid unum in natura divina tribus modis subsistente,

CAPUT IV.

De Attributis Divinis.

Q. 1. *Quid sunt Attribute Divina?*

R. Sunt perfectiones, quas concipimus fluere ab essentia divina.

Q. 2. *Quomodo dividuntur attribute divina?*

R. Dividuntur in absoluta, quæ nullum dicunt ordinem ad aliquem terminum, ut immutabilitas, bonitas, &c. & in relativa, quæ ordinem dicunt ad aliquem terminum, ut paternitas, & filiatio, de quibus in tractatu de Trinitate.

Q. 3.

Q. 3. *Quotuplicis sunt generis attributa absoluta?*

R. Duplicis, scilicet modificativa, & adjuncta.

Modificativa sunt ea, quæ, licet à nobis non apprehendantur, ut essentia, concipiuntur tamen ut modi interni pertinentes ad constitutionem naturæ. Hujusmodi autem attributa sunt simplicitas, infinitas, immutabilitas, immensitas, æternitas, bonitas, sanctitas, ineffabilitas, invisibilitas, & incomprehensibilitas. Hi modi transcendunt omnes perfectiones divinas, possuntque de illis formaliter prædicari, v.g. immensitas Dei est æterna, æternitas est immensa, &c. quod de adjunctis dicit nequit; nam intellectus divinus non est formaliter voluntas, nec justitia formaliter misericordia aut sapientia.

Q. 4. *Quotuplicis generis sunt attributa modificativa?*

R. Duplicis: alia dicuntur negativa, quæ exprimuntur nominibus removensibus imperfectiones, quæ in creaturarum perfectionibus occurrunt, ut immutabilitas, infinitas, incomprehensibilitas. Alia dicuntur positiva, quæ perfectionem positivè exprimunt, ut bonitas, sapientia, &c.

Q. 5. *Quid sunt attributa adjuncta?*

R. Sunt ea, quæ concipiuntur veluti advenire naturæ divinæ jam in se constitutæ, quasi accidentia Logica, ut justitia, misericordia, &c.

Q. 6. *Quotuplicis generis sunt adjuncta?*

R. Triplicis: alia enim denotant veluti facultatem, ut intellectus, voluntas, omnipotentia: alia quasi habitum significant, ut scientia, justitia, misericordia; &c. alia denique quasi actionem exprimunt, ut intellectio, volitio, decreta divina, providentia, prædestinatio, reprobatio.

CAPUT

CAPUT V.

De attributis modificativis.

§. I.

De perfectione Dei.

Q. I. *Deus habetne omnes omnino perfectiones?*

R. Habet, sed diverso modo; quia ens est à se maximè necessarium & illimitatum, quemadmodum enim hoc interest calorem inter & calidum, lucem & lucidum, quòd lucidum & calidum sint entia, quæ de calore & luce participant cum limitatione aliqua & modificatione, juxta subjecti capacitatem; quidquid enim recipitur, ad modum recipientis recipitur; alio modo animal est calidum, alio modo ignis, & stella differt à stella in claritate: unde fieri possunt hæ quæstiones circa calida & lucida, nempe quomodo & quantum calidum sit illud corpus: at qui nominat calorem aut lucem, absque ulla limitatione exprimit quidquid his nominibus exprimi potest, nec à dicente est calor ipse, & lux ipsa, quærere licet quis & quantus sit calor, quæ & quanta lux. Ergo cum dicitur Deus *ipsum esse*, intelligitur quidquid nomine entis concipi potest, ac proinde omnimoda perfectio.

Dixi, *diverso modo*: quia duplicis generis sunt perfectiones: aliæ dicuntur simpliciter simplices, aliæ simplices & secundum quid.

Perfectio simpliciter simplex est ea, quæ non pugnat cum majori aut æquali, nullamque involvit imperfectionem, ideoque à sancto Anselmo dicitur melior ipsa, quàm non ipsa, id est, melius est

est eam habere formaliter, quàm non habere, talis est spiritus, sapientia, bonitas, &c. quia melius est esse formaliter spiritualement, sapientem, bonum, &c. quàm non esse.

Perfectio simplex & secundùm quid est ea, quæ pugnat cum alia majori, admixtamque habet imperfectionem, ut corpus, lapis, planta, &c. quæ non possunt esse spiritus: unde juxta eundem sanctum Anselmum ejusmodi perfectio non est melior ipsa, quàm non ipsa, hoc est, melius non est esse corpus, lapidem, animal, quàm esse spiritum.

Porro perfectiones simpliciter simplices sunt formaliter in Deo; melius enim est esse formaliter spiritum, sapientem, bonum, quàm non esse: simplices verò non sunt formaliter in Deo, propter imperfectionem, quam admixtam habent; meliusque est esse spiritum, quàm esse corpus, animal, &c. sed sunt in Deo tum virtualiter, quia sunt ejus effectus; tum eminenter, quia quidquid in his est perfectionis, est in Deo perfectiori & eminentiori modo.

Ergo Deus & creaturæ simul non sunt quid melius & perfectius quàm Deus solus; quia bonitas & perfectio, quæ creaturis inest, non addit quidquam bonitati, & perfectioni divinæ.

Ergo non est beator, qui plures creaturas possidet cum Deo, quàm qui Deum solum possidet; quia non fruitur majori bono.

Ergo charitatis perfectio in eo sita est, ut solus Deus diligatur propter se, & cætera in ipso aut propter ipsum; ac proinde in charitate perfectus non est, cui Deus non sufficit, quique feliciorem fore sese existimat, si alia extra Deum possideret.

§. II.

De Bonitate Dei.

Bonitas triplex, alia absoluta & transcendens, alia relativa, alia moralis.

Q. 1. *Deus estne bonus triplici illa bonitate?*

R. Affirmativè.

1. Deus est bonus bonitate absoluta & transcendentali; quia bonitas illa nihil aliud est quam entis perfectio, quæ cum sit Deo summa in omni genere perfectionis; sequitur Deum non solum esse bonum, sed etiam summum bonum: *ostendam omne bonum tibi*, ait Dominus Exod. 33. v. 19.

2. Deus est relative bonus, & convenientissimus omnibus creaturis; quia est causa efficiens & exemplaris rerum omnium; quælibet enim res tendit in suam perfectionem: perfectio autem ejus est assimilari suæ causæ; arca v. gr. erit perfecta, si sit similis ideæ, quæ est in mente artificis: ergo omnia, quantum possunt, Deo assimilari appetunt.

3. Deus est bonus bonitate morali; quia semper operatur propter debitum finem, & omnia ad summum bonum sapienter reducit; *universa propter semetipsum operatus est Dominus*, Prov. 16.

Q. 2. *Deus estne bonus bonitate accidentali?*

R. Minime; cum enim sit actus purissimus & simplicissimus, non est capax ullius accidentis. Est ergo bonus bonitate substantiali: bonitas sapientia, scientia, &c. sunt ejus substantia.

Q. 3. *Estne proprium Dei esse bonum per essentiam?*

R. Ita est; quia ille solus est bonus per essentiam, cui est essentialia existere: nihil quippe bonum est, nisi existat, res mere possibilis proprie

non est bona, sed bona esse potest, quatenus potest existere; unde si nunquam exitura sit, non est objectum divini amoris, ut communiter docent Theologi: atqui existentia, ex dictis, soli Deo est essentialis, utpote enti à se & summè necessario: ergo solus Deus est bonus per essentiam; quo sensu Christus dixit Lucæ 18. vers. 19. *Nemo bonus nisi solus Deus.* Creaturæ enim, cum esse à Deo accipiant, & existentia sit ipsis accidentalis, non sunt bonæ nisi per participationem.

Q. 4. *Omnia suntne bona bonitate divina?*

R. 1. Non possunt esse bona bonitate divina substantialiter & formaliter sumpta, quasi sint particulæ quædam substantiæ divinæ, ut somniarunt quidam Hæretici: *cætera bona*, inquit S. Augustinus, *non nisi ab illo sunt, sed non de illo.*

R. 2. Omnes creaturæ possunt dici bonæ bonitate divina. 1. efficienter; *Deus quia summe bonus*, inquit S. Fulgentius, *dedit omnibus naturis, ut bonæ essent*: 2. exemplariter, quia Deus est omnium rerum exemplar, cui illas assimilât, & quo ei similiores sunt, eo meliores.

§. III.

De Simplicitate Dei.

Q. 1. *Quid est simplicitas?*

R. Est negatio compositionis; illud enim vere est simplex, quod non componitur ex partibus.

Q. 2. *Quotuplex est compositio?*

R. Duplex; realis & rationis. Realis est adunatio partium realiter distinctarum, ut animæ rationalis & corporis, ex qua exurgit homo. Compositio

positio rationis est ex partibus ratione & per mentem dumtaxat distinctis, ut compositio ex genere & differentiâ; v. g. ex animali & rationali, quæ duo, quamvis réaliter sint unum & idem, mens tamen illa distinguit tanquam partes definitionis.

Q. 3. *Deus estne expers omnis compositionis?*

R. Est expers omnis compositionis realis, non vero rationis.

Prima pars est contra Paganos, Sadducæos, qui omnem spiritum negabant, Act. 23. quosdam Ægyptios Monachos, qui dicti sunt Antropomorphitæ, ex eo quod assererent Deum habere humanum corpus; & Gilbertum Porretanum Episcopum Pictaviensem, qui contendebat attributa divina saltem relativa réaliter distingui à natura divina; sed agente sancto Bernardo ejusmodi errorem revocavit in Concilio Rhemenſi, Præſide Eugenio III. Denique contra Abbatem Joachimum, *pium* virum, sed rudem in rebus Theologicis, qui scripsit tres personas esse unum Deum, quomodo Petrus, Paulus & Andreas dicuntur unus homo, quia natura humana in illis est una *pecifice*, sed contracta & divisa per differentias singulares; qui error damnatus est in Concilio Lateranenſi quarto, cap. *Firmiter*.

Probatur autem nostra responsio, quia ens à se est actus purissimus & maximè necessarius excludens omnem potentialitatem, quæ reperitur in qualibet compositione reali. Deus itaque non componitur sive ex materia & forma, sive ex partibus integrantibus, ut corpus humanum ex capite, humeris & brachiis, &c. sive ex subſecto & accidente, ut Angelus intelligens & volens ex

natura Angelica, intellectu & volitione, qui actus realiter distinguuntur ab ejus natura. Unde sanctus Bernardus lib. 5. de Consideratione c. 7. de Deo sic scribit: *purus est, simplex, integer, perfectus constans sibi, nihil de temporibus, nihil de locis, nihil de rebus trahens in se; unum quippe est, sed non unitum; non partibus constat, ut corpus, non affectibus distat, ut anima; non formis substat, ut omne quod factum est; ipse sibi forma, ipse sibi essentia est.* Quare Deus perfectius dicitur in abstracto, vita, bonitas, sanctitas, omnipotentia, intelligentia, amor seu volitio; quam in concreto vivens, bonus, sanctus, justus, intelligens, volens, seu amans, omnipotens: hæc enim nomina concreta idem sonant ac habens vitam, bonitatem, intelligentiam, amorem, &c. Natura autem Dei non est habens istas perfectiones, sed est simplicissimus, actus, qui realiter est omnis illa perfectio.

Ergo quando in scripturis tribuuntur Deo caput, oculis, manus, est metaphorica locutio. Utrum autem Tertullianus, & nonnulli ex Patribus lapsi sint in errorem Antropomorphitarum, consule tom. 1. cap. 6.

Ergo homo non est factus ad imaginem Dei secundum corpus, sed secundum spiritum.

Ergo Deus venire non potest in compositionem alterius, & esse pars alicujus totius; quia omnis pars propriè dicta, sive materialis, sive formalis, est perfectibilis, perficiturque per unionem cum altera parte, quod divinæ perfectioni & simplicitati repugnat.

Nec dicas Verbum in Incarnatione uniri hypostaticè naturæ humanæ, quia cum per ineffabilem illam unionem nullatenus perficiatur, sed
sola

sola creatura humana, non habet rationem partis propriè dictæ, ut docent Theologi, ubi de Incarnatione.

Dices : paternitas : filiatio & spiratio passiva sunt in Deo realiter distinctæ : ergo in Deo est compositio realis.

Distinguo antecedens; sunt realiter distinctæ, si ad seipsas conferantur, Concedo; si cum natura divina conferantur, Nego antecedens, sunt enim realiter ipsamet natura divina, ac proinde cum ea compositionem non sonant, sed unitatem.

Instabis : illa realiter distinguuntur, quibus à parte rei, & nemine cogitante, diversa conveniunt prædicata : atqui naturæ divinæ & ejus attributis diversa conveniunt prædicata à parte rei & nemine cogitante; verum enim est à parte rei, quod natura divina non producat, filiatio vero sit producta : Ergo.

R. I. Negari absolutè potest major; namque à parte rei & nemine cogitante voluntas Petri v. g. non intelligit, intellectus verò ejus intelligit, cum tamen in communiori Philosophorum sententia voluntas & intellectus in eodem homine realiter non distinguantur, sive à natura humana, sive inter se. Unde

R. Distinguendo majorem : illa realiter distinguuntur, quibus diversa conveniunt prædicata, si illorum entitas non sit virtualiter multiplex, Concedo : si sit virtualiter multiplex, Nego majorem; eadem enim natura Petri intelligit & non intelligit, vivit & non vivit : intelligit ratione intellectus, non intelligit ratione voluntatis : vivit ratione animalitatis, non vivit quatenus præcise est substantia aut corpus, alias lapis & omnes sub-

substantiæ corporeæ viverent. Sic eadem entitas divina producit & non producit: producit quatenus personalitas est, hoc est filiatio aut spiratio passiva: non producit quatenus præcise est natura.

Secunda pars, quæ est contra quosdam Arianos, qui dicti sunt Anomæi, duce Eunomio; probatur; quia ens à se licet sit actus purissimus & simplicissimus, habet tamen infinitas perfectiones, quas intellectus creatus, cum non possit eas ut unum sibi repræsentare, cum fundamento concipit ut multa.

Dices: omnimoda simplicitas est Deo tribuenda, utpote enti purissimo: ergo Deus est expers omnis compositionis, sive realis, sive metaphysicæ & rationis.

Distinguo antecedens, omnimoda simplicitas realis, Concedo: metaphysica, Nego antecedens; Quia distinctio metaphysica seu rationis formaliter est in mente, non verò in objecto, nisi fundamentaliter. Unde arguit solum imperfectionem intelligentis, qui non potest uno actu percipere tantam excellentiam, quam deprehendit in objecto; ac proinde distinctio rationis seu metaphysica commendat infinitam Dei perfectionem, nedum ei officit: quo enim objectum est præstantius, eo plures in eo perfectiones distinguimus, mens nostra plura distinguit in animali quam in lapide; quia animal est quid lapide perfectius.

Q. 4. *Simplicitas estne ita Dei propria, ut non possit alteri convenire?*

R. Si per simplicitatem intelligatur negatio compositionis realis vel ex materia & forma, vel
ex

ex partibus integrantibus, simplicitas non est Dei propria, cum Angelus nec componatur ex materia & forma, nec ex partibus integrantibus, ut qui sit incorporeus. At simplicitas sumpta pro negatione compositionis ex subiecto & accidente, v. g. ex intellectu & ejus actibus, ex essentia & existentia, est ita Dei propria, ut nulli creaturæ convenire possit; omnis quippe creatura est capax accidentium, puta gratiæ, habitus & actus; nulla est suus actus, sua cognitio, suus amor; nulla existit necessario, ita ut existentia sit ejus essentia.

§. IV.

De Immutabilitate.

Q. I. *Deus estne immutabilis?*

R. Affirmative. *Ego Dominus, & non mutor.* Malach. 3. & ratio est, quia duobus dumtaxat modis res aliqua potest mutari, nempe vel deperdendo ex iis quæ habet, vel acquirendo quod nondum habet: atqui Deus non potest quidquam perdere, cum sit ens maximè necessarium & simplicissimum; nec acquirere, cum sit infinitus in omni genere perfectionis: Ergo.

Dices: habetur Gen. 6. quod Deus *tactus cordis dolore intrinsecus*, dixit *pœnitet enim me fecisse eos.* Sap. 7. *Omnibus enim mobilibus mobilior est sapientia*: Ergo.

Distinguo antecedens: dixit Deus, *pœnitet me*, locutione metaphorica & figurata: Concedo: locutione propria, nego antecedens: Deum enim ita pœnitet, ut non doleat, nec concilium mutet; facit tamen quod dolentes & pœnitentes fa-

ciunt, nempe destruit opera sua, quando ipsi displicent. Sapientia dicitur mobilior, quia ipsa immota ubique operatur, & mutabilia immutat.

Q. 2. *Immutabilitas estne Dei propria?*

R. Affirmative, quia omnis creatura est mutabilis tum substantialiter, tum accidentaliter: substantialiter quidem, tum quia transit de non esse ad esse per creationem, tum quia potest saltem à Deo annihilari; quo sensu solus Deus dicitur habere immortalitatem; spiritus enim Angelicus aut rationalis, quamvis sit in æternum duraturus, potest tamen à Deo destrui, & eatenus dicitur mortalis; accidentaliter quoque, quia omnis creatura est capax accidentis, puta habitus & actus; solus enim Deus est suus actus, sua volitio, sua intellectio.

§. V.

De Sanctitate Dei.

Q. 1. *Quid est sanctitas?*

R. Est perfecta puritas ab omni immunditia spiritali?

Q. 2. *Sanctitas estne attributum divinum?*

R. Affirmative. 1. Reg. 2. *Non est sanctus ut est Dominus.* Exod. 15. *magnificus in sanctitate.* Et ratio est, quia Deus, utpote ens à se, est actus purus, simplicissimus, & immutabilis, ac proinde deficere nequit. Deus ergo sanctus est per essentiam, & hoc illi proprium: creatura vero per participationem, quatenus per charitatem puritati increaræ unitur; hocce puritatis fulgore percussi Spiritus cœlestes non cessant clamare, *Sanctus, Sanctus, Sanctus Dominus Deus exercituum.* Isa. 6.

§. VI.

§. VI.

De Infinitate Dei.

Q. *Deus estne infinitus?*

R. Infinitus est in essentia & in omni perfectionis genere, juxta illud Psalm. 144. *magnitudinis ejus non est finis.* Patet ex dictis, quia Deus est ens necessarium & illimitatum: ergo non potest inveniri finis, aut terminus illius virtutis & perfectionis.

§. VII.

De Immensitate Dei.

Q. I. *Quid est immensitas Dei?*

R. Est illimitata diffusio substantiæ divinæ, seu aptitudo coexistendi in infinitis locis.

Q. 2. *Deus estne ubique?*

R. Affirmativè. *Magnus est, & non habet finem, excelsus & immensus, Baruc. 3. Deus est extra omnia non exclusus, inquit sanctus Augustinus lib. 8. de Genesi ad litteram c. 26. intra omnia non inclusus, supra omnia non elatus, subter omnia non depressus, interior omni rei, quia in ipso sunt omnia: exterior omni rei, quia ipse est super omnia.* Ens enim à se est illimitatum & infinitum in omni genere perfectionis: Atqui magna esset imperfectio, si alicubi consistens, locum suum deferere cogeretur, ut alibi præsentem se sisteret. Figurata ergo est locutio, quando Deus in Scripturis legitur in cælo sedem habere, aliquando descendere, ut Gen. 18. v. 21. peccatores deferere, à Saulo recessisse; immotus enim accedit & recedit, quando

nova operatur in conversione peccatoris, & definit operari ob ejus malitiam, quemadmodum dicimus spiritum recessisse ab eo, qui deliquium patitur; & redire, cum sensus consueta officia repetunt: quamvis corpus informare non desierit.

Q. 3. *Quomodo Deus est ubique?*

R. Tripliciter, 1. per præsentiam, quatenus omnia videt; *omnia nuda & aperta sunt oculis ejus*, Hebr. 4. 2. per potentiam; *in ipso enim vivimus, movemur & sumus*, Act. 7. Insignis est ille locus, *in ipso vivimus*, non localiter, sicut aves in aere, aut pisces in aquis; sed efficienter, sicut anima efficit vitam corporis, *vita animæ Deus est*, inquit sanctus Augustinus serm. 161. *In ipso movemur*, non solum quia dat creaturis virtutem agendi; sed maxime quia immediatè cum illis concurrit ad quamlibet operationem. *In ipso sumus*, nimirum per conservationem. 3. Deus est ubique per substantiam; virtus enim & potentia Dei, quæ est ubique, est realiter una cum ejus substantia; *sicut potestas Dei est semper & ubique*, inquit sanctus Anselmus lib. de Incarnatione cap. 4. *ita quidquid est Deus, ubique & semper est.*

Q. 4. *Quomodo substantia Dei præsens est ubique?*

Advertes triplici modo rem posse esse alicubi per substantiam. 1. circumscriptivè, cum per diversas sui partes respondet totidem loci partibus, ita ut ulterius non extendatur. Et hic modus existendi in loco proprio est corporum. 2. definitivè, cum tota est in toto, & tota in qualibet loci parte, nec alibi reperitur, quod convenit solis spiritibus; anima rationalis v. g. tota est in toto corpore, & tota in qualibet ejus parte, nec ultra extenditur. 3. repletivè, quando non solum

lūm implet, sed etiam continet omnia loca, iisque tribuit virtutem locativam, nec illis includitur.

His præmissis,

Dico, Deus ubique est præsens, non circumscriptivè, cum non sit corpus; neque definitivè, quia nullo loco concluditur; sed repletivè, omnia loca non solum implens, sed etiam in se continens, ipse locorum locus, & cælis excelsior, & inferno profundior, ut dicitur Job 11. Ergo rectius dicitur mundus esse in Deo ratione ejus immensitatis, quam Deus in mundo, cum in illo non includatur. Similiter mundus alter possibilis non nisi in immensitate divina crearetur, ac proinde Deus novam non acquireret præsentiam; sed mundus ipse immensitati divinæ præsens esse inciperet, & ita intrinsece mutaretur, non verò Deus. Spatia autem extra hunc mundum, ex sancto Augustino lib. 11. de Civitat. c. 5. inanes sunt hominum cogitationes, quibus infinita imaginantur loca: cum locus nullus sit præter mundum, quemadmodum homines inaniter cogitant præterita tempora ante mundi creationem, cum nullum sit tempus ante mundum.

§. VIII.

De Æternitate Dei.

Q. I. *Quid est æternitas?*

R. Definitur à Boetio interminabilis vitæ tota simul & perfecta possessio.

Dicitur 1. *possessio*, id est duratio seu permanentia in suo esse, possidere enim dicitur, quasi po-

potens sedere; quia possessor alicujus ditionis potest in ea sedere, & permanere firmiter.

Dicitur 2. *vita*; quia possessio propria est viventium, & quidem vita intellectuali.

Dicitur 3. *interminabilis*, id est, quæ caret utroque termino, nempe principio & fine: sicque æternitas distinguitur à duratione creaturarum, quæ initium habent.

Dicitur 4. *tota simul*, quo distinguitur æternitas à tempore, quod est essentialiter successivum & divisibile in partes priores & posteriores; in æternitate enim nihil est præteritum quasi jam non sit; nihil futurum, quasi nondum sit.

Dicitur 5. *perfecta*, ut distinguatur ab ævo seu duratione Angelorum, quia, licet secundum substantiam non sint corruptibiles, mutationi tamen accidentali obnoxii sunt; novos quippe eliciunt actus, de novo identidem cogitant & volunt, at æternitas nullam admittit mutationem, sive substantialem, sive accidentalem.

Q. 2. *Deus estne æternus?*

R. Affirmativè 1. ad Tim. 6. *solus habet immortalitatem*. Et ratio est, quia ens à se est actus purissimus & immutabilis: atqui Deus mutaretur, nisi esset æternus; quia aut inciperet aut desineret esse; aut nova acciperet. Ergo æternitas est Dei propria, non secus ac immutabilitas.

Dices: Deus ab æterno est omnipotens: ergo potuit ab æterno creare.

Distinguo consequens: potuit ab æterno creare quod non repugnat: Concedo: quod repugnat, Nego consequentiam. Porro non minus repugnat creaturam esse æternam, quam montem sine valle, quem ab æterno Deus creare non potuit.

tuit. Omnis enim creatura mutabilis est, nec potest esse suus actus, sed novos successivè potest elicere & recipere: in æternitate autem nulla successio; si Angelus creatus esset ab æterno actu non intelligens, per totam æternitatem non posset intelligere: & contra si creatus esset cum actuali intelligentia, actus ille esset æternus & durationis infinitæ, quæ omnia sunt absurda.

Instabis: in illa duratione vera est successio, in qua datur prius & posterius: atqui in æternitate datur prius & posterius: de Deo enim æterno dicitur Apoc. I. *qui est, & qui erat, & qui venturus est*; nonne hodierna Dei duratio major est, quàm cum creavit mundum? Ergo.

Distinguo minorem: in æternitate datur prius & posterius intrinsece & connotativè ad diversas temporis partes, Concedo: intrinsecè & formaliter, Nego minorem. Itaque æternitas, quamvis sit duratio realiter indivisibilis, cum partes ejus non forent æternæ, nec ex partibus finitis exurgere possit duratio infinita; virtualiter & tamen eminenter continet partes temporis successivas, & relative ad illas de Deo dicitur quòd sit, fuerit, & erit. Unde si duratio ejus mensureretur per temporis successiones, dici potest major hodie, quàm in mundi principio, *cum secundum volumina temporum locutio humana varietur*, inquit sanctus Augustinus Tractatu 99. in Joannem; *qui per nulla deesse potuit, aut potest, aut poterit tempora, vera de illo dicuntur cujuslibet temporis verba.* Vide plura tomo 1. capite 13.

De invisibilitate & incomprehensibilitate Dei.

Quæstio hic moveri non potest de visione Dei abstractiva, quæ habetur per effectus & alienam speciem, cum ex dictis invisibilia Dei per ea quæ facta sunt intellecta conspiciantur, Rom. 1. sed de visione tum intuitiva, qua objectum cognoscitur ut in se est, & per propriam speciem, tum comprehensiva, qua objectum perspicitur non solum in se totum, sed etiam omni claritate & modo, quo cognoscibile est. Itaque

Q. 1. *Visio Dei intuitiva estne possibilis?*

R. 1. Naturaliter est impossibilis 1. ad Tim. 6. *lucem inhabitat inaccessibilem* (Deus) *quem nullus hominum vidit, sed* NEC VIDERE POTEST. Et ratio est, quia Deus est ens supernaturale, id est, supra rerum creatarum ordinem, unde sicut oculus corporeus non potest percipere spiritalia, utpote superioris ordinis; ita mens creata non potest naturaliter cognoscere quæ sunt divini & supernaturalis ordinis.

R. 2. Visio Dei intuitiva supernaturaliter est possibilis; promittitur enim iis, qui sunt mundo corde 1. Joan. 3. *videbimus eum sicuti est.* Quod autem ejusmodi visio sit possibilis, probatur, quia est proportio inchoata intellectus creati ad Deum intuitivè videndum; intellectus enim creatus est intellectivus, Deus vero est intelligibilis, ergo Deus continetur intra latitudinem objecti intellectus creati.

Ergo oculus corporeus ne quidem supernaturaliter potest Deum percipere; quia Deus non minus est extra latitudinem objecti visus corporei, quam

quam tactus, gustus & olfactus; Deus enim neque est color, neque sapor, neque odor, nec quidquam aliud sensibile.

Dices 1. Est distantia infinita Deum inter & intellectum creatum: ergo Deus ne quidem supernaturaliter videri potest ab intellectu creato, repugnat enim superari distantiam infinitam.

Distinguo antecedens: est distantia infinita entitatis, Concedo: habitudinis, Nego antecedens; est enim proportio inchoata intellectus creati ad Deum intuitive videndum: ergo quemadmodum voluntas per charitatem amare potest Deum ut est in se, & ei intimè uniri; quia voluntas essentialiter est omnis boni appetitiva: ita pariter mens creata omnis veri cognoscitiva, per lumen supernaturale potest Deum intuitive videre.

Instabis: non potest esse proportio inchoata habitudinis intellectus finiti ad objectum infinitum: Ergo nulla solutio.

Nego antecedens, ut patet vel ipso exemplo voluntatis, quæ habet proportionem inchoatam ad diligendum Deum ut in se est. Potest etiam distingui illud antecedens: non potest esse proportio inchoata ad objectum infinitum infinite & comprehensive cognoscendum, Concedo: unde voluntas non potest Deum infinite diligere: ad finite cognoscendum, Nego antecedens.

Dices 2. Antiqui Patres, ut sanctus Chrysostomus, Theodoretus, docent Deum non posse videri, nisi per condescensum quemdam: Ergo.

Distinguo antecedens: non posse videri vel naturaliter, vei supernaturaliter comprehensive, ut contendebant Anomæi, adversus quos scripserunt

pferunt illi Patres, Concedo : non posse supernaturaliter, modo tamen finito & per condescensum quendam, Nego antecedens. Consule Tomum I. cap. 14.

R. 3. Visio Dei comprehensiva est impossibilis etiam supernaturaliter ; quia Deus est infinite cognoscibilis : atqui intellectus creatus & finitus non potest elicere visionem infinitam : ergo intellectus creatus etiam Christi Domini non potest Deum comprehendere.

Dices : tum comprehenditur objectum, cum videtur totum.

Nego : nam voluntas per charitatem totum Deum, sicut in se est, diligit, neque tamen eum diligit, nec ulla virtute diligere potest, quantum est diligibilis. Similiter intellectus beatus, licet totum Deum videat, non potest tamen illum omni modo videre, quo visibilis est, quia infinite est visibilis, hoc est, clarius est & clarius infinitum ; sic discipulus, quamvis conclusiones, & principium, quo nituntur, plane intelligat, non tamen ea claritate & perfectione intelligit, qua Magister.

Q. 2. *Potestne intuitive videri natura divina absque ejus attributis ?*

R. Affirmant Scotistæ ; & opinio illa non videtur probabilis ; quia natura divina & ejus attributa sunt in se actus purus & simplicissimus. Ergo natura divina non potest videri, sicuti est, quin videantur omnia ejus attributa.

Dices potuit una persona incarnari sine alia ; Ergo & videri.

Nego consequentiam. Disparitas est, quod visio intuitiva terminetur ad objectum sicuti est :
atqui

atqui natura divina & ejus attributa sunt unum quid : ergo repugnat ea separatim videri sicut in se sunt. Contra vero in Incarnatione, licet & identice &, ut ita dicam, materialiter, totus Deus humanitati uniatur, juxta illud Christi Joan. 16. *Ego in Patre, & Pater in me est*; non unitur tamen omni modo, nec formaliter ut natura est, ut Pater est, vel ut Spiritus Sanctus, quemadmodum in æternitate Pater communicat naturam divinam Filio, non secundum omnem modum, quo se habet, id est ut formaliter subsistentem paternitate.

Q. 3. *Fueruntne qui in hac vita mortali Deum intuitive viderint?*

R. Nonnulli Theologi, ut S. Thomas, affirmant illud privilegium fuisse concessum Moyfi & sancto Paulo. Sed communior sententia negat Deum aliquando visum fuisse in hac vita mortali; probaturque Joan. 1. *Deum nemo vidit unquam* 1. Tim. 6. *quem nullus hominum vidit*. Hæ propositiones nullam admittunt exceptionem, cum sint universaliter negantes.

Dices 2. Cor. 12. S. Paulus raptus est in Paradisum usque ad tertium cælum. Moyfi promisit Deus se ei ostensurum omne bonum; locutusque est cum eo facie ad faciem, & non per figuras & ænigmata, Exod. 33. & n. 12. Ergo visio Dei intuitiva fuit illis concessa.

Nego consequentiam; quia textibus perspicuis & clavis non debent opponi obscuriores: 1. Enim non constat quid sit tertium cælum, ad quod raptus est Apostolus, & quid ibi audierit: 2. Deus expresse dixit Moyfi: *Non poteris videre faciem meam; non enim videbit me homo & vivet*. Ergo

D. Habert Theolog. Tom. VIII.

D

Moy-

Moyſes non vidit omne bonum in propria ſpecie, ſed in effigie humana, in qua Deus, ſeu potius Angelus gerens vices Dei, ut habetur Actuum 7. v. 37. & 38. ſolebat apparere Moyſi, & cum eo loqui, ſicut amicus ad amicum ore ad os, & facie ad faciem, non vero per ſomnia, per figuras & ænigmata obſcuriora, puta per ignem, nubem, &c.

Intabis. Videre Deum facie ad faciem, eſt videre intuitive, ut patet ex cap. 13. 1. Cor. ubi ſic ſcribit Apoſtolus v. 12. *videmus nunc per ſpeculum & in ænigmatè; tunc autem facie ad faciem*; atqui Moyſes vidit Deum facie ad faciem: ergo vidit Deum intuitive.

Distinguo majorem: videre facie ad faciem in propria natura, Concedo: videre facie ad faciem in natura aſſumpta, in qua Deus vel potius Angelus loquebatur Moyſi, Nego majorem. Quamquam faciem illam fulgentem, ſicut refulſit facies Chriſti in transfiguratione: non vidit Moyſes; ait enim Exodi 33. verſ. 20. & 23. *videbis poſteriora mea*, (nempe in corpore aſſumpto) *faciem autem meam videre non poteris*. Quod autem Apoſtolus laudato capite 13. per verba; *tunc autem facie ad faciem*, intelligendus ſit de viſione Dei in propria ſpecie, colligitur ex verbis ſequentibus, *tunc autem cognoscam ſicut & cognitus ſum*.

Q. 4. Sancti plene purgati fruunturne viſione Dei intuitive ante corporum reſurrectionem?

R. Affirmative; ita enim definitum eſt in Concilio generali Florentino ſeſſ. 25. an. 1432. Præiverat Concilium ſecundum Lugdunenſe etiam generale in formula fidei, anno 1274. probaturque
reſpon-

responsio ex Scriptura Luc. 23. v. 42. ubi Christus Latroni pœnitenti ait : *Amen dico tibi , hodie mecum eris in Paradiso.* 2. Cor. 5. *Cum sumus in corpore , peregrinamur à Domino audemus autem , & bonam voluntatem habemus magis peregrinari à corpore , & præsentes esse ad Dominum.*

Dices : hæc Concilii definitio contraria est Traditioni & Scripturæ sacræ. Traditioni quidem ; nam à primo Ecclesiæ sæculo communis fuit Ecclesiæ doctrina, Sanctos post resurrectionem cum Christo regnatos in terris per mille annos , priusquam ad conspectum Dei in cœlo reciperentur. Ita tradidit Papias Episcopus Hierapolitanus , & discipulus S. Joannis Evangelistæ , quem secuti sunt sanctus Justinus secundo sæculo ; sanctus Irenæus , & Tertullianus tertio sæculo , Lactantius , Severus Sulpitius quarto sæculo ; sanctus Augustinus quinto sæculo ; Sanctus Bernardus XII. sæculo , & Joannes XXII. decimo quarto sæculo : Scripturæ etiam adversatur ejusmodi definitio , nam Matth. 20. denarius omnibus simul operariis in fine diei distribuitur , quo significatur justis debita merces simul rependenda in consummatione sæculi Apoc. 6. v. 9. animabus Martyrum sub altari delitescensibus dictum est ut requiescerent , donec compleantur conservi & fratres eorum ; & cap. 20. fit mentio duplicis resurrectionis ; prima est justorum , qui regnabunt cum Christo mille annis : secunda impiorum , quæ consequetur illud temporis intervallum : Ergo.

Nego antecedens ; fuit enim omnium sæculorum traditio , animas , quibus nihil superest expiandum simul ac corpore solutæ sunt , in cœ-

lum admitti, ibique frui intuitiva Dei visione, ut fufe probavimus adversus Lutherum & Calvinum tomo I. cap. 14. §. 6. quamvis nonnulli ex veteribus contra senserint, quemadmodum semper creditum est in Ecclesia, ratum esse Baptismum collatum ab Hæreticis, licet sancti Cyprianus & Firmilianus, Tertullianus & plures Episcopi illum reprobaverint, veritate nondum eliquata, ut loquitur sanctus Augustinus.

Nec nocent allati Scripturæ textus.

Non primus, is enim est scopus Christi Domini in parabola denarii diurni, Judæos, qui primo vocati sunt, non plus accepturos, quam Gentiles Christianos, licet tempore posteriores, imo nec sanctos Patriarchas ante primitias Christianorum, puta Innocentes, Joannem Baptistam, Latronem pœnitentem, cœlum ingressuros, nec ante nos gloria consummata, quæ erit in resurrectione corporum donandos, juxta illud Apostoli Hebr. II. v. 39. *hi omnes testimonio fidei probati non receperunt mercedem ut non sine nobis consummarentur.*

Non secundus; quia altare, de quo sæpe fit mentio in Apocalypsi, in cœlo semper visum est, ergo & animæ Martyrum sub illo collocatæ, quæ laudem Deo concinunt cum Spiritibus cœlestibus; datæque sunt singulis stolæ albæ, scilicet incompleta felicitas, donec perfecto salvandorum numero, in resurrectione completam accipiant. Dicuntur autem sub altari tanquam sub Principe Christo, qui est supra velut Agnus occisus, cujus virtute & merito Martyres seiplos in sacrificium Deo obtulerunt.

Non

Non tertius; eo enim loco regnum mille annorum est totum temporis spatium, quod à morte Christi (quando ligatus est satanas) protenditur usque ad adventum Antichristi, quo rursus solvetur satanas citato capite 20. Apoc. & resurrectione prima, de qua ibidem fit mentio, est animarum justificatio, in qua transeunt à morte ad vitam, ut dicitur Joan. 5. v. 24. *Cum consummati fuerint mille anni*, inquit sanctus Joannes v. 7. *solvetur satanas de carcere suo, & exibit, & seducet gentes*, v. autem 9. prosternitur, mittiturque in stagnum ignis. Tum sequitur mortuorum resurrectio v. 13. *mors & infernus dederunt mortuos suos.... & judicatum est de singulis secundum opera ipsorum*. Ergo locus iste destruit, nedum astruat errorem Millenariorum, in quem S. Augustinus primò impegerat; sed illum revocavit lib. 1. Retract. cap. 14. & lib. 20. de Civit. cap. 7. Sanctus Bernardus obscuriùs locutus est; sed intelligi potest de beatitudine consummata, quæ non habetur nisi post resurrectionem corporum. Joannes XXII. inclinavit revera in errorem Millenariorum; sed in pleno Consistorio confessus est, teste Benedicto XII. ejus successore, omnia à se fuisse prolata ad veritatem dumtaxat indagandam, nec quidquam se definisse, quin morti proximus sinceræ fidei suæ testimonia reliquit anno 1434. Sed cùm isthæc longa dissertatione indigeant, vide tom. 1. cap. 14. §. 6. ubi fusiùs & clariùs sunt exposita, ac probata.

Satisfit nonnullis quæstionibus circa visionem beatificam.

Q. I. *Quæ requiruntur, ut mens creata elevetur ad Deum intuitivè videndum?*

R. Requiritur 1. lumen gloriæ, quod est habitus supernaturalis, quo mens creata ultimò disponitur ad eliciendam visionem Dei intuitivam, quemadmodum per supernaturalem fidei habitum elevatur ad credendum iis, quæ Deus dixit: sed sicut Hæreticus ad Catholicam Religionem rediens, necdum justificatus, per supernaturale Dei auxilium absque fidei habitu, elicit actus fidei; ita Beati Deum absolutè videre possunt solo actuali lumine gloriæ illustrati & corroborati.

Requiritur 2. ut Deus intellectui lumine gloriæ instructo conjungatur in ratione objecti; namque ex sancto Augustino cognitio gignitur à cognoscente & objecto cognito. Hinc est quòd homo viator Deum, quamvis ubique præsentissimum, intuitivè non videat; quia in ratione objecti non conjungitur ejus intellectui, quemadmodum nec oculus percipit in tenebris objecta, quæ circumstant; quia sine lumine ab iis non afficitur, nec movetur.

Q. 2. *Deus imprimitne sui speciem in intellectu Beato, sicut per species seu ideas vel innatas, vel acquisite percipimus alia objecta?*

R. Minimè; quemadmodum enim oculus sine specie impressa percipit lumen utpote sibi præsentissimum; sic & intellectus beatus Deum, qui illi intimè præsens est, nulla interveniente specie intue-

intuetur. Possset tamen absolutè dari ejusmodi species, cujus virtute intellectus beatus Deo in ratione objecti conjungeretur.

Q. 3. *Visio Dei intuitiva fitne per aliquam similitudinem, quæ solet dici verbum mentis, seu species expressa?*

R. Communior est sententia fieri; quia sicut calefactio nec esse, nec intelligi potest sine calore, ad quem terminatur, illuminatio sine lumine; sic nec intellectio sine suo termino, quod est verbum mentis seu species expressa: *quemadmodum enim, inquit sanctus Augustinus lib. 9. de Trinitate cap. 11. cum per sensum corporis videmus corpora, fit eorum aliqua similitudo in animo nostro... ita cum Deum novimus... fit aliqua Dei similitudo illa notitia.*

Dices: nihil creatum potest repræsentare objectum infinitum: ergo nulla species sive impressa, sive expressa, Deum, sicuti est, repræsentare potest.

Distinguo antecedens: nihil creatum repræsentare potest objectum infinitum, tamquam medium, in quo Deus intuitivè videatur, quemadmodum Pater videtur in filio, Concedo: tamquam medium, quo Deus videatur, quemadmodum per ideas, quæ in mente sunt accidentia, repræsentantur substantiæ accidentibus nobiliores, Nego antecedens: si enim intellectus creatus lumine gloriæ adjutus virtutem habet eliciendi visionem Dei intuitivam, quidni & specie, sive impressa, sive expressa instructus?

Q. 4. *Beati videntne Deum æqualiter?*

Afferuit Jovinianus quarto seculo, cujus errorem jampridem postratum restituerunt Pseudo-reformati seculo decimo-sexto, adversus quos.

R. De fide est, inæqualem esse visionem beatificam; ita enim definiit Consilium Tridentinum sess. 6. can. 32. probatutque ex Scriptura Joan. 14. *in domo Patris mansiones multæ sunt.* 1. Cor. 15. *stella enim à stella differt in claritate: sic & resurrectio mortuorum.*

Dices: Matth. 20. idem denarius omnibus operariis redditur, licèt alii plus, alii minùs laboraverint: ergo omnes æquali donantur beatitudine.

Distinguo consequens: æquali beatitudine objectiva, Concedo; nam Deus erit omnibus una merces per unum denarium figurata; æquali beatitudine formali, Nego consequentiam: diversimodè enim Beati idem objectum possidebunt.

Q. 5. *Quenam est causa hujus inæqualitatis?*

R. Causa moralis est inæqualitas meritorum, nam *qui parcè seminat, parcè & metet,* 1. Cor. 9. Causa Physica est lumen gloriæ, quod inæquale datur pro diversitate meritorum. Ergo Angelus supremus Deum clariùs non videret cum æquali lumine gloriæ, licèt in eo vis intelligendi sit longè perfectior; quia non videt per potentiam naturalem, sed per obedientialem, quæ æqualis est sive in Angelo, sive in homine, utpote quæ non agat, nisi quatenus elevatur. Unde cùm perfectiori modo elevetur Beatæ Virginis intellectus, Deum clariùs attingit, quàm intellectus Angelicus; sic homo acutioris ingenii cum æquali lumine fidei perfectiùs non credit, quàm idiota.

Q. 6. *Quenam videntur à Beatis in essentia divina?*

R. 1. Necessariò videntur omnia, quæ sunt in Deo formaliter, nempe tres personæ, & omnia attri-

attributa, ut supra diximus. 2. Beati non vident necessariò creaturas secundùm suum esse formale; quia ut sic, sunt aliquid prorsus à Deo distinctum. Vident tamen ex rebus creatis illas, quæ pertinent ad eorum vel perfectionem, vel statum.

Hinc vident primò ea gratiæ mysteria, quæ in via per fidem crediderunt; fidei enim succedit visio, tamquam merces operi. *Quid videbimus*, inquit sanctus Augustinus lib. 20. de Civit. cap. 21. *nisi Deum & omnia illa, quæ nunc non videmus credentes?* Secundò vident omnes rerum species & genera, quæ scientiarum naturalium sunt objecta; hæc enim notitia pertinet ad eorum perfectionem. Tertiò ex contingentibus ea cognoscunt, quæ illos specialiter spectant: v. g. orationes, quæ ad illos diriguntur; nam ex Concilio Senonensi, *pervium est Divinitatis speculum, in quo quidquid eorum interfit, illucescat.*

Ergo fieri potest ut Beatus meritis & gloria inferior plura cognoscat, quàm superior; quia illius specialis conditio hanc notitiæ extensionem exigit: v. g. plures illum invocant. Sed propterea non erit beatiòr, ut monet sanctus Augustinus lib. 5. Confess. cap. 4. ubi Deum sic alloquitur: *Beatus est qui te novit, etsi alia nesciat; qui autem te & alia novit, non propterea beatiòr, sed propter te solum.*

Q. 7. *Quid est videre in verbo?*

R. Hic loquendi modus dupliciter intelligi potest. Ita ut idem sit, ac per visionem beatificam videre in essentia divina, quæ est idea rerum omnium: & hæc acceptio est communior apud Theologos. 2. Significat aliquando videre per

revelationes speciales, quæ appropriantur verbo: dubium enim non est, quin Beati identidem nova cognoscant, quod fieri nequit per visionem beatificam, quæ immutabilis est, cum detur ut merces propter merita, quæ post mortem nec augentur, nec minuuntur: Ergo per novas revelationes. Prior cognitio vocatur matutina; posterior verò, utpote imperfectior, vespertina; res enim perfectiori modo cognoscuntur in Deo per visionem beatificam, quàm in seipsis per speciales revelationes.

Q. 8. *Beati possuntne videre omnes omnino creaturas possibiles?*

R. Non possunt; alioquin comprehenderent omnipotentiam divinam; neque enim aliter Deus intelligitur comprehendere suam omnipotentiam, quàm videndo quidquid illa possit, quemadmodum ille censetur cognoscere aliquod principium, quantum cognoscibile est, qui in illo videt omnes conclusiones, quæ inde deduci possunt.

Dices: qui potest majus, potest & minus: atqui minus est videre omnes creaturas possibiles, quàm Deum videre: Ergo.

Nego minorem; videre enim omnes creaturas possibiles, est non solum videre, sed etiam comprehendere omnipotentiam divinam.

Instabis: omnes creaturæ possibiles sunt quid Deo minus: Ergo.

Nego antecedens: possibilitas enim rerum est vel ipsamet Dei omnipotentia, vel saltem illam includit.

CAPUT VI.

De Attributis divinis, quæ per modum facultatis exprimuntur.

Atributa illa sunt intellectus, voluntas, & omnipotentia.

§. I.

De intellectu Divino.

Monuimus supra in Deo nullam esse potentiam propriè dictam, cum ipse sit actus purissimus, ac proinde essentiam divinam, intellectum, scientiam & cognitionem actualem esse planè unum & idem.

Ergo sicut essentia divina est simplicissima, immutabilis, & infinita; ita & ejus scientia: *Sicut omnino tu es*, inquit sanctus Augustinus lib. 13. Confess. cap. 16. *tu scis solus, qui es incommutabiliter, & scis incommutabiliter, & vis incommutabiliter.* Esther 14. *habes omnium scientiam.* Psal. 146. *Sapientiæ ejus non est numerus.* Ac imprimis novit seipsum & comprehendit tamquam primarium objectum, ac præstantissimum intelligibile, deinde cætera omnia, possibilia, existentia, futura, *discretor cogitationum & intentionum cordis, & non est ulla creatura invisibilis in conspectu ejus,* Hebr. 4.

Dices: Deus aliquando cum dubitatione loquitur: *si fortè audiant*, ait Jerem. 26. *forfitan Patrem meum sciretis.* Joan. 8. Ergo.

Respondet Sanctus Hieronymus ad primum locum; *verbum ambiguum, forfitan, majestati divinæ non potest convenire; sed nostro loquitur affectu, ut liberum homini servetur arbitrium.* Et sanctus Augustinus

nus ad secundum locum Tract. 37. in Joan. sic habet: *ille qui omnia scit, quando dicit, forsitan, non dubitat, sed increpat: dubitationis verbum est; quando dicitur ab homine ideo dubitante, quia nesciente: cum verò dicitur à Deo verbum dubitationis, cum Deum nihil utique lateat, illa dubitatione arguitur infidelitas, non opinatur Divinitas.*

Q. 1. *Quomodo dividitur scientia divina secundum nostrum concipiendi modum?*

R. Dividitur 1. in scientiam speculativam & practicam. Speculativa est objecti non operabilis, ut scientia, qua Deus seipsum cognoscit, & res merè possibiles. Hæc scientia est necessaria, utpote independens à divinis decretis. Scientia practica est cognitio objecti operabilis, ut mundi condendi, dependens à decretis divinis, ac proinde libera, & est causa rerum, quemadmodum ars in mente artificis, est causa artefactorum.

2. Dividitur in scientiam simplicis intelligentiæ, & scientiam visionis. Celeberrima est in scholis Isthæc divisio.

Scientia simplicis intelligentiæ est cognitio rerum merè possibilium, quæ nec extitere, nec extituræ sunt.

Scientia visionis est cognitio rerum existentium in aliqua temporis differentia, sive actu existant, sive extiterint, sive extituræ sint.

Q. 2. *Estne adæquata ejusmodi divisio?*

R. Affirmativè, quia quidquid Deus cognoscit, vel existit in aliqua temporis differentia, vel non existit: medium quippe non datur inter existere & non existere, cum sint contradictoria: atqui primum pertinet ad scientiam visionis, secundum verò ad scientiam simplicis intelligentiæ: Ergo.

Dices:

Dices: Totuplex scientia in Deo est distinguenda, quotuplici modo res possibiles distinguuntur: atqui res possibiles distinguuntur in eas, quæ sub nulla conditione futuræ sunt, & eas, quæ sub conditione numquam tamen ponenda, futuræ essent: Ergo.

Minor probatur. David 1. Regum cap. 23. accepto nuntio, quod Saul cum exercitu ad urbem Ceilam, in qua tum commorabatur David, accederet, dubius erat num tradendus esset à Ceilitis, si apud eos remaneret, proptereaque consuluit Dominum. Quam verò responsionem ex divino oraculo expectabat? quod illud esset possibile? minimè, id enim ipsi constabat: sed quærebat quod non erat sibi compertum, num scilicet re vera tradendus esset, in hypothese quod ex urbe non fugeret. Respondit Deus: *Tradent*; propterea David fugit, & ideo non est traditus: Ergo traditio Davidis non fuit objectum scientiæ visionis, utpote quæ numquam extiterit: neque fuit objectum simplicis intelligentiæ; quia non erat merè possibilis, nec Deus simpliciter respondit esse possibilem, sed futuram sub conditione, nempe si David remaneret in urbe: ergo præter scientiam possibilium & existentium, media est admittenda, quæ sit conditionatè futurorum.

Distinguo minorem: duplici modo cognosci potest, sed duplici scientia, nimirum simplicis intelligentiæ & visionis, propter duplex objectum, quod concurrat in futuris conditionatis, Concedo: duplici modo, qui constituat scientiam mediam distinctam à scientia simplicis intelligentiæ; & à scientia visionis, Nego minorem.

In

In futuro itaque conditionato, v. gr. in proditione Davidis, si remansisset in urbe Ceila, duo spectari debent. Primum est ipsamet conditio numquam futura, ac proinde merè possibilis, quæ ut sic, est objectum scientiæ simplicis intelligentiæ. Secundum est infirmitas humana, quæ in habitatoribus Ceilæ infallibiliter cessisset Sauli militanti urbis obsidionem & subversionem, nisi Deus efficaci suo auxilio eos roborare decrevisset: non decreverat autem, cum statuisset Davidem fuga salvare. Atqui infirmitas Ceilitarum & divinum decretum erant quid existens, ac proinde objectum scientiæ visionis. Sic possibile erat Tyrios & Sydonios converti si vidissent miracula, quæ facta sunt in urbe Betsaida & Corozain, & eo sensu eorum conversio erat objectum scientiæ simplicis intelligentiæ; sed voluntas eorum non tam indurata, sicut voluntas civium Betsaidæ & Corozain; vis quoque & efficacia gratiæ iisdem civibus concessæ erant existentes, ac proinde objectum scientiæ visionis, & ex iis potuit Christus certò dicere Tyrios & Sydonios fore convertendos, si similes apud eos factæ fuissent virtutes.

Q. I. Quodnam est medium scientiæ divinæ?

Medium scientiæ dicitur causa cognitionis: sic creaturæ sunt medium, quo naturaliter cognoscimus Deum existere, & prima cognitionis principia sunt media, per quæ devenimus in notitiam conclusionis. His præmissis,

R. I. Deus seipsum videt sine medio; quia Deus est ipsamet lux, ipsa veritas, per quam cætera ipsi sunt pervia: Ergo si prima cognitionis principia cognoscimus sine medio, sed per ea devenimus in cæterorum cognitionem; à fortiori

Deus

Deus seipsum primam veritatem sine medio cognoscit. Secundum tamen nostrum concipiendi modum, quo distinguimus attributa divina ab essentia, Deus cognoscit sua attributa in propria essentia, à qua veluti fluere intelligimus ejus proprietates.

R. 2. Deus alia à se cognoscit in seipso, probatque sanctus Thomas lib. 1. contra Gentes cap. 4. hac ratione; quia cognitio sumit suam speciem & perfectionem ab objecto; unde Metaphysica est præstantior Physica, quia versatur circa objectum præstantius, utpote ab omni materia abstractum, puta circa Angelum, Deum ipsum, cum Physica tota sit circa corpus naturale; atqui repugnat scientiam Dei speciem & perfectionem accipere à creaturis, cum ejus scientia & cognitio sit ipsius essentia: Sic igitur, inquit Angelus Doctor, *impossibile est quod intellectum à Deo primo & per se sit aliud ab ipso.*

Porro Deus videt res possibiles primò in essentia, quæ est ipsum esse à creaturis participabile, sicut cognoscuntur omnia calida in calore ipso, cujus sunt participationes. Secundò in omnipotentia, utpote earum productiva. Tertiò in suis ideis, tanquam in sua arte, ut loquitur sanctus Augustinus. Idea enim est exemplar, seu interna similitudo in mente agentis, ad cujus inspectionem opus suum dirigit ac perficit. Ideæ autem divinæ nihil aliud sunt, quàm essentia divina, quatenus ad ejus similitudinem producuntur creaturæ. Ergo realiter in Deo est una idea sicut & cognitio; sed secundum nostrum concipiendi modum multiplex, quatenus essentia divina

divina non uno modo, sed infinitis est imitabilis & participabilis.

Res vero existentes in aliqua temporis differentia videt Deus in suis decretis; quia res futuræ sunt eo modo, quo Deus decrevit res futuras; futuræ, inquam, libere aut necessario, si voluit Deus eas venire liberè, aut necessario; *cum voluntas divina sit efficacissima*, inquit sanctus Thomas I. p. q. 19. art. 8. *non solum sequitur, quod fiant ea quæ Deus vult fieri, sed & quod eodem modo fiant, quo Deus ea fieri vult. Vult autem Deus quædam fieri necessario*, (ut motus creaturarum irrationalium & insensatarum) *quædam contingenter*, id est, libere, ut actiones humanas.

Dices: Illud non potest esse medium certo cognoscendi actus libere futuros, quod non habet cum illis necessariam connexionem: atqui decreta Dei quantumcumque efficacia, non habent necessariam connexionem cum actibus libere futuris; actus enim libere futurus potest non esse futurus, cum in eo libertas arbitrii essentialiter consistat, ut actus possit non poni. Ergo.

Distinguo minorem: non habet connexionem necessariam absolutè, Concedo: hypothetice, Nego minorem. Necesse enim est ut actus fiat eo modo, quo Deus efficaciter fieri voluit: Ergo cum Deus efficaciter voluerit ejusmodi actus fieri libere, necessarium est, ex sancto Thoma, mox laudato, ut actus fiat libere, hoc est, ita ponatur, ut possit absolute non poni.

Instabis. Deus in suis decretis saltem non videt actus malos liberè futuros, cum illos efficaciter non decernat, sed solummodo permittat: Ergo.

Distin-

Distinguo antecedens : non videt in suis decretis positivis, quasi decreverit ad eos præmovere, Concedo : in permissivis, Nego antecedens. Deus itaque non decrevit excitare & agere voluntates ad peccandum, ut blasphemarunt Lutherus & Calvinus ; sed decrevit se illa permiffurum propter rationes exponendas ubi de Providentia. In illo autem decreto permissivo includitur decretum concurrendi ad materiale peccati, ad quod se determinatura est voluntas mala. Porro in illo concurrendi decreto videt Deus futurum peccatum.

At inquires, quomodo Deus ab æterno vidit voluntatem malam se determinaturam ad malum?

R. Eo modo vidit, quo videt in tempore cum actu præbet concursum simultaneum, vel secundum Thomistas, physicè præmoventem; scientia enim Dei utpote immutabilis, rerum ortu aut interitu non crescit nec decrescit.

§. II.

De voluntate Dei.

Q. I. *Estne in Deo voluntas?*

R. Affirmative. *Omnia quæcunque voluit, fecit*, Ps. 113. *Non mea voluntas, sed tua fiat*, Luc. 22. Et ratio est, quia voluntas nihil est aliud, quam naturalis inclinatio, quæ in sensitivis dicitur appetitus, & intellectualibus voluntas. Porro sicut in Deo esse & intelligere unum sunt, ita esse & velle. Ergo in Deo una est realiter voluntas & volitio, seu amor, quemadmodum est una natura, multiplex verò secundum nostrum concipiendi modum.

D. Habert. Theolog. Tom. VIII.

E

Q. 2.

Q. 2. *Quomodo voluntas Dei dividitur nostro concipiendi modo?*

R. Dividitur generatim in voluntatem signi, & voluntatem beneplaciti?

Q. 3. *Quid est voluntas signi?*

R. Est signum externum divinæ voluntatis, sic mandata Dei dicuntur voluntas Dei, quia iis significatur Deum velle fieri, quod lege sua sanxit.

Q. 4. *Quid est voluntas beneplaciti?*

R. Est ipsemet actus internus & immanens divinæ voluntatis.

Q. 5. *Quotuplex est voluntas signi?*

R. Quintuplex, scilicet præceptum, prohibitio, concilium permissio, & operatio; Deus enim vult nos facere bonum quod præcipit, aut consulit, abstinere à malo, quod prohibet, pati persecutiones, quas permittit, & omnia adversa, quæ immittit.

Q. 6. *Quotuplex est voluntas beneplaciti?*

R. Duplex; antecedens & consequens.

Voluntas antecedens est ea, qua Deus aliquid vult fieri secundum se spectatum, & non consideratum cum omnibus circumstantiis particularibus.

Voluntas consequens est ea, qua Deus aliquid vult simpliciter & absolute spectatis omnibus circumstantiis.

Q. 7. *Voluntas Dei impleturne semper?*

R. Consequens & absoluta semper impletur; nam, Rom. 9. *voluntati ejus quis resistit?* Sed antecedens non impletur semper, ut patet ex cap. 23. Matth. *Quoties volui congregare filios tuos, quemadmodum gallina congregat pullos suos sub alas, & nolui?* Nec propterea dici potest eam vinci ab hominibus; quia sic vult eos salvare obediētes,
ut

ut velit etiam damnare inobedientes : alterutrum autem semper impletur. Infideles quidem contra voluntatem Dei faciunt, cum ejus Evangelio non credunt, nec ideo tamen eam vident, verum se ipsos fraudant magno & summo bono, malisque pœnalibus implicant, experturi in suppliciiis potestatem ejus, cujus in donis misericordiam contempserunt. Ita voluntas Dei semper invicta est; vinceretur autem, si non inveniret quid de contemptoribus faceret.

Q. 8. *Voluntas salvandi omnes homines estne signi aut beneplaciti?*

R. Estius, Sylvius, & nonnulli veteres Thomistæ contendunt esse signi dumtaxat; sed communis est Theologorum sententia post sanctum Thomam, esse voluntatem beneplaciti, non quidem consequentem, quia non omnes salvantur: sed antecedentem; ex qua Deus omnibus & singulis filiis Adæ, & peccato originali infectis præparat aut confert gratias vere sufficientes quibus salutis suæ consulere possint, ut fuse probamus Tom. 2. cap. 7.

Q. 9. *Voluntas Dei estne causa rerum?*

R. Est causa imperans, scientia causa dirigens, & omnipotentia causa exequens; quod explicatur exemplo artificis, cujus voluntas imperat domus ædificationem, quam ars dirigit, & manus seu potentia motrix exequitur.

Q. 10. *Estne etiam causa malorum?*

R. Causat mala pœnæ: quia sunt justa & moraliter bona: *Ego Dominus*, inquit Isa. 45. *faciens pacem & creans malum.* Non causat mala culpæ, juxta illud Ps. 5. *non Deus volens iniquitatem tu es.* Et rationem affert Sanct. Anselmus lib. de lib.

arbit. cap. 8. quia iusta voluntas hominis ea est, qua vult id quod Deus vult eam velle, ac proinde iniustitia non esset iniustitia, si fieret secundum Dei voluntatem.

Dices : Deus dicitur indurare corda : Ergo.

Distinguo antecedens, indurare negative, subtrahendo gratiam, Concedo : positive infundendo malitiam, Nego antecedens.

Q. II. *Estne aliqua causa voluntatis divinæ?*

R. Est causa volitorum; nam Deus unum facit propter aliud : nulla est causa ipsiusmet volitionis; quia ex dictis divina volitio est ipsamet divina essentia. Unde Sanct. Augustinus lib. de Genesi contra Manichæos cap. 2. *si habet causam voluntas Dei*, inquit, *est aliquid quod antecedit voluntatem Dei, quod nefas est credere Qui autem dicit, quare voluit facere cælum & terram, majus aliquid quærit, quam est voluntas Dei : nihil autem majus inveniri potest. Compescat ergo se humana temeritas, & id quod non est, non quærat, ne id quod est non inveniat.*

§. III.

De objecto & proprietatibus voluntatis divinæ.

Certum est bonum esse objectum voluntatis, sicut verum intellectus.

Objectum autem voluntatis duplex est, nempe materiale & formale. Objectum materiale voluntatis est res amata; formale verò est motivum, seu ratio propter quam res illa amatur.

Sic pharmacum v. g. est objectum materiale ægroti, sanitas vero formale, quia sanitas est
moti.

motivum , seu ratio propter quam pharmacum appetitur.

Q. 1. *Quodnam est objectum materiale voluntatis divinæ?*

R. Primarium est Deus ipse , quia est summum bonum : secundarium verò omnes creaturæ existentes in aliqua temporis differentia , juxta illud Sapientiæ 11. *Diligis omnia quæ sunt, & nihil odisti eorum , quæ fecisti.* Enimvero Deus diligit omne bonum ; imperfectæ enim & deficientis voluntatis est non amare quod est bonum & amabile : atqui omnes creaturæ sunt bonæ , Gen. 1. *viditque Deus cuncta quæ fecerat , & erant valde bona.* Deinde amare est bene velle , & benefacere : atqui Deus omnibus existentibus bene vult & bene facit , cum illis tribuat esse.

Ergo Deus non amat res merè possibiles ; quia illis nec bene vult , nec bene facit.

Q. 2. *Quodnam est formale objectum divinæ voluntatis?*

R. Est sola bonitas divina , propter eam seipsum diligit & cætera , juxta illud Proverb. 16. *universa propter semetipsum operatus est Dominus.* Unde , inquit sanctus Thomas q. 19. art. 2. ad 2. *cum Deus alia à se non velit nisi propter finem , qui est sua bonitas , non sequitur , quod aliquid aliud moveat voluntatem ejus , nisi bonitas sua.* Et q. 20. art. 2. *amor noster , quod aliquid bonum volumus , non est causa bonitatis ipsius , sed illam supponit : amor vero Dei est infundens & creans bonitatem in rebus.* Et Sanct. Bernardus lib. de amore divino cap. 4. sic Deum alloquitur : *Non afficeris à nobis , vel ad nos , cum nos amas : nos à te , & in te , & ad te afficimur , cum amamus te.*

Q. 3. *Deus amatne creaturas amore amicitiae?*

E 3

R. Ita ;

R. Ita ; amat rationales ; ait enim Joan. 15. *jam non dicam vos servos , sed amicos* : irrationales vero non ita amat , quia non vult illis bonum propter ipsas , sed in commodum & utilitatem rationalium.

Dices : Amat creaturas rationales , propter semetipsum : ergo illas non amat amore amicitiae , sed concupiscentiae.

Nego consequentiam ; quia Deus non in utilitatem suam diligit nos propter semetipsum , sed nos ad seipsum refert , tanquam ad summum nostrum bonum , & in hoc ipso nobis bene vult amore gratuito. Imo nos non diligeret amore verae amicitiae , si aliter nos amaret.

Q. 4. *Amor Dei estne erga omnia æqualis?*

R. Ex parte voluntatis seu ratione ipsius volitionis , amor Dei est æqualis ; quia ut sic unus est & Deus ipse : rationi termini est inæqualis ; quia cum amare sit alicui bonum velle , illa profecto Deus plus amat , quibus vult majora bona.

Q. 5. *Deus amatne necessario?*

R. Amat seipsum necessario , quia est summum bonum ; creaturas vero libere , quia non sunt summum bonum.

Dices : velle in Deo & esse sunt unum & idem : atqui esse Dei est maxime necessarium : ergo & velle.

Distinguo majorem ; sunt unum & idem entitative , hoc est , sunt una & eadem entitas , Concedo : sunt unum & idem connotativè & terminativè , Nego majorem ; nam velle ut sic , connotat aliquid intrinsecus volitum & productum aut producendum , quod Deus potuisset non velle producere.

Ergo

Ergo Dei libertas est divini amoris modus tendendi in terminum extrinsecus connotatum, qui posset non poni. Modus autem ille est quid Deo intrinsecum; connotatio vero ipsa prorsus extrinseca.

Instabis : vera libertas dicit indifferentiam : atqui in Deo nulla est indifferentia : ergo in Deo nulla libertas.

Distinguo majorem : dicit indifferentiam activam, Concedo : passivam, qua possit quis novum actum immanentem producere, & in se recipere, Subdistinguo, libertas creata, Concedo; Angelus quippe & homo in exercitio suæ libertatis producunt novum suæ volitionis actum, qui, cum sit immanens, in ipsis recipitur, & ita accidentaliter componuntur, ut diximus parag. de simplicitate Dei : libertas increata dicit indifferentiam passivam. Nego maj. Namque ex dictis Deus est suus actus, sua volitio, nec ullum actum novum producit aut recipit, cum aliquid liberè decernit, ac proinde nulla fit in eo mutatio, sed in creaturis dumtaxat, quas de novo producit vel sanctificat.

Ergo voluntas Dei est immutabilis, juxta illud Proverb. 19. *Voluntas Domini permanet in æternum.*

Dices frustra ergo preces ad Deum dirigimus.

Nego sequelam, quia preces ad Deum non dirigimus sicut ad hominem. Hunc precamur ut trahamus voluntatem ejus ad nostram, ut velit quæ prius nolebat, mutetque consilium, si quid adversus nos statuerat. Deum autem oramus, ut voluntatem nostram ad suam, quæ recta est, & omnium bonorum origo, convertat; tumque

nos planè exauditos credere oportet, cum eveſta eſt voluntas noſtra ad divinam, & ſincero cordis affectu dicere poſſumus, *non mea, ſed tua voluntas fiat.*

§. IV.

De omnipotentia Divina.

Q. I. *Deus eſtne omnipotens?*

R. Affirmat Scriptura, *Unus eſt altiſſimus Creator omnipotens*, Eccli. I. evincitque ratio, quia Deus eſt ens à ſe, ac proinde illimitatum, & continens omnes perfectiones: atqui omnipotentia eſt inſignis perfectio, impotentia vero infirmitas & imperfectio. Porro facere male eſt deficere, ac proinde imperfectio, quæ in Deum cadere nequit. Cætera quæ ad omnipotentiam ſpectant, diximus paragr. de Immenſitate Dei.

CAPUT VII.

De Attributis Divinis, quæ habitum ſonant.

Q. I. *Suntne in Deo habitus?*

R. Minimè; quia habitus eſt acci- dens inclinans potentiam ad agendum; atqui in Deo nullum eſt accidens, nulla eſt potentia paſſiva, ſed totus eſt actus puriſſimus. Ergo in Deo nullus eſt habitus, ac proinde virtutes quæ Deo ineſſe concipiuntur, ut charitas, magnificencia, &c. ſunt realiter ipſa ejus natura & bonitas eſſentialis.

Q. 2. *Omnes virtutes ſuntne in Deo?*

R. Quæ ſunt ſubditi ad ſuperiorem, ut Religio, obediencia, nullatenus poſſunt convenire Deo. De cæteris vero idem dicendum, quod de aliis perfectionibus, nempe virtutes, quæ admix-
tam

tam habent imperfectionem, ut temperantia, fortitudo, quæ totæ sunt regendis passionibus, non sunt formaliter in Deo, sed eminenter dumtaxat, nec de eo dici possunt nisi metaphorice: quæ autem nullam habent admixtam imperfectionem, ut charitas, beneficentia, magnificentia, sunt formaliter in Deo, ac propriè de illo dicuntur

Ergo diligere Deum, possidere Deum, & beatum esse, est diligere & possidere omnem virtutem: nec potest beatus esse, qui omnia in se vitia non debellaverit, nec fuerit in omnigenere virtutis perfectus: Ergo observatio manditorum ad visionem beatificam non præparat.

Q. 3. *Estne formaliter in Deo misericordia?*

R. Non est quatenus dicit tristitiam & miseriam alienam: est autem quatenus significat voluntatem sublevandi miseriam alterius. Unde Ps. 110. dicitur, *miserator, & misericors Dominus.*

Q. 4. *Estne in Deo justitia?*

R. Non est propriè justitia sive legalis, sive distributiva, multo minus commutativa; quia omnis justitia propriè dicta supponit aliquod debitum: atqui in Deo nullum est debitum: *Reddis debita nulli debens*, inquit sanctus Augustinus lib. 1. Confess. c. 4. Unde acceptio personarum in Deum cadere nequit, sicut in Magistratum, qui indebite officia & onera communitatis distribuit; dona enim Dei non sunt bona communitatis; sicut officia & beneficia politica; sed sunt ipsi propria.

Dices; ex sancto Augustino lib. 4. contra Julianum capit. 3. *Deus ipse, quod absit, erit injustus, si ad ejus regnum verus non admittatur justus*: quia quod debetur ex pacto & conventionem, debetur ex justitia strictè sumpta: atqui regnum cælorum debe-

tur iustis ex pacto & conventione : Ergo debetur ex vera iustitia. Unde Apostolus 2. Tim. cap. 4. *in reliquo reposita est mihi corona iustitiæ, quam reddet mihi Dominus in illa die iustus iudex.*

Distinguo maiorem : quod debetur ex pacto, debetur ex vera iustitia, quando ambo contrahentes ita jus proprium habent & distinctum, ut alter jure suo cedat in commodum alterius, Concedo : quando ambo non habent jus proprium, nec alter contrahentium jure quod habet spoliare se potest, Nego maiorem. Porro omnes creaturæ cum Deo comparatæ, sunt absolute & omni modo sub Dei dominio, quo Deus se spoliare non potest, alioquin desineret esse omnium Dominus. Quidquid facimus, quidquid possumus, & quidquid sumus, totum Dei est necessariò : Ergo Deus nihil nobis debet, sed suæ dumtaxat bonitati, sapientiæ, & ubi aliquid nobis promisit, non debet, sed suæ fidelitati, adversus quam agere non potest ; & eo sensu dicitur iustus, quia fidem suam servat.

CAPUT VIII.

De Attributis divinis, quæ actionem significant.

Ejusmodi attributa sunt Providentia, Prædestinatio, & Reprobatio.

§. I.

De Providentia Dei.

Q. I. *Quid est Providentia?*

R. Est ratio ordinis rerum creaturarum in finem per media congrua.

Du.

Dupliciter autem spectari potest Providentia, 1. in arte, seu mente divina, quo sensu definitur à Boetio lib. 4. de Consolatione: divina ratio in summo Principe constituta, quæ cuncta disponit. 2. in executione, & est ipsummet Dei regimen, seu actualis rerum creatarum directio in finem. Ipsa rerum ordinandarum ratio est ab æterno, actualis vero gubernatio in tempore.

Q. 2. *Daturne providentia?*

R. Datur, teste Scriptura Sap. 14. *Tua autem, Pater, providentia ab initio cuncta gubernat: & ratio demonstrat; quia agens intellectuale, ut Deus 1. finem intendit, deinde omnia opera sua ad eum dirigit: Quis operator negligat operis sui curam? inquit sanctus Ambrosius lib. 1. de Offic. c. 12. quis deserat & destituat, quod ipse condendum putavit? si injuria est non regere, nonne est major injuria fecisse, & non curare? cum aliquid non fecisse nulla injuria sit; non curare quod feceris, summa inclementia.*

Q. 3. *Providentia extenditurne ad omnes omnino creaturas?*

R. Affirmat Scriptura Sap. 6. *Magnum & pusillum ipse fecit, & æqualiter est ipsi cura de omnibus.* Illud ipsum ratio evincit; quia nulla est creatura, quam Deus non produxerit propter finem, ac proinde cui non provideat: providentia quippe est ratio ordinis rerum in finem.

Dices 1. Indecens est Deum minimis rebus se immiscere, *nunquid de bobus cura est Deo?* inquit Apostolus 1. Cor. 9.

R. Respondet sanctus Ambrosius citato libro *si non est injuria & probrum minutissimas quasque res fecisse & conservare, multo minus opprobrium ipsi esset eas factas regere.* Imo repugnat sapientiæ quidquam
teme-

temere facere & nullo sibi fine præstituto, vel opera sua non dirigere ad finem intentum. Apostolus autem vult solummodo Deum non providere bobus propter ipsos, sed in hominum gratiam & commodum; nam Christus Dominus Luc. 12. expresse docet ne quidem passeret esse in oblivione coram Deo, & capillorum capitis numerum apud illum retineri.

Dices 2. Si Deus res humanas gubernaret, tot peccata & defectus non contingerent, nec iusti affligerentur, cum omnia impiis prospere cedunt: Ergo.

Nego antecedens; nam ex sancto Augustino Enchir. cap. 11. Deus, cum summe bonus sit, nullo modo sineret malum aliquod esse in operibus, nisi usque adeo bonus & omnipotens esset, ut de malo etiam bene faceret; quot bona elicit ex perfidia Judæ & crudelitate Judæorum!

Dices 3. Multa fiunt casu: Ergo non omnia subjacent Providentiæ divinæ.

Distinguo antecedens: fiunt casu respectu causarum secundarum, Concedo: respectu causæ primæ, Nego antecedens. Hanc responsionem illustrat sanctus Thomas exemplo duorum famulorum, quorum iter dominus sic direxit, ut alicubi sibi occurrant præter utriusque intentionem: occursum ille est casualis respectu famulorum, & intentus respectu domini.

Q. 4. *Providentia divina causatne violentiam in rebus quas regit?*

R. Minimè: dicitur enim Sap. 7. *attingit à fine usque ad finem fortiter, & DISPONIT OMNIA SUAVITER.* Ratio autem est quod Deus, utpote sapientissimus, quaslibet creaturas aptaverit operibus,

ribus, ad quæ illas destinavit; lapidi v. g. dedit gravitatem, qua inclinaretur ad centrum, quo fit ut Deus omnia suaviter disponat; suave quippe est unicuique sequi naturæ suæ propensionem. Ergo omnes molestiæ & animi ægritudines inde nascuntur, quod contra divinam Providentiam & ejus ordinationem nitamur.

Dices: Miracula sunt contra naturam: Ergo creaturæ violenter inferunt.

Nego. Miracula quippe sunt supra, non contra naturam; inest enim in qualibet creatura dispositio, quam potentiam obedientialem vocant, per quam inclinantur ad obediendum suo auctori, etiam in iis, quæ repugnant suo privato commodo: sic manus naturaliter, & minime violenter, periculo se exponit ad salvandum caput.

Q. 5. *Providentia estne idem quod fatum?*

R. Fatum proprie & formaliter sumptum non est providentia, sed effectus providentiæ; definitur enim fatum ordinatio causarum secundarum ad effectus à Deo prævisos. Deus quippe ordinat motus syderum, ut sequatur temperies vel intemperies aeris, pluvia vel siccitas, ubertas vel sterilitas terræ, sanitas animalium vel pestilentia.

Dixi, *proprie & formaliter sumptum*; nam apud Gentiles fatum vulgo sumebatur pro ea dispositione syderum, quæ voluntatibus humanis necessitatem imponeret. Hinc apud eos fatalis necessitas, per quam homo sub talibus syderibus natus, credebatur futurus necessario bonus aut malus, beatus aut felix. Contra fatum, hoc modo acceptum sancti Patres scripserunt, ut sanctus Gregorius

gorius homil. 10. in Evangelia. *Absit, inquit, à Fidelium cordibus, ut fatum esse aliquid dicant.*

Q. 6. *Omnia subdunturne fato proprie & formaliter sumpto?*

R. Minime, quia multa fiunt & diriguntur à Deo independenter ab ordinatione causarum secundarum, ea quæ sunt divinitati propinqua & stabiliter fixa, inquit Boetius lib. 4. de Consol. Phil. *fatalis ordinem mobilitatis excedunt*. Unde concludit sanctus Thomas 1. p. q. 111. *omnes, quo longius à Deo recedunt, eo magis fati nexibus implicari, quia magis subiacentur ordini causarum secundarum, & à pluribus dependent: quod videre est in avaro: nam pecunia, cui adhæret, pendet à fructibus agri quem colit: fructus autem à temperie aeris, & temperies aeris ab influxu syderum: hanc autem seriem justus superat uni Deo adhærens.*

Q. 7. *Quotuplex est Providentia?*

R. Duplex; naturalis, & supernaturalis. Naturalis est ordinatio causarum secundarum ad finem naturalem per media naturalia. Supernaturalis autem est ordinatio creaturæ rationalis sive spiritualis ad finem supernaturalem per auxilium gratiæ.

Q. 8. *Providentia supernaturalis estne idem quod prædestinatio?*

R. Minimè; quia prædestinatio est decretum efficax perducendi hominem infallibiliter ad finem supernaturalem: Providentia vero supernaturalis est ordinatio non efficax creaturæ rationalis ad finem supernaturalem per auxilia gratiæ sufficientia. Unde providentia supernaturalis se extendit ad reprobos, prædestinatio vero est solummodo electorum.

§. II.

De prædestinatione.

Q. I. *Quid est prædestinatio?*

R. Secundum vim nominis, est æterna quorundam præ aliis destinatio ad gratiam & gloriam: destinatio autem idem est ac decretum efficax quosdam salvandi, seu, ut vult sanctus Thomas, transmittendi ad gloriam. Particula vero *præ* significat vel prælationem, vel antecessionem temporis; ita ut quidam potius quam alii ante omnia secula fuerint ad gloriam prædestinati.

Definitur prædestinatio à sancto Augustino lib. de bono perseverantiæ cap. 14. præscientia & præparatio beneficiorum; quibus certissime liberantur quicumque liberantur.

Dicitur 1. *præscientia*, non quidem speculativa, qua Deus præscit, quod facturum non est ut peccatum, sed practica, id est, conjuncta cum voluntate aliquod perducendi ad gloriam; à qua præscientia prædestinati dicuntur in Scripturis à Deo cogniti & præcogniti, scilicet amoris cognitione.

Dicitur 2. *præparatio beneficiorum*; quibus vocibus significatur firmum dandi propositum; solemus enim habere apud nos parata & seposita, quæ dilecto dare efficaciter decrevimus. *Inter gratiam porro & prædestinationem hoc tantum interest*, inquit sanctus Augustinus libro de prædestinatione Sanctorum cap. 10. *quod prædestinatio est gratiæ præparatio, gratia vero jam ipsa donatio.*

Dicitur 3. *quibus certissime liberantur*, ut denotentur auxilia efficacia, quibus adjuti non pereunt.

Dicitur 4. *quicumque liberantur*, ut ostendatur in
hoc

hoc statu neminem actu & de facto salvari, nisi certissime; id est, nisi adjutum auxilio efficaci; quamvis enim vere possit quis potentia proxima & completa cum gratia sufficiente salutis suæ consulere, actu tamen non consulet, nisi gratia efficaci adjuvetur.

Q. 2. *Daturne prædestinatio?*

R. De fide est dari: Matth. 25. *Venite benedicti Patris mei, possidetis paratum vobis regnum à constitutione mundi.* Rom. 8. *quos præscivit & prædestinavit conformes fieri imagini Filii sui.*

Q. 3. *Quotuplex est prædestinatio?*

R. Proprie una est; quia Deus unico decreto vult dare gloriam, & media ad illam infallibiliter obtinendam: *vult quidem hoc esse propter hoc, sed non propter hoc vult hoc*, inquit S. Thomas 1. p. quæst. 14. art. 5. id est, dat gratias efficaces propter electorum beatitudinem: sed non vult gratias efficaces propter illorum beatitudinem. Sic artifex uno actu decernit scalam conficere, nec vult unum gradum propter alium, sed facit unum v. gr. primum propter secundum, & sic deinceps. Usus tamen obtinuit in scholis, ut divideretur prædestinatio in totalem, & partialem.

Q. 4. *Quid est prædestinatio totalis & partialis?*

R. Totalis est decretum Dei efficax dandi simul gloriam & gratiam: partialis vero est decretum efficax dandi vel gloriam, vel gratiam.

Q. 5. *Quotuplex est prædestinatio ad gratiam?*

R. Duplex; alia ad primam gratiam, ut vocatio ad fidem; alia ad secundam.

Q. 6. *Quænam est causa prædestinationis?*

Quæstio non est de causa physica, cum certum sit Deum esse auctorem gratiæ & gloriæ; sed de morali & meritoria.

R. Ve-

R. Vera & unica causa meritoria prædestinationis totalis, vel partialis ad primam gratiam, est Christus Dominus. Est contra Pelagianos & Semipelagianos, qui, ne Deus videretur injustus personarum acceptor, docebant Deum ideo unum eligere præ alio; quia bonis operibus, viribus naturæ elicitis, vel saltem orationibus, præferri meruerat. Contra ejusmodi errorem

Probatur responsio. Ephes. I. *Benedixit nos in omni benedictione spirituali in cælestibus in Christo, sicut elegit nos in ipso ante mundi constitutionem, ut essemus sancti & immaculati in conspectu ejus in charitate: qui prædestinavit nos in adoptionem filiorum per Jesum Christum in ipsum, secundum propositum voluntatis suæ.* Act. 4. *Nec enim aliud nomen est sub cælo datum hominibus, in quo oporteat nos salvos fieri.*

Q. 7. *Prædestinatio ad gloriam estne ex prævisis meritis, ita ut concipiatur Deus prius decrevisse gratias ad bene operandum, & intuitu bonorum operum inde consequentium prædestinavisse ad gloriam?*

R. I. Potuit esse: nam ab actu ad posse valet consequentia: atqui Angeli prædestinati sunt ad gloriam ex prævisis meritis, nam ex communi Theologorum sententia post sanctum Augustinum, non sunt eis collatæ gratiæ per se efficaces, sed solum sufficientes; quibus pro libero arbitrio uti & non uti possent: ac tum demum quos Deus prævidit bene usuros, prædestinavit ad gloriam.

Dices: electio & præparatio mediorum præsupponit intentionem finis: atqui præparatio gratiarum est medium ad gloriam tamquam ad finem: Ergo intentio gloriæ conferendæ prius concipitur in Deo, quam præparatio gratiarum,

& consequenter quàm prævilio bonorum operum.

Distinguo majorem: præsupponit intentionem vel efficacem & absolutam, vel conditionatam & hypotheticam, Concedo: efficacem & absolutam, Subdistinguo: si eligantur media efficacia & infallibiliter cum fine conjuncta, Concedo: si eligantur sufficientia dumtaxat, Nego majorem. Responsio patet familiari exemplo. Paterfamilias omnes pauperes suæ viciniae sublevare intendit, sed diversimodè: alios absolutè; & nulla conditione apposita iis distribuit quotquot sufficiunt panes: alios conditionatè, nempe si laborare voluerint in sua vinea, aliàs nihil ipsis daturus. Porro Deus omnium Angelorum salutem conditionatè tantum voluit, modò scilicet uterentur auxiliis sufficientibus ad salutem promerendam, quorum efficacia penderet ex eorum voluntate à Deo præparata. Cum autem in hocce statu electis conferat beneficia, quibus certissimè liberentur, meritò colligunt S. Augustinus & S. Thomas, prædestinationem ad gloriam non esse ex prævisis meritis. Quare

R. 2. Prædestinatio ad gloriam est omninò gratuita; & ante prævisa merita.

Probatur è Scriptura; Matth. 24. v. 22. de electis sic habetur; *nisi breviati fuissent dies illi, non fieret salva omnis caro; sed propter electos breviabuntur.* Et v. 24. de pseudo-Christis, *dabunt signa magna & prodigia, ita ut in errorem inducantur (si fieri potest) etiam electi.* Joan. 10. de iisdem electis dicitur, *non peribunt in æternum.* Idem, *nemo potest rapere de manu Patris mei.* Rom. 8. v. 36. *quos prædestinavit, hos & vocavit, & quos vocavit, hos & justificavit; quos*
autem

autem justificavit, illos & glorificavit. In quibus textibus electio, seu prædestinatio ad gloriam est causa, cur Deus electos efficaciter vocet, invigiletque, ut in gratia accepta invincibiliter perseverent. Et ita laudatum Apostoli textum interpretatur sanctus Augustinus libro de prædestinatione Sanctorum cap. 17. *electi sunt itaque ante mundi constitutionem, inquit, ea prædestinatione, qua Deus sua facta præscivit: electi è mundo ea vocatione, qua Deus id, quod prædestinavit, implevit. Quos enim prædestinavit, ipsos & vocavit, illa scilicet prædestinatione secundum propositum, non alios: sed quos prædestinavit, ipsos & vocavit, non alios: sed quos ita vocavit, ipsos & justificavit, nec alios: sed quos prædestinavit, vocavit, justificavit, ipsos & glorificavit.*

Hic perspicue distinguit sanctus Doctor inter destinatos ad gratiam, & prædestinatos ad gloriam. Illi quippe, quamvis efficaciter vocati & justificati, non perseverant, nec coronantur; quia nec vocati nec justificati sunt secundum propositum absolutum conferendæ gloriæ; hi verò secundum idem propositum vocati & justificati certissimè gloriam consequuntur. Mentem suam non minùs clarè exponit libro de correptione & gratia cap. 9. ubi sic habet: *nec nos moveat, quòd filiis suis quibusdam Deus non dat istam perseverantiam; absit enim ut ita esset si de illis prædestinatis essent, & secundum propositum vocatis, qui verè sunt filii promissionis.* Et nonnullis interjectis sic pergit de prædestinatis secundum propositum: *hi ergo Christo intelliguntur dari, qui ordinati sunt in vitam æternam. Ipsi sunt illi prædestinati, & securum propositum vocati, quorum nullus perit. Ac per hoc nullus eorum ex bono in malum mutatus finit hanc vitam, quoniam sic est*

*ordinatus, & idè Christo datus, ut non pereat . . . propter hoc Apostolus, cum dixisset, scimus quoniam diligentibus Deum omnia cooperantur in bonum, sciens nonnullos diligere Deum, & in eo bono usque in finem non permanere, mox addidit: his qui secundum propositum vocati sunt . . . ostendens autem quid sit secundum propositum vocari, mox addidit ea, quæ jam supra posui, quoniam quos ante præscivit & prætestinavit, illos & vocavit, scilicet secundum propositum. Talibus Deus diligentibus eum omnia cooperatur in bonum, ut etiam si qui eorum deviant & exorbitant, hoc ipsum eis faciat proficere in bonum, quia humiliores redeunt & doctiores. Iste sancti Augustini discursus ex Apostoli textu funditus evertit dogma de prædestinatione ex prævisis meritis, cum ex ea asserat gratuitum perseverantiæ donum. Numquid enim justus, qui à justitia sua per peccatum excidit, meretur perseverantiæ donum, cum peccato ejus debeatur pæna æterna? accipiet tamen illud donum, si prædestinatus sit, imò illud ipsum peccatum, quod in altero est causa damnationis, ipsi cooperatur in bonum. Porro quanti ponderis sit auctoritas sancti Augustini in materia de gratia & prædestinatione, discimus ex sancto Hormisda, qui sexto seculo regebat Ecclesiam; sic enim scribit ad Possessorem: *de arbitrio tamen libero, & gratia Dei quid Romana, hoc est Catholica, sequatur & asseveret Ecclesia, licet in variis libris beati Augustini, & maxime ad Hilarium & Prosperum possit cognosci, &c.* Et Petavius, inter Theologos Societatis Jesu doctissimus, libro 9. cap 6. Theolog. dogm. sic habet de doctrina sancti Augustini, *cujus de gratia sententiam quotquot deinceps consecuti sunt Patres & Doctores, tum verò Ecclesiæ Romanæ Præsules,*
*Præsuli.**

Præfulumque conventus aliorum, ratam & Catholicam esse judicarunt, ut hoc satis magnum putarent veritatis argumentum, quod ab Augustino positum, ac decretum esse constaret.

Sanctus Thomas concinit sancto Augustino I. p. q. 23. art. 5. ad 3. ubi sic habet: *quare hos elegit ad gloriam, & illos reprobavit, non habet rationem, nisi divinam voluntatem.*

Dices I. Beatitudo est merces; Matth. 25. *rependitur bonis operibus, Venite benedicti Patris mei, possidete paratum vobis regnum à Constitutione mundi; esurivi enim, & dedistis mihi manducare:* atqui merces supponit meritum: Ergo.

Distinguo majorem: est merces in executione & retributione, Concedo: in intentione, Nego majorem. Solutio explicatur exemplo divitis, qui necessaria subsidia pauperibus largiri statuit: sed ne eorum inertiam foveat, injungit operas sibi satis inutiles, puta reparationem cujusdam viæ publicæ, cum pacto retribuendi juxta cujusque laborem. Vides in proposito subveniendi pauperibus prædestinationem gratuitam in intentione; nam consilium divitis est actus meræ misericordiæ, ut patet: in retributione verò pro labore suscepto mercedem, quam Deus reddit bonis justorum operibus.

Instabis: quod debet obtineri per meritum, & propter ipsum retribui, non potest absolute decerni: Ergo.

Nego antecedens; namque licet finis non obtineatur nisi per media, decernitur tamen ante media, utpote qui sit mediorum causa.

Dices 2. Decretum efficax dandæ gloriæ tollit libertatem: Ergo.

Negari potest antecedens; namque prædestinatio ad gloriam non magis nocet libertati, quam prædestinatio ad gratiam efficacem: atqui ex adversariis datur prædestinatio ad gratiam efficacem sine præjudicio libertatis. Ergo. Sed

Distinguo antecedens; decretum efficax dandæ gloriæ tollit libertatem, si gloria danda sit per media quæ necessitatem inferant, Concedo: si gloria danda sit per media cum libertate cohærentia: Nego antecedens. Porro gratia efficax, per quam electi gloriam promerentur, libertatem perficit, nedum illam perimat:

Dices 3. Sanctus Ambrosius lib. 5. de Fide; & sanctus Augustinus lib. 1. ad Simplicianum, disertè docent electionem ad gloriam esse ex prævisis meritis. Prior enim sic scribit: *non antè prædestinavit, quàm præscierit: sed quorum merita præscivit, eorum præmia prædestinavit.* Posterior verò, *quomodo est justa, aut qualiscunque omnino electio, ubi omnino nulla distantia est? ... Non electio præcedit justificationem, sed electionem justificatio: nemo enim eligitur nisi distans ab illo qui reicitur.* Ergo.

Distinguo antecedens: electio ad gloriam supponit justificationem & merita, in executione, Concedo: in intentione, Nego antecedens. Duplex itaque est electio: prima præcedit merita, & est ipsa prædestinatio: secunda subsequitur merita, & præest in retributione præmiorum & pœnarum. De prima intelligitur illud Apostoli Ephes. 1. *elegit nos in ipso (Christo) ante mundi constitutionem, ut essemus sancti & immaculati.* Elegit, inquit, non quia sancti & immaculati eramus; sed malos, & filios iræ elegit, ut sancti essemus. De secunda autem loquitur Christus Matth.

Matth. 25. v. 32. *separabit nos ab invicem* (nempe bonos & malos) *sicut Pastor segregat oves ab hædis.* Illos assumet in gloriam, hos ejiciet in ignem æternum. Porro illa electio & separatio supponit præscientiam meritorum & demeritorum, essetque injusta, si nulla esset distantia inter electos & reiectos.

Q. 8. *Quinam sunt effectus prædestinationis?*

R. Omnia & sola beneficia, quæ per merita Christi efficaciter sive directè, sive indirectè, sive meritoriè, sive dispositivè, conducunt (Deo ita ordinante) ad vitam æternam. Colligitur hæc responsio ex ipsa prædestinationis definitione, quæ est præparatio beneficiorum Dei, quibus certissimè liberantur, quicumque liberantur.

Ergo non sunt effectus prædestinationis 1. Incarnatio, & institutio Sacramentorum; quia ejusmodi mysteria sunt in gratiam etiam reproborum, quos certissimè non liberant. 2. Creatio; quia Christus non meruit ut homines nasceremur, sed ut jam nati filii Dei renasceremur. 3. Peccati permissio; quia illa non est gratia, sed denegatio gratiæ efficacis, quam denegationem à nobis deprecamur, cum dicimus, *Et ne nos inducas in tentationem.* Nec obstat illud sancti Augustini lib. 14. de Civitate Dei cap. 13. *audeo dicere superbis esse utile cadere in aliquod apertum manifestumque peccatum, unde sibi displiceant;* non enim ipsa permissio, sed bona quæ Deus ex malis nostris novit elicere, ad salutem nostram proficiunt.

Ergo effectus prædestinationis sunt vocatio, justificatio, perseverantiæ donum, bona etiam naturalia, si à Deo ad salutem efficaciter ordinentur, ut nasci ex parentibus piis, persecutiones

pati, vel ab iis liberari, cùm obesse possent; omnia enim Deum diligentibus secundùm propositum vocatis & prædestinatis cooperantur in bonum.

Q. 9. *Potestne quis esse certus de sua prædestinatione?*

R. non potest esse omninò certus sine speciali Dei revelatione; ita enim definiit Conc. Trid. sess. 6. can. 15. & can. 16. *Nescit homo, ait Sapiens Eccles. 9. utrum amore vel odio dignus sit, sed omnia in futurum servantur incerta.*

Potest tamen quis morali quadam certitudine id conjicere ex bonitate & misericordia Dei, quam in multis expertus est. De hac certitudine intelligendus est Apostolus Rom. 8. *Certus sum ... quia nec mors, neque vita neque creatura alia poterit nos separare à charitate Dei.* Item, *ipse Spiritus testimonium reddit spiritui nostro, quod sumus filii Dei.*

Q. 10. *Numerus prædestinatorum estne major numero reproborum?*

Quæstio non est de omnibus hominibus infidelibus & fidelibus; sed solum de fidelibus reprobis. De quibus

R. Longè plures sunt fideles reprobi, quàm prædestinati; quia plures sunt hædi in grege Christi Domini, qui non audiunt vocem ejus nec sequuntur. Hinc Matth. 3. *Ecclesia comparatur areæ, in qua plus est paleæ quàm tritici: permundabit (Christus) aream suam, & congregabit triticum suum in horreum, paleas autem comburet igni inextinguibili.* Sanctus Augustinus lib. 3. contra Cresconium cap. 16. de mystico tritico in horreum cœleste congregando, sic habet: *Boni verique Christiani, qui per se ipsos multi sunt, in comparatione*

*tionem malorum falsorumque iidem pauci sunt. Et S. Gregorius hom. 19. in Evangelia: Multi, inquit, ad fidem perveniunt, & ad cœleste regnum pauci perdu-
cuntur.*

Q. II. *Quid est liber vitæ?*

R. Est divina notitia prædestinatorum, sive ad gloriam, sive ad gratiam. Quare duplex est liber vitæ, alius simpliciter dictus, estque divina notitia salvandorum: alius secundum quid, qui est divina notitia eorum qui gratiam consecuturi sunt, sed non in ea permansuri. De hoc libro multi delentur, de priori autem nullus.

§. III.

De Reprobatione.

Q. I. *Quid significat reprobationis nomen?*

R. Reprobatio, secundum vim nominis, est rejectio: *reprobatio*, inquit Apostolus Hebr. 7. . . . *fit præcedentis mandati propter infirmitatem ejus.* Ex usu autem Christianorum intelligitur rejectio à gloria cœlesti.

Q. 2. *Daturne reprobatio sic sumpta?*

R. Certum est dari; Matth. enim 25. v. 41. ait Christus: *discedite à me, maledicti in ignem æternum.*

Q. 3. *Quomodo dividitur reprobatio?*

R. In positivam & negativam.

Q. 4. *Quid est reprobatio positiva?*

R. Definitur, æternum & efficax Dei decretum privandi aliquos gratia finali & gloria cœlesti, illosque addicendi pœnis æternis.

Dicitur, *gratia finali & gloria*; quia nullus positivè reprobatur, nisi propter peccatum finale,

& cum morte junctum, in quo intelligitur exclusio à gratia finali, quæ in hoc statu est semper donum efficax. David v. gr. permissus est labi in adulterium. S. Petrus in negationem, & S. Thomas in incredulitatem, nec propterea reprobati sunt, quia exclusi non fuere à gratia finali, nec proinde à gloria.

Additur in definitione, *illosque addicendi pœnis æternis*; quia in die judicii generalis non dabitur medius locus inter beatitudinem supernaturalem, & pœnam æternam, in hypothese etiam quod parvuli, qui sine baptismo exeunt, igne non crucientur, pœnam enim æternam subeunt, ut suo loco dicetur.

Q. 5. *Quid est reprobatio negativa?*

R. Definitur efficax Dei decretum non præparandi quibusdam beneficia, quibus certissime liberentur; quia reprobatio negativa contrariè opponitur prædestinationi; contrariorum autem contrariæ sunt rationes. Cum ergo prædestinatio in hoc statu sit decretum præparandi ejusmodi beneficia, reprobatio negativa in hoc statu intelligi debet decretum eadem non præparandi.

Dices: reprobatio negativa est exclusio à gloria: atqui decretum non præparandi ejusmodi beneficia, non est exclusio à gloria, cum illam consequi possint ii, quibus non præparantur: Ergo.

Distinguo majorem; est exclusio voluntatis efficacis dandi gloriam, Concedo: est exclusio voluntatis antecedentis & conditionatæ, Nego majorem; Deus enim hac voluntate vult omnes & singulos homines salvos fieri, & hac voluntate ipsis præparat media, quibus salutem consequi possint.

Q. 6.

Q. 6. *Quenam est causa reprobationis positivæ?*

Zwinglius & Calvinus non aliam statuunt præter voluntatem Dei, qui ex Angelis & hominibus alios antecedenter prædestinavit ad pœnas æternas, alios ad felicitatem æternam: Docentque Deum vi illius decreti, & ex potestate, quâ dominatur creatis voluntatibus, reprobos ad mala opera, & electos ad bona efficaciter movere adeò, ut traditio Judæ non minùs sit opus Dei, quàm confessio sancti Petri. Quam doctrinam ipsimet Calvini sectatores exhorruerunt, & Concilium Arausicanum can. 25. Tridentium quoque sess. 6. can. 6. & 17. anathemate percusserunt. Quare ad propositam quæstionem

R. Peccatum est causa, non verò effectus reprobationis positivæ.

Probatur è Scriptura. Oseæ c. 13. v. 9. *Perditio tua, Israel (ex te) tantummodo in me auxilium tuum.* Sapientiæ 11. *diligis enim omnia quæ sunt, & nihil odisti eorum, quæ fecisti.* Pſalmo 5. *Non Deus volens iniquitatem tu es.* Jacobi 1. *Nemo, cum tentatur, dicat quoniam à Deo tentatur.*

Dices: Deus in Scripturis dicitur excæcare, dare in reprobum sensum, Rom. 1. facere vasa alia in contumeliam, alia in honorem; Rom. 9. execrandum incestum Absalonis vocat opus suum; 2. Reg. c. 12. Satanæ præcipit, ut sit spiritus mendax in ore Pſeudo- Prophetarum ad decipiendum Acab. 3. Reg. c. 22. S. Petrus injustam & crudelem Christi mortem æterno Dei Decreto tribuit; *hunc*, inquit, *definito consilio & præscientia Dei traditum, . . . interemistis*, Act. 2. Ergo Deus movet ad malum æquè ac ad bonum.

Nego

R. Nego consequentiam; namque 1. excæcat, & in reprobum sensum tradit non infundendo malitiam, sed subtrahendo gratiam; 2. Inducit in tentationem & peccatum, non quod ad illud moveat, sed quod malas voluntates sibi ipsis dimittat, iisque utatur sive ad puniendos malos, sive ad exercendos bonos; atque eo sensu incestus Absalonis dicitur opus ejus, maledictio Semei ab eo præcepta ad puniendum Davidem; mors Christo illata secundum ejus consilium & decretum; sic venator dicitur immittere canem, cum illum solvit; 3. Ex eadem massa, sed peccato originali infecta, vasa facit, alia in honorem, quod misericordiæ est; alia in contumeliam, quatenus à corruptione non liberat, quod justitiæ est.

Instabis: Deus convertit corda Ægyptiorum, ut odirent populum ejus, & dolos facerent in servos ejus, Psal. 104. Ergo reverà Deus incitat ad malum.

Distinguo antecedens: convertit indirectè & occasionaliter, quatenus Israelitas cumulavit beneficiis, quæ odium & invidiam Ægyptiorum provocarunt, Concedo: directè, Nego antecedens. Ista habentur fusiùs explicata Tom. 1. cap. 20.

Q. 7. *Quænam est causa reprobationis negativa in hoc statu?*

R. Peccatum originale, quia ex dictis reprobatio negativa in hoc statu est decretum denegandi quibusdam beneficia, quibus certissimè liberantur, quicumque liberantur: atqui peccatum
tum

tum originale est causa hujusmodi decreti: *hæc massa*, inquit Augustinus epist. 186. aliàs 106. num. 18. *si esset ita media, ut quemadmodum nihil boni, ita nec mali aliquid mereretur, non frustra videretur iniquitas, ut ex ea fierent vasa in contumeliam.* Et Sanctus Thomas qu. 3. de veritate art. 2. ad 9. *in ipsa electione*, inquit, *ratio est divina bonitas, ratio autem reprobationis peccatum originale, ut Augustinus dicit.*

Dices: peccatum originale in multis reprobis in baptismo fuit remissum: ergo in iis saltem non est causa reprobationis negativæ.

Distinguo antecedens: fuit remissum quoad culpam, Concedo, quoad pœnalitates, Nego antecedens. In baptizatis enim remanent ignorantia & concupiscentia, quæ difficultatem pariunt resistendi malo & operandi bonum, adeo ut nec malo actu resistat, nec bonum actu operetur homo, nisi gratia efficax succurrat.

Instabis: Deus vult omnes & singulos homines etiam peccato originali infectos, salvos fieri: atqui generalis illa Dei voluntas non potest stare cum decreto excludendi aliquos à gloria præcisè propter peccatum originale, Ergo.

Distinguo minorem: si illud decretum excludat voluntatem antecedentem præparandi auxilia sufficientia, quibus improbi salutis suæ consulere verè possint, Concedo: si non excludat, ut suprà diximus ubi de voluntate Dei, Nego minorem.

94 *De Deo, Divinisque ejus Attributis.*

Q. 8. *Quinam sunt effectus reprobationis?*

R. Sunt exclusio à gloria, pœnæ æternæ inflictio, derelictio in peccatis usque ad mortem & permissio peccati, non cujuscumque, (cùm permissio adulterii in Davide, & infidelitatis in sancto Thoma, non fuerit effectus reprobationis) sed peccati causativi damnationis æternæ.

Quodnam autem sit illud peccatum, diximus Tom. I. cap. 20.

Q. 9. *Peccatum ipsum estne effectus reprobationis?*

R. Minimè, quia effectus reprobationis debet esse à Deo, sicut & ipsa reprobatio; atqui peccatum non est à Deo, sed à mala voluntate. Ergo.

Hactenus de Attributis absolutis: de relativis verò differemus Tractatu sequenti.



Tra-



Tractatus DE MYSTERIO SS. TRINITATIS.

CAPUT PRIMUM.

De notione hujus Mysterii.

Q. 1. *Quare sanctissima Trinitas dicitur Mysterium?*

R. Quia ratione naturali demonstrari non potest, sed sola Dei revelatione nobis innotescit : *Nemo novit Filium nisi Pater ;* ait Christus Matth. 11. *neque Patrem quis novit nisi Filius , & cui voluerit Filius revelare.* Et ratio est , quam urget Sanct. Thomas : quia omnis demonstratio vel est à priori , seu per causas ; vel à posteriori seu per effectus : atqui Trinitatis existentia probari non potest à priori , cum Deus nullam sui causam agnoscat ; neque etiam à posteriori ; quia creaturæ

turæ non dependent à Deo quatenus trinus est, sed quatenus omnipotens : omnipotentia autem est attributum ad naturam divinam pertinens, nec minimam distinctionis inter Personas suspensionem ingerit : Ergo.

Dices : ratione naturali cognoscimus Deum intelligere & velle : atqui intelligere est producere verbum mentis, & velle est spirare amorem : ergo ratione naturali cognoscimus verbum & amorem esse apud Deum, ac proinde in Deo esse tres personas divinas, unam producentem, & duas productas, quidquid enim est in Deo, infinitum est, immensum, æternum; &c.

Distinguo minorem : intelligere est producere verbum, & velle est spirare amorem; in creatis Concedo : in divinis, Nego minorem. Namque lumine naturali in præcedenti Tractatu demonstravimus in Deo, esse, diligere, & velle, esse unum & idem; Deum non componi ex potentia & actu, ex substantia & accidente, quemadmodum Angelus intelligens componitur ex natura Angelica, & actuali intelligence; sed esse actum purissimum & simplicissimum. Unde ratio naturalis sibi derelicta, ut in Philosophis Ethnicis, pernegaret Deum intelligendo & amando producere verbum mentis, & amoris pondus, ac proinde Trinitatem Personarum in una singulari natura repugnare. Utrum autem Mysterium Trinitatis lumini naturali revera repugnet, suo loco examinabimus.

Confirmatur : Filius & Spiritus Sanctus æque ac Pater intelligunt, & tamen nullum verbum producant : Spiritus Sanctus vult & amat nullo volitionis producto termino.

Insta-

Instabis, Plato, Zoroastres, Trismegistus, & Sybillæ mysterium Trinitatis agnovere, & sancti Patres eorum scriptis Paganos revincunt.

R. 1. Plato creditur ex sacris Judæorum libris multa desumpsisse, sed male intellecta: nam tres personas proponit tanquam tres Deos, quorum unus sit major, secundus minor, & tertius infimus; 2. Quæ ex Zoroastre, Trismegisto & Sybillinis proferuntur, sunt supposititia & post Christum conficta. Sed esto, genuina fuerint Sybillina carmina ab antiquis Patribus laudata, fœtus luminis naturalis dici nequeunt; sed habenda ut revelationes, quemadmodum dicta ab Ariolo Balaam Num. 23.

Q. 2. *Quomodo definitur mysterium sanctissimæ Trinitatis?*

R. Definitur, unus Deus in tribus personis subsistens.

Dicitur 1. *unus Deus*, scilicet unitate numerica & singulari, non vero unitate specifica, quæ per differentias singulares dividatur & multiplicetur, ut natura humana in Petro, Paulo, & Andrea: qui idcirco sunt revera tres homines. Unde tres personæ divinæ non sunt tria individua, in quibus natura divina una solum specificè multiplicetur, ut definiebant sexto seculo Tritheitæ, sic dicti, quia in eorum sententia in tribus personis multiplicatur natura divina, sicut natura humana in tribus hominibus. In eundem errorem hac nostra ætate impegit privatus quidam ex ignorantia potius, quam ex contumacia.

Dicitur 2. *in tribus personis*, contra Noetum & Sabellium, qui tertio seculo docuerunt Patrem & Filium & Spiritum Sanctum esse tria nomina

D. Habert Theolog. Tom. VIII.

G

unius

unius & ejusdem personæ, quæ, quatenus creat, vocatur Pater, quatenus homines doctrina imbuunt, nominatur Filius; & quatenus sanctificat, dicitur Spiritus Sanctus.

Dices: omnipotentia; justitia & misericordia sola ratione distinguuntur propter diversos effectus: ergo à pari Pater & Filius & Spiritus Sanctus.

Nego consequentiam; & ratio disparitatis est, quod omnipotentia, justitia & misericordia relative non opponantur, nec se habeant ad invicem tanquam producat & productum, sicut paternitas & filiatio: repugnat autem productum non distingui realiter à producente.

Dicitur 3. *subsistens*, contra Abbatem Joachimum, qui duodecimo seculo finxit Patrem, Filium & Spiritum Sanctum habere naturas partiales, ex quibus una tota coalescat, adeo ut Pater, aut Filius, aut Spiritus Sanctus seorsim non sit Deus, nec proinde persona, cum nomen personæ significet substantiam completam & in se totam: ut patebit ex sequenti definitione.

Q. 3. *Quid est persona?*

R. Definitur, substantia singularis, intelligens, tota in se, & incommunicabilis alteri.

Dicitur 1. *substantia*, id est, ens per se subsistens: Ergo accidens, quod est ens alteri inhærens, non potest esse persona.

Dicitur 2. *singularis*; quia substantia universalis, v. g. animal in genere non existit nisi in singularibus: persona autem per se existit & est incommunicabilis alteri.

Dicitur 3. *intelligens*; quia substantia intellectu carens, v. g. lapis, equus, non vocatur persona, sed suppositum; nomen enim personæ aliquam

quam dignitatem exprimit, quæ non competit creaturis ratione destitutis. Absque tamen injuria persona nonnumquam vocatur suppositum.

Dicitur 4. *tota*, ut excludantur substantiæ partiales, v. g. anima, quibus non convenit ratio Personæ.

Dicitur 5. *in se*; nam si sit in alio, à quo ulterius perficiatur, quemadmodum natura humana in Christo, Persona non est. Hinc verbum assumpsit naturam humanam totam, non vero personam humanam; quia natura humana in Christo non est in se, ultimo terminata, sed est unita Verbo, à quo mirum in modum perficitur.

Dicitur 6. *incommunicabilis alteri*; quia personalitas est ultimus terminus substantiæ completæ, quæ est tota in se, & incommunicabilis alteri.

Ergo Persona est nomen concretum substantiale significans subjectum & formam. Natura completa est subjectum aut velut subjectum: forma est ipsa personalitas seu subsistentia, quæ à Græcis dicitur hypostasis. Liceat itaque dicere tres esse in Deo sive Hypostases, sive Personas, ita enim definitum est in Concilio Alexandrino sub S. Athanasio anno 363. ubi sopita est gravis controversia, quæ erat solum de nomine Græcos inter & Latinos; cum enim plures è Latinis non intelligerent vim nominis, contendebant, unam tantum dicendam Hypostasim; quia apud eos Hypostasis idem erat ac substantia.

Dices: si Hypostasis seu personalitas est ultimum complementum naturæ, quo redditur incommunicabilis, sequitur in Deo non posse esse tres Personas, sed unam dumtaxat; quia natura divina in Patre habet Hypostasim seu personalitatem:

ergo non potest ulterius communicari Filio & Spiritui sancto.

Nego antecedens, cujus confirmationis distinguo consequens : ergo Natura divina non potest ulterius communicari Filio & Spiritui Sancto cum paternitate seu cum subsistentia Patris, Concedo ; ut sic enim est incommunicabilis : non potest communicari sine paternitate seu sine subsistentia Patris, Nego consequentiam : Natura enim divina secundum se præcise spectata non est persona, & tribus personis potest esse communis.

Instabis : ad multiplicitatem concreti non sufficit multiplicitas formæ, sed insuper requiritur multiplicitas subjecti : ponantur v.g. duæ albedines in uno pariete, unum album facient non duos ; ergo cum in Trinitate sit una natura, erit quoque una persona, etiamsi sint tres personalitates, seu hypostases.

Distinguo antecedens : concreti accidentalis, Concedo : substantialis, Nego antecedens ; nam ad multiplicitatem concreti substantialis sufficit multiplicitas formæ, ut videre est in fœtibus monstrosis, in quibus si sint duæ animæ rationales, censentur duo homines in uno & eodem corpore ; & unus homo, si una anima rationalis informet duo corpora. Et ratio est, quia forma substantialis constituit rem in suo esse ; forma vero accidentalis, ut albedo, gratia sanctificans, supponit rem jam constitutam, & ei additur, sicut vestis corpori, quæ quantumcumque multiplicetur, erit nilominus unum vestitum. Porro tres personalitates seu subsistentiæ in Deo sunt tres formæ substantiales, quæ constituunt totidem personas, non vero tres Deos aut tria individua ;

dua; quia in tribus illis personis una est divinitas, quæ tanquam forma substantialis Deum constituit.

Q. 4. *Estne aliquis ordo inter divinas personas, propter quem Pater debeat primo loco nominari, Filius secundo, Spiritus Sanctus tertio?*

R. Est ordo originis, non temporis, aut dignitatis proprie dictæ.

Est ordo originis, qui in eo consistit, ut una persona respectu alterius habeat rationem principij, atque adeo prius attendatur: atqui ita se habent divinæ personæ. Namque Pater est ingenuitus, & à nullo procedens, & est principium Filii & Spiritus Sancti; Filius vero est à Patre, & una cum ipso est principium Spiritus Sancti; ergo ordine originis Pater est prior Filio, hoc est, prius attenditur, Filius vero Spiritu Sancto.

Non est ordo temporis; quia Deus ab æterno est intelligens & volens; imo est ipsamet actualis intellectio & volitio: Ergo Filius & Spiritus Sanctus, qui sunt termini, ille divinæ intellectionis, iste divinæ volitionis, necessario sunt ab æterno. Præterea Deus est substantia in se subsistens & ultimo completa in tribus subsistentiis: atqui tres illæ subsistentiæ sunt tres proprietates personales, nempe paternitas, filiatio, & spiratio passiva: ergo tres illæ subsistentiæ æque necessario sunt ab æterno, ac ipse Deus

Neque etiam est ordo dignitatis, quia tres personæ sunt consubstantiales & ejusdem naturæ, ac proinde omnino æquales, licet paternitas nomine tenus sonet aliquam dignitatem.

Accuratiorem notionem tum mysterii sanctissimæ Trinitatis, tum personæ generatim sumptæ

præmittere oportuit, ut Lector intelligat, quæ & quo ordine nobis tractanda sint in materia adeo remota sensibus & à naturali hominum intelligentia. Primo loco occurrunt processiones, quibus totum nititur Trinitatis mysterium, cum ex iis pendeat personarum pluralitas; si enim nulla sit in divinis processio, nullus erit Pater nullus Filius; nullus Spiritus Sanctus. Ex processionibus autem exurgunt relationes, seu respectus producentis ad productum, de quibus secundo loco nobis erit agendum: Constitutis vero personis per relationes, expendendum erit, quod caput est, an personæ sint consubstantiales & æquales; quæ sint propria cujusque personæ attributa, ac tandem utrum mysterium adeo incomprehensibile repugnet lumini naturali, destruat ratiocinii humani principia, sitque ab omnibus explicite credendum.

CAPUT II.

De divinis processionibus.

Q. 1. *Quid est divina processio?*

R. Est emanatio unius personæ ab alia.

Q. 2. *Dantur in Deo processiones?*

R. De fide est dari: probaturque ex Scriptura Psal. 2. *Ego hodie genui te*: Joan. 8. *Ego* (ait Christus) *ex Deo processi*: Joan. 15. *Paracletus, quem ego mittam vobis à Patre, Spiritum veritatis, qui à Patre procedit.*

Q. 3. *Quot sunt in Deo processiones?*

R. Duæ, nec plures, nec pauciores esse possunt;

sunt; quia in agente intellectuali non possunt esse nisi duæ operationes immanentes, scilicet intellectio & volitio, quibus respondent duo termini, nempe Verbum, & Amor: atqui Deus est agens intellectuale: Ergo.

Ergo tres sunt in Deo personæ, nec plures nec pauciores: altera improducta & producens, nimirum Pater; & duæ productæ, scilicet Filius terminus & Verbum intellectiois paternæ; & Spiritus Sanctus Amor & terminus volitionis Patris & Filii.

Dices: Sicut Pater intelligit & amat, ita Filius & Spiritus Sanctus: Ergo Filius & Spiritus Sanctus æque producunt Verbum ac Pater; & Spiritus Sanctus amorem æquè ac Pater & Filius; ac proinde plures sunt in Deo personæ quam tres.

Distinguo antecedens: Filius & Spiritus Sanctus intelligunt intellectioe essentiali & absoluta, Concedo: intellectioe notionali & relativa. Nego antecedens.

Intellectio itaque & volitio dupliciter in Deo accipiuntur: 1. essentialiter, quomodo illas spectavimus Tractatu de Attributis, ubi ratione naturali demonstravimus Deum non esse compositum ex natura, potentiis & actibus, v. gr. ex intellectu & intellectioe; sed esse actum simplicissimum, minusque propriè dici intelligentem & volentem, quam ipsammet intellectioem & volitionem. Unde cum Filius, & Spiritus Sanctus sint cum Patre unus Deus, sunt quoque cum Deo ipsammet essentialis intellectio, & volitio.

2. Notionaliter sumuntur intellectio & volitio, nempe cum spectantur ut conjunctæ cum paternitate

tate & spiratione activa, quæ à Theologis notiones vocantur; quia per eas una Persona cognoscitur ut distincta ab alia: Pater v. g. per paternitatem cognoscitur distingui à Filio, & uterque per spirationem activam à Spiritu Sancto.

Porro intellectio & volitio non sunt fecundæ & productivæ ullius termini, nisi quatenus notionales, hoc est, conjunctæ cum notionibus, intellectio cum paternitate, volitio cum spiratione activa, paternitate & filiatione.

Q. 4. *Quot ergo sunt notiones in divinis?*

R. Theologi numerant quinque, quæ sunt innascibilitas, paternitas, filiatio, spiratio activa; & spiratio passiva. Per innascibilitatem designatur primum principium à nullo alio procedens; unde innascibilitas primario significat aliquid positivum, secundo vero negationem, non solum nativitatis, quia nec Spiritus Sanctus nascitur; sed etiam cujuscunque processiois, ac proinde per eam Pater distinguitur à Filio & Spiritu Sancto. Sterilitas autem, quæ est in Spiritu Sancto, non numeratur inter notiones (quamvis absolute numerari posset,) tum quia non sonat dignitatem aliquam, sicut innascibilitas; tum quia sine ea Spiritus Sanctus satis intelligitur distingui ab aliis personis per amorem notionalem seu spirationem passivam; quæ est terminus volitionis Patris & Filii, post quam ulterior actus immanens concipi non potest in substantia spirituali. Quæri autem posset, num paternitas aliunde procedat, nisi videretur innascibilitas, qua designatur primum principium, & negotio omnis processiois.

Q. 5. *Quodnam est principium divinarum processio-*
num?

R. Prin-

R. Principium proximum *quo* Filii, est intellectus notionalis; & Spiritus Sancti, est voluntas notionalis; remotum *quo*, seu radicale, est natura divina: & principium *quod* seu denominationis est persona producens. Explicatur responsio exemplo rerum naturalium. Principium quo homo v.g. intelligit, est intellectus, & quo vult, est voluntas; remotum seu radicale, est natura humana, utpote radix, & prima ratio, qua ambæ illæ facultates conveniunt homini: principium autem *quod*, est ipse homo; quia principium *quod*, est subiectum seu persona quæ denominatur ab operatione; atqui homo proprie denominatur intelligens ab intellectu, & volens ab actu voluntatis. Sic intellectus notionalis est ratio proxima, qua Pater producit Filium seu Verbum, & voluntas notionalis, qua Pater & Filius producunt Spiritum Sanctum, qui est terminus amoris utriusque: ipsa denique persona Patris denominatur producens Verbum, seu generans Filium, & utraque simul persona producens Spiritum Sanctum.

Q. 6. *Quis est terminus divinarum processionum?*

R. Similiter terminus formalis *quo* productus, sunt Verbum seu filiatio & spiratio passiva: terminus *qui*, est persona producens.

Q. 7. *Spiritus Sanctus proceditne à Patre & Filio?*

R. De fide est ab utroque procedere; ita enim definitum est in Concilio secundo Lugdunensi, & in Concilio Florentino, consentientibus Græcis, qui in iis Conciliis adfuerunt, sed à doctrina catholica postmodum recessere, negantque pertinaciter Spiritum Sanctum à Filio procedere, contra expressa Scripturæ verba; de eo enim di-

citur Joan. 16. *ille me clarificabit, quia de meo accipiet.* Joan. 15. *cum autem venerit Paracletus, quem ego mittam vobis à Patre, Spiritum veritatis, qui à Patre procedit.* Missio autem in divinis non est nisi à persona producente, ut infra dicetur. Roman. 8. & Galat. 4. Spiritus Sanctus dicitur Spiritus Christi, Spiritus Filii, ergo revera à Filio procedit.

Dices 1. Patres Græci scribunt Spiritum Sanctum ex Patre procedere per Filium: ergo Latini asserere non debuerunt eum procedere ex Filio.

Nego consequentiam: namque (fatentibus ipsis Græcis in Concilio Florentino) procedere per Filium idem est ac procedere ex Filio. Ideo autem Patres Græci sic loquuntur; quia Pater communicat Filio spirandi virtutem. Unde sanctus Augustinus docet Spiritum Sanctum principaliter procedere à Patre.

Dices 2. Quatuor prima Concilia docent Spiritum Sanctum procedere à Patre, nulla facta Filii mentione; imo Concilium Ephesinum, quod est tertium generale, sub anathemate prohibet, ne quidquam addatur symbolo Nicæno, ubi simpliciter definitum est circa Spiritum Sanctum, *qui à Patre procedit.* Ergo culpandi sunt Latini, quod in eodem symbolo addiderint, *Filioque.*

Nego consequentiam: tum quia Concilia tractant solummodo de rebus, quæ in controversiam veniunt. Unde cum in Concilio Nicæno quæstio non moveretur de divinitate Spiritus Sancti, sed de divinitate Filii, Concilium solum asseruit Filii divinitatem. Postmodum mota est quæstio de divinitate Spiritus Sancti, quæ asserta est in Concilio primo Constantinopolitano. Posteriorio-

sterioribus autem sæculis Græci excitarunt controverſiam circa proceſſionem Spiritus Sancti; quæ controverſia terminata eſt in Concilio Lugdunenſi, in quo Græci cum Latinis decantarunt ſymbolum cum additione *Filioque*. Nec obſiſtit prohibitio Concilii Ephesine; quia Concilia Lugdunenſe & Florentinum; utpote æcumenica ſunt ejuſdem auctoritatis ac Concilium Ephesinum, & Concilia poſteriora mutare poſſunt, quæ à prioribus ſunt ſancita in iis quæ ſpectant diſciplinam, tum maximè, cum id exigit rerum mutatio. Porro Concilium Ephesinum caute prohibuit ne quidquam adderetur Symbolo Nicæno propter Arianoſ, qui tunc temporis novas in dies fabricabant fidei formulas ad evertendum Symbolum Nicænum, & occultandum ſuum errorem: tempore vero Concilii Lugdunenſis, Arianis jam extinctis, propulſandus erat Græcorum error: quo docebant Spiritum Sanctum à Filio non procedere.

Q. 8. *Spiritus Sanctus diſtinguereturne à Filio, ſi ab eo non procederet?*

R. Affirmant Græci, quibus ſe adjungunt Scotiſtæ. Sed effatum ſancti Anſelmi ab omnibus Theologis eſt receptum, nempe, in divinis omnia ſunt unum, ubi non obviat relationis oppoſitio; atqui ſi Spiritus Sanctus à Filio non procederet, inter eos non obviaret relationis oppoſitio: Ergo eſſent una Perſona.

Dices: paternitas & filiatio relative non opponuntur ſpirationi paſſivæ, & tamen ab ea realiter diſtinguuntur: Ergo.

Diſtinguo antecedens: non opponuntur præciſe ſpectatæ, Concedo: non opponuntur quatenus

tenus modificatæ per spirationem activam, cum qua conferunt ad productionem Spiritus Sancti, Nego antecedens. Itaque in hypothefi quod Spiritus Sanctus non procederet à Patre nec à Filio, paternitas & filiatio essent alterius rationis, nec constituerent personas à Spiritu Sancto realiter distinctas.

Q. 9. *Pater & Filius suntne duo principia Spiritus Sancti?*

R. Minimè; quia in illis unica est spiratio activa, seu virtus spirandi. Quemadmodum ergo tres personæ non sunt tria principia creaturarum, quia per unicam omnipotentiam illa producant; sic Pater & Filius non sunt duo principia Spiritus Sancti; quia spirant unica virtute. Possunt tamen dici adjectivæ duo spirantes; quia, ut jam observavimus, ad multiplicationem concretorum adjectivorum sufficit multiplicitas subiectorum.

CAPUT III.

De relationibus divinis.

Q. I. *Dantur in Deo relationes reales?*

R. Affirmativè; quia paternitas & filiatio absque mentis opera, & nemine cogitante, existunt in Deo: atqui paternitas & filiatio sunt relationes; Pater enim per paternitatem refertur ad Filium, & Filius vicissim per filiationem refertur ad Patrem. Ergo.

Dices: Relatio realis dicit dependentiam unius ab altero: ergo in Deo nulla est relatio realis.

Nego

Nego antecedens ; Pater enim non dependet à Filio , nec paries similis ab altero pariete : ergo relatio non dicit dependentiam , sed solummodo connotationem omnino necessariam ; adeo ut non possit esse pater sine filio , nec paries similis , nisi coexistat alter paries ei similis.

Q. 2. *Quot sunt in Deo relationes reales?*

R. Quatuor, nempe paternitas, filiatio, spiratio activa, & spiratio passiva; quia totuplex est relatio, quotuplex est ordo seu respectus unius ad alterum: atqui in Deo quadruplex est respectus; paternitas enim est ad filium, & filiatio ad Patrem; spiratio activa ad personam spiratam seu Spiritum Sanctum; & spiratio passiva ad spiratorem.

Q. 3. *Relationes illæ suntne categoricæ?*

R. Minimè; quia relatio categorica est accidens: atqui in Deo nullum est accidens: Ergo.

Q. 4. *Quomodo relationes divinæ inter se distinguuntur?*

R. Vel sibi invicem opponuntur, vel non: si primum, distinguuntur realiter: si secundum, non distinguuntur nisi virtualiter, & per mentem formaliter; quia in divinis non est distinctio realis, ubi non obviat relationis oppositio.

Ergo spiratio activa est realiter distincta à spiratione passiva, utpote ipsi opposita: indistincta vero à paternitate & filiatione, quibus non opponitur.

Ergo paternitas, filiatio, & spiratio passiva realiter inter se distinguuntur propter oppositio-
nem, quæ inter eas intercedit, directa quidem & immediata paternitatem inter & filiationem; indirecta vero & mediata paternitatem & filiationem

nem inter & spirationem passivam, ratione scilicet spirationis activæ; paternitas enim & filiatione conferunt ad productionem Spiritus Sancti, ut jam observavimus.

Ergo paternitas, filiatione, & spiratio passiva sunt relationes personales, id est constitutivæ trium personarum; quod enim est principium distinctivum, est & constitutivum: rationalitas v. g. per quam homo essentialiter differt à bruto, hominem essentialiter constituit in esse hominis: atqui tres personæ non distinguuntur nisi per relationes: Ergo per illas constituuntur in esse personæ.

Dices; persona, ex sancto Augustino, dicitur ad se, non ad alium: Ergo ratio constitutiva divinæ personæ, seu personalitas non est relatio.

Distinguo antecedens: persona non est ad alium quoad vocis sonum, Concedo: quoad rem hac voce significatam, Subdistinguo: in creatis, Concedo: in divinis, Nego antecedens. Itaque persona, secundum rationem genericam, significat substantiam completam in se existentem, ac proinde absolutum quid & minime relativum; sed secundum rationem specificam potest significare substantiam completam in se ita existentem, ut ordinem & relationem habeat ad aliam personam; nam in divinis hæc eadem persona est Pater, aut Filius, nec constituitur persona nisi per paternitatem aut filiationem, cum per eam solam ab altera persona distinguatur.

Instabis: prius est constitui, quam referri: Ergo personæ divinæ non constituuntur per relationem.

Distin-

Distinguo antecedens : quàm referri relatione accidentali & categorica, Concedo : quam referri relatione substantiali & transcendente, Nego antecedens ; nam potentia v. g. visiva non constituitur in esse potentiæ, nisi per aliquid relativum ; quia natura tota potentiæ est ad aliud, puta ad objectum visibile.

CAPUT IV.

De æqualitate & consubstantialitate trium Personarum.

Circa personam Patris nulla est controversia ; omnes enim sive Mahumetani, sive Judæi, sive Christiani conveniunt personam divinam, quam vocamus Patrem, esse verum Deum. Sed gravis est controversia inter Christianos, Catholicos, & Mahumetanos, Judæos ; & plures hæreticorum sectas, utrum Filius & Spiritus Sanctus sint Patri æquales & consubstantiales ?

§. I

Filius est verus Deus Patri consubstantialis.

Probatur ex Scriptura, Joan. i. *In principio erat Verbum, & Verbum erat apud Deum, & Deus erat Verbum. omnia per ipsum facta sunt, & sine ipso factum est nihil.* Hic Verbum non est factum, ergo non est creatum ; sed verus Deus, qui fuit semper apud Patrem.

Nec dicant Sociniani Verbum in textu Græco dici Deum sine articulo, & qui semper præfigitur, quando significatur verus Deus, Θεός ; nam

v. 13. & 18. Deus summus legitur sine articulo, sicut & Matth. 14. v. 33. & 1. Cor. 8. v. 4. & 6. Contra vero Christus cum articulo dicitur Deus Rom. 9. v. 5. ut observat sanctus Chrysostomus hom. 3. in Joan. Quin & falsi Gentium Dii nominantur cum ejusmodi articulo. Gal. 4. v. 8. Act. 7. v. 43. Rom. 9. *ex quibus (Judæis) est Christus secundum carnem, qui est super omnia Deus benedictus.*

Philipp. 2. *Cum in forma Dei esset; non rapinam arbitratus est esse se æqualem Deo; sed semetipsum exinanivit formam servi accipiens.* Insignis est iste locus, solusque sufficit ad convincendos Socinianos. Christo hic duplex tribuitur forma, scilicet forma Dei, & forma servi, id est, hominis, quam accipiendo semetipsum exinanivit. Ergo sicut per formam servi verus est homo; ita per formam Dei verus est Deus, adeo ut potuerit absque rapina, ut loquitur Apostolus, se exhibere æqualem Deo; sed majestatem suam voluit occultare, vilem servi formam induens velut habitum.

Prima Joannis 5. *Hic (Christus) est verus Deus, & vita æterna.*

Dices 1. Nomen Dei est æquivocum, soletque in Scripturis indiscriminatim tribui Deo & creaturis in Dignitate constitutis, ut Exodi 7. ubi Deus ait Moyse, *Constitui te Deum Pharaonis.* Psal. 81. *Deus stetit in Synagoga Deorum,* id est Judicum. Et infra, *Ego dixi, Dii estis, & filii excelsi omnes.* Ergo non potest concludi Filium esse Patri consubstantialem; ex eo quod in Scripturis vocetur Deus.

Distinguo antecedens: est æquivocum in novo testamento; Nego; nam apud Latinos Deus est

est nomen substantiæ, inquiebat supra Tertullianus, sicut & apud Græcos Θεός; neque Dominus, inquit sanctus Irenæus lib. 3. c. 6. neque Spiritus sanctus, neque Apostoli eum, qui non esset Deus, definitive & absolute Deum nominassent, qui non esset verus Deus. Est æquivocum in veteri Testamento; Subdistinguo: quando in textu originali, Hebraico scilicet, Deus exprimitur per vocem *Eloim*, transeat: quando exprimitur per nomen tetragrammaton *Jehova*; Nego antecedens. In Confesso enim est apud omnes tum Judæos, tum Christianos, hoc nomine significari Dei essentiam: atqui Christus in veteri Testamento sæpè vocatur *Jehova*: Isa. 7. *Ecce virgo concipiet, & pariet filium, & vocabitur nomen ejus Emmanuel, Jehova*, cap. 9. *parvulus natus est nobis... vocabitur nomen ejus Admirabilis... Deus, Jehova*, Zach. 11. *appenderunt mercedem meam triginta argenteos, & dixit Dominus (Jehova) ad me... decorum pretium, quo appretiatus sum ab eis*. Quæ de Christo esse prædicta constat ex Matthæi capite 27. v. 9. Idem Propheta cap. 12. inducit Deum, (*Jehova*) de se loquentem, *aspicient ad me, quem confixerunt*, scilicet quando unus militum lancea latus ejus aperuit Joan. 19. Malach. 3. Deus (*Jehova*) sic loquitur: *Ecce ego mitto Angelum meum, & præparabit viam ante faciem meam: quem Angelum ipse Gabriel Angelus Luc. 1. v. 16. & 17. interpretatur de Joanne Baptista, multos filiorum Israel, inquit, convertet ad Dominum Deum ipsorum, & ipse præcedet ante illum in spiritu & virtute Eliæ; ac proinde Christus, quem præcessit Joannes, est Deus (Jehova) filiorum Israel*. Sociniani textibus Zachariæ

D. Habert. Theolog. Tom. VIII. H & Ma.

& Malachiæ se victos confitentur, dum unum reponunt, nempe illos esse corruptos.

Dixi in responsione, *transeat*, scilicet nomen *Eloim*, esse æquivocum; quia revera non est, ex eo quòd semel aut bis tribuatur creaturis; quis enim dixerit nomina, *Leo*, *lapis*, *angularis*, esse æquivoca, quia Christus in Scripturis aliquando appellatur Leo de Tribu Juda, lapis angularis? Æquivoca quippe sunt nomina, quæ ex communi usu tribuuntur rebus diversæ prorsus naturæ: sic canis est nomen æquivocum respectu canis terrestris & marini, quia ambo conveniunt in illo nomine, & vix aliter vocantur, quamvis natura prorsus differant. Sed quemadmodum non sequitur nomen *Leo* esse æquivocum, quia metaphoricè & figuratè rarò de Christo prædicatur; ita nec dici potest nomen *Deus* esse æquivocum, quia creaturis semel aut bis tribui legitur.

Dices 2. Christus Joan. 10. amovit hancce Judæorum opinionem, quòd se Deo æqualem faceret; ostenditque se Deum dixisse, aut Filium Dei, quomodo in Scripturis, ii, ad quos sermo Dei factus est, dicuntur Dii & filii Excelsi: Ergo.

Nego antecedens: Christus enim, ut compe-scat furentes adversum se Judæos, quia dixerat, *Ego & Pater unum sumus*, argumentatur à minori ad majus. Scriptura Deos appellat, qui indubitatis signis probant se à Deo missos, & nomine ejus locutos: atqui opera mea, quæ nemo alius fecit, probant me à Patre missum & vera locutum: Deus enim non potest miracula edere ad confirmandum mendacium: Ergo absque blasphemia dixi me esse Filium Dei. Si ratione tam opportuna & ad persuadendum accommodata plac-

placabiles se præbuisſent Judæi, audiſſent à Chriſto, quàm ſublimiori modo verè dixiſſet ſe eſſe Filium Dei. Sed cùm nihilominus in ipſum furerent, eos in cæcitate ſua dimiſit, monente Scriptura Eccli. 32. *ubi auditus non eſt, non effundas ſermonem.*

Inſtabis: Chriſtus probat ex operibus & miraculis à ſe patratis, ſe eſſe Filium Dei: atqui miracula non probant verum Deum eſſe & Filium ejus naturalem, qui ea operatur; nam Elias & alii Prophetæ patrarunt miracula, ex quibus colligi non poteſt ipſos fuiſſe filios Dei naturales & conſubſtantiales: Ergo Chriſtus hoc ſuo ratiocinio non concludit ſe eſſe Filium Dei conſubſtantialem, ſed ſolum ſecundùm quandam denominationem.

Diſtinguo majorem: ex operibus & miraculis editis in confirmationem ſuæ doctrinæ, qua aſſerebat eſſe ſe Filium Dei unigenitum, Joan. 3. v. 16. æqualem Patri, Joan. 5. v. 18. Concedo: quæ aſſerebat ſe eſſe Filium Dei eo modo, quo Elias & alii Prophetæ dicuntur Filii Dei, Nego majorem. Itaque miracula, ſi ſecundùm ſe præciſè ſpectentur, non probant Deum eſſe, qui ea operatur, ut patet ex cap. 14. Act. 1. 10. ſed quando eduntur ad probandam divinitatem ejus qui loquitur, ſunt ſigna indubitata illum eſſe Deum. Porrò nec Prophetæ, nec Apoſtoli patrarunt miracula ut perſuaderent ſe eſſe Deos, abſit; ſed ut teſtarentur Meſſiam in lege promiſſum, & in Evangelio exhibitum eſſe unigenitum Dei Filium, Patri conſubſtantialem, quam veritatem Chriſtus ipſe innumeris ſignis & prodigiis confirmavit.

Dices 3. Eccli. 24. v. 5. & 12. Sapiaientia, quæ est Christus inter creaturas, prima numeratur, *Ego ex ore Altissimi prodixi primogenita ante omnem creaturam.... qui creavit me, requievit, in tabernaculo meo.* Ergo.

Nego conseq. Sapiaientia enim dicitur 1. primogenita eo sensu quo legitur Matth. 1. de beata Virgine, *peperit filium suum primogenitum*, non quod alios postea peperit; sed quod nullum prius pepererit. 2. dicitur creata creatione latius sumpta pro quavis productione. E enim verò quæ eodem capite dicuntur de Sapiaientia, convenire non possunt creaturæ.

Alii textus benemulti obijciuntur à Socinianis, sed facillè solvi possunt.

Matth. 17. ait Christus ad Jacobum & Joannem, *non est meum dare vobis*, scilicet ratione propinquitatis carnalis, quo titulo ambo illi fratres primas sedes ambiebant.

Matth. 19. Christus rejicit nomen Magistri boni: *Nemo bonus*, inquit, *nisi solus Deus.* Sed ejusmodi responsum est ad mentem juvenis, qui Christum ut purum hominem habebat.

Matth. 24. de die ultimo ait Christus: *Nemo scit, neque Filius*, &c. quod de Christo ut homine intelligi debet. Utrum autem reverà Christus sic spectatus ignoraverit diem judicii, expendetur, ubi de Incarnatione.

Joan. 14. ait Christus, *Pater major me est*, nempe secundum Christi humanitatem.

Joan. 17. v. 3. Christus Patrem sic alloquitur: *hec est autem vita æterna, ut cognoscant te solum verum Deum.* Sed hoc dicitur comparatè ad falsos Deos Gentilium, non vero ad duas Personas sanctissimæ

mæ Trinitatis; ita ut vox *solus* conjungatur substantivo *Deus*, non verò substantivo *Pater*, quasi sensus sit; Tu, Pater, es solus verus Deus, non verò: Tu solus, Pater, es verus Deus. Et v. 22. *ut sint unum, sicut & nos unum sumus.* Quæ à Christo dicuntur ratione humanitatis, qua affectu unum est cum Patre: non ratione divinitatis, qua cum Patre unum est in natura.

I. Cor. 15. v. 28. *Cum autem subjecta fuerint illi (Patri) omnia, tunc & ipse Filius subjectus erit ei; scilicet ratione corporis mystici, quod est Ecclesia, quæ destructa morte & omni peccato, evacuatoque omni principatu & potestate inimici, perfectè cum suo capite subjiçietur Deo.*

§. II.

Spiritus sanctus est æqualis & consubstantialis Patri, ac Filio.

Probatur Matth. 28. *Euntes docete omnes gentes, baptizantes eos in nomine Patris & Filii, & Spiritus sancti.* I. Joan. 5. *Hi tres unum sunt.* Sub hac fide initiantur Christiani, & tribus personis consecrantur. Act. 5. Sanctus Petrus Ananiam sic increpat: *Cur tentavit satanas cor tuum mentiri te Spiritui sancto? non es mentitus hominibus, sed Deo.* I. Cor. 6. *An nescitis, quoniam membra vestra templum sunt Spiritus sancti?* atqui templum soli vero Deo competit, nec ullius creaturæ dici possumus templa.

Dices I. Quæ in Scripturis de Spiritu sancto leguntur, intelligenda sunt de donis gratiæ, ut I. Thessal. 4. *Spiritum nolite extinguere:* ergo Spiritus sanctus non est persona divina.

Distinguo antecedens : intelligenda sunt de donis gratiæ, aliquando, ut citato capite, Concedo: Semper, Nego antecedens: namque Spiritus sanctus à suis donis manifestè distinguitur Rom. 8. *Charitas diffusa est in cordibus nostris per Spiritum sanctum Hæc omnia operatur unus atque idem Spiritus dividens singulis prout vult.* Unde Dydimus sic concludit c. I. de Spiritu sancto, *quorum ergo una est operatio, una est substantia.*

Dices 2. Plura de Spiritu Sancto leguntur, quæ Deo vero convenire nequeunt, ut Rom. 8. *Spiritus postulat pro nobis gemitibus inenarrabilibus.* Ephes. 4. *Nolite contristare Spiritum sanctum Dei.* Ergo Spiritus sanctus non est Deus.

Distinguo antecedens. Plura leguntur scripta figuratè & metaphoricè, quemadmodum Genes. 6. Deus dicitur tactus dolore cordis, Concedo: plura leguntur scripta propriè, Nego antecedens. Itaque Spiritus postulat gemitibus, id est, postulare facit, interprete S. Augustino & aliis. Contristatur, hoc est, improbat; quod malè gerunt homines.

Dices 3. Qui mittitur minor est eo, qui mittit: atqui Spiritus sanctus mittitur à Patre & Filio: Ergo.

Distinguo majorem: qui mittitur cum imperio & dependentia, Concedo: qui mittitur sine imperio & dependentia, ut accidit in missionibus divinis, de quibus mox, Nego majorem.

CAPUT V.

De Missionibus Divinis.

Q. 1. *Danturne missiones divine?*

R. Dantur; Christus enim Joan. 7. de seipso ait, *ab ipso sum, & ipse me misit.* Et cap. 14. de Spiritu sancto, *quem mittet Pater in nomine meo.*

Q. 2. *Quomodo definitur missio?*

R. Definitur processio unius personæ ab alia adjunctum habens effectum temporalem, pertinentem ad ordinem gratiæ.

Dicitur 1. *processio*, quia persona, quæ non procedit, propriè non mittitur: *Pater*, inquit Sanctus Augustinus lib. 4. de Trinitate cap. 20. *non dicitur missus: non enim habet de quo missus sit, aut ex quo procedat.*

Dicitur 2. *adjunctum habens effectum temporalem*; quia processio præcisè spectata est æterna; missio verò temporaliter dicitur Galat. 4. *ubi venit plenitudo temporis, misit Deus Filium suum.* Unde sanctus Augustinus citato c. 20. sic habet, *non eo ipso quòd de Patre natus est, missus dicitur Filius, sed vel eo quòd apparuit mundo Verbum caro factum, vel eo quòd ex tempore cujusque mente percipitur.*

Dicitur 3. *pertinentem ad ordinem gratiæ*; persona enim divina propriè non dicitur mitti propter opera ordinis naturalis.

Dices 1. Isa. 48. *Filius dicitur missus à Spiritu sancto: Ergo Missio in divinis non est processio.*

Distinguo antecedens: missus est à Spiritu sancto quatenus homo, quem Spiritus sanctus

omnium gratiarum donis ornavit, Concedo: quatenus Verbum & secunda persona sanctissimæ Trinitatis, Nego antecedens.

Dices 2. qui mittit, voluntatem ejus, qui mittitur, movet, ac determinat: atqui Pater voluntatem Filii nec movet, nec determinat: Ergo.

Distinguo majorem: quando mittens & missus habent diversas naturas & voluntates, ut in creatis, Concedo: quando una est mittentis & missi singularis natura & voluntas, Nego majorem.

Ergo una persona non mittitur, quin aliæ adsint propter circuminseccionem, juxta illud Joan. 14. *ad eum veniemus, & mansionem apud eum faciemus.* Sed in illa inhabitatione Filius & Spiritus sanctus propriè mitti dicuntur, quia procedunt: Pater verò dari, quia à nullo procedit.

Q. 3. *Quid est circuminseccio?*

R. Definitur à Theologis, intima existentia unius personæ in altera sine confusione personæ: *Totus Pater in Filio & Spiritu sancto*, inquit S. Fulgentius lib. de Fide cap. 1. *& totus Filius in Patre & Spiritu sancto; & totus Filius & Pater in Spiritu sancto est*, nimirum propter unitatem naturæ, à qua tres personæ non distinguuntur realiter.

Q. 4. *Quare una persona potius dicitur mitti, quam alia, cum sola nec mittatur, nec operetur adjunctum effectum temporalem?*

R. Ideo una persona potius mitti dicitur; quia effectus temporaliter producendus specialem habet affinitatem, & similitudinem cum propria ejus notione. Hinc quia Pater est primum notionale principium, appropriatur illi creatio & gubernatio universi: Filio quoque, quia procedit ut Verbum terminus cognitionis æternæ, adscri-

adscribitur omne donum intellectuale, ut sapientia, & propter illud dicitur mitti. Denique ad Spiritum sanctum, qui est terminus volitionis & amoris Patris ac Filii, referuntur omnia dona, quæ perficiunt voluntatem, ut sanctificatio, charitas, &c. quorum infusio appellatur Spiritus sancti infusio.

Q. 5. *Quotuplex est missio?*

R. Duplex; alia visibilis, cum adjunctum habet effectum visibilem, vel permanentem, puta Incarnationem; vel transeuntem, v. g. speciem columbæ, linguas igneas die Pentecostes: alia invisibilis, quæ est cum effectum invisibili, qualis est infusio gratiæ & charitatis.

CAPUT VI.

De Prima Persona.

Q. 1. *Quæ sunt nomina propria primæ Personæ?*

R. Dicitur 1. Pater, quia propriè generat Filium. 2. ingenitus, non quia non nascitur, hoc enim sensu Spiritus sanctus est ingenitus; sed quia non producit.

Q. 2. *Pater potestne dici fons & origo totius divinitatis?*

R. Non potest nisi impropriè; quia principium denotat processionem: divinitas autem non procedit, sicut definitum est in Concilio Lateranensi quarto, capite *Damnamus*; sed est ipsa met pricipium radicale omnium processionum.

Q. 3. *Potestne vocari auctor, aut causa Filii?*

R. Primam appellationem detestatur sanctus Augustinus lib. 3. contra Maximinum cap. 14.

existimans illud nomen significare quandam excellentiam & auctoritatem; usurpatur tamen à sancto Hilario lib. 4. de Trinitate. Similiter apud Græcos Pater sæpius dicitur causa; sed juxta usum Latinæ vocis non potest ita vocari; quia causa est principium influens in aliud, id est, in rem alterius naturæ: Filius autem in divinis non est aliud à Patre, sed alius dumtaxat.

Q. 4. *Veræ suntne hæ propositiones: Pater omnia intelligit verbo: Pater & Filius diligunt se Spiritu sancto?*

R. Si sumantur notionaliter, veræ sunt; nam Pater producendo Verbum omnia intelligit: Pater & Filius mutuo amore producant Spiritum sanctum. Si autem accipiantur essentialiter, falsæ sunt; quia neque Filius est forma, per quam Pater intelligit; neque Spiritus sanctus forma, per quam Pater & Filius sese diligunt: Pater enim intelligit per intellectionem, & amat per volitionem; quæ sunt attributa essentialia communia tribus Personis. Unde sanctus Augustinus improbat hanc propositionem, *Pater est sapiens sapientia genita.*

CAPUT VII.

De secunda Persona.

Q. 1. *Quæ sunt nomina propria secunde Personæ?*

R. Dicitur 1. Filius; quia procedit per veram generationem. 2. Verbum, & à Tertuliano Sermo; quia est terminus intellectionis paternæ, ob eamque rationem nonnunquam vocatur Sapientia genita. 3. Imago; quia imago definitur,

finitur, unius ab alio deducta similitudo: atqui secunda Persona deducitur seu producitur à Patre tanquam ejus similitudo; quid enim est verbum, nisi similitudo & imago rei? *Ista imago*, inquit sanctus Ambrosius lib. 1. de Fide cap. 4. *non est falsa, quia veritas est: non est muta; quia Verbum est, non est mortua, quia vita est: non est inanis, quia virtus est.* Hæc imago dicitur splendor gloriæ, candor majestatis divinæ, figura & character substantiæ paternæ, hoc est, similitudo expressa personæ Patris.

Q. 2. *Quare secunda Persona dicitur Filius?*

R. Quia procedit per veram generationem, generatio enim definitur, origo viventis à vivente principio conjuncto in similitudinem naturæ: atqui hæc definitio convenit processioni Filii; est enim origo Personæ viventis à Patre vivente, principio conjuncto, id est, substantia generantis communicata genito in similitudinem naturæ: Ergo.

Q. 3. *Quare processio secundæ Personæ est potius generatio quam processio Spiritus sancti; cum processio Spiritus sancti sit etiam origo viventis à vivente, principio conjuncto, in similitudinem naturæ? Spiritus enim sanctus est vivens, proceditque à principio vivente, scilicet Patre & Filio, quorum substantia ipsi communicatur in similitudinem naturæ, utpotè qui sit Deus, æqualis Patri & Filio?*

R. Hic exclamare licet cum Propheta Isa. 53. *Generationem ejus quis enarrabit?* Unde S. Gregorius Nazianzenus oratione prima, *honoretur silentio.* Et S. Augustinus lib. 3. contra Maximinum cap.

14. *distinguere inter illam generationem & hanc processionem, nescio, non valeo, non sufficio.* Quin Sanctus Irenæus

Irenæus lib. 2. contra hæreses cap. 48. & S. Athanasius Or. 2. insanos pronuntiant, qui divinæ generationis rationem enarrare præsumunt. Et hæc est unica Sanctorum responsio adversus argutias Hæreticorum ex Philosophia petitas.

Verùm iidem Patres, ubi Catholicis illud mysterium explanare student, probabilibus conjecturis discrimen definiunt divinam generationem inter & Spiritus sancti processionem, illudque præsertim repetunt, ut sanctus Augustinus in Psalmum 44. & lib. 9. de Civitate Dei cap. 12. sanctus Athanasius Orat. 3. sanctus Gregorius Nazianzenus Orat. 36. & alii, ex eo quòd secunda Persona non verò tertia procedat ut Verbum seu terminus cognitionis paternæ, ac proinde ut vivens Patris imago ab eo deducta, & verus Filius; namque proprium est intellectus assimilare sibi objectum cognitum, ejusque imaginem exprimere.

Dices: Spiritus sanctus habet naturam divinam vi suæ processionis; tum quia illam non habet à se, tum quia procedit ut Deus: Ergo.

Nego antecedens; Spiritus enim sanctus non procedit ut Deus, sed ut amor, qui indenticè & realiter, non autem vi suæ processionis est Deus; quia amor ex ratione sua non assimilatur amanti objectum amatum, sed unit solummodò: contra verò cognitio est expressa imago & similitudo objecti cogniti, ac proinde secunda persona, utpote Verbum & terminus cognitionis paternæ, procedit ut Deus, hoc est, ut Patri per omnia similis.

Q. 4. *Ex quarum rerum cognitione procedit Verbum?*

R. 1. Procedit per se & formaliter ex cognitione comprehensiva Essentiæ divinæ, trium Personarum.

sonarum, & creaturarum possibilem; quia Verbum est formalis expressio adæquata & infinite perfecta Personæ Patris, ac proinde divinæ ejus naturæ & proprietatum personalium: atqui non esset perfecta & adæquata expressio, nisi cognitio, ex qua procedit, esset comprehensiva Divinæ naturæ, hoc est, nisi se extenderet ad omnia, quæ potest Divina natura, & ad omnes ejus subsistendi modos, qui sunt tres Personalitates: Ergo.

R. 2. Verbum non procedit formaliter ex cognitione creaturarum existentium; quia Verbum, utpote summè necessarium, non procedit formaliter, nisi ex cognitione absolute necessaria: atqui cognitio creaturarum existentium non est absolute necessaria, cum earum existentia sit contingens, & absolute possint non existere.

R. 3. Verbum procedit concomitanter ex cognitione creaturarum existentium; quia illa cognitio, quamvis non necessaria, est tamen æterna, & identicè eadem ac cognitio essentiæ divinæ: Ergo processio Verbi non est sine cognitione creaturarum existentium: *Verbum*, inquit sanctus Augustinus lib. 11. Confessionum capite secundo, *semper* *piternè* *dicitur*, & *eo semper* *piternè* *dicuntur omnia*.

Dices: Nondum concipitur Verbum existere in instanti quo producit, alioquin supponeretur prius existere, quam generaretur: Ergo non procedit ex cognitione sui ipsius, multò minus ex cognitione Spiritus sancti, aut creaturarum possibilem, quæ sunt Verbo posteriores.

Nego antecedens; Verbum enim est Patri coæternum, & Spiritus sanctus utrique, nec in æternitate ulla est prioritas durationis, sed solum origi-

originis, quæ non est instans, in quo non fuerit Verbum, sed dumtaxat instans, à quo Verbum emanare concipitur. Cum autem Pater ex cognitione sui ipsius producat Verbum, nec possit esse aut concipi Pater, vel spirator, quin concipiatur habere Filium, & producere Spiritum Sanctum; manifeste sequitur Filium æquè procedere ex cognitione sui & Spiritus Sancti, ac ex cognitione Patris.

Ergo, inquires, Verbum ex seipso & ex Spiritu Sancto procedit, objectum enim cognitionis concurrir ad Verbum efformandum.

Nego sequelam, cujus confirmationem distinguo; objectum concurrir, si sit motivum, hoc est, si intellectum moveat, Concedo: si sit terminativum solummodo, Nego. Porro Intellectus divinus ex sese infinitam habet vim intelligendi, nec indiget concursu objectorum, ac proinde nec Verbum, nec Spiritus Sanctus, nec creaturæ concurrunt ad intellectionem notionalem Patris, sed illam solummodo terminant.

CAPUT VIII.

De tertia Persona.

Q. 1. *Quæ sunt nomina propria tertiæ Personæ?*

R. Vocatur 1. Spiritus Sanctus: 2. Amor. 3. Donum.

Q. 2. *Cur tertia Persona dicitur Spiritus Sanctus, cum Pater & Filius sint æque spiritus & sancti?*

R. Spiritus dupliciter accipi potest: essentialiter pro substantia immateriali, & sic nomen Spiritus est commune tribus personis; quia una est earum

earum substantia simplicissima, & omnis materiæ expers. 2. notionaliter, ita ut spiritus idem sit ac spiratus, & hoc sensu nomen Spiritus est proprium tertiæ Personæ; quia nulla alia producitur spiratione.

Q. 3. *Quare non simpliciter dicitur Spiritus, sed cum adjuncto sanctus?*

R. Quia procedit per voluntatem, ut amor purissimus & immutabilis: cum enim amor sit unio & nexus amantis cum re amata, substantiæ spirituales puræ vel impuræ fiunt, quatenus per amorem rebus vel præstantioribus aut vilioribus admiscuntur, *facti sunt abominabiles, sicut ea quæ dilexerunt*, Oseæ 9. Ergo tertia Persona, utpote nexus seu amor Patris & Filii purissimus & comprehensivus, vi suæ processions est sancta, vel potius ipsa sanctitas, cujus participatione Angeli & homines sancti evadunt, & ideo eorum sanctificatio Spiritui Sancto appropriatur.

Ergo amor notionaliter sumptus est nomen proprium Spiritus Sancti; essentialiter verò est commune tribus Personis, juxta illud Joan. 4. *Deus charitas est.*

Q. 4. *Ex quarum rerum amore procedit Spiritus Sanctus?*

R. Per se formaliter procedit ex amore diviniæ essentiæ & trium Personarum; quia solus ille amor est necessarius: concomitanter vero ex amore creaturarum existentium, quia in Deo est unus amor, quo se & cætera diligit propter seipsum; sed seipsum diligit necessario, cætera liberè: Spiritus autem sanctus, cum sit persona summe necessaria, non procedit formaliter & per se ex amore libero, sed solum concomitanter, ut diximus de processione Verbi.

Dixi,

Dixi, *creaturarum existentium*; quia cum ex dictis Deus non bene velit creaturis possibilibus & nunquam futuris, nullus in Deo est earum amor, ex quo procedat Spiritus Sanctus.

Q. 5. *Quare Spiritus Sanctus vocatur donum?*

R. Quia donum definitur, res gratuito ac liberaliter data sine spe retributionis: atqui prima donatio est amor, quo quis alteri bene vult: ergo cum Spiritus Sanctus procedat ut amor notionalis, proprie est donum notionaliter sumptum.

Ergo Spiritus Sanctus non est donum, nisi per ordinem ad creaturas, quia donatio debet esse libera; amor autem in Deo non est liber, nisi quatenus terminatur ad creaturas.

Ergo productio Filii & Spiritus Sancti non potest dici donum, quia est emanatio naturalis necessaria & minimè libera.

Ergo licet donatio actualis sit in tempore, sicut & omissio; nomen tamen doni competit Spiritui Sancto ab æterno, quia Deus ab æterno dilexit, quos in tempore vocat, justificat & glorificat. Hæc supernaturalia dona dumtaxat in exemplum appellamus; quia Spiritus Sanctus non dicitur dari aut mitti propter dona naturalia, qualis est creatio, aut conservatio.

CAPUT IX.

Utrum mysterium Sanctissimæ Trinitatis ita sit supra rationem, ut ei repugnet?

R. **M**inime; tum quia ratio naturalis est lumen à Deo infusum: atqui quod est à Deo, non

non potest determinare ad falsum & erroris principium : tum quia homo creatus est ad imaginem & similitudinem Dei : esset autem dissimilis, si ex principiis rationis naturalis cogeretur negare hoc mysterium : Ergo.

Dices : Illud est primum principium totius ratiocinii humani, *quæ sunt eadem uni tertio, sunt eadem inter se* : atqui mysterium Trinitatis destruit hoc principium ; namque Pater, & Filius, & Spiritus Sanctus sunt quid unum in uno tertio, nempe in natura divina, & tamen non sunt idem inter se : Ergo mysterium Trinitatis est contra rationem naturalem.

R. i. Negando majorem : Illud quippe principium, *quæ sunt eadem uni tertio, &c.* non est æquè universaliter verum, ac istud, *impossibile est idem simul esse & non esse* ; ac proinde non est primum principium totius ratiocinii humani. Sienim absolute & universaliter esset verum, cur à Philosophis inventæ sunt tot regulæ, figuræ, & modi quibus non servatis, ratiocinia nostra reperiuntur falsa ? nisi quia multa possunt esse eadem in uno tertio, quæ tamen non sunt inter se eadem, ut patet sequentibus exemplis : aliquod vivens est rationale : atqui omne brutum est vivens : Ergo aliquod brutum est rationale. In hoc syllogismo, licet brutum & rationale sint quid unum in vivente, diversa tamen sunt inter se. Item omnis homo est vivens : sed omnis planta est vivens : Ergo omnis planta est homo. Hic planta & homo conveniunt in vivente, & tamen non conveniunt inter se.

Ergo principium illud, *quæ sunt eadem uni tertio, &c.* non est ita verum, ut nullas admittat

exceptiones, etiam in rebus creatis, propter quas Philosophi docent satis non esse, res convenire utcumque in uno tertio, ut sint quid unum inter se, sed certo quodam modo, & secundum regulas ab ipsis traditas.

Porro si ratio naturalis has regulas adinvenit, ut certo discurrat circa res creatas & finitas, prudenter hærere debet circa divinas, & dubitare, num scilicet istæ ratiocinii leges sufficiant, multa enim effata valent in rebus creatis, quæ si ad divina transferas, falsa reperiuntur, quale est istud, *ex nihilo nihil fit*. Quare

R. 2. negando minorem, cujus confirmationem distinguo: Pater & Filius sunt quid unum in essentia divina inadæquatè, Concedo: adæquate, Nego. Nam essentia divina non solum convenit Patri, sed etiam Filio, & Spiritui sancto, iisque est communicabilis, quemadmodum animal convenit, & communicatur rationali & brutum. Unde sicut non sequitur brutum & rationale esse quid unum inter se, quia sunt unum in animali, sed inadæquate, rationale quippe non est omne animal, sed aliquod: sic Pater & Filius non sunt una persona, ex eo quod sint quid unum in natura divina; quia Pater non est totum id, quod est natura divina.

Instabis: Atqui mysterium Trinitatis repugnat primario huic principio, *impossibile est idem simul esse & non esse*; admissio enim sanctissimæ Trinitatis mysterio idem simul erit & non erit; Deus erit ens à se, & non erit ens à se; Filius quippe & Spiritus Sanctus sunt Deus, & tamen non sunt à se; Ergo.

Nego

Nego subsumptum , cujus confirmationem distinguo : idem erit à se & non erit sub diverso respectu , Concedo : sub eodem respectu , Nego ; namque Filius & Spiritus Sanctus absolute & essentialiter spectati sunt unum ens à se , notionaliter autem non sunt à se , sed ab alio , non tanquam à causa diversæ naturæ , sed tanquam à principio ejusdem naturæ singularis , quæ exigit subsistere tribus modis , quorum ipsamet est radicale principium ; & ab ipsa emanant mediante intellectu , & voluntate notionaliter sumptis.

CAPUT X.

Utrum notitia mysterii sanctissimæ Trinitatis sit ad salutem necessaria?

Respondeo cum omnibus Catholicis : Est necessaria necessitate tum mediæ , tum præcepti in lege Evangelica. Probatur ex Scriptura ; Matth. 28. *Euntes docete ergo omnes gentes , baptizantes eos in nomine Patris , & Filii , & Spiritus Sancti.* Additur Marc. 16. *Qui crediderit & baptizatus fuerit , salvus erit ; qui vero non crediderit , condemnabitur.* Unde Apostolus Act. 19. obstupescens , quod Ephesii dicerent se nescire an esset Spiritus Sanctus , respondit , *in quo ergo baptizati estis ?* Quæ verba innuunt notitiam trium Personarum uti necessariam Baptismo præire , & ita ab initio intellexit Ecclesia , quæ ab initiandis expressam sanctissimæ Trinitatis fidem semper exegit. Enimverò initiandus Patri , Filio , & Spiritui Sancto in Baptismo consecratur , illis fidem & obsequium pollicetur : noverit ergo necesse est , quæ sit cujusque natura

& dignitas, ne cultum divinum ad creaturam transferat, vel debitum honorem vero Deo deneget. Quare merito Innocentius XI. an. 1679. & Clerus Gallicanus anno 1700. damnarunt hanc quorundam Modernorum propositionem, *Absolutionis capax est homo, etiamsi per negligentiam etiam culpabilem nesciat mysterium sanctissimæ Trinitatis & Incarnationis.* Præiverat Academia Lovanien. an. 1653. Porro si incapaces sunt absolutionis qui adorandum illud mysterium ignorant, à fortiori Pastores, quorum silentio & incuria plures animæ pereunt.

Dixi, *in lege Evangelica*; quia in lege veteri notitia explicita hujus mysterii non erat omnibus & singulis ad salutem necessaria, cum non esset ita clare revelatum.





Tractatus DE RERUM CREA- TIONE.

Dicemus I. generatim de creatione mundi, dein-
- de speciatim de præcipuis ejus partibus, sci-
licet de Angelis, & de Homine.

CAPUT PRIMUM.

De Creatione Mundi.

Q. 1. *Quid est creatio?*

R. Latius sumitur pro qualibet pro-
ductione; quo sensu Eccles. 27. Sapientia ait,
Ab initio & ante sæcula creata sum: strictius vero
sumpta definitur, productio totius entis ex nihilo.

Q. 2. *Mundus estne ab æterno?*

R. De fide est, mundum non esse ab æterno, sed creatum in tempore ex nihilo; nam Proverb. 8. Sapientia de seipsa sic loquitur: *Dominus possedit me in initio viarum suarum, antequam quidquam faceret à principio*: ergo fuit, cum Deus non fecerat quicquam. Et Gen. 1. *In principio creavit Deus cælum & terram*, hoc est, initio temporis, interprete Concilio Lateranensi quarto, capite *Firmiter*, ubi sic habet: *Unum universorum principium. Creator omnium visibilium, & invisibilium, spiritualium & corporearum*; qui sua omnipotenti virtute simul AB INITIO TEMPORIS utramque de nihilo condidit creaturam spirituales & corporales Angelicam videlicet, & mundanam, ac deinde humanam quasi communem, & spiritu & corpore constitutam.

Ergo ex Concilio Angeli non sunt creati ante mundum corporeum; ut visum est nonnullis è Patribus; confirmaturque Exodi c. 20 *Sex... diebus fecit Dominus cælum & terram & omnia quæ in eis sunt*, ac proinde Angelos.

Ergo Angeli creati sunt primo die, & ut loquitur Concilium, ab initio temporis; illudque colligit Venerabilis Beda ex cap. 1. Genes. ubi dicitur: *terra erat inanis & vacua*, non vero cælum, utpote statim Angelorum sedes. Certe constat Angelos creatos ante lapsum hominis, cum ceciderit suggestionem dæmonis.

Q. 3. *Cur Moyse nihil de creatione Angelorum inseruit in sua Historia?*

R. Quia solam rerum corporearum originem & seriem describendam suscepit.

Quomodo autem Moyse texere potuerit historiam ab orbe condito usque ad suam ætatem, cum nullus sit Scriptor ipso antiquior; quo ordine

ne condita sit rerum universitas, & intelligenda plura difficilia, quæ in illa Historia occurrunt, sat fuse exposuimus Tom. I. Tractatu de creatione, secunda parte.

CAPUT II.

De Angelis.

Q. I. *Quid significat Angeli nomen?*

R. Nuntium: *Angelorum vocabulum*, inquit sanctus Gregorius homilia 34. in Evang. *nomen est officii, non naturæ*. Hoc sensu Sacerdotes, Malach. 2. Angeli vocantur, & Joannes Baptista Matth. 11. quin ipse Christus Dominus appellatur Angelus testamenti, Malach. 3. utpote missus ad annuntianda gratiæ mysteria.

Q. 2. *Exsistuntne Angeli?*

R. De fide est existere, de iis enim frequenter loquitur Scriptura Gen. 22. *Angelus Domini de cælo clamavit dicens, Abraham, &c.* Exodi 23. *Ecce ego mitto Angelum meum, audi vocem ejus.* Matth. 18. *Angeli eorum in cælis semper vident faciem Patris.*

Q. 3. *Potestne ratione naturali demonstrari Angelorum existentia?*

R. Affirmant Theologi non pauci, probantque tum ex incantationibus Magorum, tum ex quibusdam energumenorum operationibus, quæ nec ad Deum referri possunt, cum in illis impia deprehendantur, nec ad animas separatas, cum anima plus non possit separata à corpore, quam conjuncta, alioquin unio ad corpus non esset illi naturalis, seu violenta & pœnalis, ut somniarunt Origenistæ. Ergo illa opera refundenda sunt in substantias spirituales creatas, anima rationali præstantiores.

Verum, quamvis argumentum illud sit probabilissimum, omnino tamen non convincit; namque seclusa revelatione divina; fingi posset plures animas corporibus solutas portenta illa conjunctim operari.

Q. 4. *Quid est Angelus?*

R. Definitur substantia creata, omnis materiæ expers, completa, & intellectualis.

Dicitur 1. *substantia creata*, ut explodatur error Gentilium, qui Angelos custodes quos vocabant Genios & Deos penates, quasi penes se manentes, tanquam Deos inferiores colebant.

Dicitur 2. *omnis materiæ expers*, quo differt Angelus ab homine; rejiciturque quorundam Antiquiorum opinio, ut sancti Justini, Tertulliani, &c. qui Angelis tribuerunt corpora subtilia, per quæ ante diluvium genuerant Gigantes, de quibus Gen. 6.

Dicitur 3. *completa*, ut distinguatur Angelus ab anima rationali, quæ quidem est substantia spiritalis, sed incompleta, & unum per se cum corpore efficiens.

Dicitur 4. *intellectualis*, hoc est, vi intelligendi prædita, & quidem tanta, ut Angeli simpliciter vocentur Intelligentiæ.

Ergo Angeli sunt incorruptibiles & immortales, quia non constant ex partibus, quæ dissolvi possint, utpote spiritus.

Ergo Angeli sunt homine perfectiores, ut constat ex Ps. 8. in quo de homine sic habetur, *minuisti eum paulo minus ab Angelis*, quem locum Apostolus urget Hebr. 2. ut probet Filium Dei assumendo naturam humanam, se infra Angelos dejecisse. Enimvero substantia mere spiritalis
me-

melior est substantia composita ex spiritu & corpore.

Q. 5. *In quo Angeli hominibus excellunt?*

R. Excellunt 1. facultate motrice, quam Scripturæ passim, ut in Machabæorum libris & in Apocalypsi, stupendam exhibent. 2. intelligendi virtute: intellectus enim Angelicus humanum tripliciter superat: 1. cum non sit materiæ & sensibus alligatus, semper est in actu, non tamen in eodem; nam transit ab uno ad alium. 2. Non est discursivus circa res naturales, sed earum naturas intuitive videt, conclusiones cognoscit in principiis, causas in effectibus, & vicissim effectus in causis.

Dixi: *circa res naturales*; circa supernaturales quippe Angelus discurrere potest, nec Deum naturaliter cognoscit, nisi abstractè. 3. Angeli, utpote natura, ingenii acumine & amplitudine longe præstantiores hominibus, atque ad majora ministeria deputati tum in cælo, tum in terra; *sunt enim administratorii Spiritus*, Hebr. 1. multo plura naturaliter cognoscunt; etenim Deus formavit primum hominem rerum naturalium scientia instructum: ut habetur Eccl. 17. à fortiori Angelos puras mentes & intelligentias, quibus scientia non minus est naturalis, quam materia formæ dispositæ.

Q. 6. *Quomodo cognoscunt Angeli?*

R. Non cognoscunt per propriam substantiam, utpote quæ non sit causa, neque idea aut exemplar rerum; quemadmodum essentia divina; sed per species, seu ideas ipsis à Deo inditas rerum omnium naturalium saltem existentium; quemadmodum nobis innatus est habitus primorum princi-

piorum. Dixi, *rerum existentium*; quia Anpeli non cognoscunt omnia possibilia.

Q. 7. *Angeli cognoscuntne naturaliter futura?*

R. Cognoscunt quæ futura sunt necessario, quia continentur in suis causis, quas comprehendunt: futura vero libera non cognoscunt nisi conjecturaliter; quia non habent necessariam connexionem cum causis secundis, dependentque à liberis Dei decretis, & determinatione voluntatis humanæ: quare horum præscientia Dei propria est, *annuntiate quæ ventura sunt in futurum*, ait Dominus ad idola gentium, Isa. 41. & *sciemus quia Dii estis vos.*

Q. 8. *Angeli cognoscuntne secreta cordium?*

R. Non cognoscunt certo, nisi Deus ipse, aut persona cogitans ea ipsis aperuerit; scriptum est enim 3. Regum cap. 8. v. 39. *tu solus nosti corda filiorum hominum.* Cur autem Angeli ignorent cordis aliorum secreta, id refundendum est in Providentiam Divinam, quæ cordis arcana suo examini & iudicio retinuit.

Dixi, *nisi persona cogitans ea ipsis aperuerit*; quia Angelis patent secreta nostra quando volumus constataque ex Scriptura Angelos sibi invicem loqui & patefacere quid mente gerant, alioquin nulla inter eos esset societas.

Q. 9. *Quid est Angelorum locutio?*

R. Est unius ad alium mentis directio, ita ut Angeli tum censeantur ad invicem loqui, cum ad se invicem dirigunt cogitationes suas: sic & nos orantes Deum, vel Angelos alloquimur.

Q. 10. *Quomodo Angeli, per huiusmodi directionem, acquirunt novam notitiam, cum directio illa sit actus immanens, nec transeat ad intellectum audientis?*

R. Di-

R. Directio illa confert ad notitiam Angeli audientis, quatenus solvit signaculum, quo claudebantur proprii cordis arcana, efficitque ut cogitationes sint perviæ Angelo audienti, quemadmodum & res cæteræ existentes. Hujusmodi itaque directio non est causa influens in alterius intellectum; sed causa dumtaxat impedimentum removens, nempe velum supra corda expansum, quo remoto, consilia cordis patent Angelis sive bonis, sive malis, sicut alia objecta existentia.

Q. 11. *Locutio Angelorum estne idem quod illuminatio?*

R. Minimè; Nam discipulus loquitur Magistro, & creatura rationalis Deo; non ut illuminet; sed ut discat.

Q. 12. *Quid est ergo illuminatio?*

R. Est locutio, per quam veritas ante ignorata manifestatur inferiori Angelo per superiorem, quem inferior non illuminat. Unde illuminatio pertinet ad doctrinam, quod de simplici locutione dici non potest.

CAPUT III.

De gratia & lapsu Angelorum.

Q. 1. *Angeli fueruntne cum gratia conditi?*

R. Fuerunt; nam Joan. 8. Christus de diabolo dicit, quod in veritate non steterit, id est, in justitia in qua constitutus est. Unde Sanctus Augustinus lib. 12. de civitate Dei c. 9. sic scribit, *simul ut facti sunt, ei, à quo facti sunt, amore, cum quo facti sunt, adhæserunt; eoque sunt isti (Dæmones) ab illorum societate discreti, quod hi in bona voluntate manserunt, illi ab ea deficiendo mutati sunt.*

Ergo

Ergo Angeli non fuerunt beati ab instanti suæ conditionis, alias fuissent impeccabiles.

Ergo Dæmones mali sunt non natura, sed propria voluntate, ut definitum est in Concilio Lateranensi IV. cap. *Firmiter*.

Q. 2. *Angeli cecideruntne in magno numero?*

R. Communis est Patrum & Theologorum sententia Angelos cecidisse in magno numero, minori tamen quam eorum qui steterunt; nam Apoc. 12. legitur Draconem traxisse post se tertiam partem stellarum, id est, Angelorum.

Q. 3. *Cecideruntne ex omnibus Ordinibus?*

R. Negat S. Damascenus lib. 2. de fide c. 4. ubi vult Luciferum fuisse primum ex inferioribus Ordinibus. Sed S. Augustinus l. 11. de Genesi ad litteram c. 26. rejicit hanc sententiam, adhæretque communi, scilicet Luciferum fuisse ex Ordine Seraphinorum, nec Angelum habuisse superiorem, colligiturque è Scriptura Matth. 25. ubi dicitur ignis æternus paratus diabolo, scilicet Lucifero, & Angelis ejus.

Q. 4. *Lucifer fuitne aliis Angelis causa ruinæ?*

R. Affirmant communiter Patres & Theologi, colliguntque ex citato capite, Matth. 25. quo innuitur Luciferum fuisse auctorem defectionis Angelicæ.

Q. 5. *Quodnam fuit peccatum Luciferi?*

R. Certum est fuisse superbiam, in eo quod inordinate, hoc est propriis viribus, voluerit acquirere suam beatitudinem, in qua seipso fruere-
tur tanquam sibi sufficiens, & eatenus similis Altissimo, ipse sibi ad beatam vitam sufficere voluit, inquit sanctus Ambrosius in Psal. 118.

Q. 6. *Quæ pæna consecuta est peccatum Angelorum?*

R. Qua-

R. Quadruplex, Prima est cæcitas mentis, per quam Angeli mali simpliciter dicuntur tenebræ Luc. 22. v. 53. *hæc est hora vestra, & potestas tenebrarum.* Cæcitas autem illa non est privatio luminis naturalis, quia peccatum non destruit naturam; sed est privatio omnis luminis supernaturalis. *Reprobi spiritus;* inquit Sanctus Bernardus Epist. 77. ad Hugonem, *et si destituti sunt participatione gratiæ spiritualis, non tamen vivacitate industriæ naturalis.* Secunda est obstinatio voluntatis in malo, & aversio ab omni bono, à qua denominantur Spiritus mali, spiritus nequam. Tertia est exclusio à Gloria. Quarta tormentum ignis, qui paratus est Diabolo, & Angelis ejus, Matth. 25.

Q. 7. *Quomodo ignis corporeus torquet malos spiritus?*

Certum est ignem ratione caloris nativi quantumcunque intensi, non posse torquere spiritus, quia calor nimius eatenus est noxius corporibus viventibus, quatenus eorum temperiem corrumpit, & partium juncturas dissolvit, quod in substantiam spiritalem, utpote simplicem non cadit. Unde Sanctus Augustinus lib. 20. de Civit. cap. 10. scribit spiritus incorporeos posse pœna corporali ignis affligi, veris quidem, sed miris & ineffabilibus modis, quos Theologi, utcumque explicare conantur. Quare

R. Ex omnibus Scholæ opinionibus verisimilior apparet, quæ statuit Dæmones igne torqueri quatenus alligantur igni eo fere modo, quo anima rationalis ligatur corpori humano; per quam unionem fit ut cum dolore & quidem vehementissimo, ignem percipiat proprium corpus devorantem.

Hanc opinionem probat S. Augustinus lib. 21. de Civit. c. 10. dummodo non credantur spiritus
per

per illam unionem evadere animalia, hoc est, fieri unum totum substantiale ex Dæmone & igne, sicut ex anima rationali, & corpore humano unitis exurgit unus homo.

CAPUT IV.

De numero Angelorum.

Q. 1. *Angeli suntne in magno numero?*

R. Constat ex Scripturis innumeros esse Angelos. Danielis 7. millia millium ministrabant ei. Job. 25. Nunquid est numerus militum ejus?

Q. 2. *Numerus Angelorum exceditne numerum rerum corporearum?*

R. Res est admodum incerta, quidam ut Sanct. Gregorius hom. 34. in Evang. opinantur plures esse homines, quàm Angelos, numerando ab Adam usque ad finem seculi; sed S. Thomas 1. par. quæst. 50. art. 3. absolute definit longe majorem esse numerum Angelorum, quàm rerum corporearum: *Rationabile est*, inquit, *quod substantiæ immateriales excedant secundum multitudinem substantias materiales incomparabiliter*, nititurque auctoritate l. de cœlesti hierarchia, c. 14. in quo sic habet auctor, *multi sunt beati exercitus supernarum mentium, infirmam & constrictam excedentes nostrorum materialiorum numerorum commensurationem.*

Q. 3. *Omnes Angeli suntne ejusdem speciei ut homines?*

R. Verisimilius videtur Angelos ejusdem Ordinis convenire in natura specifica, differre vero ab aliis, præsertim si sint distinctæ Hierarchiæ, quia sicut pertinet ad pulchritudinem mundi corporei, quod in eo existant corpora distinctæ speciei;

ciei; sic mundus intelligibilis multo præstantior, & secundum plures Theologos, partibus locupletior, ex intelligentiarum varietate magis splendet.

Q. 4. *Estne ordo in Angelis beatis?*

R. Est, & quidem perfectissimus, juxta Ecclesiæ Collectam, *Deus qui miro ordine Angelorum ministeria hominumque dispensas.*

Q. 5. *In quo consistit ille ordo?*

R. Auctor Libri de Cœlesti Hierarchia, & alii deinceps, ut SS. Gregorius & Bernardus, omnesque communiter Theologi Angelos dividunt in tres Hierarchias; & quamlibet Hierarchiam in tres Ordines, qui & Chori dicuntur ad denotandam ordinatissimam Angelorum societatem: Chorus quippe est societas psallentium, in qua nec minima dissonantia debet reperiri.

Q. 6. *Quid est Hierarchia?*

R. Secundum vim nominis Græci idem est ac sacer Principatus, definiturque collectio personarum sub aliquo principe ad functiones sacras destinatarum.

Ergo in Dæmonibus non remanet Hierarchia; quia nullam obeunt functionem sacram. Remanet tamen in illis distinctio graduum essentialium, utpote qui ex diversis Ordinibus & Hierarchiis ceciderint, existitque inter illos nonnulla subordinatio & dependentia in actionibus naturalibus, propter quam Beelzebub vocatur Princeps Dæmoniorum.

Q. 7. *Quæ sacra functiones competunt unicuique Hierarchiæ?*

R. S. Augustinus lib. contra Priscillianistas c. 11. ultro fatetur se id nescire, sic enim scribit, *esse itaque Sedes (Thronos) Dominationes, Principatus & Pote-*

Potestates in cœlestibus apparatibus, firmissimè credo, & differre inter se aliquid indubitata fide teneo, sed quænam istæ sint, & quid inter se differant, nescio.

S. Bernardus lib. 5. de Consideratione cap. 4. conjectat ex nominibus Angelorum cujusque Hierarchiæ, quæ sint singulorum proprietates & officia, quæ S. Thomas q. 112. art. 3. verisimilia exhibet exemplo regiminis Politici; in quo triplex est Regionum Ministrorum ordo. In primo ordine occurrunt viri primarii, qui Regi semper assistunt tamquam ejus familiares & ejus præcepta immediatè audiunt. In secundo ordine sunt Præfecti Provinciarum, qui à Ministris Regi assistentibus mandata accipiunt in suis Provinciis observanda & exequenda per inferiores Magistratus singularum Urbium. In tertio itaque ordine sunt illi Magistratus inferiores, qui mandata Regia sibi denunciata per provinciæ præfectos exequuntur. Atque juxta hanc ideam

Prima Hierarchia constat ex Angelis assistentibus, quibus Deus immediate sua consilia revelat, & decreta manifestat, quæ primarii illi Principes Angeli secundæ Hierarchiæ denuntiant, ut curent executioni demandari per Angelos tertiæ Hierarchiæ.

Porro sicut inter eos, qui assistunt Regi, unus solet esse conscius plurium secretorum, quàm alter; ut observat Angelicus Doctor citato articulo ad 4. ita Deus nonnullis ex assistentibus Angelis secreta sua familiaris communicat. Hinc inter assistentes triplex exurgit ordo: In tertio ordine collocantur Throni, sic dicti, quia Deus in iis firmissimè sedere dicitur, quatenus ipsi immobiliter adhærent; & ab ipso accipiunt rationes rerum ab
infe-

inferioribus Angelis observanda. Licet autem commune sit tribus ordinibus primæ Hierarchiæ revelationes à Deo immediatè accipere, & eatenus quilibet trium illorum ordinum Thronus vocari possit, solus tamen tertius, utpote species minùs nobilis, nomen illud retinet, & Angeli secundi ordinis vocantur Cherubim, hoc est, scientiarum Magistri; quia ampliùs hauriunt ex ipso luminis fonte. Sed supra illos existunt Angeli primi ordinis, dicti Seraphim, idest, incensi & incendentes; quia intensissimum lumen, quo à Patre luminum perfunduntur, non solùm illos illuminat, sed & incendit.

Secunda Hierarchia in tres ordines similiter distributa, nempe Dominationes, Virtutes & Potestates, disponit de Ministeriis Divinis secundùm rationes universales à Prima Hierarchia acceptas: Dominationes quidem, tanquam Domini in familia, inferioribus denuntiant & præcipiunt quid sit agendum; sed ad opus externum non exeunt, nec mittuntur. Virtutes verò & Potestates; veluti Duces in ministeriis divinis, præsumt tertiæ Hierarchiæ, cui executio demandata est: Virtutes quidem, ut fert illud nomen, dant efficaciam inferioribus spiritibus ad exequenda divina ministeria, quatenus miracula edunt, quibus confirmatur fides eorum, quæ annuntiant Angeli; Potestates ordinant quæ sunt agenda, & arcant Dæmones, ne ea impediant.

Tertia Hierarchia tota incumbit exequendis operibus per secundam dispositis & ordinatis. In primo ordine Principatus præsumt operibus, & universaliora curant, puta Regna, & alias hominum Societates. In secundo ordine Archangeli,

& in tertio Angeli singularia administrant, illi majora, isti minora, qualis est custodia singulorum hominum.

Q. 8. *Deputanturne Angeli ad custodiam singulorum hominum?*

R. Constat deputari tum è Scriptura Psal. 90. *Angelis suis Deus mandavit de te.* Matth. 18. *Angeli eorum in cælis semper vident faciem Patris,* tum ex Traditione. Consule Tom. 1. cap. 6. ubi ista fusè tractantur.

Q. 9. *Quenam ministeria circa nos exercent Angeli Custodes?*

R. 1. Avertunt exteriora pericula tam corporis, quàm animæ nobis incognita. 2. Animam excitant ad operandum bonum, & fugiendum malum, quatenus pias cogitationes immittunt. 3. Dæmones arcent, ne acrius tentent. 4. Orationes alumnorum suorum offerunt Deo, Tob. 12. Apoc. 8. 5. Orant & intercedunt pro suis alumnis, ex S. Bernardo lib. 5. de Consideratione cap. 4. & 5. serm. 31. in Cantica. 6. Corrigunt & puniunt pœnis medicinalibus, ex S. Augustino lib. 9. de Civitate, c. 5. 7. Suscipiunt è corpore egredientem justæ animæ, ut habetur de Lazaro, Luc. 16. in quem locum sic loquitur S. Chrysostomus hom. de Lazaro, *portabatur in humeris Angelorum, ne saltem ambulans laboraret. Gaudet unusquisque Angelorum tale onus tangere.*

Ergo omnes functiones tertiæ Hierarchiæ spectant Ecclesiasticam Hierarchiam ipsi immediate subordinatam, quemadmodum functiones primæ Hierarchiæ secundam respiciunt, & secundæ tertiam.

Porro

Porro Ecclesiastica Hierarchia ad formam cœlestium divinitus instituta, suis quoque gradibus perficitur. Episcopi in primo ordine sunt constituti, Presbyteri in secundo, & Ministri tertium & ultimum locum obtinent. In illis sacris ordinibus Laici non numerantur, quia functiones eorum non sunt sacræ, utpote quæ versentur circa temporalem & civilem rerum administrationem. Laici ergo in Ecclesiastica Hierarchia passivè se habent, quatenus ab Hierarchicis Ministris purgantur, illuminantur, & perficiuntur, sicque sanctificantur, & ad Deum reducitur temporale eorum regimen.

Atque hæc ex Angelico Doctore summatim exscripta sunt, ut lector uno intuitu inspiciat Deum ubique operantem & omnia ad se reducens, infima per media, & media per prima sibi immediatè assistentia.

CAPUT V.

De primo homine.

Q. 1. *Adamus fuitne omnium hominum primus?*

R. Affirmativè, nec Præadamitæ, qui fingunt Adamum dici primum dumtaxat in Genealogia Christi, detorquere possunt Scripturæ textus luce clariores. Sap. 10. v. 1. hæc (Sapientia) illum, qui primus formatus est à Deo pater orbis terrarum, cum solus esset creatus, custodivit. Act. 17. v. 26. fecit ex uno omne genus hominum inhabitare super universam faciem terræ.

Dices: Rom. 5. v. 14. Regnavit mors ab Adam usque ad Moysen etiam in eos, qui non peccaverunt in

similitudinem prævaricationis Adæ: Ergo fuerunt homines, qui in Adamo non peccaverunt, nec proinde ab ipso procreati.

Nego conseq. vult solum Apostolus mortem, quæ per peccatum in mundum intravit, sæviisse etiam in infantes propter peccatum originale in Adamo contractum, licet actualiter, seu propria voluntate non peccaverint sicut Adam.

Q. 2. *Cur homo non est conditus sicut cæteræ creaturæ, scilicet voce Dei imperante, sed humum contrectante?*

R. Ut hominis dignitas, & imago Dei in eo elucens commendaretur, *bestias non fecerunt manus tuæ, sed dixisti, producat terra, &c.* inquit S. Ambrosius in Psalm. 118. & Tertullianus lib. de Resurr. carnis, *Recogita totum illi Deum occupatum, ac deditum, manu, sensu, opere, consilio, sapientia, providentia, & ipsa imprimis affectione, quæ lineamenta ductabat.*

Q. 3. *Quid indicant illa verba, inspiravit in faciem ejus spiraculum vitæ?*

R. Indicant animam rationalem, utpote spiritalem & incorpoream, non fuisseeductam ex materia, sed à Deo inspiratam, non quidem tamquam particulam substantiæ divinæ, ut somniarunt nonnulli Hæretici, sed à Deo creatam.

Q. 4. *Quomodo probatur animam rationalem esse spiritalem?*

R. Probatur, tum Scriptura, tum ratione. Scriptura quidem, Eccl. 12. v. 7. *Antequam revertatur pulvis in terram suam, unde erat, & spiritus redeat ad Deum, qui dedit illum.* Ratione etiam, quia illa anima est spiritualis & incorporea, quæ producit effectus spirituales & incorporeos: Atqui

qui anima rationalis producit actus spirituales, contemplatur sapientiam ac Deum ipsum, attingit possibilia æquè ac existentia, universalia æquè ac singularia: habet actus reflexos, per quos supra se & supra omnem materiam assurgit, intentiones cordis discutit, approbat vel reprobat: de actibus suis disponit tamquam Domina, nec ab objectis trahitur sicut irrationalia, sed seipsam determinat etiam contra naturalem propensionem.

Porro omnes illi actus procul dubio sunt spirituales: Ergo & principium, à quo procedunt: ac proinde meritò definivit Concilium IV. Lateranense cit. cap. *Firmiter*, animam rationalem esse spiritalem.

Dices: Eccles. 2. v. 19. similiter spirant omnia, & nihil homo habet jumento amplius: de terra facta sunt, & in terram pariter revertuntur: Ergo.

Distinguo antec. Similiter spirant omnia & in terram revertuntur quoad corpus & vitam animale, Concedo: quoad animam & vitam spiritalem, Nego antec.

Instas, Eo loci additur, quis novit, si spiritus filiorum Adam ascendat sursum, & si spiritus jumentorum descendat deorsum? Ergo.

Distinguo ant. quis novit sensum, supra quem pauci se erigunt, Concedo: ratione & intelligentia, Nego antec. Sapiens enim capite immediate sequenti colligit, ex eo quod in hac vita, eadem fere omnibus eveniant bonis & malis, futurum post hanc vitam Dei Judicium, in quo reddet unicuique juxta opera sua.

Q. 5. *Anima rationalis estne immortalis?*

R. Solus Atheus & impius negavit animæ immortalitatem, quam Scripturæ tam luculenter

astruunt, Joan. 10. v. 28. *Ego vitam æternam do eis, & non peribunt in æternum, & in qua fundatur spes Resurrectionis & Beatitudinis, timor Judicii, ignis & tota Religio christiana.*

Q. 6. *Potestne probari ratione animæ rationalis immortalitas?*

R. Probatur evidenter ex ejus spiritualitate, namque, ut supra dicebamus de Angelis, substantia corrumpi non potest nisi ex dissolutione ejus partium. Atqui substantia spiritalis, qualis est anima rationalis, non componitur ex partibus, sed est simplicissima, ergo corrumpi non potest.

Dices: gratia sanctificans, licet spiritalis, corrumpi potest: Ergo & anima rationalis.

Nego conseq. & paritatem, quia gratia sanctificans & alii habitus spirituales sunt accidentia, quæ educuntur ex subiecto disposito, ac proinde ab eo dependent in suo esse & conservari, ita ut pereant, cum subiectum est male dispositum: at substantia spiritalis non educitur ex subiecto; sed creatur: Ergo sicut non dependet ab eo, in suo esse; ita nec in conservari.

Q. 7. *Homo estne factus ad imaginem Dei secundum corpus?*

R. Minime: *Imago Dei est intus non in corpore,* inquit S. Augustinus Serm. 2. in Psalm. 48. *sed ubi est intellectus; ubi mens, ubi ratio investigandæ veritatis:* Enimverò res corporeæ non possunt esse expressæ similitudines entis spiritalis & incorporei, Dicuntur solummodo vestigia Dei: quia sicut ex vestigiis colligitur, quæ species animalis pertransierit; sic invisibilia Dei per ea quæ facta sunt, intellecta conspiciuntur, Rom. 1,

Imago

Imago autem in homine duplex est, alia naturalis & essentialis, quæ fœdari potest per actus diffformes naturæ rationali, sed corrumpi omnino non potest, sicut nec ipsa anima: alia accidentalis, quæ consistit in donis supernaturalibus, ac præsertim in gratia sanctificante, per quam iusti consortes fiunt divinæ naturæ. 2. Petri cap. 1. filii Dei adoptivi, & conformes imagini filii ejus. Hæc imago per quodlibet peccatum mortale prorsus deletur.

Q. 8. *Primi Parentes fueruntne conditi in gratia?*

R. Fuerunt, Eccles. 7. v. 30. *fecit Deus hominem rectum.* Eccl. 12. v. 6. *Creavit illis scientiam spiritus, & sensu implevit cor illorum.* Et Concilium Tridentinum sess. 5. c. 1. si quis non confiteatur primum hominem Adam, cum mandatum Dei in paradiso fuisset transgressus, statim sanctitatem, & justitiam, in qua constitutus fuerat, amisisse - - - anathema sit.

Q. 9. *Justitia originalis estne quid idem cum gratia sanctificante?*

R. Minime; quia per Baptismum & Pœnitentiam gratia cum omnibus virtutum donis, quam in Adamo amiseramus, nobis restituitur, non verò justitia originalis. Ergo justitia originalis plura complectitur, quàm gratia sanctificans.

Q. 10. *Quid ultra complectitur?*

R. Perfectam subordinationem partis inferioris cum superiore, adeo ut quemadmodum mens primi hominis plenissime erat subdita Deo, sic pars inferior in omnibus sequeretur nutum rationis. Per originalem itaque justitiam nulla erat in homine innocente membrorum rebellio, nullus concupiscentiæ motus, nulla imaginationis,

aut alterius sensus evagatio, passiones nec rationem præveniebant, nec ei imperanti reluctabantur, corpus non aggravabat animam, sed adjuvabat, nulla in eo infirmitas, nulla ægritudo sive ab intrinseco & humorum intemperie, sive ab extrinseco & ab ulla creatura circumstante. Rectus enim ordo deposcebat, ut quemadmodum spiritus Deo, & corpus spiritui obtemperabat; sic creaturæ inferiores; v.g. elementa, anni tempestates, & omnia animalia, ut in obsequium hominis condita erant, ita ipsi ad nutum deservirent.

Ergo primus homo in illo felici statu, sicut poterat non peccare, ita & non mori poterat; nam per peccatum mors in hunc mundum intravit, ait Apostolus Rom. 5. Ergo si Adamus non peccasset, justitiam originalem in posteros transmisisset.

Q. 11. *Fuissetne perpetuò mansurus in terra?*

R. Minime; sed sine morte translatus esset ad beatitudinem. Quamdiu autem in terris egisset, prorsus incertum.

Q. 12. *Perseverante statu innocentiae fuissetne ordo inter homines?*

R. Fuisset; tum quia societas stare non potest sine ordine, tum quia vir naturaliter est caput mulieris.

Dices: in pœnam peccati dicitur Evæ, & ipse dominabitur tui, Gen. 3. Ergo ante peccatum non fuisset illi subdita.

Distinguo consequ. non fuisset illi subdita cum molestiis & pœnis, quas nunc patiuntur mulieres sub virorum potestate, Conc. ejusmodi quippe molestiæ sunt pœna peccati; non fuisset subdita
sub.

subjectione naturali & suavi, qualis cernitur inter membra ejusdem corporis, Nego consequen. Sic serpenti dicitur eodem capite, *super pectus tuum gradieris*, non quòd rectus antea incederet, sed quòd ille serpendi modus non fuisset illi pœnalis, sicut nunc existit propter odium, & horrorem in illum conceptum.

Instas: primis parentibus adhuc innocentibus datur solum potestas dominandi cunctis animalibus: Ergo nullam potestatem acceperant in alios homines.

Distinguo consequ. potestatem dominationis & proprietatis, quæ inducit servitutem, Concedo: nam ex S. Augustino lib. 19. de Civit. Dei cap. 15. *nomen servitutis culpa meruit, non natura*, potestatem jurisdictionis, quantum necessaria est ad servandum ordinem, Nego consequ.

Q. 13. *In statu innocentiae homines fuissentne propagati per carnalem generationem?*

R. Negarunt nonnulli ex SS. Patribus, ut Sanctus Augustinus; sed retractavit suam sententiam, & communem amplexus est lib. 2. Retract. cap. 10. & libro de Genesi ad litteram cap. 3. *non video, inquit, quid prohibere potuerit, ut essent hominibus etiam in paradiso honorabiles nuptiae & Thorus immaculatus, hoc Deo præstante fideliter justèque viventibus, ut sine inquieto ardore libidinis, sine ullo dolore laboreque pariendi fœtus ex eorum semine gigneretur.*

Q. 14. *Quodnam fuit peccatum Adami?*

R. Certum est peccasse superbia Eccl. 10. v. 14. *initium omnis peccati est superbia*, quæ adjunctam habuit inobedientiam & inordinatam complacentiam erga uxorem. Utrum autem peccaverit contra fidem, non satis constat.

Affirmat Tertullianus l. 2. contra Marcionem c. 2. Negat verò S. Augustinus lib. 11. de Genesi ad litteram c. 42. quia ex Apostolo Adam non fuit seductus, nec proinde falsum credidit.

Q. 15. *Si sola Eva peccasset; posteri fuissentne peccato obnoxii?*

Minimè: quia in Eva non continebamur tamquam in capite.

Q. 16. *Primi parentes suntne veniam consecuti?*

R. Affirmative; de iis enim sic habetur Sapientiae 10. *hæc* (Sapientia) *illum qui primus formatus est à Deo custodivit & eduxit illum à delicto suo*, communisque est Ecclesiae traditio Christum, cum ad inferos descendit, illos inde eduxisse.

Q. 17. *Quomodo veniam sunt consecuti?*

R. Per fidem in Christum venturum; *non enim est in alio aliquo salus. Act. 4. & S. Augustinus Epistola 102. aliàs 49. etiam illi iusti facti sunt, qui priusquam veniret in carne, crediderunt in carne venturum; eadem namque fides est & nostra & illorum, quoniam hoc illi crediderunt futurum, quod nos credimus factum.*

Q. 18. *Cur Filius Dei venit ad liberandum hominem, potius quàm Angelum?*

R. Non occurrit alia responsio, quàm Apostoli Rom. 11. *Quis cognovit sensum Domini, aut quis Consiliarius ejus fuit? item, vide bonitatem Dei in te, & severitatem in eos, qui derelicti sunt. Convenientia tamen hæc afferri potest, quòd peccatum Angelorum fuit personale, nec totam naturam Angelicam infecit, sicut peccatum Adami.*



Tractatus

DE

MYSTERIO IN-

CARNATIONIS.

CAPUT PRIMUM.

De ejus nomine.

Quid intelligitur nomine Incarnationis?

R. Secundum vim nominis idem est, ac unio Verbi Divini cum carne, juxta illud Joan. 1. *Verbum caro factum est*, ubi pars sumitur pro toto, ut Genes. 6. *Omnis caro corruerat viam suam*, & Luc. 2. *Videbit omnis caro salutare Dei*. Maluit autem Evangelista scribere, *Verbum caro*, quam *homo factum est*; tum quia caro, utpote magis distans

distans à Verbo, *minùs assumptibilis videbatur*, ut loquitur S. Thomas q. 5. art. 3. ad 1. tum quia magis commendatur Dei erga nos dilectio, qua se usque ad carnem demisit.

Cùm autem Apollinaristæ ex laudato Joannis textu assererent solam carnem sine anima saltem rationali fuisse à Verbo assumptam, apud veteres Scriptores Græcos, pro Incarnatione legitur inhumanatio, hoc est, unio Verbi cum natura humana.

CAPUT II.

De possibilitate Incarnationis.

Q. 1. *Mysterium Incarnationis estne possibile?*

R. Affirmativè; quia ab actu ad posse valet consequentia: atqui Mysterium Incarnationis est actu peractum: Ergo.

Q. 2. *Potestne lumine naturali demonstrari Incarnationem esse possibilem?*

R. Non potest positivè; quia cùm Mysterium Incarnationis sit supernaturale, ratio naturalis illud attingere nequit: potest autem negativè, dissolvendo scilicet omnia momenta, quæ contra opponi possunt, & ostendendo lumini naturali non repugnare.

Dices 1. illa non possunt inter se uniri, inter quæ est distantia infinita. Atqui inter Verbum & naturam humanam est distantia infinita: Ergo.

Distinguo majorem sicut alibi, distantia infinita tum entitatis, tum habitudinis, Concedo: entitatis tantùm, Nego majorem; namque, ex dictis, est infinita entitatis distantia inter Deum
viden-

videndum & intellectum creatum, nihilominus intellectus creatus elevari potest ad eliciendam visionem intuitivam, per quam Deo unitur in ratione objecti propter habitudinem, quam creatura intellectiva habet ad objectum intelligibile. Porro est habitudo Verbum inter, & naturam humanam, quatenus natura humana est terminabilis, & Verbum infinite terminativum.

Dices 2. Repugnat Verbum mutari: atqui non potest uniri naturæ humanæ in unitatem Personæ, quin mutetur: Ergo.

Distinguo majorem, non potest mutari intrinsecè acquirendo vel deperdendo aliquam perfectionem, Concedo: non potest mutari extrinsecè per novam denominationem, quæ exurgit ex termino intrinseco, Nego majorem. Deus enim, quando condidit mundum, factus est ex non creante Creator per novam denominationem petitam ex creaturis, quæ sunt quid extrinsecum Deo. Atqui per Incarnationem Verbum nec acquirit; nec deperdit ullam perfectionem, sed solummodo terminat naturam humanam, à qua denominatur homo, tanquam ab aliquo ipsi extrinseco.

Instas: Atqui Verbum per Incarnationem intrinsecè & substantialiter fit homo: Ergo intrinsece mutatur.

Distinguo subsumptum, intrinsece & substantialiter fit homo, quatenus substantialiter unitur naturæ humanæ in ratione termini & suppositi, nihil prorsus perfectionis ab ea accipiens, Concedo: intrinsece & substantialiter fit homo accipiendo naturam humanam tanquam sui perfectivam, quemadmodum corpus organizatum recipiendo

piendo animam rationalem tanquam fui formam, sit substantialiter vivens: Nego subsumptum.

CAPUT III.

De existentia mysterii Incarnationis.

Q. I. *Mysterium Incarnationis estne in Christo Domino impletum?*

R. Affirmative, Joan. I. *Verbum caro factum est*; sed cum ista doctrina *Gentilibus sit stultitia, & Judæis scandalum*, I. Cor. I. utpote qui Evangelium non recipiant, aliis momentis adversus eos astruenda est existentia Incarnationis.

§. I.

Mysterium Incarnationis asseritur adversus Gentiles.

Primum momentum ducitur ex Prophetiis, quæ evidenter in Christo Domino impletæ sunt, ut patebit ex Paragrapho sequenti; namque *idoneum testimonium veritatis est veritas divinationis*, inquit Tertullianus Apol. 20. Origenes tanti fecit illud argumentum, ut lib. contra Celsum asseruerit omnium, quæ ad Christi fidem astruendam adhiberi possunt, argumentum maximum hoc esse, quod Christus prædictus sit à Prophetis, qui apud Judæos fuerunt.

Secundum momentum petitur ex miraculis. Illud enim Mysterium evidenter est credendum, in cujus commendationem Deus evidentia patrauit miracula: atqui in commendationem Mysterii Incarnationis & Doctrinæ, qua Christus dixit se missum

missum à Deo in hominum salutem, Deus innumera eaque evidentissima patravit miracula: Ergo.

Majorem negare non possunt Infideles, apud quos duo constant. Primò, miraculum esse opus virtutis divinæ, utpote excedens omnes naturæ vires, & supra naturalem rerum ordinem. Secundò: Deum esse veracem, nec quicquam posse facere ad confirmandum errorem.

Minor probatur ex Apostolorum scriptis, in quibus tam patentia & tam multiplicia referuntur miracula, ut ne Judæi repetitis examinibus ea inficiari potuerint. *Quid facimus*, (inquiunt Joan. 11.) *quia hic homo multa signa facit?* (Et de claudo per S. Petrum sanato) Act. 4. *Notum signum factum est per eos . . . manifestum est, & non possumus negare.*

Illud insuper movere debet Infideles, quòd Christus tanquam naturæ Auctor & Dominus contulerit Apostolis omnimodam potestatem operandi miracula, Matth. 11. *Infirmos curate, mortuos suscite, leprosos mundate, Dæmones ejicite.* Hæc dixit, & facta sunt. Nam Apostoli post ejus mortem & resurrectionem mundum miraculis impleverunt; ut liquet, tum ex Libro Actuum, tum ex Epistolis Apost. ac præsertim ex prima ad Corinthios capite 12. ubi Apostolus præscribit quo ordine Corinthii uterentur potestate accepta patrando miracula, adeo frequentia erant apud illos; tum ex scriptis eorum, qui proxime Apostolis successerunt. *Alii*, inquit S. Irenæus lib. 2. c. 57. & 58. *Dæmones excludunt; alii autem & præscientiam habent futurorum; alii laborantes aliqua infirmitate per manus impositionem curant & sanos resti-*
tunt

tuunt. Jam etiam, ut diximus, & mortui resurrexerunt & perseveraverunt nobiscum annis multis. Quid autem? Non est numerum dicere gratiarum, quas per universum mundum Ecclesia à Deo accipiens in nomine Jesu Christi crucifixi sub Pontio Pilato per singulos dies in opitulationem Gentium perficit.

Dices 1. Scripta Apostolorum nullam habent auctoritatem apud Infideles: Ergo ex iis persuaderi nequeunt.

Distinguo antecedens, nullam habent auctoritatem divinam, & tanquam à Deo inspiratam, Concedo: nullam habent auctoritatem humanam, & qualem merentur historiæ, puta Suetonii, Taciti &c. Nego antecedens. Enimverò libri Apostolorum fidem faciunt Gentilibus Christum extitisse crucifixum sub Pontio Pilato, quidni & operatum ea, quæ in iisdem libris referuntur gesta, non occulte, sed in oculis omnium, ut resurrectio Lazari? &c.

Instas: Gentilis suspicari potest illa scripta esse supposititia, & à Christianis post mortem Apostolorum exarata, sicut plura Sybillarum carmina.

Contra 1. Constat scripta Apostolorum fuisse vulgata illis adhuc superstitionibus; nam S. Petrus Epist. 2. c. 3. laudat S. Pauli Epistolas, scribitque illas tunc fuisse in manibus etiam indoctorum, & SS. Clemens, Ignatius, & Polycarpus, Apostolorum Discipuli, testimonia ex eorum scriptis depromunt ad erudiendos fideles. 2. S. Irenæus auditor S. Polycarpi, & S. Justinus ex scriptis Apostolorum Hæreticos revincunt. Idipsum præstant Patres, qui eos proxime excipiunt, ut Origenes & Tertullianus: Ergo.

Dices

Dices 2. Magi in Ægypto prodigia edidere sicut Moyſes. Antichriſtus etiam ſigna facturur eſt: Ergo veritas doctrinæ miraculis non probatur.

Distinguo antecedens: prodigia, quorum falſitatem Deus detexit, Concedo: prodigia, quæ erant vera & indubitata miracula, Nego antecedens. Itaque Deus nonnunquam in vindictam quorundam impiorum hominum ad tempus permittit illos illudi præſtigiis & fallaciis Dæmonum; ſed ne omnes, præſertim electi, in errorem inducantur, certis & indubitatis indiciis prodit Magorum fallacias & confirmat operum ſuorum veritatem. Moyſis quippe virga Magorum Ægyptiorum virgas devoravit, qui coacti ſunt publicè confiteri digitum Dei in Moyſe contra ipſos pugnare, Exod. 7. v. 2. & c. 8. v. 19. Sic miracula Chriſti & Diſcipulorum ejus Magicas Philoſophorum & Gentilium artes traduxerunt. Sic & Prophetia Chriſti de futuris ſignis Antichriſti probabit eorum vanitatem, ſicut prædicatio Enoch & Helix, ſecundusque Chriſti Adventus mox ſubſecuturus.

§. II.

Mysterium Incarnationis aſſeritur adverſus Judæos.

Ille eſt verus Meſſias, qui venit tempore à Prophetis notato, cuique ſoli competunt omnia, quæ de Meſſia prædicta ſunt: atqui Chriſtus venit tempore à Prophetis notato, eique ſoli conveniunt omnia, quæ de vero Meſſia prædicta ſunt: Ergo.

D. Habert Theolog. Tom. VIII.

L

Minor

Minor ex innumeris Prophetarum testimoniis, probatur duobus dumtaxat, utpote omnium celeberrimis.

Primum habetur Gen. 49. ubi Patriarcha Jacob morti proximus, cum filiis suis fausta precaretur, & quæ ipsis postmodum essent ventura, prædiceret: sic Judam allocutus est, *Juda, te laudabunt fratres tui . . . non auferetur sceptrum de Juda & Dux de femore ejus, donet veniat; qui mittendus est, & ipse erit expectatio Gentium.*

Duo continet hæc prophetia; 1. is mittendus dicitur, qui sit expectatio Gentium, quod non potest intelligi de Cyro, Zorobabele, aut quovis alio, quàm de Messia, ut agnoscunt omnes veteres Judæi. 2. Designatur tempus, quo venturus est Messias, nempe vel antequam deficiat, vel statim atque defecerit sceptrum de Juda, vox enim *donec* utrumque sensum pati potest.

Atqui hæc prophetia manifeste cadit in Jesum Christum Dominum nostrum. Natus enim est regnante apud Judæos Herode, qui non erat de Tribu Juda, sed ex genere Chanaan, scilicet ex patre Antipatro Ascalonita, qui migravit in Idumæam, ex Joseph lib. 1. de bello Judaico cap. 5. unde Herodes cognominatur aliquando Ascalonita, aliquando Idumæus; Rexque Judæis præfectus est à Senatu Romano; nec post Herodem quisdam de Tribu Juda regnavit apud Judæos: Ergo post Christum Dominum Messias in lege promissus, & à Patriarcha Jacob prædictus, non est expectandus.

Dices: Sceptrum defecit apud Judæos sexcentis annis circiter ante Nativitatem Christi, quando scilicet Nabuchodonosor, vastata Judæa, in-

censo

censo Templo, & destructa Civitate Jerusalem, Judæos cum eorum Rege catenis onusto transtulit Babylonem: Ergo.

Nego antecedens, Regnum enim Judæorum non fuit extinctum in captivitate Babylonica, sed solummodo intermissum cum spe illius repetendi, & revera illud repetierunt paulo post subversum Templum lib. 1. Esdræ c. 4. Adde quod in illo interregno resedit suprema potestas, seu jus vitæ & necis penes Judæorum Principes, ut patet ex historia Susannæ, Danielis 18.

Dices 2. à diebus Machabæorum usque ad Adventum Christi Domini, hoc est per 200. annos, Sacerdotes, qui fuerunt de Tribu Levi, præfuerunt Genti Judæorum: Ergo.

Nego consequentiam: namque sceptrum primario resedit penes Tribum Judam, secundario verò tantum & ministerialiter penes Tribum Levi, quatenus Summi Sacerdotes eligebantur per Tribum Juda ad Rempublicam administrandam; sic hodiè apud Polonos viget Regia potestas, licet sceptrum gerant Principes exteri, quia ab illa Gente in Reges assumuntur.

Secundum Prophetiæ testimonium ducitur ex c. 9. Danielis, ubi Angelus Gabriel Prophetam deprecantem pro libertate populi sui consolatur his verbis: *Septuaginta hebdomades abbreviatæ sunt super populum tuum, & super urbem sanctam tuam, ut consummetur prævaricatio, & finem accipiat peccatum & deleatur iniquitas, & educatur justitia sempiterna, & impleatur visio & Prophetia, & ungatur Sanctus Sanctorum.* Quis non videt ista dici de vobis Messia? pergit autem Angelus, *Scito ergo & animadvertite; ab exitu sermonis, (id est, Edicti Re-*

gis Persarum) ut iterum ædificetur Jerusalem, usque ad Christum ducem, hebdomades septem & sexaginta duæ erunt; & post hebdomades 62. occidetur Christus; & non erit ejus populus, qui eum negaturus est. Et civitatem & sanctuarium dissipabit Populus cum Duce venturo, & finis ejus vastitas, & post finem belli statuta desolatio. Confirmabit autem pactum multis hebdomada una, & in media hebdomadis deficiet hostia & sacrificium, & erit in Templo abominatio desolationis: & usque ad consummationem & finem perseverabit desolatio. Hic tam clarè pingitur Christus, ut videatur Propheta historiam rerum gestarum potius texere, quàm vaticinium promere. Consule tom. 2. c. 5. ubi duo allata Prophetarum testimonia, & plura alia accuratius exponuntur.

Dices: ex ista Prophetia non potest colligi tempus venturi Messiae: nisi certo numerentur anni ab Angelo prænotati: atqui certò numerari non possunt; maximè quia non constat etiam apud Catholicos de exordio, ex quo numerandæ sunt illæ hebdomades: Ergo.

Distinguo majorem; non potest colligi præcisè ante oraculi eventum, transeat: post oraculi eventum, Nego majorem. Porro ex eventu potissimum cognoscitur veritas prophetiæ. Hieremias v. g. prædixerat Judæos Babylone in patriam redituros post 70. annos; sed quia non fixerat punctum temporis, ex quo numerandi essent illi anni, Judæi non potuerunt illos numerare, nisi soluta jam captivitate, ex qua facile fuit retrogradiendo numerare 70. annos & devenire ad illorum exordium. Similiter cum videamus omnes vaticinii Danielis circumstantias in Adventum Christi Domini cadere, à die mortis ejus,
quam

quam Propheta prædixit futuram in medio septuagesimæ & ultimæ hebdomadis, certò ascendimus ad initium primæ hebdomadis, intelligimusque hebdomadas illas non esse dierum aut sæculorum, sed annorum, ut citato loco tomo 2. demonstravimus.

CAPUT IV.

De notione Mysterii Incarnationis.

Ut ex notione hujus Mysterii promptius & faciliiori via ac methodo confutentur varii errores, quibus Hæretici quovis sæculo illud omnibus modis impugnarunt, paulo latius describi potest. Primarium Religionis Christianæ Mysterium, quo Verbum inseparabiliter assumpsit veram & integram naturam humanam in unitatem personæ, ad Deum passionem suam placandum, & reconciliandum generi humano.

Dicitur 1. *primarium Mysterium*; nam ex Apostolo 1. Cor. 3. *Fundamentum aliud nemo potest ponere præter id quod positum est, quod est Christus JESUS.* Act. 10. v. 43. *Huic omnes Prophetæ testimonium perhibent, remissionem peccatorum accipere per nomen ejus omnes, qui credunt in eum.* Noticiam autem hujus Mysterii esse necessariam necessitate medii multis probavimus tomo 2. cap. 2.

Dicitur 2. *Verbum*, ut significetur. 1. Christum non esse purum hominem, ut contendebat Paulus Samosatenus; cujus impiissimum errorem amplexi sunt Sociniani; sed esse verum Deum Patri consubstantialem, ut supra demonstravimus pag. 115. 2. Patrem non esse Incarnatum, & pas-

sum ut docuere Sabelliani, qui personas non distinguebant, ac propterea dicti sunt Patripatiani. Potuit quidem Pater incarnari; quia omnipotentia & virtus terminandi alienam naturam communis est tribus personis. Nec ulla foret contradictio, quodd sub diverso respectu diceretur Pater & Filius; Pater quidem, quia ab æterno generat Filium; Filius quoque, quia temporaliter genitus esset ex Beata Virgine, quemadmodum David v. g. respectu Isai est Filius, & respectu Salomonis est Pater. Conveniebat tamen Filium potius incarnari quàm Patrem aut Spiritum Sanctum; quia sicut per Verbum omnia facta sunt, sic per illud reparanda videbantur. Ita sanctus Thomas quæst. 3. art. 8.

Dicitur 3. *Assumpsit*, hoc est, sibi univit, sibi sumpsit. Tres quidem personæ concurrerunt ad unionem hypostaticam, utpote quæ sit opus omnipotentia divina; attamen unio ad solam filii personam terminata est. Unde solus naturam humanam assumpsit, quemadmodum is qui vestem induit, solus dicitur illam assumere, quamvis alii illum adjuvent ad illam aptandam & circumponendam.

Dicitur 4. *Naturam humanam*, non vero hominem; quia homo est nomen concretum significans personam seu naturam subsistentem: atqui Verbum non assumpsit naturam humanam prius subsistentem subsistentia humana, ut docuerunt Photinus & Nestorius; *Natura nostra*, inquit S. Leo Epist. 11. *non sic assumpta est, ut prius creata, post assumeretur; sed ut ipsa assumptione crearetur.*

Dicitur 5. *veram & integram*. 1. adversus Saturninum & Basilidem Simonis Magi discipulos, qui

qui primo sæculo docuerunt Corpus Christi fuisse phantasticum, ac propterea minimè passum: quem errorem amplexi sunt secundo sæculo Cerdo & Marcion, & tertio sæculo Manichæus. 2. Adversus Apollinarem, qui quarto sæculo negavit primo Verbum assumpsisse animam; cùmque ipsum tantæ amentię puderet, admisit animam, sed ratione carentem, fingens Verbum in Christo gerere vices intellectus humani: *Videte absurditatem & insaniam non ferendam*, (inquit S. Augustinus Tract. 47. in Joan.) *animam irrationalem eum habere voluerunt, rationalem negaverunt: dederunt ei animam pecoris, subtraxerunt animam hominis*. 3. Adversus Monothelitas, qui in Christo agnoscebant unam voluntatem, nempe divinam contra expressa Scripturæ verba, *non mea voluntas, sed tua fiat*, Luc. 22. Refelluntur autem ex omnibus Scripturæ textibus; ubi Christus sæpius dicitur homo, filius Abraham, ex semine David, Rom. i. v. 3. natus ex Maria Virgine; homo enim essentialiter constat ex carne seu corpore, & ex anima rationali, ac proinde Christus non esset verus homo, si aliquid ex iis ipsi defuisset; nec esset ex semine David, si, ut volebat Valentinus secundo sæculo, accepisset corpus cœleste seu æreum, quod per Mariam Virginem veluti per canalem transisset nihil ab ea accipiens. Gravis olim fuit controversia in scholis, num Verbum immediatè assumpsisset sanguinem; sed post Clementem sextum sententia affirmans obtinuit, evasitque communis.

Dicitur 6. *in unitatem personæ*, contra duos oppositos errores Eutychetis & Nestorij. Eutyches contendebat unionem factam in natura,

adeo ut quemadmodum ex unione animæ & corporis fit una natura humana, ita ex unione Divinitatis & Humanitatis exurgeret una Christi natura. Nestorius ex adverso non admittebat in Christo nisi unionem accidentalem & moralem, Verbum inter & naturam humanam, scilicet per charitatem, qua iusti sunt moraliter quid unum cum Deo, ut habetur Joan. 17. v. 21. & ita hæreticus ille in Christo admittebat duas naturas & personas, divinam scilicet & humanam, ac consequenter negabat beatam Virginem esse propriè Deiparam. Refelluntur autem duo illi errores, simulque asseritur in Christo unam esse personam, & duas naturas hocce Apostoli textu Philip. 2. *Cum in forma Dei esset, non rapinam arbitratus est esse se æqualem Deo, sed semetipsum exinaniuit formam servi accipiens, in similitudinem hominum factus, & habitu inventus ut homo. Humiliavit semetipsum factus obediens usque ad mortem, mortem autem Crucis. Propter quod & Deus exaltavit illum.* Hic de Christo manifestè duæ prædicantur naturæ: alia, qua est in forma Dei, alia, qua est in forma servi, per primam est æqualis Deo, & per secundam similis hominibus: hæc posterior alteri est obediens usque ad mortem, propter quod exaltatur ab alia. Atqui prædicata tam opposita non possunt convenire uni & eidem naturæ: Ergo in Christo reverà duæ sunt naturæ, scilicet divina & humana. Et hæc contra Eutychemem.

Contra Nestorium verò, illa prædicata quantumcunque opposita de eadem persona enuntiantur. Idem Christus dicitur Patri æqualis, hominibus similis, factus obediens & exaltatus: atqui prædicata tam opposita de eodem enuntiari non possunt.

possunt secundum diversas ejus naturas, nisi substantialiter uniantur, & coalescant in unam personam, seu suppositum; namque ex eo quod Deus habitet in justo, & ei accidentaliter ac moraliter uniatur per gratiam sanctificantem, non potest dici per istam conjunctionem accidentalem fieri caro vel homo, exinaniri, obediens, vel mori, justo obediente vel occumbente; Ergo cum ista de uno Christo prædicentur, Christus reverà est una persona & unum suppositum.

At, inquires, quomodo concipi potest post unionem hypostaticam remanere in Christo duas naturas, scilicet divinam & humanam, & unicam personam, nempe divinam?

R. Facile concipit, qui tenet notionem seu definitionem tum naturæ, tum personalitatis seu subsistentiæ. Naturam definiunt Philosophi, Principium motus (id est operationis) & quietis ejus in quo est. Unde tot sunt naturæ in aliquo supposito, quot sunt principia ejus operationum. In homine v. g. sunt duæ naturæ incompletæ; quia sunt duo diversa principia motus & operationum, quæ in ipso sunt: per corpus grave & corruptibile cadit nisi fulciatur, viget, deficit: per spiritum intelligit, discurrit. Personalitas autem sive subsistentia definitur ultimus terminus & complementum, quo natura tota est in se & incommunicabilis alteri. Sic Petrus, quamvis constet ex duabus naturis incompletis, corpore scilicet & spiritu, est unicum suppositum, sive unica persona; quia est quid unum totum in se & incommunicabile alteri, & ratione hujusce totalitatis, de Petro prædicantur tot diversæ operationes, quæ in ipso sunt; rectè enim dicitur, Pe-

trus cadit, viget, deficit, intelligit, discurrit. Atqui in Christo Domino duo sunt principia diversarum operationum; miracula enim, puta mortuorum & sui ipsius resurrectio ex una parte, & dolores, defatigationes ex altera arguunt diversa principia: Ergo & duas naturas, divinam scilicet & humanam. Nihilominus Christus est unum quid totum, quod adeo diversa operabatur; unus Christus mortuos & seipsum suscitavit, esurivit, doluit, mortuus est: Ergo est unica persona, unicum suppositum.

Dices, inde sequitur naturam divinam æquè ac humanam in Christo amisisse suam subsistentiam seu personalitatem. Ideo enim natura humana in Christo non subsistit propria subsistentia, quia est unita alteri: atqui similiter natura divina est unita alteri, nempe naturæ humanæ: Ergo ambæ naturæ pariter amittunt suam subsistentiam.

Nego sequelam & paritatem pro confirmatione adductam. Ratio autem disparitatis est quòd per unionem hypostaticam natura humana mirum in modum perficitur, ideòque non habet rationem totius, sed partis in toto, nempe Christo, existentis. At Verbum, utpote infinitum in omni genere perfectionis, nullatenus perficitur per unionem hypostaticam; nec proinde pars evadit, quia cum natura humana conjunctum, non est quid majus aut melius, quàm ab ea separatum: Ergo retinet rationem totius: & semper est in se. Unde Theologi docent Christum esse compositum cum his, non verò ex his: compositum quidem, quia Christus est Deus & homo simul; cum his, quia constat ex duabus naturis: sed non ex his, quia natura divina & humana
in

in Christo non se habent ex æquo tanquam partes.

Instas: Ex symbolo sancti Athanasii sicut anima rationalis & caro unus est homo, ita Deus & homo unus est Christus: atqui ex anima rationali & carne una fit natura completa, scilicet humana, ex qua exurgit persona v. g. Petrus, quæ prius non erat: Ergo ex natura divina & humana fit una natura totalis, ex qua exurgit Christus tanquam nova persona Theandrica, id est, partim divina, partim humana.

Distinguo majorem. Ita Deus & homo unus est Christus; unus inquam, in persona, Concedo: unus in natura totali, Nego majorem: quia natura divina & humana non sunt duæ substantiæ incompletæ, quæ confluant in unam naturam totalem, sicut anima rationalis & caro, sed inconfusæ & impermixtæ subsistunt in Verbo, ex quo unus est Christus, scilicet in persona.

Ergo natura humana in Christo non est sui juris, sed tam ipsa quàm ejus potentiæ sunt conjunctum instrumentum Verbi, quo ita agit & operatur, ut ex earum operationibus denominetur agens & operans. Quemadmodum enim de puro homine propriè non dicitur, oculus ejus videt, voluntas ejus amat, brachium ejus operatur; sed propria locutione dicendum est, homo, qui est suppositum, seu persona, oculis videt, voluntate amat, brachio operatur; quia actiones sunt suppositorum. Sic ubi sermo est de natura assumpta à Verbo, figurata est locutio, si dicatur quòd videat, amet & operetur; sed ut servetur proprietas sermonis, dicendum est, Verbum Incarnatum seu Christus videt, amat, operatur, nimi-

nimirum per potentias humanas, quas unione hypostatica fecit suas.

Ergo in Christo agnoscenda est communicatio Idiomatum, hoc est mutua & reciproca attributorum & proprietatum divinæ & humanæ naturæ de se invicem & de Christo prædicatio, nominibus tamen concretis, v. g. Deus est homo, homo est Deus, Deus est passus, mortuus, homo est immortalis, æternus, &c. sensus enim est, quod Christus habens humanitatem, mortalitatem, &c. sit etiam habens divinitatem, æternitatem.

Dixi, *nominibus tamen concretis*; quia nomina abstracta, ut divinitas, humanitas, æternitas, mortalitas, significant solummodo formam: atqui falsum est quod divinitas sit humanitas, æternitas sit mortalitas, omnipotentia sit infirmitas, contra verò concreta significant subjectum & formam, album v. g. & dulce in lacte significant lac habens albedinem & dulcedinem. Unde rectè dicitur lac est album, est dulce; item dulce est album, & album est dulce, non verò lac est albedo aut dulcedo. Item albedo est dulcedo.

Ergo natura humana in Christo est ineffabiliter sancta sanctitate substantiali; quia subsistit in Verbo, quod est ipsa sanctitas substantialis, & naturæ humanæ ultimum complementum substantiale.

Ergo natura humana in Christo est absolutè impeccabilis; quia repugnat dicere, Verbum divinum peccare: id autem propriè de illo diceretur in hypothese quod natura humana in illo peccaret, quia actiones sunt suppositorum.

Ergo

Ergo Christus propriè neque est creatura, quia nomen illud designat suppositum seu personam, quæ in Christo est increata : neque etiam servus ; quia servus significat personam extraneam, quæ jus non habet ad hæreditatem. Ratione tamen officii Christus in Scripturis nonnunquam vocatur servus, sed eo sensu, quo Filius dicitur servire Patri, cum injunctum opus exequitur. Veteres etiam non timuerunt Christum nominare creaturam ratione humanitatis, quæ creata est ; sed impropria est locutio, à qua abstinendum.

Ergo Christus est Filius Dei, non adoptivus, sed naturalis, quia non est persona extranea ad hæreditatem assumpta, sed à Deo Patre genita in similitudinem naturæ.

Nec dicas Christum, ut homo est, non esse in similitudinem naturæ divinæ, sed humanæ, namque ex dictis homo est nomen concretum significans in Christo subjectum habens naturam divinam & humanam : atqui habens naturam divinam & humanam est Verbum, quod procedit in similitudinem naturæ divinæ, non verò humanæ : Ergo Christus, etiam ut homo, est filius Dei naturalis.

Ergo beata Virgo verè est Deipara, seu Mater Dei ; quia generatio terminatur ad personam, non ad naturam ; non enim propriè dicitur natura humana genita, sed homo genitus : atqui homo, quem beata Virgo ex sua substantia genuit, est Deus : Ergo verè est Deipara, *Unde hoc mihi, ut veniat Mater Domini mei ad me ?* inquit sancta Elisabeth ad Beatam Virginem, mox ut conceperat de Spiritu Sancto, Luc. i.

Quod

Quod si quæras cur Spiritus Sanctus non æquè dicatur Pater Christi, cum non minus ad Incarnationem contulerit, quàm Beata Virgo, responditur, quia nihil contulit ex propria substantia, quemadmodum Beata Virgo : ad generationem autem propriè dictam necesse est ut generans communicet propriam substantiam, ut diximus tractatu de Trinitate.

Ergo Christus est adorandus unico cultu, eoque supremo, quem Patriæ vocant, quia adoratio terminatur ad personam, debetque respondere ejus excellentiæ; quæ in Christo est increata & infinita.

Ergo actiones Christi, licèt physicè & secundùm entitatem spectatæ essent finitæ; nihilominus moraliter & secundùm valorem à persona agente derivatum, fuerunt meriti infiniti. Constat enim apud omnes, quod actio desumat suum valorem & meritum à dignitate & excellentia personæ, à qua procedit, v.g. salutatio honorifica à Rege delata, quamvis physicè spectata sit ejusdem rationis cum simili salutatione personæ inferioris gradus, attamen moraliter longè pluris æstimatur.

Porro actiones humanitatis Christi erant à persona infinitè digna. Imo (quod hîc præcipuè est advertendum & ponderandum) quædam Christi actiones, ut oratio, adoratio, satisfactio & actus obedientiæ, non solum erant à persona divina, sed illam includebant; quia persona adorans, satisfaciens & obediens, non solum actus adorationis, satisfactionis & obedientiæ, sed seipsam quoque offert, dejicit, & subjicit. Ipse Christus in forma Dei æqualis Patri, idem ipse in
forma

forma servi factus est obediens usque ad mortem, Phil. 2. semetipsum obtulit immaculatum Deo, Hebr. 9. v. 14.

Dices, persona divina non potest dejici nec subijci: Ergo.

Distinguo anteced. non potest subijci directè & secundum se præcisè spectata, Concedo: indirectè & ratione naturæ assumptæ, Nego antecedens, quia, ut sæpius diximus, actiones sunt suppositorum, ac proinde Christus per humanitatem orans, adorans & obediens, seipsum deiciebat & subiciebat.

Ergo Christus infinitè meruit & satisfecit ultra debitum offensæ, quantumcunque supponatur infinita sive ob gravitatem, sive ob multitudinem; quia in satisfactionem obtulit personam divinam, quæ est pretium substantialiter infinitum in omni genere perfectionis; offensa verò est infinita dumtaxat moraliter & derivatè à dignitate Dei offensi, & vilitate creaturæ offendentis. *Multò plura his quæ debebamus, dependit Christus, quantò mare immensum ad pusillam aquæ guttam collatum esse possit*, inquit Sanctus Chrysostomus hom. 10. in Epistolam ad Romanos.

Dicitur 7. Verbum inseparabiliter assumpsisse naturam humanam, 1. ut significetur Verbum in triduo mortis mansisse substantialiter unitum corpori in sepulchro, animæ descendenti ad inferos, *sic in sepulchro carnem suam commoriendo non deseruit, sicut in utero Virginis connascendo formavit*, inquit Sanctus Augustinus, alioquin Christus nec fuisset sepultus, sed ejus corpus, nec ad inferos descendisset, sed ejus anima. Unde celebre in Scholis effatum, quod semel Verbum assumpsit, nunquam

quam dimisit. 2. Ut excludatur error eorum, qui repugnante scriptura, docuerunt post extremum judicium, expleto Christi ministerio, humanitatem in nihilum redituram, ait enim Angelus Luc. 1. *Regni ejus non erit finis*, & Apostolus Heb. 7. *hic autem eo quod maneat in æternum, sempiternum habet Sacerdotium*.

Dicitur denique, *ad Deum Passione sua placandum*, quibus verbis 1. notatur Incarnationis finis, qui in ejus descriptione prætermitti non debuit, cum beneficium imprimis æstimetur ex fine & ex commodis, quæ inde proveniunt: finis autem Incarnationis est reconciliatio Generis Humani cum Deo, qui licet peccato offensus, *sic dilexit mundum, ut filium suum unigenitum daret . . . ut salvetur mundus per ipsum*, Joan. 3.

Ergo Incarnatio supponit peccatum, adeo ut si homo non peccasset, Filius Dei incarnandus non fuisset, *Non veni vocari justos*, inquit Matth. 9. *sed peccatores*. Hinc exclamat Ecclesia in Canticò, *ò felix culpa, quæ talem ac tantum meruit habere Redemptorem!*

2. Iisdem verbis excluduntur duo errores. Primus est Socinianorum, qui contendunt Christum missum fuisse, ut homines verbo & exemplo doceret, ac pro illis interPELLARET in proprio sanguine, non vero ut Deum placaret, eique satisfaceret pro peccatis: quæ impietas refellitur vel ex sola Epistola ad Hebræos, in qua Apostolus à capite 5. ad caput 10. totus est, ut ostendat Christum se obtulisse in sacrificium & hostiam piacularem pro peccatis.

Nec dicas indignum esse sapiente offendi & irasci adversus vermiculum, qui contra ipsum
caput

caput erigeret: inde enim concludere liceret Deum non curare res humanas, nullamve habere rationem bonorum & malorum operum. Certè si Deus malis operibus non offenditur, nec bonis honoratur, nec colitur: si illa non ulciscitur, nec ista remunerat, quod solus Atheus dixerit.

Alter error, qui iisdem definitionis vocibus exploditur, est quorundam Eutychianorum, qui ideo dicti sunt incorrupticolæ, quod docerent Verbum non assumpsisse defectus humani corporis, scilicet, famem, fatigationem, dolores, cum tamen Christus Isaïæ 53. dicatur vir dolorum, sciens infirmitatem: cum Matth. 4. esurierit, Joan. 4. fatigatus fuerit ex itinere, Matth. 26. tristis fuerit usque ad mortem. *Esuriivit*, inquit Hilarius in Psal. 53. *sitivit*, *dormivit*, *lassatus fuit*, *mæstus fuit* & *flevit*, & *passus* & *mortuus est*. Unde patet quod S. Doctor vel revocavit quæ scripserat lib. 10. de Trinit. scilicet ictus & vulnera dolorem passionis Christo non intulisse; vel benignè interpretanda ejusmodi verba; eo nimirum sensu, quod Christus doloribus & aliis corporis defectibus naturaliter obnoxius non fuerit, cum sint pœna peccati, sed illos libera voluntate & per insigne miraculum assumpserit, ita tamen ut ab iis obrutus non fuerit, *pro his rogat dicens*, inquit c. 31. in Matth. *transeat à me calix, id est, quomodo à me bibitur, ita & ab iis bibatur, sine spei diffidentia, sine sensu doloris, sine metu mortis, hoc est, sine sensu & metu animam obruente; neque enim Martyres fuerunt omnis doloris expertes.*

Dixi Christum assumpsisse defectus corporis, non vero defectus animæ, puta ignorantiam, concupiscentiam, sensuum & appetitus inordina-

D. Habert Theolog. Tom. VIII. M . tionem,

tionem, quia ejusmodi defectus fini Incarnationis obessent, nedum conferrent, sicut defectus corporis: Ergo metus mortis & tristitia in Christo rationem non anteverterunt, sed ejus imperio paruerunt, nec ulterius fuerunt progressa.

C A P U T V.

De necessitate Incarnationis.

Q. *Incarnatio fuitne necessaria?*

R. 1. Absolutè non fuit necessaria; quia Deus potuit vel hominem peccatorem punire, quemadmodum Angelos perduelles, vel aversum per gratiam suam convertere, & offensam condonare. *Si omnibus debitum damnationis supplicium redderetur, non injustè redderetur*, inquit Sanctus Augustinus libro de natur. & grat. cap. 5. & lib. de Agone Christiano cap. 11. *sunt stulti*, inquit, *qui dicunt, non poterat aliter Sapientia Dei homines liberare, nisi susciperet hominem . . . quibus dicimus, poterat omnino*; optimi enim est Principis veniam aliquando dare subditis pœnitentibus & Reipublicæ profuturis.

R. 2. Incarnatio fuit necessaria ex hypothesi, quod Deus plenè & perfectè sibi satisfieri voluerit, nec ulla pura creatura etiam gratiis ornata id præstare potuit; quia injuria crescit pro vilitate personæ nocentis & dignitate personæ læsæ, contrà vero satisfactio iisdem capitibus decrescit. Patet exemplo. Magistratus v. g. alapa percussus, majori injuria afficitur, si percussor sit ex infima plebe, quàm si sit æqualis dignitatis; quia persona ejus per plebejum magis deprimitur, quàm

quàm per æqualem: at longè minor erit satisfactio plebei, qui se offerret ad sustinendam similem contumeliam; quia ex dejectione vilis personæ vix aliquis effluit honos in Magistratum, magnus vero, si eo se deprimat persona in simili dignitate constituta. Porro distantia est infinita majestatem Dei inter & creaturæ vilitatem, ac proinde infinita quoque creaturæ in Deum offensa, & ejus satisfactio qualiscunque, quasi nulla, *Omnes Gentes quasi non sint, sic sunt coram eo, & quasi nihilum & inane reputatæ sunt ei.* Isaïæ 40.

Hæc ratio efficaciter concludit etiam in hypothesi quod offensa in Deum non sit intrinsecè infinita, ut peccatum veniale, quia etiamsi gravis contumelia Regi terreno irrogata, non sit infinitæ malitiæ; reus tamen pro ea condignè satisfacere nequit propter distantiam, quæ inter ipsum & dignitatem Regiam intercedit. Poterit tamen satis pati, sicut & justus, pro peccato veniali; quia malitia finita non meretur nisi pœnam finitam.

CAPUT VI.

Utrùm natura humana in Christo præter unionem hypostaticam aliarum gratiarum donis fuerit ornata.

R. **H**abuit ab instanti conceptionis plenitudinem scientiæ in intellectu, & in voluntate gratiæ sanctificantis, omniumque virtutum, quæ imperfectionem non involvunt, quemadmodum fides, pœnitentia, Joan. i. *Vidimus gloriam ejus, gloriam quasi unigeniti à Patre, plenum gratiæ & veritatis.*

Q. I. *Quotuplex in Christo distinguitur scientia?*

R. Triplex.

Prima est scientia beata, qua Deum intuitivè videbat, Joan. 1. *Deum nemo vidit unquam, unigenitus qui est in sinu Patris, ipse enarravit.* Unde Sanctus Augustinus lib. de consensu Evang. capite ultimo scribit Christo soli concessam fuisse videre Deum in hac vita. Et hæc propositio, quamvis non sit de fide, constans est tamen apud omnes Catholicos.

Secunda est scientia supernaturalis infusa, qua Christus cognoscebat omnia etiam contingentia, sive præterita, sive præsentia, sive futura, secreta quoque cordium, saltem usque ad diem Judicii; hanc enim scientiam exigit officium Mediatoris, Judicis & Capitis omnium hominum.

Tertia est scientia naturalis seu Philosophia; magis enim pertinuit ad perfectionem secundi Adam, quàm primi, ut naturas rerum cognosceret, colligeretque effectus ex causis, & vicissim causas ex effectibus. Hæc scientia dicitur acquisita, non quod studio Christus illam acquisierit, infusione enim illam accepit sicut primus Adam; sed quod naturaliter acquiri potuerit.

Dices: Luc. 2. habetur: *Jesus proficiebat sapientia, & ætate, & gratia:* Ergo.

Distinguo antec. proficiebat quoad usum & exercitium, quatenus perfectiora in dies opera edebat, Concedo, proficiebat quoad habitum, quasi novos gradus sapientiæ & gratiæ acquireret, Nego antecedens: habetur etiam Hebr. 5. *Didicit ex eis quæ passus est obedientiam,* hoc est, expertus est, quod jam noverat. Et Marci 13. v. 82. *De die autem illò vel hora (extremi Judicii)*

nemo

nemo scit, neque Angeli in cælo, neque Filius; nisi Pater; quia Christus diem illum noverat per solam visionem beatificam, cujus nullus est usus in societate humana. Unde si Confessarius absque mendacio negare potest, se nosse quod in Confessione sacramentali audivit, à fortiori Christus, quæ in Verbo videbat.

Ergo Christus fuit comprehensor simul & viator: comprehensor secundum partem superiorem, in qua ex visione Dei summo fruebatur gaudio: quod insigni miraculo continuit, ne in inferiorem partem efflueret, secundum quam erat viator, doloribus obnoxius. Videat ergo lector, quis membrorum consensus cum capite? si ad dolorem vitandum miracula expeterent, cum Christus ad patiendum miracula ediderit.

Q. 2. *Quotuplex est in Christo gratia?*

R. Duplex, alia quæ competit ei ut est homo singularis: alia quæ dicitur gratia capitis ipsi concessa quatenus est caput hominum.

Q. 3. *Differuntne ejusmodi gratiæ?*

R. Non differunt entitativè, sed moraliter & respectivè dumtaxat, sicut aqua, quæ implet fontem, & quæ effluit in rivum, entitativè est eadem aqua, respectivè vero diversa, nam gratia capitis est ipsamet gratia humanitatem Christi perficiens, sed spectata prout moraliter derivatur in homines, *de plenitudine ejus omnes accepimus*, Joan. i.

Q. 4. *Gratia capitis estne propria Christi?*

R. Est; quia Deus cum nullo alio pactum iniit, ut esset aliis causa salutis æternæ, *non est in alio aliquo salus. Act. 4. v. 12.*

Q. 5. *Gratiarum plenitudo estne Christi propria?*

R. Duplex est gratiæ plenitudo: alia ex parte objecti, seu ipsius gratiæ; alia ex parte subjecti gratiam recipientis. Plenitudo gratiæ ex parte objecti dicitur, quando possidetur omnis gratia, sicut ignis habet plenitudinem caloris ex parte objecti, si supponatur continere omnem calorem, ex quo cætera fiunt calida. Plenitudo gratiæ ex parte subjecti dicitur, quando subjectum, etsi non possideat omnem omnino gratiam, habet tamen eam omnem, quæ competit ejus statui, quemadmodum homo fruens perfecta sanitate habet plenitudinem caloris ex parte subjecti; quia nihil caloris ipsi deest ad perfectam sanitatem.

Jam vero Christus utroque modo fuit gratia plenus; sed plenitudo illa, si spectetur ex parte objecti, est ipsi propria; quia solus est omnium gratiarum fons & origo. Si autem spectetur ex parte subjecti, est ipsi quodammodo communis cum pluribus; namque Sanctus Stephanus dicitur plenus gratia & fortitudine. Act. 6. sanctus Joannes Bapt. repletus est Spiritu Sancto ex utero matris suæ. Luc. 1. & beata Virgo ibidem salutatur gratia plena.

Attamen sicut alia est plenitudo rivuli, alia fluminis, alia maris, secundum alvei angustiam vel latitudinem, sic pro diversa amplitudine subjecti, diversa quoque est ejus gratiæ plenitudo. Unde minor Sancti Stephani plenitudo, quam Sancti Joannis Baptistæ; quia officium Diaconi tot dotes non requirit, quot officium Præcursoris; nec plenitudo Matris Dei, quantumcunque excedat plenitudinem Præcursoris, propter singula-

rem

rem Matris dignitatem, accedit ad plenitudinem gratiæ, quæ competit unigenito Dei Filio.

Q. 6. *Gratia Christi estne infinita?*

R. Physicè non est; quia nihil creatum potest esse entitativè infinitum; unde secundum potentiam Dei extraordinariam major posset produci gratia: moraliter tamen potest dici infinita, quatenus summa est, quæ esse possit secundum Dei sapientiam & potentiam ejus ordinariam.

Dices: gratia sanctificans admixtam habet imperfectionem, cum sit adoptio, & filios adoptivos constituat: Ergo Christus non habuit gratiam sanctificantem.

Nego antecedens, cujus confirmationem distinguo, gratia sanctificans est adoptio in persona extranea & creata, Concedo: in persona consubstantiali, Nego: sic torques à Rege concessus proprio filio non adoptat illum in cognatum Regis, quemadmodum adoptat cæteros nobiles.

CAPUT VII.

De merito Christi.

Q. I. *Meruitne Christus?*

R. De fide est meruisse, *humiliavit semetipsum factus obediens propter quod & Deus exaltavit illum.* Philip. 2. *factus est omnibus obtemperantibus sibi causa salutis æternæ.* Hebr. 5. Et ratio est, quia ad meritum tria requiruntur. Primum, bona opera supernaturalia: secundum, persona Deo grata liberè operans & in statu viæ posita: tertium, pactum, quo Deus promiserit præmium & mercedem sic operanti. Atqui hæc tria in

Christo adhuc mortali concurrerunt, opera ejus erant supernaturaliter bona, persona Deo infinitè grata, liberè & in statu viæ operabatur. Deus promiserat præmium & mercedem bonis ejus operibus, Isaïæ 53. *si posuerit pro peccato animam suam, videbit semen longævum.*

Dices: Christus ex dictis erat impeccabilis: Ergo caruit libertate, ac proinde non meruit.

Distinguo consequ. caruit libertate contrarietatis, Concedo: libertate contradictionis saltem quoad exercitium, Nego consequ.

Multiplex itaque distinguenda est libertas à necessitate: alia dicitur contrarietatis, qua quis potest facere contraria, bonum scilicet & malum, & hæc libertas à Christo exulavit, cum sit imperfectio posse deficere. Alia est libertas contradictionis in eo sita, quod homo possit bonum velle, seu facere, & non velle, seu non facere, quando præceptum non est: si enim præciperetur, omissio illius esset mala, ac proinde bonum illud non posset omitti sine libertate contrarietatis. Sed libertas contradictionis subdividitur in libertatem specificationis, ut vocant, qua quis est indifferens ad hoc specie bonum, vel ad aliud, quando neutrum præcipitur; & talis libertas est in beatis, in Deo quoque perfectissima, nec Christo deneganda, ubi præceptum non urgeret. At urgente præcepto v.g. moriendi, non erat libertas specificationis; quia, ut jam monuimus, voluntas non potest sine peccato respuere opus præceptum, *quomodo implebuntur Scripturæ? quia sic oportet fieri,* ait Dominus ad Petrum, Matth. 26.

Sed præter libertatem pacificationis est alia libertas contradictionis, quæ dicitur libertas exercitii,

citii, qua voluntas potest exercere hunc vel illum actum, licet sit determinata ad unum etiam numero objectum; quod demonstratur uno & altero exemplo. Sancta Apollonia, referente sancto Dionysio Alexandrino, Epistola ad Fabium, apud Eusebium lib. 6. Hist. c. 41. sponte & proprio motu insiliit in rogam accensum & sibi præparatum. Porro motus ille tum voluntatis, tum corporis, fuit liber & laude dignus, etiam iudicio Sancti Dionysii: liber, inquam, non libertate specificationis, quia hæc supplicii species erat ab iniquo Iudice determinata; & ab electione sanctæ Martyris independens: sed libertate exercitii, quatenus intrepida Virgo præveniens carnificis ministerium in rogam sponte & libere se conjicit, disposuit enim de illo actu, potuitque illum non ponere. Idem videre est in reo ad mortem damnato, & stipiti jam alligato; si ex desperatione præveniat carnificem & ex scala seipsum præcipitet, graviter peccat, æternisque suppliciis dignus est, utpote qui libere libertate non specificationis, sed exercitii ad tantum flagitium se determinaverit: Ergo ad merendum, aut demerendum libertas contrarietatis aut specificationis non est absolute necessaria, sed sufficit libertas exercitii, per quam homo vere & proprie ita est dominus sui actus, ut possit eum non ponere. Atqui Christus libertate exercitii mandatum Patris adimplevit, ut patet ex historia Passionis, *ut cognoscat mundus*, (inquit Joan. 14.) *quia diligo Patrem, & sicut mandatum dedit mihi Pater* (scilicet moriendi) *sic facio, surgite, eamus hinc*, scilicet quod facilius à militibus comprehenderetur: quin exiit eis obviam Joan. 18. *processit & dixit ei, quem quæritis?*

Denique libere, & ut voluit, emisit Spiritum, probans quod dixerat Joan. 10. *Nemo tollit eam (animam) à me, sed ego pono eam à meipso.*

Q. 2. *Quibus meruit Christus?*

R. Sibi & nobis, ut patet ex textibus laudatis in præcedenti responsione.

Q. 3. *Quid sibi meruit?*

R. Corporis gloriam, & nominis exaltationem, Philip. 2. *Propter quod & Deus exaltavit illum; & dedit illi nomen, quod est super omne nomen.*

Non meruit autem sibi gratiam sanctificantem, & alia virtutum dona; tum quia sunt appendices unionis hypostaticæ, & insignia naturæ Dei Filio debita: tum quia ab instanti conceptionis, & prius saltem natura, quàm posset operari, accepit tantam gratiarum plenitudinem, ut in vitæ decursu nec creverit, nec secundum ordinariam Dei potentiam crescere potuerit.

Multominus Christus mereri potuit unionem hypostaticam, quæ est principium omnis ejus meriti, cum principium meriti cadere non possit sub meritum.

Ergo à fortiori SS. Patriarchæ non potuerunt mereri Incarnationem, quæ in decreto divino præsupponebatur tanquam causa omnis humani meriti.

Meruerunt tamen de congruo aliquas Incarnationis circumstantias, Abraham v.g. & David meruerunt ut Christus ex eorum stirpe nasceretur, Beata Virgo, ut, supposito Incarnationis decreto, præ aliis eligeretur in Matrem Dei.

Dixi 1. *de congruo*: cum enim gratia non ordinetur nisi ad beatitudinem consequendam, nec Beata Virgo, nec SS. Patriarchæ per eam de condigno

digno meruerunt ulla circumstantias Incarnationis, sicut nec justus bona temporalia.

Dixi 2. *supposito Incarnationis decreto*; quia Beata Virgo nec meruit, nec mereri potuit simpliciter & absolute, ut Verbum carnem assumeret ex muliere; sed in hypothese, quod Filius Dei nasciturus esset ex muliere, meruit ut ipsa præ ceteris mulieribus tanquam dignior eligeretur.

Q. 4. *Quid Christus nobis meruit?*

R. Meruit nobis vitam æternam & omnes gratias ad illam consequendam necessarias, *benedixit nos in Christo in omni benedictione spiritali in cælestibus*, Ephes. 1.

Q. 5. *Meruitne omnibus, seu quod idem est, mortuusne est pro omnibus & singulis hominibus?*

Extra controversiam est non omnes mortis Christi beneficium recipere, id agnoscunt Patres Tridentini sess. 6. cap. 3. & patet in infantibus sine baptismo decedentibus, hi enim nullum fructum ex Passione Christi percipiunt.

Certum est etiam Christum obtulisse sufficiens pretium ad salvandos non solum omnes homines, sed etiam omnes Dæmones. Quæstio igitur solum est, utrum Christus actu & de facto sanguinem suum obtulerit pro salute omnium hominum?

Respondeo affirmative; nam Apostolus Rom. 5. Christum cum Adamo componens, sic ait, *Sicut per unius delictum in omnes homines in condemnationem; sic per unius justitiam in omnes homines in justificationem.* Hic redemptio tam late patet, quàm damnatio; Atqui damnatio ex uno in omnes & singulos homines descendit; Ergo. Idem argumentum urgetur ab Apostolo 2. Cor. 5.

Si

Si unus, inquit, pro omnibus mortuus est: Ergo omnes mortui sunt, & pro omnibus mortuus est Christus. Ubi probat Apostolus omnes & singulos in Adamo fuisse mortuos, ex eo quod Christus pro omnibus sit mortuus; nulla autem esset consequentia, si Christus pro aliquibus non esset mortuus. Unde S. Augustinus Julianum negantem peccatum originale sic infectatur lib. 6. cap. 4. Probavit Apostolus omnes mortuos esse, quia pro omnibus mortuus est unus, impingo, inculco, insertio recusanti: accipe, salubre est, nolo moriaris, unus pro omnibus mortuus est. Denique Innocentius X. & Alexander VII. hanc Jansenii propositionem numero quintam, Semipelagianum est dicere Christum pro omnibus omnino hominibus mortuum esse, aut sanguinem fudisse; sed mortuus est dumtaxat pro salute predestinatorum; damnarunt ut falsam, temerariam & scandalosam, quoad primam ejus partem; & ut impiam, blasphemam, & hæreticam, quoad secundam ejus partem.

Dices: Christus Matth. 26. dicit sanguinem suum pro multis effundendum: Ergo non pro omnibus.

Nego consequentiam, nam vox, *multi*, aliquando collective sumitur ut multus exercitus: aliquando distributive, ut multi ex exercitu. Porro collective hic sumitur, idemque significat ac omnes; ait enim Apostolus 2. Cor. 5. *pro omnibus mortuus est Christus.* Et Rom. 5. voces illas *multi* & *omnes* promiscue usurpat ad unum & idem significandum, *sicut per unius delictum, inquit, in omnes homines in condemnationem; sic & per unius justitiam in omnes homines in justificationem. Sicut enim per inobedientiam unius hominis peccatores consti-*
tuti

tuti sunt multi; ita & per unius obeditionem iusti constituentur multi. Hic multi & omnes idem prorsus significant.

CAPUT. VIII.

De Titulis Christi.

Q. I. *Quibus titulis insignitur Christus?*

R. In Scripturis hi præcipue numerantur.

1. Est Filius Dei naturalis, non adoptivus, ut demonstravimus cap. 4.

2. Est Rex non solum secundum divinitatem, ut patet, sed etiam secundum humanitatem, Ps. 2. *Ego autem constitutus sum Rex ab eo super Sion montem ejus.* Luc. 1. *dabit illi Dominus sedem Patris ejus, & regnabit in domo Jacob in æternum;* Atqui-Christus Rex non est constitutus ut Deus, cum titulum illum necessario ex natura divina habeat, æque ac Pater & Spiritus Sanctus : Ergo. Cum autem Rex sit subditorum caput, jusque habeat iisdem imponendi leges, & de illis judicandi, hinc Christus,

3. Est Caput hominum & Angelorum, Ephes. 1. *Ipsam dedit caput super omnem Ecclesiam, quæ est corpus ejus,* Et Coloss. 2. *Estis in illo repleti, qui est caput omnis principatus & Potestatis.*

4. Est Legislatores, Joan. 14. *Si diligitis me, mandata mea servate.* Unde Concilium Tridentinum sess. 6. can. 22. contra Lutheranos Legislatoris titulum Christo denegantes, sic definit. *Si quis dixerit Christum Jesum à Deo hominibus datum fuisse ut Redemptorem cui fidant; non etiam ut Legislatorem cui obediant, anathema sit.*

5. Est

5. Est Judex, Joan. 5. *Pater omne Judicium dedit Filio.*

6. Est Sacerdos. Psal. 10. *Tu es Sacerdos in æternum secundum ordinem Melchisedech.* Quem locum Apostolus de Christo interpretatur Hebr. cap. 5. & sequentibus. *Unus verus Rex*, inquit S. Augustinus lib. 3. de consensu Evang. cap. 3. *quia & unus verus Sacerdos: illud ad regendum nos, istud ad expiandos.*

Dicitur 1. *Sacerdos in æternum*, quia non habet successores, sed Vicarios: Summus Pontifex v. g. succedit quidem Petro, ut qui per mortem prohibitus sit permanere, sed non succedit Christo, qui, eò quòd maneat in æternum, sempiternum habet Sacerdotium, Heb. 7.

Dicitur 2. *Secundum ordinem Melchisedech*, non quod Melchisedech sit fons, & origo Sacerdotii legis novæ, quemadmodum Aaron Sacerdotii Levitici, sed quòd Melchisedech præfiguraverit Sacerdotium à Christo instituendum.

Porro Christus Sacerdos non est secundum naturam divinam, ut falsò contendit Calvinus; quia Sacerdotis est sacrificium offerre, orare, ac proinde superiorem agnoscere: quæ proculdubio non competunt Christo, nisi ratione humanitatis, secundum quam dixit, Joan. 14. *Pater major me est.* Unde Sanctus Augustinus ait, *Christus homo, pro nobis est orator; ut Deus, est cum Patre exauditor.*

7. Est Mediator Dei & hominum 1. Tim. c. 2. *Unus Mediator Dei & hominum, homo Christus JEsus.* Et ratio est, quia ille proprie & absolute est Mediator inter Deum & homines, qui sponsor est Deo pro hominibus, qui pro iis plane satisfecit.

tisfecit, eosque per sua merita in Dei gratiam reduxit; Atqui Christus ea omnia præstitit, non per naturam divinam, ut vult Calvinus, sed per naturam humanam, non quidem nude spectatam, cum per se solam non potuerit condignam, hoc est, infinitam exhibere satisfactionem; sed in Verbo subsistentem, hoc est, Christus Mediator fuit & Sacerdos, ut homo Deus, sed ut homo subsistens persona divina, ita ut persona divina fuerit principium quod mediationis Christi, & natura humana principium quo. *Mediator Dei & hominum*, inquit S. Augustinus Tract. 72. in Joan. *non in quantum est Deus, sed in quantum est homo Christus Iesus.*

Q. 2. *Christus ut homo estne Rex temporalis?*

R. Minime, saltem quoad actum seu exercitium: *Regnum meum*, (inquit, Joan. 18.) *non est de hoc mundo.* Luc. 12. *Quis me constituit Iudicem?* nempe ad dirimendam controversiam de hæreditate inter fratres dividenda.

Dixi, *saltem quoad actum & exercitium*; Nam probabilitate non caret eorum sententia, qui docent Christum fuisse Regem quoad jus; quia ut homo subsistens persona divina erat naturalis Dei Filius, ac proinde supra omnem potestatem temporalem, quod ipse videtur agnoscere Matt. 17. ubi negat se, utpote Filium Dei, teneri solvere tributum. Sed cum hæc potestas sit excellentiæ, nec ea uti voluerit, illam non transmisit ad Pastores Ecclesiæ, quibus sicut cæteris dicit Apostolus Rom. 13. *Omnis anima potestatibus sublimioribus subdita sit.*

Dices: Summus Pontifex nulli potestati temporali subjacet, sed Regia fulget dignitate: Ergo.

Distin-

Distinguo antecedens: fulget per accidens & ex concessione Principum temporalium, Concedo: ratione sui Sacerdotii & jure divino, Nego antecedens; nam prædecessores ejus per plura sæcula fuerunt subditi Dominis temporalibus etiam Christianis.

Q. 3. *Christus estne Sacerdos & Mediator vi unionis hypostaticæ?*

R. Minime; nam ex Apostolo Hebr. 5. *Christus non semetipsum clarificavit ut Pontifex fieret, sed qui locutus est ad eum Tu es Sacerdos in æternum secundum ordinem Melchisedech.* Ergo Christus ex deputatione Patris fuit Sacerdos, & Mediator.

Dices, amicus non indiget acceptatione & deputatione creditoris, ut pro debitore sponso-rem se exhibeat & solvat: Ergo.

Distinguo antecedens, si agatur de restitutione, per quam damnum in re familiari allatum refarcitur, & pecunia ablata restituitur, Concedo: si sermo sit de satisfactione pro offensa personæ illata, Nego antecedens. Persona enim læsa & depressa ab eo, qui in eam superbe & contumeliose insurrexit, jus habet ut ipse contumeliosus deprimatur & pœnas luat rejecta alterius satisfactione. Unde si persona læsa Mediatorem & sponso-rem admittat, qui pro nocente veniam precetur, satisfaciat, cedit juri suo & gratiam facit; quantò magis si ipsa talem Mediatorem nocenti per se ad condigne satisfaciendum impari præparasset & suscitasset? Sic autem Deus dilexit mundum, ut Filium unigenitum suum daret, salvareturque mundus per ipsum, Joan. 3. v. 16. Ergo plus Christo non debemus, quàm Patri; quia Christum pro nobis satisfecisse, & Patrem
Filium

Filium suum unigenitum nobis dedisse, utrumque fuit opus æqualis & infinitæ charitatis.

Q. 4. *Estne proprium Christi esse Mediatorem Dei & hominum?*

R. Distinguendum est: esse Mediatorem suo nomine & merito, est proprium Christi; quia ex dictis nulla creatura potuit offerre pretium æquivalens offensæ; & condignam exhibere Deo satisfactionem; sed Mediatorem esse ministerialem, qui agat nomine & virtute alterius, convenit Sacerdotibus, & omnibus justis sive in Cælo regnantibus, sive in terra militantibus; iis quippe tanquam instrumentis utitur Christus verus Dei & hominum Mediator ad opus reconciliationis & officium Mediatoris perficiendum; Angeli enim Hebr. 1. dicuntur administratorii spiritus à Christo in ministerium missi propter eos, qui hæreditatem capient salutis. 1. Cor. 5. clamat Apostolus, *pro Christo legatione fungimur.* Et Coloss. 1. *adimpleo ea, quæ defunt passionum Christi, in carne mea, pro corpore ejus, quod est Ecclesia.* Quid verò deest passionibus Christi, per quas *consummavit in æternum sanctificatos?* Heb. 10. v. 14. fructus scilicet & applicatio meriti illius. Adimpleant autem Pastores prædicationibus, Sacramentorum administratione; & justi omnes suis orationibus. Quin ipsi Calviniani, qui calumniantur Catholicos non sine Christi Mediatoris injuria sanctos invocare, mutuis se precibus adjuvant, publica jejunia, & solemnes supplicationis, si quæ occurrat Ecclesiæ necessitas, indicunt ad Deum per merita Christi placandum.

Objiciunt, Ecclesia Romana vult invocationem Sanctorum esse necessariam, nec patere ac-

cessum ad Deum, nisi per ejusmodi intercessores, quem impium errorem carpit Apostolus in Simonis Magi discipulis, Coloss. 2. *Nemo vos seducat, inquit, volens in humilitate & religione Angelorum, quæ non vidit ambulans, frustra inflatus sensu carnis suæ, & non tenens caput ex quo totum corpus crescit in argumentum Dei: Ergo.*

Nego antecedens, & dico mala fide Pseudoministros ejusmodi criminationibus Ecclesiam Romanam apud suos infamare, cum in Concilio Tridentino sess. 25. dilucide exponat, quid de invocatione Sanctorum à primis seculis hætenus senserit, nempe bonum & utile esse non verò necessarium Sanctos suppliciter invocare: merita Christi in Sanctorum intercessione operari communionem, quam ipse caput Ecclesiæ posuit inter membra sui corporis: preces eorum non prævenire Dei misericordiam, sed ab ea proficisci, & exequi dumtaxat, quæ ipse per illas facere decrevit, *portat contradictionem deprecantium, quam aspirat, inquit S. Gregorius lib. 9. mor. cap. 9. & veluti nolenti apponitur, quod ab ipso, ut fiat, imperatur.* Unde Ecclesia in suis collectis orat, non solum ut per Christum profit nobis Sanctorum intercessio; sed etiam ut Deus ipsis inspiret intercedendi affectum: *Interveniat pro nobis quæsumus Domine, apud tuam clementiam, nunc & in hora mortis nostræ, Beata Virgo Maria, inquit in festo ejus Compassionis. Et in vigilia S. Andreæ, Quæsumus omnipotens Deus, ut beatus Andreas Apostolus tuum pro nobis imploret auxilium Per Dominum, &c.* Qua igitur fronte Pseudoministri spargere audent apud suos Sanctorum invocationem adversari honori unius Mediatoris, Dei & hominum

num JESU Christi, cū in illa communicatio gratiæ & Spiritus ejus mirificè eluceat?

Instant 1. Novatores: frustra & inutiliter invocantur, qui non audiunt: Atqui Sancti in Cœlo non audiunt sibi supplicantium preces, *mortui nihil amplius noverunt.* Eccles. 9. Hinc in scripturis legimus sanctos Patriarchas & Prophetas invocasse quidem Angelos, utpote qui in terris versentur ad hominum custodiam, nusquam verò mortuos: Ergo.

R. i. Ex concessis Adversariorum saltem habemus creaturas sanctas absque injuria Christi Mediatoris invocari posse, cū agnoscant sanctos Patriarchas & Prophetas piè & utiliter sanctos Angelos invocasse, cur igitur non & ipsi eos in suis Synagogis invocant? Ergo manifestè pugnant contra Verbum Dei; cū docent invocationem Sanctorum adversari honori Christi Mediatoris. Ideo autem in veteri lege sancti homines defuncti non invocabantur, quia nondum ipsis erat refferatum cœlum, nec fruebantur Dei consortio, in quo Beatis multa revelantur, ut constat ex dictis Tractatu de Attributis, ubi de visione beatifica. Addo Angelos non semper esse præsentés ubi invocantur, cū in locis admodum distantibus preces ad eos dirigantur, quas proinde naturaliter percipere nequeunt; sed S. Patriarchæ & Prophetæ non erant anxii, præsentésne essent aut absentes Angeli, quoties eorum opem implorabant. Unde

R. 2. In forma ad argumentum distinguendo majorem; frustra invocantur qui non audiunt, si nullus invocantes audiat, qui postulata concedere possit, Concedo: secus, Nego majorem.

Porro Ecclesia certa est Deum exaudire implorantes Sanctorum auxilium, grataque ipsi esse ejusmodi orationes, ut probant singularia beneficia, quæ hactenus contulit confugientibus ad Sanctorum auxilium. Hinc Ecclesia publicas orationes, quas collectas vocant, solet ad Deum dirigere, ut intercedentibus Sanctis, quorum agit memoriam, postulata concedat per Christum Dominum nostrum.

Distinguo similiter minorem; Sancti in cælo sibi supplicantes non audiunt naturaliter & per se, Concedo: non audiunt, sive per Angelorum ministerium, quorum officium est orationes fidelium ad Deum referre, ut habetur Apoc. 8. v. 3. & 4. & testantur communiter SS. Patres; sive per Dei revelationem; Nego min. Nam ex dictis citato loco de Attributis; Beati in cælo cognoscunt quæ ad ipsos spectant: ad eorum autem beatitudinem accidentalem pertinet nosse quis sit eorum status, pro quibus sunt solliciti; legimus enim 2. Paralip. c. 21. v. 12. literas ab Elia jam translato allatas fuisse ad Joram Regem Israel, & 2. Machab. c. 15. Jeremiam & Oniam summum Sacerdotem defunctos orare pro populo suo in magnis calamitatibus constituto. *Quis dubitat, inquit Origenes hom. 31. in Num. quod Sancti quique orationibus nos juvent?* Et S. Hieronymus contra Vigilantium, *Si Apostoli & Martyres adhuc in corpore constituti possunt orare pro cæteris, quando adhuc pro se debent esse solliciti; quanto magis post coronas, victorias & triumphos?* Illud ipsum agnoscit Anglorum Rex in sua responsione ad Cardinalem Peroniam his verbis; *Sà Majestè revere les Martyrs & autres Saints regnants maintenant avec JESUS CHRIST,*
& ne

Et ne doute point qu'ils ne prient pour les necessitez de l'Eglise, Et croit fermement que leurs prieres ne sont point inutiles. Ex pia autem ejusmodi sollicitudine sequitur Sanctorum interesse, ut cognoscant orationes, quæ ad ipsos diriguntur.

Instant 2. Catholici ejusmodi invocationem in cultum Religiosum deducunt, Sanctos honoribus afficiunt, qui idololatriam sapiunt, thura ipsis incendunt, &c. Ergo.

R. I. Dallæus Calvinianorum olim Pseudominister fateri cogitur cultum, quem Ecclesia Romana defert Sanctis non esse Latreuticum. Sic enim habet in sua Apologia : *Cette Rome me me, de laquelle nous nous plaignons, est pour la plupart d'accord avec nous ; car bien qu'elle rende de grands bonheurs à diverses creatures, si est ce qu'elle à toujours connu qu'il y a une espece de service qui ne doit Et ne peut etre rendu à d'autres qu'à Dieu.* Thuris suffitus in veteri quidem lege & apud Paganos erat signum supremi cultus, quem latriæ vocant, quique soli Deo, sive vero, sive credito defertur; sed apud Christianos promiscuè usurpatur, sive ad cultum religiosum, sive ad cultum civilem, honores enim thuris tribuuntur Principibus politicis & Magistratibus, Reliquiis, Imaginibus Sanctorum, sed alia intentione, quàm augustissimo Eucharistiæ Sacramento, ac proinde non est signum determinatum supremi cultus, sicut sacrificium, quod in quacumque Religione sive vera, sive falsa soli Deo licet offerre, Nos Martyribus nostris, inquit S. Augustin. lib. 22. de civ. c. 10. *non templa sicut Diis, sed memorias sicut hominibus mortuis ædificamus; Deo quippe, non ipsis sacrificat (Sacerdos) quamvis in memoriam sacrificet*
N 3 eorum,

eorum, quia Dei Sacerdos est, non illorum. Vulgò tamen vocamus templa, aras, missas Sanctorum, quorum specialis fit commemoratio, sed propriè sunt Dei templa, aræ & missæ, quia illi soli sacrificium offertur; *quis enim audivit aliquando fidelium stantem Sacerdotem ad altare etiam super sanctum corpus Martyris ad Dei honorem, cultumque constructum, dicere in precibus, offero tibi sacrificium, Petre, Paule, vel Cypriane?* S. Augustinus lib. 18. de civ. cap. 6.

R. 2. Cum excellentia sit motivum & ratio, cur honos alicui exhibetur, necesse est honos & cultus sit diversus pro diversitate excellentiæ. Hinc cultus Magistratibus delatus est civilis duntaxat, quia excellentia, propter quam coluntur, est merè civilis, exhibitus vero Creatori debet esse summus ob infinitam ejus excellentiam nulli creaturæ communicabilem. Porro excellentia Beatorum, quæ consistit in eorum sanctitate & unione, quam habent cum Deo, quamvis infinitè distet à divina excellentia, negari tamen non potest quin sit longè spectabilior excellentia merè civili; ac proinde honos ipsis debetur plusquam civilis, & eò major, quo perfectior sanctitas & dignitas in ipsis refulgent. Unde Mater Dei speciali cultu, qui dicitur hyperdulæ, prosequenda est ob singularem ejus dignitatem & excellentiam. Jam examinandum superest, utrùm ejusmodi cultus ad Religionem pertineat, dicique possit religiosus, quanquam hæc quæstio ad fidem non pertineat, liberumque sit circa eam opinari.

R. 3. Cultus Sanctorum ad Religionem pertinet, meritoque dicitur religiosus, quia Religionis officium est colere Deum ut primarium suum objectum, & cætera, quæ Deo consecrata sunt, tan-

tanquam secundaria objecta, v. gr. templa, altaria, vasa & omnem templi supellectilem; adeo ut omnium Nationum iudicio & sensu, qui unum ex his violaverit, impius & sacrilegus habeatur. Quod autem Templum augustius & sanctius, quàm Spiritus cœlestes & animæ beatæ? An non præstantiori, ac mirabiliori modo Deus inhabitat in Sanctis suis, quàm in domibus manufactis? si vasa ex contactu rerum sacrarum denominantur sancta, & eatenus religiosè observanda, quanto magis qui unus spiritus sunt cum Deo, ejus amicitiae participes & consortes facti divinæ ejus naturæ?

Hinc Sanctorum Reliquiæ & eorum Imagines inter res sacras numerantur; atque ideo religioso cultu venerandæ.

Reliquiæ quidem, utpote quæ in societatem Passionum Christi cum animabus sanctis venerint, ipsis instrumenta fuerint plurium bonorum operum, quæ & templa Spiritus sancti extiterint, 1. Cor. 6. in resurrectione reparanda, & ad gloriam immortalem restituenda. Deus ipse multis miraculis reliquias Sanctorum veneratione dignas ostendit, pallio Eliæ aquas Jordani divisit, 4 Reg. c. 2. v. 8. mortuum suscitavit contactu cadaveris Elisei 4. Regum c. 13. v. 2. quamplurimos ægros sanavit sudariis & semicinctiis Apostoli, Actuum 19. v. 11. Sanctus Chrysostomus Hom. 16. in 2. ad Cor. refert innumera prodigia, quæ Deus sua ætate operabatur ad Sanctorum sepulchra; & S. Augustinus scribit similia contigisse in Inventione Corporum tum SS. Gervasii & Protasii, lib. 9. Conf. cap. 7. tum S. Stephani libr. 22. de Civ. cap. 8.

Imagines quoque Christi & Sanctorum religiosè sunt tractandæ, quemadmodum definiit Concilium Nicænum II. contra Iconoclastas an. 785. & Concilium Tridentinum adversus Pseudoreformatos citata sess. 25. tum quia Imagines relationem habent ad eos, quos repræsentant, & ita quodammodo ad eos pertinent; tum quia oculis fidelium subjiciuntur ad honorificam Sanctorum memoriam & imitationem. Ipse Pseudominister Dallæus in suo opere de Imaginibus, iis concedit sicut omnibus Religionis instrumentis aliquod honoris signum, cogiturque fateri Catholicos in hac parte non esse Idololatrias. *Enim verò qui imaginem Imperatoris coronat, inquit S. Ambrosius in Psal. 118. utique illum honorat, cujus imaginem coronavit: quia statuam contempserit Imperatoris, Imperatori utique fecisse injuriam videtur.* Viderint ergo Novatores, quomodo iram Christi sustinebunt, cujus imagines fœde traxerunt, fregerunt, & etiam nunc (ubi prævalent) illas ejusmodi contumeliis afficiunt.

Illud tamen discrimen est reliquias inter & imagines, quòd reliquiæ majori honore dignæ sint, quam imagines. Crux v. g. cui Christus affixus est, quàm Imago Crucis; quia ipso contactu & usu, quo Christo & Sanctis servierunt, consecratæ sunt, cùm imagines propter solam repræsentationem ad Christum & ad Sanctos referantur. Unde minime sacrarum reliquiarum particulæ honos debetur, nullus verò imaginis particulæ, quia nihil sanctum repræsentat.

Dixi, *Imagines Christi & Sanctorum*: nam circa Imagines Divinitatis Ecclesia nihil hætenus expresse statuit, imò illas excipit in Concilio Nicæno II.

no II. Act. 7. his verbis, *Christiani invisibilis & incomprehensibilis imaginem nunquam fecerunt.*

Ufus tamen invaluit à nono sæculo pingendi Deum in illa forma, in qua apparuit SS. Patriarchis & Prophetis, ut Danielis 7. v. 9. quemadmodum Angeli (licet incorporei) ante Concilium Nicænum II. & Spiritus sanctus pingebantur in illa specie, in qua visi fuerant, ut ibidem Nicæni Patres testantur. Enimverò cur non liceret Pictori, quod Scripturæ licet, quæ Deum sæpius pingit cum membris humanis? Hinc meritò proscripta est ab Alexandro VIII. anno 1690. hæc propositio, *Dei Patris simulacrum nefas est Christiano in Templo collocare.* Quia tamen usus ille respectu rudiorum non est sine aliquo periculo, Patres Tridentini citata cess. 25. Pastores monent hisce verbis, *quod si aliquando historias sacræ Scripturæ, cum id indoctæ plebi expediet, figurari contigerit, doceatur populus non propterea divinitatem figurari, quasi oculis corporeis conspici, vel coloribus aut figuris exprimi possit.*

Objiciunt Novatores. Indecorum est & omnino probrosum, si Filius honoret patibulum, in quo Pater passus est.

Respondeo hanc esse Gentilium & Judæorum impietatem, quibus Crux Christi erat scandalum & stultitia; sed ipsis vocatis Judæis & Gentilibus fuit Dei Virtus 1. Cor. v. 24. Trophæum Christi victoris (domuit enim orbem ligno, non ferro): Cathedra docentis & Tribunal Judicis, ex quo *Expolians Principatus & Potestates, traduxit confidenter, palam triumphans illos in semetipso*, Coloss. 2. v. 15. Quis autem filius cum honore non servat gladium, quo Pater strenuè pugnavit, & Reipu-

blicæ hostes gloriose devicit ? Si Calvinianus erubescit adorare in Cruce pendentem, pudeat ergo ipsum confiteri Christum pro nobis passum, & mortuum.

At, inquires, si Crucem colere licet, quia Christus ei affixus est, cur non similiter asinum qui Christum vexit, & os Judæ proditoris, cui Christus osculum dedit? Quia scilicet ista propter se honorari viderentur, cum sint sensu vel ratione prædita; inanima verò, ut Crux, Clavi, Corona spinea, nullo honore digna sunt, nisi relativè ad eximiam personam, cui inservierunt; sic Sceptrum & Coronam Regis veneramur, non ejus equos.

Objiciunt 2. Exod. 20. v. 4. Deus prohibet imagines, *non facies tibi sculptile, neque omnem similitudinem*, ex quo textu Tertullianus lib. de spectaculis c. 23. Origenes lib. 7. contra Celsum concludunt artem pingendi Christianis esse interdictam. Concilium Eliberitanum Can. 36. sic statuit, *placuit picturas in Ecclesia esse non debere*. Galli 8. & 9. sæculo imagines quidem admiserunt, sed definierunt in Templis non esse collocandas ad cultum, sed ad recordationem Sanctorum, ut patet ex libris Carolo Magno ascriptis, & ex Concilio Parisiensi sub Ludovico Pio, Caroli Magni filio & successore, Ergo.

Nego consequentiam, ad antecedens verò

R. 1. Revera imaginum usus fuit Judæis prohibitus, sicut esus carnis, sed ejusmodi præcepta, utpote cæremonialia, per Christum fuere abrogata. Unde sicut Christianis licitum est edere carnem porcinam & suffocatam, ita & pingere imagines.

R. 2.

R. 2. Cùm usus sacrarum Imaginum non sit ad salutem necessarius, nec in Evangelio præscriptus, penesque sit Ecclesiam illum præcipere vel prohibere, prout fidelibus expedire judicaverit, mirum non est, si rarior fuerit, vel etiam alicubi prohibitus eo tempore, quo hinc Gentiles à cultu simulacrorum erant revocandi, hinc Judæi à Lege veteri ad Legem Evangelicam transferendi; si enim Apostoli colendas Imagines proposuissent, periculum fuisset ne Gentiles eas ut nova Idola amplexi fuissent, neve Judæi, qui juxta Legis veteris præscriptum ab imaginibus abhorrebant, à suscipiendo Evangelio deterriti fuissent.

R. 3. Galli sub Imperatoribus Carolo Magno & Ludovico Pio, primo pro imaginibus retinendis adversus Iconoclastas strenuè pugnarunt. Secundò parciores quidem fuerunt quàm Græci in cultu illis exhibendo; sed omnem reverentiam imaginibus non denegarunt, in laudato quippe Concilio Parisiensi definierunt illas in Templis honorificè collocandas & conservandas, ad exemplum scilicet & piam recordationem virtutum, quas Christus hominum mediator & caput in membris suis operatus est. Ergo nec invocatio Sanctorum, nec sacrarum Reliquiarum & Imaginum cultus mediatorem nostrum Christum injuria afficiunt, quin sunt eximia monumenta, & testimonia copiosæ redemptionis, quam habemus in illo.

Nonnulla tamen observanda sunt circa sacrarum Reliquiarum & Imaginum venerationem.

Primum. Sanctorum Reliquiæ & Imagines non sunt colendæ cultu absoluto; sed relativo dum-

dumtaxat, tum quia in illis nulla est excellentia absoluta, sed relativa tantum: tum quia creatura rationalis non debet subjici rebus inanimatis.

Secundum. Sacræ Reliquiæ & Imagines plus vel minus sunt honorandæ, secundum majorem, vel minorem excellentiam personæ, quam respiciunt, v. g. plus honoris deferendum est Cruci, in qua passus est Christus Dominus, quàm Cruci, cui affixus est sanctus Petrus: plus Imagini Christi, quàm Imagini Deiparæ, &c.

Tertium. Cultus sacrarum Reliquiarum & Imaginum est inferior cultu debito Sanctis, ad quos illæ referuntur; quia excellentia illa relativa, quæ Reliquiis & Imaginibus competit, longè distat ab excellentia absoluta, quæ in ipsis Sanctis refulget, ut patet exemplo ministrorum Regis, qui cum in se non contineant totam excellentiam & majestatem Regiam, non eodem honore, quo Rex ipse, excipiuntur. Unde concludere licet contra nonnullos Theologos Crucem, sive veram, sive pictam, non esse colendam cultu supremo, qui dicitur latriæ, qui soli Deo deferri debet, ut expresse definiit Concilium Nicænum

II. *Illis (Imaginibus) salutationem & honorariam salutationem exhibeant, non secundum fidem nostram, veram latriam, quæ solum Deo competit, sed quemadmodum veneranda & vivificantis Christi typo . . . tribuimus.*



Tra-



Tractatus DE GRATIA CHRISTI.

ORDO doctrinæ postulat, ut post Tractatum de Incarnatione, continuò dicamus de Gratia Christi, utpote quæ sit Incarnationis effectus, juxta illud Eph. 1. *Qui benedixit nos in omni benedictione spirituali in cœlestibus in Christo.* Et 2. Petr. cap. 1. *per quem (Christum) maxima & pretiosa nobis promissa donavit, ut per hæc efficiamini divinæ consortes naturæ.* Sit igitur

CA-

CAPUT PRIMUM.

De notione Gratiæ Christi.

Q. I. *Quid est gratia Christi?*

R. Est donum Dei gratuitum, supernaturale, homini lapso concessum per merita Christi Domini in ordine ad vitam æternam.

Dicitur 1. *Donum gratuitum*, ut ostendatur gratiam non rependi præcedentibus operibus; sed gratis dari: alioquin gratia jam non esset gratia, sed merces, Rom. II.

Dicitur 2. *Supernaturale*, ut gratia Christi distinguatur à donis naturalibus, qualis est creatio & conservatio, quæ sunt dona Dei gratuita sed naturalia: *illam gratiam, qua creati sumus homines*, inquit S. Augustinus epist. 177. aliàs 95. *etiamsi ita appellandam non immeritò intelligimus, mirum est tamen si ita appellatam in ullis legitimis Prophetis, Evangelicis Apostolicisque litteris legimus. Hanc Apostolica doctrina gratiam isto nomine appellat, qua salvamur & justificamur Fide Christi.* Gratiam sic appellatam Pelagius, à quo Pelagiani, & Semipelagiani, rejecit quinto ineunte sæculo, propter eaque accusatus in Concilio Diospolitano, Patres fefellit per subdolam confessionem, nempe professus est gratiæ necessitatem, sed qua conditi sumus homines, & sine qua nec sumus, nec quidquam possumus.

Dicitur 3. *Homini lapso concessum*, ut significetur gratiam Christi esse minime gratuitam; siquidem donum quod indulgetur inimico, magis gratuitum est, quàm quod tribuitur amico, ut notat Apostolus Rom. 5. *Commendat autem* (inquit) *chari-*

charitatem suam Deus in nobis : quoniam cum adhuc peccatores essemus . . . reconciliati sumus Deo per mortem filii ejus.

Dicitur 4. *Per merita Christi Domini*, ut distinguatur gratia hujus status à gratia Angelorum, & primorum parentum in statu innocentiae, quæ in nostra sententia independenter à meritis Christi fuit concessa.

Dicitur 5. *In ordine ad vitam æternam*; gratia enim est semen vitæ æternæ, nec ad aliud datur, quam ut vitam æternam consequi mereamur.

Q. 2. *Quid est donum supernaturale?*

R. Supernaturale secundum vim nominis significat quod est supra omnem naturam creatam & creabilem.

Dupliciter autem aliquid dicitur supernaturale, vel quoad modum dumtaxat, vel quoad modum simul & entitatem. Donum est supernaturale quoad solum modum, quando licet secundum se spectatum sit naturalis ordinis, viribus tamen cujusque naturæ creatæ haberi non potest. Sic Philosophia Adamo infusa, vita Lazaro redita, sunt dona quoad entitatem naturalia, cum sint ejusdem ordinis cum Philosophia & vita aliorum hominum; sed modus, quo Adamus habuit Philosophiam, & vita Lazaro jam foetenti est redita, excedit omnes naturæ vires.

Unde Philosophia Adami, & vita Lazari suscitati dicuntur supernaturales quoad modum dumtaxat. Sed ut intelligatur quid sit donum supernaturale quoad entitatem,

Observandum triplicem esse rerum ordinem. In primo ordine sunt res mere corporeæ, ut lapis, bruta animantia. In secundo ordine sunt res spirita-

ritales, ut Angelus, anima rationalis, quæ ita abstrahunt à materia corporea, ut tamen non sint puri actus, sed in illis realis sit compositio ex substantia & accidentibus, habeantque esse per participationem, & dependentiam à prima causa, à qua accipiunt esse & agendi virtutem: in tertio autem ordine solus Deus existit, qui, utpote ens à se, est actus purissimus, summe necessarius, & sine ulla compositione, infinite perfectus in omni genere perfectionis; ita ut intellectio, sapientia & cæteræ perfectiones sint ipsius esse, aptiusque Deus dicatur intellectio, quàm intelligens; sapientia, bonitas & sanctitas, quam sapiens: bonus & sanctus.

Porro cum operari sequatur esse, quæ sunt in primo ordine, nempe corporea, non possunt operari quæ pertinent ad secundum ordinem, nec ista quæ pertinent ad tertium, v. g. corpus animale non potest sensu spiritalia percipere, nec Angelus Deum, ut in se est, intellectu attingere, nisi supra naturam suam elevetur & disponatur, quod S. Thomas 1. p. q. 12. art. 5. ad 3. illustrat exemplo ferri, quod præstare non potest quæ sunt ignis, nec ad id disponi, nisi ab habente formam ignis, cujus virtute fiet igneum, ac consequenter agat quæ sunt ignis propria, lucebit, calefaciet, comburet: similiter Spiritus creatus non percipiet quæ Dei sunt, nisi fiat Deiformis, ut loquitur S. Doctor, hoc est, formam à Deo accipiat, per quam constituatur in esse divino; & fiat quodammodo divinus. Forma autem illa est gratia, quæ dicitur semen gloriæ, quia ad visionem Dei intuitivam tendit, sicut semen arboris ad arborem producendam.

Ergo

Ergo Gratia est donum supernaturale, tum quoad modum, tum quoad entitatem: quoad modum quidem, quia à nulla natura creata potest profluere: quoad entitatem quoque, quia est divinum quid, creaturam intellectualem elevans supra omnem rerum creatarum ordinem, illamque Deiformem constituens.

CAPUT II.

De divisione Gratiæ Christi.

Q. 1. *Quotuplex est Gratia Christi?*

R. Duplex, alia exterior, ut institutio Sacramentorum, prædicatio Verbi divini, &c. alia interior, ut Fides, Spes, Charitas. De sola interiore hîc agimus.

Q. 2. *Quotuplicis generis est gratia interior?*

R. Duplicis, scilicet gratia gratis data, & gratia gratum faciens.

Gratia gratis data, est ea, quæ datur ad aliorum salutem, ut donum miraculorum, potestas absolvendi à peccatis, & conficiendi alia Sacramenta.

Gratia gratum faciens est ea, quæ ordinatur ad propriam accipientis salutem, us Fides, Charitas; &c. Ideò autem dicitur gratum faciens, quia rectè ad Deum disponit & afficit: non potest autem quin gratus sit Deo, qui est erga eum rectè affectus.

Q. 3. *Quare gratia gratis data sic dicitur, cum gratia gratum faciens etiam gratis detur, aliòquin non esset gratia?*

D. Habert Theolog. Tom. VIII.

○

R. Quia

R: Quia nomen generis solet tribui speciei ignobiliori, sic bruta simpliciter vocantur animalia, & eo nomine distinguuntur ab homine, qui, quamvis sit & ipse animal, non sine contumelia tamen appellaretur animal, quia est quid longè præstantius. Similiter cum gratia gratum faciens sit nobilissima gratiæ species, speciale nomen sortitur, cæteræ verò ignobiliores nomen genericum retinent, dicunturque simpliciter gratiæ gratis datæ.

Dices: bonum illud majus est, quod ad plures se extendit: Atqui gratia gratis data ad plures se extendit, quam gratia gratum faciens; hæc quippe ordinatur dumtaxat ad salutem recipientis; illa verò ad bonum commune christianæ Societatis: Ergo. Distinguo majorem; bonum majus est, quod ad plures se extendit, si compareretur cum bono ejusdem generis, Concedo: sic lumen solis, quod latius diffunditur, majus est bonum, quàm lumen candelæ. Si compareretur cum bono superioris ordinis, Nego majorem; nam lumen solis non est majus bonum, quàm sapientia, quæ solam sapientis mentem illustrat. Porro gratia gratis data, & gratia gratum faciens, sunt dona diversi ordinis; gratia enim gratis data per se ordinat accipientem ad creaturas perficiendas: gratia verò gratum faciens, ordinat ad Deum. Deinde homo gratia gratis data rectè non utitur sine auxilio gratiæ gratum facientis, *multi mihi dicent in illa die, ait Christus Matth. 7. Domine, Domine, nonne in nomine tuo prophetavimus . . . & in nomine tuo virtutes multas fecimus? & tunc confitebor illis, quia nunquam novi vos: Discedite à me qui operamini iniquitatem.*

Q. 4. *Quot sunt gratiæ gratis datæ?*

R. Novem ab Apostolo numerantur 1. Corinth. 12. his verbis, *alii quidem per Spiritum datur sermo sapientiæ alii autem, sermo scientiæ alteri Fides* (non Theologica, quæ est gratia gratum faciens; sed vel donum explicandi Mysteria Fidei, vel fiducia divinitus inspirata patrandi miracula) *alii gratia sanitatum: alii operatio virtutum; alii prophetia: alii discretio spirituum: alii genera linguarum: alii interpretatio sermonum.*

Q. 5. *Quomodo dividitur gratia gratum faciens?*

R. Dividitur in actualem & habitualem.

Actualis est illustratio mentis, seu cogitatio supernaturalis in intellectu, & pia affectio similiter supernaturalis in voluntate.

Gratia habitualis est gratia animæ permanenter inhærens, eamque perficiens per modum habitus, ut gratia sanctificans.

Dices: gratia ex dictis est gratuitum Dei donum; Atqui illustratio seu cogitatio non sunt Dei dona, sed effectus ejusmodi donorum, & actus ab homine elicit: Ergo.

Nego minorem, cujus confirmationem distinguo: sunt actus ab homine supernaturaliter elicit, Concedo: naturaliter elicit, Nego. Sicut ergo visio beatifica & amor beatificus, licet sint actus ab intellectu & à voluntate Beatorum elicit, nihilominus sunt Dei dona: quia non producuntur ab intellectu & voluntate naturaliter operantibus, sed supernaturaliter à Deo elevatis: sic sancta cogitatio & pia affectio sunt gratiæ actuales, quia ab intellectu & voluntate naturalibus viribus non procedunt, sed impressione & motione divina, eaque supernaturali. Ergo bona
O 2 nostra

nostra opera sunt Dei dona; ut qui gloriatur, in Domino gloriatur, & non in semetipso; non enim sumus sufficientes aliquid cogitare à nobis, tanquam ex nobis, 2. Cor. 3.

Q. 6. *Quotuplex est gratia habitualis?*

R. Triplex, nimirum gratia sanctificans, seu justificans, qua homo fit formaliter justus; virtutes infusæ & dona Spiritus Sancti; quibus homo disponitur ad actus supernaturales.

Q. 7. *Quotuplex est gratia actualis?*

R. Triplex. Prima dicitur præveniens, excitans & operans, estque sancta cogitatio & in-deliberata voluntatis motio seu affectio, qua homo vel à Deo averfus, vel in bono torpens, excitatur. Secunda dicitur adjuvans, cooperans & concomitans, estque supernaturale Dei auxilium, quo roborata voluntas liberè consentit gratiæ excitanti. Tertia dicitur subsequens, qua firmatur voluntas in bono proposito, & adjuvatur, ut illud ad executionem perducatur; quia in executione major occurrit difficultas, propter quam homo aliquando quod proposuerat bonum, non perficit, *Deus immittendo bonam cogitationem*, inquit S. Bernardus lib. de Gratia & lib. arb. c. 14. *nos prævenit: immutando etiam malam voluntatem, sibi per consensum jungit: ministrando & consensui facultatem, foris per apertum opus nostrum internus opifex innotescit.*

Q. 8. *Quomodo dividitur gratia præveniens seu excitans?*

R. Dividitur in efficacem & sufficientem, de qua divisione hac nostra ætate valdè celebri separatim dicendum erit, postquam expenderit an & quæ sit gratiæ actualis generatim spectatæ necessitas.

CA-

CAPUT III.

De necessitate Gratiæ actualis.

Q. I. *Potestne quis sine gratia actuali cognoscere verum, velle & operari bonum?*

R. Nullatenus potest motivo supernaturali & conducente ad vitam æternam: aliquatenus potest motivo naturali, sed ad vitam æternam prorsus inutili.

Prima pars est de Fide sæpius definita contra Pelagianos & Semipelagianos in Conciliis Milevitano, Carthaginensi, Arausicano II. ac demum Tridentino sess. 5. Can. 3. constatque ex Scriptura Joan. 15. v. 4. *Sicut palmes non potest ferre fructum à semetipso, nisi manserit in vite; sic nec vos, nisi in me manseritis.* Et v. 5. *sine me nihil potestis facere.* 2. Cor. 3. *Non quod sufficientes simus cogitare aliquid à nobis, quasi ex nobis, sed sufficientia nostra ex Deo est.* Et ratio est, quia sicut sensatio non potest procedere nisi à principio sentiente, actus rationalis nisi à principio rationali, ita actus supernaturalis non potest elici, nisi à principio supernaturali. Enimverò ideo dicitur supernaturalis, quia excedit omnes naturæ vires, ferum, inquiebat supra S. Thom. efficere non potest, quæ sunt propria ignis, nisi disponatur ab habente formam ignis, fiatque quodammodo igneum, ita homo vel Angelus non potest agere divina, nisi fiat Deiformis & quodammodo divinus.

Ergo Hæretici, v. g. Calviniani, quia carent lumine Fidei, non credunt Mysteria supernaturalia, puta Trinitatis & Incarnationis, modo super-

naturali; sed humana tantum persuasione, quemadmodum Gentiles Philosophi sempiternam Dei virtutem & divinitatem, quæ est objectum maxime supernaturale, cognoverunt medio & motivo naturali, nempe creaturarum testimonio.

Ergo homo naturalibus liberii arbitrii viribus non potest se ad gratiam præparare, ut definierunt Concilium Arausicanum II. Can. 7. & Concilium Tridentinum sess. 6. cit. Can. 3. *non volentis*, inquit Apostolus Rom. c. 9. *neque currentis, sed misereantis est Dei*. Et ratio est, quia actus naturalis nullam habet proportionem, nullumve ordinem ad formam supernaturalem, qualis est gratia. Unde in sacris litteris, inquiunt Patres Tridentini sess. 6. c. 5. *cum dicitur, convertimini ad me & ego convertar ad vos, libertatis nostræ admone-mur. Cum respondemus, converte nos, Domine ad te, & convertemur, Dei nos gratia præveniri confitemur*.

Ergo gratia habitualis seu sanctificans non potest verè dici gratia sufficiens, cum justus ex ea non possit agere, nisi gratia actuali præveniat & adjuvetur, *sicut oculus corporis*, (inquit sanctus Augustinus lib. de nat. & grat. c. 26.) *etiam plenissimè sanus nisi candore lucis adjutus non potest cernere: sic homo perfectissimè justificatus, nisi æterna luce justitiæ divinitus adjuvetur, rectè non potest vivere*.

Dices I. Orationes & eleemosynæ fuerunt actus supernaturales in Cornelio, cum fuerint dispositiones ad Baptismum & justificationem, Act. 10. Atqui non fuerunt ex gratia; prima enim gratia est Fides, qua carebat Cornelius: Ergo.

Nego minorem, cujus confirmationem distinguo; prima gratia est Fides inchoata & implicita,
Con-

Concedo: est Fides perfecta & explicita. Nego. Fides inchoata est supernaturalis illustratio & motio, qualis potest esse in infideli, qui Dei existentiam ignorare non potest saltem invincibiliter, & per quam Cornelius dicitur vir religiosus ac timens Deum.

Dices 2. facienti quod in se est, Deus non denegat gratiam, ex S. Augustino lib. 19. de Civit. c. 13. ubi sic habet: *Quisquis talibus bonis (naturalibus) fuerit rectè usus, accipiet meliora.* Et S. Thomas quæst. 24. de veritate art. 1. ad secundum: *Gratiam, inquit, quamvis ex libero arbitrio homo non possit acquirere, potest tamen se ad gratiam habendam præparare: Ergo.*

Distinguo antecedens, facienti quod in se est ex motione Spiritus Sancti, Deus non denegat gratiam, Concedo: *quia intentio Dei deficere non potest, inquit S. Thomas quæst. 112. art. 3. Unde si ex intentione Dei moventis est, quodd homo gratiam consequatur, infallibiliter eam consequitur:* facienti quod in se est naturalibus viribus, Deus non denegat gratiam, Nego antecedens; vel enim naturalis ille conatus esset dispositio ad gratiam, quod falsum est, cum ad eam nullum habeat ordinem: vel esset conditio sine qua non, ex pacto Dei Patris cum Christo inito, & hoc non; tum quia Clérus Gallicanus anno 1700. fictitium asseruit ejusmodi pactum, & erroneum, eoque instaurari Semipelagianismum: tum quia ejusmodi conditio esset titulus onerosus contra rationem gratiæ; posita enim illa conditione, Deus teneretur suas partes implere, hoc est, gratiam conferre.

Secunda pars, nempe quod homo sine gratia actuali possit cognoscere aliquod verum, velle &

operari aliquod bonum motivo naturali, sed sterili respectu vitæ æternæ, probatur; quia ex S. Thoma, secunda secundæ quæst. 10. art. 4. Natura humana per peccatum non est totaliter corrupta, Publicani & Ethnici diligentes se diligunt, Matth. 5. Gentiles Deum ex creaturis cognoverunt, *ita ut sint inexcusabiles, quia cum cognovissent Deum, non sicut Deum glorificaverunt, aut gratias egerunt.* Plura facta Romanorum & aliorum nec Deum verum veraciter justèque colentium legimus, inquit S. Augustinus lib. de spir. & litt. c. 27. *quæ secundum justitiæ regulam non solum vituperare non possumus, verum etiam meritò rectèque laudamus. Quanquam si discutiatur, quo fine fiant, vix inveniuntur, quæ justitiæ debitam laudem defensionemque mereantur.* Quibus verbis docet S. Augustinus pleraque Gentilium opera ex officio seu ex objecto bona, ex pravo fine, puta ex superbia, esse mala, rarèque contingere, ut ex utroque capite simpliciter bona existant. Unde

Dixi hominem sine gratia actuali posse cognoscere aliquod verum, velle & operari aliquod bonum, ut innuerem eum sine gratia actuali non posse moraliter loquendo totam legem etiam naturalem implere: tum quia nonnulla sunt præcepta per se difficiliora, ut diligere Deum super omnia & plusquam se, mortem oppetere pro decore justitiæ aut fidei confessione: tum quia graves irruunt tentationes, quas sine Dei auxilio vincere non possumus, ut definitum est contra Pelagianos in Conciliis Diospolitano & Milevitano; *necessè est ut quo auxiliante vincimus, eodem rursus non adjuvante vincamur,* inquit Innocentius I. epist. ad Episcopos Africæ inter epistolas S. Augustini 181. aliàs 91.

Ergo,

Ergo, inquires, urgente gravi tentatione homo non peccat, cum ad merendum aut demerendum in statu naturæ lapsæ, requiratur libertas à necessitate, ut definierunt summi Pontifices Innocentius X. & Alexander VII. adversus Janse-
nium.

Nego consequentiam: quia etiamsi supponatur tum deesse gratiam, ut nonnulli Theologi supponunt deesse in infidelibus negativis & inobduratis, tentatio quantumcumque gravis, modò non pervertat iudicium rationis, non inducit necessitatem propriè dictam & physicam, sed moralem dumtaxat, & impropriè dictam, quam voluntas superare potest. Unde non succumbit etiam in obduratis, nisi ex socordia & negligentia. *dicendum, inquit S. Thomas q. 24. de lib. arb. ar. 12. ad 12. quòd cupiditas non potest esse cogens absolute liberum arbitrium, quod semper est liberum à coactione; sed dicitur cogens propter vehementiam inclinationis, cui tamen potest resisti, licet cum difficultate.* Et Bellarminus lib. 5. de lib. arb. c. 8. in solutione objectionum sic respondet, *Significat S. Thomas à passione non necessitari voluntatem necessitate physica, quasi voluntas determinetur ad unum, quomodo determinatur appetitus animantium brutorum: tamen non negat necessitari moraliter, id est, infallibiliter moveri.* Suarez quoque lib. de necessitate gratiæ cap. 24. num. 83. *Gravis tentatio, inquit, si instet, infallibiliter hominem gratia non adjutum dejiciet.*

Dices; Rom. 2. *Gentes quæ legem habent, naturaliter ea, quæ legis sunt, faciunt:* Ergo sine gratia lex naturalis impleri potest.

Nego consequentiam; Apostolus enim per vocem *naturaliter* excludit solum legem exteriori-

rem: non vero gratiam interiorem, interprete S. Augustino lib. de Spir. & lit. cap. 27. *Non quodd per naturam, inquit, negata sit gratia; sed potius per gratiam reparata natura*, ut contigit in Melchisedcho, Jobo, & Cornelio, qui sine Lege scripta verum Deum colebant.

Q. 2. *Potestne justus cum auxilio gratiæ actualis vitare omnia & singula peccata venialia?*

R. Non potest in tota vita, nisi ex speciali privilegio, quemadmodum de beata Virgine tenet Ecclesia. Est expressa definitio Concilii Tridentini, sess. 6. Can. 23. *In multis offendimus omnes, Jac. 3. si dixerimus, quoniam peccatum non habemus, ipsi nos seducimus, & veritas in nobis non est, 1. Joan. 1. quam doctrinam S. Augustinus probat. toto lib. de perfectione justitiæ adversus Pelagianos.*

Dixi 1. Concilium, *in tota vita*; quia ad breve tempus justus cum gratiis ordinariis potest etiam moraliter esse sine peccato. An. per diem integrum? Non videtur: usus enim loquendi SS. Patrum & Concilii Tridentini sess. 6. Can. 11. qui peccata venialia vocat quotidiana, innuit justum moraliter non posse per integrum diem ita vigilare, ut nullum peccatum subrepat.

Dixi 2, Concilium, *omnia venialia*; quia non pauci puros se cum gratia servant ab omnibus levioribus, quæ ex proposito & ex plana deliberatione contingunt. Hæc quippe morali potentia vitari possunt, non verò quæ ex inadvertentia & fragilitate subrepunt: *ad nonnulla superanda, inquit S. Augustinus lib. 3. de pecc. mer. c. 2. quæ vel malè cupiuntur, vel quæ malè metuiuntur, magnis aliquando & totis viribus opus est voluntatis, quas nos non perfectè in omnibus adhibitueros prævidit, qui per*
Pro-

Prophetam veridicè dici voluit, non justificabitur in conspectu tuo omnis vivens. Quibus verbis S. Doctor ostendit peccata venialia, etiam quæ dicuntur fragilitatis, subrepere ex negligentia, ac proinde veram habere rationem peccati, cum absolutè & physicè vitari possint: motus singulos quidem ratio reprimere potest, inquit S. Thomas hic q. 109. art. 8. & ex hoc habent rationem peccati & voluntarii, non autem omnes; quia dum uni resistere nititur, fortassis alius insurgit, & etiam quia ratio non potest esse semper pervigil. Non potest, inquam ego, moraliter loquendo; sed potest absolutè & physicè, aliàs non haberent rationem peccati, cum ad peccandum & demerendum requiratur libertas à necessitate.

CAPUT IV.

De Gratia efficaci.

Q. I. *Quid est gratia efficax?*

R. Est actuale Dei auxilium, quo voluntas actu vult, & operatur bonum infallibiliter & insuperabiliter, liberè tamen & minimè necessariò. Hæc descriptio eruitur ex S. Augustino libr. de Cor. & Grat. cap. 12. ubi sic habet. *Subventum est infirmitati voluntatis humanæ, ut divina gratia indeclinabiliter & insuperabiliter ageretur; & ideo quamvis infirma, non tamen deficeret, neque adversitate aliqua vinceretur.*

Dicitur I. *actuale Dei auxilium*, in quo conveniunt gratia efficax & sufficiens; utraque enim est species auxilii & gratiæ actualis.

Dici-

Dicitur 2. *quo voluntas actu vult & operatur.* Quibus verbis exprimitur differentia gratiæ efficacis à gratia sufficiente: hæc potentiam complet, ut possit proxima potentia velle & agere; illa verò ponit potentiam in actu, & efficit ut agat.

Dicitur 3. *infallibiliter*, ut significetur voluntatem sic motam, etsi divinæ motioni potentia completa & proxima resistere possit, certò tamen non restitutam.

Dicitur 4. *insuperabiliter*, qua voce S. Augustinus non significat voluntatem efficaciter motam verè non posse, resistendo, superare divinam motionem, ut vult Jansenius, sed denotat solum, nec concupiscentiam, nec cordis duritiem, nec dæmonum conatus prævalere adversus efficacem Dei motionem, licèt verè possit.

Q. 2. *Daturne gratia efficax?*

R. Datur in hocce statu naturæ lapsæ, Ezech. 36. v. 26. & 27. *Auferam cor lapideum de carne vestra, & dabo vobis cor carneum, & spiritum meum ponam in medio vestri, & faciam ut in præceptis meis ambuletis.* Joan. 6. v. 45. *Omnis qui audit à Patre, & didicit, venit ad me, in quem locum S. Augustinus l. de Gratia Christi c. 19. sic scribit, Qui ergo non venerit, non de illo rectè dicitur, audit qui- dem & didicit sibi esse veniendum; sed facere non vult quod didicit: & lib. de Cor. & Grat. c. 8. Hæc igitur gratia, quæ humanis cordibus divina largitate tribuitur, à nullo duro corde respuitur; ideo enim datur ut cordis duritia primitus auferatur.*

Dixi, in hocce statu naturæ lapsæ; quia ex S. Augustino lib. de Cor. & Grat. c. 12. Gratia Angelis adhuc viatoribus & Adamo innocenti concessa,

cessa, non erat auxilium per se efficax, quo actu bonum operarentur, sed auxilium sufficiens, sine quo bonum operari non possent, & cum quo possent, si vellent, fortissimo, (Adamo) dimisit atque permisit facere quod vellet: infirmis servavit, ut ipso donante, invictissime quod bonum est vellent, & hoc deserere invictissime nollent.

Q. 3. Quotuplex est gratia efficax?

R. Duplex; alia, qua quis benè operatur: alia, qua in bono perseverat usque in finem.

Q. 4. Quomodo definitur donum Perseverantiæ?

R. Definitur à S. Augustino lib. de dono perseverantiæ cap. 1. Donum Dei, quò perseveratur usque in finem in Christo.

Dicitur 1. *Donum Dei*; quia gratuito & ante prævisa merita non secus ac gloria electis præparatum est, licèt illud in ordine executionis suppliciter demereri possimus.

Dicitur 2. *Quo perseveratur*; non verò quo perseverari potest, ut significetur magnum illud donum esse efficacissimum, *hoc Dei donum*, inquit S. Augustinus cit. lib. cap. 6. *cum datum fuerit, contumaciter amitti non potest. Cum enim perseveraverit quisque usque in finem, neque hoc donum potest amittere, nec alia, quæ poterat ante finem. Quomodo igitur potest amittere per quod fit, ut non amittatur etiam quod posset amitti?*

Ergo, inquires, gratiæ efficaci non potest resisti; si enim dono perseverantiæ resisti posset, procul dubio posset etiam amitti, quod tamen negat S. Augustinus.

Distinguo consequens; non potest resisti post mortem, quando sumus in termino constituti, Concedo: non potest resisti, quandiu viatores sumus,

sumus, Nego conseq. Itaque donum perseverantiæ adæquatè sumptum in adultis, duo complectitur; 1. actuales gratias efficaces, per quas infallibiliter justificantur, & invictissimè contra tentationes dimicant, & earum respectu amitti potest; quia ejusmodi gratiis potest resisti, quamvis infallibiliter non resistatur, ut diximus; 2. specialem Dei protectionem, ut gratia cum morte jungatur, quæ beata conjunctio amitti non potest, cum supponat hominem in termino, & extra viam. Unde

Dicitur 3. *usque in finem*, quo scilicet vita ista finitur, *in qua*, inquit S. Augustinus citato cap. 1. *tantummodo periculum est, ne cadatur potiusque banc (perseverantiam) habuit unius anni fidelis, & quantum infra cogitari potest, si donec moreretur, fideliter vixit, quam multorum annorum, si perexiguum temporis ante mortem à fidei stabilitate defecit.*

Q. 5. *Existitne ejusmodi perseverantiæ donum?*

R. De fide est existere in hoc statu; ita enim definiit Concilium Arausicanum II. Can. 1. adversus Semipelagianos, & Concilium Tridentinum sess. 6. Can. 22. his verbis, *Si quis dixerit justificatum vel sine speciali auxilio Dei in accepta justitia perseverare posse, vel cum eo non posse, anathema sit.* Apostolus enim Philip. 1. v. 6. sicut initium fidei, ita perseverantiam gratiæ Dei tribuit. *Qui cœpit*, inquit, *in vobis opus bonum, perficiet usque in Diem Christi Jesu.* In quæ verba S. Augustinus sic scribit cap. 13. de dono perseverantiæ. *Undè satis dilucidè ostenditur, & inchoandi, & usque in finem perseverandi gratiam Dei, non secundum merita nostra dari, sed dari secundum ipsius secretissimam, eandemque justissimam, sapientissimam, & beneficentissimam voluntatem:*

tem: quoniam quos prædestinavit, ipsos & vocavit, &c.

Q. 6. Potestne justus mereri donum perseverantiæ?

R. 1. Non potest de condigno, cum metu & tremore vestram salutem operamini, inquit Apostolus Philip. 2. v. 12. & 13. Deus est enim qui operatur in vobis & velle, & perficere pro bona voluntate. Hic & initium salutis, nempe velle, & perfectio seu perseverantia non meritis, sed Dei voluntati & beneplacito tribuuntur. Mirandum est quidem, multumque mirandum, inquit S. Augustinus lib. de Cor. & Grat. c. 8. num. 18. quod filiis suis quibusdam Deus, quos regeneravit in Christo, quibus fidem, spem, dilectionem dedit (quibus sanè merita comparantur) non dat perseverantiam; cum filiis alienis scelera tanta dimittat, atque impertita gratia faciat filios suos. Quis hoc non miretur? quis hoc non vehementissimè stupeat? Nihilominus

R. 2. Justus quilibet vigiliis & assiduis orationibus perseverantiam suppliciter mereri potest de congruo, Luc. 21. v. 35. Vigilate itaque omni tempore orantes, ut digni habeamini fugere ista omnia, quæ futura sunt, & stare ante Filium hominis. 2. Petri 4. Magis satagite, ut per bona opera, certam vestram vocationem & electionem faciatis; hæc enim facientes non peccabitis aliquando. Et S. Augustinus cap. 6. de dono perseverantiæ, hoc donum, inquit, suppliciter demereri potest. Unde Concilium Tridentinum sess. 6. cap. 13. docet justos omnes in Dei auxilio firmissimam spem collocare, & reponere debere.

CAPUT V.

De Gratia sufficiente.

Q. 1. *Quid est gratia sufficiens?*

R. Describi potest, actuale Dei auxilium, quo voluntas redditur potens proximè & completè, sive ad operandum, sive ad obtinendum id, sine quo operari non posset, quamvis contingat eam resistere.

Dicitur 1. *Actuale Dei auxilium*; quia gratia sufficiens est species gratiæ actualis, ut jam diximus. Unde gratia habitualis seu sanctificans dici nequit gratia sufficiens.

Dicitur 2. *Quo voluntas redditur potens*, ut significetur eam gratiam sufficientem non esse, sed absolutè insufficientem, si inchoatas dumtaxat vires ad agendum tribuat; quis enim dixerit pusionem posse vincere gygantem, quia inchoatas habet vires ad eum vincendum?

Dices 3. *Sive ad operandum, sive ad obtinendum*, &c. quia duplex est gratia sufficiens, alia proxima, per quam proximè & immediatè possumus tentationem superare & præceptum implere, v. g. persecutores diligere, alia remota, per quam non nisi mediante oratione tentatio vinci potest. Sed ad tollendam omnem æquivocationem, gratia sufficiens remota non est sufficiens; nisi ex intentione Dei ordinetur ad ulteriora auxilia concedenda; neque enim infimus scalæ gradus est medium remotè sufficiens ad summum attingendum, si desint intermedii.

Dicitur 4. *quamvis contingat eam (voluntatem) resistere*; quibus verbis exprimitur differentia essen-

sentialis gratiam sufficientem inter & gratiam efficacem. In eo quippe sufficiens differt ab efficaci, quod efficax infallibiliter effectum obtineat; sufficienti verò resisti contingat. Dico, *continuat*, ut significetur illam voluntatis inobedientiam esse accidentalem gratiæ sufficienti, contra ejus inclinationem, ac Dei intentionem.

Q. 2. *Daturne in hoc statu gratia sufficiens?*

R. De Fide est dari; quia summi Pontifices Innocentius X. & Alexander VII. in suis Constitutionibus ubique receptis, hanc Jansenii propositionem; *Interiori gratiæ in statu naturæ lapsæ nunquam resistitur*, declararunt hæreticam: hæretica autem non esset, nisi contradictoria, hæc nempe, *Gratiæ interiori in statu naturæ lapsæ aliquando resistitur*, esset de fide. Porro gratia interior, cui resistitur, est gratia sufficiens. Constat autem illa definitio ex Scriptura, Proverb. 1. *Vocavi, & renuistis*. Luc. 10. *Væ tibi Corozain, væ tibi Bethsaidæ! quia si in Tyro & Sydone factæ fuissent virtutes, quæ factæ sunt in vobis, olim in cilicio & cinere sedentes pænerent*: insignis est ille locus; in eo quippe sermo est de gratia per quam converti debuerant Bethsaiditæ, & per quam Tyrii revera fuissent conversi: Atqui illa gratia non potest esse nisi interior, cui tamen restiterunt Bethsaiditæ. Act. 7. *Dura cervice & incircumcisis cordibus & auribus, vos semper Spiritui sancto resistitis*. Quem locum Sanct. Thomas quodlib. 2. art. 6. intelligit de gratia interiori; sic enim habet, *tenebantur homines interiori vocationi non resistere, sicut de quibusdam dicitur Act. 7. Vos semper Spiritui sancto resistitis*.

Dices: Ex S. Augustino supra laudato, gratia status innocentiae, & gratia status naturæ lapsæ

D. Habert Theolog. Tom. VIII.

P

in

in eo differunt, quòd in priori statu gratia esset auxilium *sine quo*, seu sufficiens: in posteriori verò statu sit auxilium *quo*, seu efficax: Ergo in hoc statu non datur gratia sufficiens.

Nego conseq. Quemadmodum enim, licet homo differat à brutis animantibus, nimirum per rationalitatem, non sequitur quòd nihil habeat cum illis commune; est quippe & ipse animal; Similiter quamvis auxilium *quo*, seu efficax, sit proprium naturæ lapsæ in mente Sancti Augustini, colligi non potest S. Doctorem nullam agnovisse gratiam actualem communem huic statui & statui innocentiae, nimirum sufficientem. Si *satanas loqueretur*, inquit in Psalm. 91. *& taceret Deus, haberes unde te excusares: modò aures tuæ posita sunt inter monentem Deum, & suggerentem Diabolum; quare hic flectuntur; & hinc avertuntur?*

Q. 3. Gratia sufficiens daturne omnibus?

R. 1. De fide esse dari justis, cum instat præceptum aut urget tentatio, 1. Cor. 10. *Fidelis Deus, qui non patietur vos tentari supra id quod potestis.* Concilium Milevitanum cap. 3. definiit gratiam justificantem non valere solum ad remissionem peccatorum, quæ jam commissa sunt, sed etiam ad adiutorium, ut non committantur. Et Concilium Tridentinum sess 6. c. 11. *Deus, inquit, seu gratia semel justificatos non deserit, nisi ab iis prius deseratur.* Quare meritò summi Pontifices Innocentius X. & Alexander VII. proscripserunt ut hæreticam & blasphemam istam Jansenii propositionem. *Aliqua Dei præcepta hominibus justis volentibus & conantibus secundum præsentem, quas habent vires, sunt impossibilia: deest quoque illis gratia, qua possibilia fiant.*

R. 2. Cum ex dictis Tract. de Attrib. Deus velit

velit omnes & singulos homines salvos fieri, & Tract. de Incarnatione, Christus pro illis sanguinem suum obtulerit; necessario sequitur omnibus & singulis conferre aut saltem præparasse auxilia, sine quibus salutem consequi non possent; Deus enim, utpote sapientissimus, non vult finem impossibilem; Atqui impossibile esset omnes & singulos homines salvos fieri, nisi sufficientia ipsis præpararentur auxilia. Sed difficultas est, utrum Deus non solum præparaverit, sed etiam actu conferat omnibus & singulis hominibus gratias sufficientes.

R. 3. Certum est parvulis, qui sine Baptismo decedunt, nullam gratiam actu conferri; quia non sunt capaces alterius gratiæ quàm Baptismi, qui ipsis non confertur. Attamen illis præparatus erat, alioquin Deus non vellet sincerè eos salvos fieri.

Nec refert, quod in iis circumstantiis Baptismus non possit illis applicari. Namque parvuli sic decedentes non minus salvi esse possunt, imò multo magis, quàm peccator adultus, qui impoenitens in amentiam incidit; quamvis enim Sacramentum pœnitentiæ in illo statu recipere non possit, nemo dicet Deum non sufficienter ipsi præparasse tale remedium, nec propterea voluisse illum salvum fieri. Agnoscenda quidem hîc sunt Dei judicia, ut monet S. Augustinus lib. de dono perseverantiæ cap. 12. quòd in pœnam peccati originalis dimittat causas secundas naturæ suæ defectibili, nec impediat incommoda, quæ inde sequuntur, puta morbi, & mors immatura; & eatenus verum est, quod ibidem scribit S. Doctor, parvulum ideò sine Baptismo hinc abire, quia Deus

non vult ut detur, voluntate scilicet efficaci & consequente confursum causarum secundarum, in quo mors parvuli sicut peccatoris repentino morbo oppressi naturali & sine miraculo vitari nequit. Sed quaestio superest utrum omnibus adultis non solum praeparantur, sed etiam conferantur gratiae sufficientes ad salutem consequendam?

R. 4. In hac parte dissentiunt Theologi. Alii magni nominis negant ullas gratias sufficientes conferri infidelibus negativis, id est, qui Evangelium audire non potuerunt, & fidelibus obduratis. Alii magno numero contra affirmant, quia voluntas Dei salvandi omnes & singulos homines, non est otiosa complacentia, sed decretum dandi singulis auxilia sufficientia, si nullus sit ex parte causarum secundarum defectus, & naturale impedimentum: Atqui nullum potest esse ejusmodi impedimentum, quo minus infidelibus adultis actu conferantur auxilia saltem remotiora, puta sancta cogitatio, pia voluntatis motio, quam supra diximus esse primam gratiam & fidem inchoatam; hæc quippe non pendent à ministerio hominum, ut Baptismus, doctrina mysteriorum Fidei; sed illa Deus immediatè per se operatur, & independentè à concursu causarum secundarum, ac salvo naturali ordine universi. Ergo si Deus infidelibus illa non conferat, non videtur sincerè, & quantum est ex se, velle illorum salutem; per illum enim solum stat, quo minus conferantur.

Hæc ratio, fateor, me movet, propensio-remque reddit in illam sententiam, quæ nova non est, nec Molinam habet authorem, quidquid dicant patroni prioris sententiæ, ut patet ex testi-
moniiis

moniis veterum prolatis Tom. 2. Tract. de Gratia, cap. 7. paragr. 7.

Dices; ex Sanct. Augustino Serm. 26. aliàs 21. de verbis Apostoli, communis est omnibus natura non gratia; Ergo.

Distinguo antecedens; non gratia sanctificans, qua sola homo fit bonus & justus, ut ait ibidem S. Doctor; Concedo: gratia sufficiens, quæ non obtinet effectum, Nego antecedens.

Quod etiam indurati non careant omni gratia, siue proxima, siue remota, suadent sacrae Scripturae & Sanctorum Patrum testimonia. 2. Petri 3. *Patienter agit (Deus) propter vos, nolens aliquos perire, sed omnes ad poenitentiam reverti.* S. Augustinus in serm. 6. *Ea est, inquit, cæcitas mentis; in eam quisquis datus fuerit, ab interiori luce secluditur, sed nondum penitus; cum in hac vita est.* S. Prosper in respons. 15. ad objectiones Vincentianas ait, *Nemini Deus correptionis adimit viam, nec quenquam boni possibilitate dispoliat.* Et S. Thomas quæst. 27. de veritate art. 11. docet, *Obduratum non posse facile cooperari, ut exeat de peccato, & hæc est obstinatio imperfecta, qua quis potest esse obstinatus in statu viæ, dum scilicet habet ita firmatam voluntatem in peccato, quod non surgunt motus nisi debiles.*

CAPUT VI.

De Gratia habituali.

Q. 1. *Quæ sunt nomina gratiæ habitualis?*

R. Appellatur 1. gratia justificans; quia per illam peccator fit formaliter justus. 2. gratia sanctificans; quia formalis ejus effectus est

reddere hominem sanctum, quemadmodum lux aut calor subjectum, in quo recipitur, reddit formaliter lucidum, aut calidum. 3. Adoptio, Rom. 8. vers. 15. *Accepistis spiritum adoptionis filiorum.* 4. Charitas, quia gratia habitualis est formalis unio cum Deo: unio autem illa fit per charitatem, 1. Joan. 4. *Qui manet in charitate, in Deo manet, & Deus in eo.* Utrum autem gratia habitualis & charitas sint unus & idem realiter habitus? discordant Theologi. Affirmant S. Bonaventura, Scotus, Durandus, & alii bene multi, quia in Scripturis omnes effectus gratiæ habitualis tribuuntur charitati. Negat verò S. Thomas, & cum eo ipsius schola; quia sicut in ordine naturali habitus virtutis supponit naturam in suo esse naturali perfectam; ita in ordine supernaturali virtus infusa supponit naturam humanam aut angelicam in esse supernaturali & divino constitutam; constituitur autem per gratiam habitualement, quæ est nova veluti natura: Ergo charitas, utpote virtus supernaturalis, supponit gratiam habitualement & sanctificantem. Unde Clementina *de summa Trinitate*, & Concilium Tridentinum sess. 6. cap. 7. distinguunt gratiam habitualement à virtutum donis.

Q. 2 *Quid est gratia sanctificans?*

Priusquam huic quæstioni, quæ est maximi ponderis, fiat satis, operæ pretium est præmittere impia Pseudoreformatorum dogmata circa propositam quæstionem, ut Doctrina catholica dilucidius exponatur; contraria enim juxta se posita magis elucescunt.

Pseudoreformati igitur primo statuunt gratiam justificantem esse formaliter ipsammet Christi justitiam,

stitiam, quæ prædestinatis imputatur, juxta illud I. Cor. I. v. 30. *Qui factus est nobis à Deo sapientia, justitia, & sanctificatio*; adeo ut prædestinatus sit formaliter justus & sanctus per Christi justitiam & sanctitatem. Quomodo verò? Definiunt secundò justitiam Christi nobis applicari per fidem, non qua simpliciter credimus, sed qua firmiter confidimus in promissionibus divinis, ita ut apud eos fides nihil sit aliud, quàm certa fiducia, qua, veluti manu, apprehendimus justitiam Christi, tanquam vestem, qua nos operimus, juxta illud Rom. 13. v. 14. *induimini Dominum Jesum*. Hinc tertio deducunt neminem posse esse justum nisi confidat & certò credat se esse prædestinatum: Quartò justitiam Christi sic apprehensam peccata tegere duntaxat, non delere, quemadmodum vestis vitia corporis tegit. Quintò peccata hoc modo tecta in justis, ipsis non imputari, & gravissima quæque, ut sacrilegia, homicidia, adulteria, in iis esse venialia: leviora verò, ut mendacia officiosa, in non prædestinatis esse mortalia. Sextò omnia bona opera etiam Justorum per concupiscentiam esse infecta, atque ideò vera peccata etiam mortalia, sed quæ non imputantur prædestinatis. Septimo solam fidem seu fiduciam in divinis promissionibus esse dispositionem ad gratiam justificantem, dicente Apostolo Rom. 3. v. 28. *Arbitramur justificari hominem per fidem sine operibus legis*. Octavo Sacramenta eatenus solum prodesse, quatenus fiduciam excitant, & promissiones Dei consignant. Nondò solam diffidentiam esse peccatum mortale, & per eam duntaxat amitti gratiam justificantem; sed ejusmodi diffidentiam non cadere in prædestinatos, ac

proinde justitiam semel acceptam amitti non posse. Decimo cum justitia Christi in omnibus sit eadem; omnes prædestinatos esse æqualiter justos, nec in illis ullam esse meritorum distantiam. Atque ejusmodi articuli in mente Novatorum sunt Religionis fundamenta, cæteri vero, qui spectant v. g. præsentiam realem Corporis Christi in Eucharistia, Communionem sub utraque specie, numerum Sacramentorum, invocationem Sanctorum, cultum imaginem, quibus vulgi mentes occupant, sunt leviores quàm ut propter eos scindatur Ecclesiæ unitas. Quas omnes impietates & blasphemias Concilium Tridentinum sess. 6. à capite 6. ad 16. figillatim ex Scripturis refellit, & subjectis pluribus Canonibus anathemate percutit. Unde ad propositam quæstionem juxta sacre Synodi definitiones,

R. Gratia sanctificans est supernaturale Dei donum intrinsecus inhærens per modum habitus, quo homo formaliter redditur justus, sanctus, Deo gratus, Filius Dei adoptivus, & hæres vitæ æternæ.

Dicitur 1. *Supernaturale Dei donum*, ut significetur gratiam sanctificantem non esse ipsummet Spiritum Sanctum, qui sanè distinguitur à suis donis, Rom. 5. v. 5. *Charitas Dei diffusa est in cordibus nostris per Spiritum Sanctum, qui datus est nobis.*

Dices 1. Joan. 4. legitur, *Deus charitas est.* Ergo.

Distinguo antecedens. Charitas, qua nos diligit, Concedo; qua illum diligimus, Nego antecedens; hæc enim diffusa est in cordibus nostris.

Dici-

Dicitur 2. *Intrinsècè inhærens* : quia gratia sanctificans non est extrinsecus Dei favor, quemadmodum gratia Principis erga familiarem subditum, ut contendunt Novatores. *Dabo eis cor carneum, ut in præceptis meis ambulent.* Jer. 31. Quæ verba mutationem intrinsecam significant.

Dicitur 3. *Per modum habitus*, scilicet permanentis, ut patet vel ex solo exemplo parvulorum, qui per Baptismum sunt permanentes iusti, nec capaces sunt ullius actus; Ergo sunt iusti per habitum inhærentem & permanentem, *qui manet in charitate, in Deo manet*, 1. Joan. 4. vers. 16.

Dicitur 4. *Quo homo formaliter redditur iustus*, docente Concilio Tridentino, sess. 6. cap. 7. *unica formalis causa (justificationis) est justitia Dei, non qua ipse iustus est, sed qua nos ipse iustos facit; qua videlicet à Deo donati renovamur Spiritu mentis nostræ, & non modo reputamur, sed verè iusti nominamur; habetur enim* 1. Joan. 3. vers. 9. *Omnis qui natus est ex Deo, peccatum non facit; QUONIAM SEMEN IPSIUS IN EO MANET.* Gratiam sanctificantem vocat Apostolus semen Dei, ut meminerimus ejus infusionem habere speciem divinæ cujusdam generationis, & nos per illam fieri consortes divinæ naturæ; juxta illud 2. Petri cap. 1. *Per quem (Christum) maxima & pretiosa nobis promissa donavit, ut per hæc efficiamini divinæ consortes naturæ; Non quidem essentialiter, aut hypostaticè, sed accidentaliter per gratiam sanctificantem, quæ intime nos conjungit Deo; ita ut si per impossibile Deus non esset ubique, præsens tamen fieret animæ gratia informatæ, non ut pars componens, sed ut principium vitæ supernaturalis,*

animam movens & elevans ad statum, qui transcendit omnem ordinem etiam angelicum & quolibet possibilem. Unde meritò Sanct. Petrus asserit gratiam sanctificantem esse donum pretiosum, & omnium maximum.

Dices 1. Apostolus erat justificatus, & tamen Rom. 7. v. 20. agnoscit in se habitare peccatum: Ergo gratia sanctificans non delet, sed tegit peccatum.

Distinguo anteced. habitare peccatum metaphoricè sumptum pro concupiscentia inclinante ad peccatum, concedo: habitare peccatum formaliter sumptum, Nego antecedens; ait enim Rom. 8. vers. 1. *Nihil ergo nunc damnationis est iis, qui sunt in Christo Jesu. Et 1. Cor. 6. v. 11. Hæc quidem fuistis, sed abluti estis, sed sanctificati estis.*

Instas 1. Psalm. 31. peccata dicuntur remitti, quatenus teguntur, nec imputantur, *Beati quorum remissæ sunt iniquitates, & quorum tecta sunt peccata: beatus vir, cui non imputavit Dominus peccatum:* Ergo.

Distinguo antecedens: teguntur, quemadmodum color albus superinducto colore nigro tegitur & evanescit, concedo: teguntur, ita ut remaneant occultata, Nego antecedens; *Nec sic intelligas, inquit S. Augustinus in illum Psal. quod dixit peccata corpora, quasi ibi sint & vivant. Et lib. 1. contra duas Epistolas Pelagii cap. 13. dicimus Baptismum auferre crimina, non radere.*

Instas 2. Gal. 3. v. 25. *Quicumque in Christo baptizati estis, Christum induistis:* Ergo sicut vestis non delet, sed tegit duntaxat corporis maculas & deformitates, ita & gratia sanctificans peccata.

Nego

Nego conseq. Nam ex eodem Apostolo Coloss. 3. v. 9. qui induit Christum, exuit veterem hominem, adeo ut in eo nihil remaneat peccati & damnationis; *Exspoliantes vos, inquit, veterem hominem cum actibus suis, & induentes novum.*

Dices 2. I. Cor. I. v. 30. Christus dicitur factus nobis sapientia à Deo & justitia, & sanctificatio: Ergo prædestinatus, per justitiam Christi ipsi imputatam, fit formaliter justus.

Distinguo anteced. Christus factus est bonis justitia, ut causa efficiens moralis & meritoria justitiæ in cordibus nostris diffusæ, Concedo ut causa formalis, per quam formaliter justī sumus, Nego antecedens; namque ex eodem Apostolo Rom. 7. per obedientiam Christi, plures constituti sunt justī, quomodo per inobedientiam primi hominis peccatores constituti sunt multi: Atqui inobedientia Adami non est forma, qua posteri ejus sunt peccatores, sed peccatum originale, unicuique proprium, ut definivit Concilium Tridentinum sess. 5. can. 3. Ergo neque per justitiam Christi sumus formaliter justī; sed per gratiam nobis inhærentem, quæ propriè dicitur justitia & justificans; quia formaliter peccatum excludit, & hominem reddit propensum ac dispositum ad omnia, quæ legis sunt, implenda. Quid est enim Philosophus v. g. nisi qui instructus est habitu Philosophiæ, quo formaliter expellitur ignorantia, & acquiritur facilitas promptè differendi de rebus Philosophicis? Atqui gratia sanctificans est habitus malitiam formaliter expellens & ad omnia, quæ legis sunt, hominem expeditum reddens: Ergo est vera hominis justitia.

Dices

Dices 3. Incredibile videtur merum accidens tantæ esse efficaciam, ut omnia peccata quantumlibet enormia statim deleat, & ex impio mox iustum efficiat.

R. Quamvis illud sit omni admiratione dignissimum, pluribus tamen exemplis suadetur esse possibile. Namque modicum fermentum totam massam immutat: ignis, præeunte calore, poros frigidi ferri ingrediens, frigus formaliter expellit, ipsumque ferrum candens & ignitum reddit; sed, quod ad propositum maximè confert, lumine fidei mentem Hæretici, vel etiam Athei innumeris erroribus implicatam subeunte, mox fugiunt mentis tenebræ, & cuncti errores evanescunt. Quidni gratia sanctificans corda, in quibus diffunditur, similiter immutet, & renovet: peccata, quibus non minus contraria est, quàm frigori calor statim expellat, voluntatemque sic ad Deum convertat, & erga divinam ejus legem afficiat, ut homo omne malum summe aversetur; & ad omnia, quæ Deo sunt placita, totus propendeat?

Dicitur 5. *Quo homo redditur formaliter sanctus*; sanctitas enim est immunitas ab omni labe peccati, & plena firmaque adhæsiō cultui divino: Atqui gratia habitualis ex dictis per se formaliter excludit peccatum, & ita inclinatur hominem ad ea quæ Dei sunt, ut peccatum ipsi dominari non possit, nisi velit: *peccatum vobis non dominabitur*, inquit Apostolus Rom. 6. vers. 14. *non enim estis sub lege, sed sub gratia*. Ergo cui gratia habitualis confertur, eum formaliter reddit sanctum. Unde merito Apostolus in omnibus ferè suis Epistolis fideles appellat sanctos.

Dicitur 6. *Deo gratus*: quomodo enim non esset

esset gratus Deo, qui Divinæ ejus voluntati in omnibus est consentiens? *Non enim est justus nisi qui gaudet justis*, ut dicitur 1. Ethic. c. 8. Justus autem Dominus & justitiam diligit: Ergo diligit & gratos habet, qui cum illo unius sunt voluntatis, *omnis sanctus in se habens animæ pulchritudinem, à Domino amatur*, inquit Sanct. Hieronymus in cap. 10. Danielis.

Dicitur 6. *Filius Dei adoptivus*, non denominatione extrinseca & morali tantum, quemadmodum in civilibus adoptantur personæ extraneæ; nam ex laudato cap. 3. 1. Joan. gratia habitualis est semen Dei, quo homo fit consors divinæ naturæ, & Christo naturali Dei filio conjungitur tamquam membrum capiti, & eodem vivens Spiritu, *qui enim Spiritu Dei aguntur, ii sunt filii Dei*, Rom. 8. *Videte*, inquit dilectus Discipulus 1. Epistola cap. 3. vers. 1. *qualem charitatem nobis dedit Pater, ut Filii Dei nominemur, & simus*. Unde

Dicitur ultimo, & *hæres vitæ æternæ*; namque ex Apostolo Rom. 8. *Si filii, & hæredes; hæredes quidem Dei, cohæredes autem Christi*.

Verum, proh dolor! quod hæresis eripere non potuit Ecclesiæ, ignorantia neglectum & quodammodo inutile reddit. Quis enim æstimat quod ignorat, aut expetit quod non æstimat? Atqui vulgus fidelium, ne dicam Pastorum, justificationem non aliter apprehendit; quam Lutherani & Calviniani, nempe ut meram peccatorum condonationem, cum tamen Pastores in hoc positi sint, ut evangelizent investigabiles Dei divitias in justificatione impii, quas præparavit, in laudem gloriæ gratiæ suæ, sciantque fideles, quæ

quæ sit supereminens magnitudo virtutis Dei in nos, qui credimus secundum operationem potentiae virtutis ejus: verba sunt Apostoli Eph. 7. qui totus est, ut tam admirabile Dei donum fidelibus commendet, refricet & inculcet; est enim summa Doctrinae christianae, & ineffabilis gloria, & sublimitas, quam Ecclesia habet in Christo Jesu.

CAPUT VII.

Explanantur reliqua, quæ pertinent ad gratiam habitualement & justificantem.

Q. 1. *Forma justificans estne unus simplex habitus, vel collectio plurium?*

R. Si spectetur essentialiter, est unus & simplex habitus, nempe gratia sanctificans, si verò spectetur integraliter, est collectio plurium habituum, scilicet gratiae sanctificantis, omnium virtutum infusarum & donorum Spiritus Sancti, *In justificatione*, inquiunt Patres Tridentini sess. 6. cap. 7. *cum remissione peccatorum, hæc omnia simul infusa accipit homo per Jesum Christum, cui inseritur, Fidem, Spem, Charitatem.*

Q. 2. *Quid sunt virtutes infusæ?*

R. Sunt virtutes entitative supernaturales, & à solo Deo producibiles, dividunturque in Theologicas, nempe Fidem, Spem, & Charitatem; & in morales, scilicet Prudentiam, Justitiam, Fortitudinem, & Temperantiam; quæ idè dicuntur Cardinales, quia cæteræ, ut Religio, Humilitas, Castitas, &c. iis imituntur tamquam Cardinalibus.

Q. 3.

Q. 3. *Quid sunt dona Spiritus Sancti?*

R. Sunt habitus supernaturales, per quos homo disponitur ad extraordinariam Spiritus Sancti inspirationem, & motionem promptè exequendam.

Dixi *extraordinariam*, ut dona distinguantur à virtutibus infusis, hæc quippe disponunt ad actiones, quæ licet supernaturales sint, ordinarium tamen prudentiæ modum non excedunt: dona verò Spiritus Sancti inclinant & movent, supra communem justorum prudentiam, quo fit, ut prudentes seculi, qui facile blasphemant quod ignorant, imprudentiæ & stultitiæ illos accusent, in quibus deprehendunt extraordinarios illos actus, qui ita transcendunt humanam prudentiam, ut tamen ei non repugnent.

Q. 4. *Quare gratia sanctificans virtutes infusas habet individuas comites?*

R. Quia gratia sanctificans est quædam natura supernaturalis, (si ita loqui fas est) seu divinus perfectionis gradus, non solum naturam pecorinam, & rationalem, sed quamcumque aliam excedens, quæ tanquam prima radix essentialiter ordinatur ad operationes sibi consentaneas, hoc est supernaturales & divinas; cum modus operandi sequatur modum essendi: Ergo sicut naturæ pecorinæ & sensitivæ debentur potentiæ sensitivæ, ut visus, gustus, olfactus; & naturæ rationali potentiæ rationales; v. gr. intellectus & voluntas, ut operationes, ad quas natæ sunt, exercent: ita gratiæ sanctificanti, quæ est nova veluti natura & prima radix operationum divinarum, respondere debent potentiæ supernaturales, per quas supernaturaliter operetur. Porro poten-

potentiæ illæ sunt virtutes infusæ, per quas homo justificatus deinceps operetur, non solo lumine sensuum, ut bruta animantia, nec solo lumine rationis, ut Philosophi, sed supernaturali fidei lumine & Spiritu Christi capitis sui; *qui enim Spiritu Dei aguntur, ii sunt filii Dei.* Et, *qui Spiritum Christi non habet, hic non est ejus.* Rom. 8. v. 14. & v. 19.

Q. 5. *Dona Spiritus Sancti suntne necessario cum gratia sanctificante connexa?*

R. De iis non æquè constat apud Theologos, ac de virtutibus infusis. Affirmat tamen Sanct. Thomas, cui adhærendum videtur; quia, cum certum sit Spiritum Sanctum, qui est Spiritus Christi capitis nostri, nonnumquam hominem extraordinariè movere, membra Christi debent esse parata ad omnem ejus motum recipiendum, tum ordinarium, tum extraordinarium: Primum habetur per virtutes infusas, secundum per dona Spiritus Sancti. Ergo homo in justificatione accipit cum virtutibus dona Spiritus Sancti.

Q. 6. *Quot sunt dona Spiritus Sancti?*

R. Septem numerantur, Isa. 11.

Primum est donum Sapientiæ, quo æterna suavius contemplamur, & secundum ea de rebus omnibus judicamus.

Secundum est donum intelligentiæ, quo mens justi mysteria Fidei clarius penetrat.

Tertium est donum Scientiæ, quo illustrata ratio de temporalibus rectè judicat, nimirum non esse æstimanda aut appetenda, quin & abjicienda quantum fieri potest, veluti onera & impedimenta, quæ retardant animam ad Deum anhelantem.

Verùm

Verum quia vitæ necessitas cogit servire hujusmodi vanitatibus, donum scientiæ tantum abest ut inflet, quemadmodum scientia Philosophorum, quin justum dejiciat, & secundum S. Augustinum, naturaliter parit donum lachrymarum.

Quartum est donum Consilii, quo in iis quæ accidunt feliciter & supra humanam prudentiam eligimus, quæ ad salutem magis expediunt.

Quintum est donum Fortitudinis, quo extraordinariè firmatur animus in rebus arduis & terribilibus, qualia sunt mortis pericula.

Sextum est donum Pietatis, quo extraordinarie ad cultum divinum afficimur, & ultra quam virtus Religionis communiter præscribit.

Septimum est donum Timoris, nempe reverentialis erga Deum, quo animus omnem Dei irreverentiam modo singulari averfatur.

Q. 7. *An & quæ dispositiones sint necessariae ad gratiam sanctificantem?*

R. 1. In parvulis nulla requiritur; si enim primus Adam illis nocere potuit sine propriæ eorum voluntatis motu, multò magis secundus Adam eis prodesse potest.

R. 2. Adultis gratia sanctificans non conceditur sine præviis eorum dispositionibus, Ezech. 18. *Si impius egerit pœnitentiam, vita vivet.* Zach. 1. *Convertimini ad me, & ego convertar ad vos,* sanctus Augustinus serm. 15. de verbis Apostoli, nunc autem Serm. 169. cap. 11. *Sine voluntate tua non erit in te justitia Dei: & infra. Qui ergo fecit te sine te, non te justificat sine te.* Denique Concilium Tridentinum sess. 6. can. 9. *Si quis dixerit sola fide impium justificari . . . & nulla ex parte necesse esse eum suæ voluntatis motu præparari; anathema sit.*

D. Habert Theolog. Tom. VIII.

Q

Dices

Dices Rom. 3. v. 28. ait Apostolus, arbitramur hominem justificari per fidem sine operibus legis: Ergo.

Distinguo antecedens cum Patribus Tridentinis sess. 6. cap. 8. sine operibus legis, quæ fidem præcedunt ex solis liberi arbitrii viribus, Concedo: quæ ex fide, & Spiritus Sancti motione procedunt, Nego antecedens. *Pœnitentiam agite, inquit Princeps Apostolorum Aët. 2. & baptizetur unusquisque vestrum in nomine Jesu Christi in remissionem peccatorum vestrorum.*

Q. 8. *Potestne quis esse certus se gratiam sanctificantem esse consecutum?*

R. 1. Absque speciali Dei revelatione nemo potest esse certus certitudine Fidei divinæ, ita definit Concilium Tridentinum sess. 6. canone 13. *Nescit homo, inquit Sapiens, Eccles. 9. utrum amore vel odio dignus sit, sed omnia in futurum servantur incerta.* Et ipse Apostolus de se ipso ait 1. Corinth. 4. *Nil enim mihi conscius sum, sed non in hoc justificatus sum.* Et Philippenses gravissimis hisce verbis monet cap. cum metu, & tremore salutem vestram operamini.

R. 2. Potest quis esse certus certitudine quadam morali, quæ, etsi non excludat omnem formidinem, sufficit tamen ad sedandas animi anxietates; nam Rom. 8. *Ipse Spiritus testimonium reddit spiritui nostro, quod Filii Dei sumus.*

R. 3. E contrario moraliter certus est se gratiam sanctificantem in sacramentali Confessione non accepisse, nec proinde peccatorum remissionem, qui non est renovatus Spiritu, qui nedum delectetur justitia & concupiscat adversus carnem; adhuc terrena sapit, & spiritualia fastidit; *Qui enim*

enim secundum carnem sunt ; quæ carnis sunt sapiunt : qui verò secundum spiritum sunt , quæ sunt spiritus sentiunt , Rom. 8. v. 15.

CAPUT VIII.

De effectibus gratiæ.

Q. 1. *Qui sunt effectus gratiæ?*

R. Justificatio & meritum bonorum operum.

Q. 2. *Quid est justificatio?*

R. Definitur à Concilio Tridentino sess. 6. cap. 4. translatio à statu peccati ad statum gratiæ & adoptionis filiorum Dei.

Ergo justificatio est motus à contrario ad contrarium, scilicet a peccato ad justitiam, quemadmodum calefactio est transitus à frigore ad calorem.

Ergo in justificatione impii sunt duæ mutationes partiales, juxta commune Philosophorum effatum, generatio unius est corruptio alterius. Prima mutatio est destructio seu expulsio peccati. Secunda, introductio seu productio gratiæ sanctificantis.

Q. 3. *Quid in justificatione est præcipuum ; an remissio peccati, an gratiæ infusio?*

Respondet S. Thomas quæst. 113. art. 1. in fusionem gratiæ esse quid præcipuum, quia in omni motu magis intenditur terminus ad quem, v. gr. sanitas, quam terminus à quo receditur, v. gr. expulsio morbi : Atque infusio gratiæ est terminus ad quem justificationis, remissio verò peccatorum est terminus à quo : Ergo.

Q. 4. *Justificatio impii estne maximum Dei opus?*

R. Post unionem hypostaticam, qua homo fit substantialiter Deus, est maximum Dei opus; quia, ut ait sanctus Thomas citata quæst. 113. art. 9. *Terminatur ad bonum æternum divinæ participationis.* Et sanctus Augustinus Tract. 72. in Joannem. *Prorsus majus hoc esse dixerim, quàm est Cælum & terra, & quæcumque cernuntur in Cælo & in terra.* Quin, si gratia justificans, quæ permanent in Beatis, conferatur cum lumine gloriæ, præstantius videtur esse donum; quia se habet, tum ad lumen fidei, tum ad lumen gloriæ; veluti natura ad suas facultates, quarum est radicale principium.

Q. 5. *Justificatio impii estne miraculum?*

R. Si fiat suprà consuetum gratiæ operandi modum, præscriptum & ordinem, v. g. si adultus sine præviis dispositionibus subito justificetur, ut Sanct. Paulus, & latro ad latus Christi in Cruce pendentis, est verum miraculum: secus, si fiat secundum consuetum gratiæ operandi modum, quæ sicut natura, ab imperfectionibus incipiens, paulatim ad perfectiora progreditur; quia ad verum miraculum satis non est, ut opus excedat naturæ vires, sed insuper requiritur ut sit rarum; unde creatio animæ rationalis non est miraculosa, quia fit secundum communem ordinem à Deo præscriptum, & exigentibus præviis dispositionibus. Miraculum ergo à Deo expectant, qui conversionem suam ab extremum vitæ differunt.

Cætera, quæ pertinent ad justificationis essentiam, proprietates & dispositiones, exposuimus

mus duobus capitibus immediatè præcedentibus.
De solo igitur merito, quod est alter gratiæ ef-
fectus, nobis dicendum superest. Sed quia me-
ritum ex actibus bonis exurgit priùs tractandum
videtur de Actibus humanis, & quærendum in
quo consistat eorum bonitas, quàm
quidquam de merito
definiamus.





Tractatus DE ACTIBUS HUMANIS.

CAPUT PRIMUM.

De notione actus humani.

Q. 1. *ESTNE aliquod discrimen inter actionem hominis, & actionem humanam?*

R. Affirmativè, actio quippe hominis dicitur ea, quæ ab homine procedit, absque rationis advertentia: actio verò humana est ea quæ fit deliberatè, & cum advertentia rationis. De posteriori dumtaxat instituitur hic tractatus.

Q. 2. *Quid est actus humanus?*

R. Est actus à voluntate hominis deliberatè procedens. Ita Sanct. Thomas prima secundæ quæst. 1. art. 1.

Dicitur 1. à voluntate hominis procedens; quod fit vel immediatè, vel mediatè; si immediatè à
VO-

voluntate procedit, ut volitio, amor, &c. dicitur actus elicited: si mediatè tantum, ut cognitio, deambulatio. &c. actus dicitur imperatus; quia nec cognitio, nec ambulatio, producantur à voluntate; sed ab aliis potentiis, illa ab intellectu, ista à facultate motrice; dicuntur tamen actus à voluntate imperati, quia non exeunt à suis propriis facultatibus, nisi imperante voluntate.

Dicitur 2. *deliberatè*, hoc est, cum electione, & advertentia rationis, ac proinde liberè.

Actus autem procedit à voluntate, vel consentaneè ad rectam rationem, vel dissentaneè, & hoc respectu dicitur actus moralis, bonus vel malus.

Ergo; in actu humano tria sunt spectanda, scilicet voluntarium, liberum, & morale.

§. I.

De voluntario.

Q. I. *Quid est voluntarium?*

R. Est quod fit à principio interno cognoscente singula, in quibus est actio. Ergo ad voluntarium duo requiruntur, primo debet esse à principio intrinseco. Unde violenta tractio in carcerem; non est voluntaria in eo, qui trahitur; quia fit à principio extrinseco, nihil conferente voluntate patientis. Secundò debet agens, à quo procedit actio voluntaria, cognoscere ea, in quibus versatur ejus actio.

Ergo absoluta violentia, seu coactio, & ignorantia invincibilis excludunt voluntarium.

Q. 2. *Quotuplex est violentia seu coactio?*

R. Duplex, alia absoluta, alia secundum quid,

quid, quæ dicitur à Sanct. Thoma, coactio insufficiens.

Violentia absoluta est actio, quæ procedit totaliter à principio extrinseco, ut tractio in carcerem, ad quam nihil confert qui trahitur, sed tota est à satellitibus.

Violenta insufficiens & secundum quid, est actio, quæ procedit partim à principio interno, partim ab externo; ut consensus cum repugnantia datus ob metum ab altero injectum, vel ob gravem tentationem ex dæmonis vel propriæ concupiscentiæ impulsu.

Q. 3. *Omnis violentia seu coactio tollitne voluntarium?*

R. Absoluta tollit omnino, quia actio nullatenus procedit à voluntate: insufficiens verò, & secundum quid non tollit, sed minuit tantum; quia actio sic coacta procedit partim à voluntate, partim à principio externo.

Q. 4. *Voluntas potestne cogi coactione absoluta?*

R. Non potest quoad actus elicitos; quia sicut omnis operatio intellectus est intellectio seu cognitio, sic omnis actus voluntatis est volitio: manifesta autem est contradictio volitionem non esse voluntariam, nec à voluntate procedere.

Ergo apostasia à Christo, perjurium, & alia crimina metu extorta sunt absolutè voluntaria, & secundum quid tantum involuntaria, ac proinde à peccato excusari non possunt.

Dixi, *quoad actus elicitos*; quia actus aliarum facultatum possunt esse simpliciter & absolutè coacti; sed tunc non sunt à voluntate imperati, nec ab ea procedunt sive mediata, sive immediata. Unde voluntas absolutè cogi non potest ad impe-

imperandum ullum actum, puta thurificationem in idoli cultum.

§. II.

De ignorantia

Q. 1. *Quotuplex est ignorantia?*

R. Duplex; alia juris, alia facti, & utraque est, vel vincibilis vel invincibilis.

Ignorantia juris est in eo, qui ignorat legem, v. g. usuram esse prohibitam.

Ignorantia facti laborat, qui sciens legem prohibentem v. g. usuram, vel præcipientem jejunium in pervigilio Sancti Joannis Baptistæ; ignorat quem init contractum esse usurarium, vel non advertit diem qua comedit carnes esse pervigilium S. Joannis Baptistæ.

Ignorantia vincibilis est eorum, quæ quis scire potest & debet: invincibilis verò eorum, quæ quis scire omnino non potest nec debet.

Q. 2. *Quotuplex est ignorantia vincibilis?*

R. Duplex: affectata, qua quis nescire affectat, ut liberius peccet; & crassa, qua quis, etiam si directè non affectet nescire, non adhibet tamen diligentiam necessariam, ut sciat quæ debet scire.

Q. 3. *Ignorantia vincibilis tollitne voluntarium?*

R. 1. Affectata voluntarium & peccatum auget, nedum minuat, quia ex Sancti Thoma 1. 2. q. 76. art. 4. ex intentione voluntatis ad peccandum provenit, quòd aliquis vult subire ignorantiae damnum propter libertatem peccandi.

R. 2. Crassa ignorantia minuit voluntarium, quia minuit cognitionem; actio enim quæ procedit à principio minùs cognoscente, est minus vo-

luntaria, ac proinde minus malitiæ continet, *qui non cognovit & fecit digna plagis, vapulabit paucis*, Luc. 12.

R. 3. Ignorantia crassa nec voluntarium absolute tollit, nec à peccato omnino excusat; quia est volita saltem indirectè, quatenus ignorans, vel omittit voluntariè diligentiam necessariam, ut ignorantia, qua laborat, expellatur; vel voluntariè suscipit officium, ad quod gerendum non potest assequi scientiam necessariam.

Dices ex concessis, ubi nulla est cognitio, nullum quoque est voluntarium: Atqui plures nesciunt, quæ scire possunt & debent, nec advertunt se nescire, nec in mentem eorum venit sibi adhibendam diligentiam, ut plenius edoceantur. Ejusmodi fuerunt Judæi, qui ex zelo legis persecuti sunt Christum Dominum; si enim illum cognovissent, nunquam crucifixissent, 1. Cor. 2. Hæretici, quorum non pauci solo Dei timore videntur suæ sectæ addicti; Plures Judices, Pastores, & Confessarii, qui ponentes tenebras lucem, putant se obsequium præstare Deo: Ergo ignorantia vincibilis sæpè tollit omnino voluntarium & peccatum.

Distinguo minorem: plures non advertunt se nescire, sed advertere possunt & debent, Concedo; advertere non possunt, ut in exemplis allatis, Nego minorem: Namque primo Judæi per miracula & prophetias Christum Dominum cognoscere potuerunt. Secundo hæretici & alii infideles, quibus annuntiatum est Evangelium, si vellent attendere ad notas veræ Religionis, facillè Ecclesiam Catholicam agnoscerent. Tertiò Fideles multò minus sunt excusandi ob ignorantiam,

tiam, quàm & hæretici & infideles: eorum enim cæcitas nascitur vel ex nimia sui fiducia, vel ex illicitis cupiditatibus, vel denique ex negligentia & socordia.

Ergo merito damnata est ab Alexandro VIII. anno 1690. & à Clero Gallicano an. 1700. ut erronea, & piarum aurium offensiva hæc propositio, *peccatum Philosophicum, quantumvis grave in eo, qui Deum vel ignorat, vel de Deo actu non cogitat, non est offensa Dei, neque peccatum mortale dissolvens amicitiam Dei, neque æterna pœna dignum.*

Ergo peccata ignorantiae vincibilis, etsi minus sint gravia, quam peccata malitiæ, majori tamen periculo æternæ damnationis exponunt; quia plerumque conjuncta sunt cum impœnitentia finali; quomodo enim quis resipisceret à peccato, cujus nullam gerit conscientiam? Hinc geminatae preces Ecclesiæ, *Illumina oculos meos, ne unquam obdormiam in morte.* Hinc tremor firmissimarum etiam Ecclesiæ columnarum, *multum timeo occulta mea*, inquit S. Augustinus lib. 10. Conf. cap. 37. *quæ norunt oculi tui, mei autem non. Tu nosti hac de re ad tegemitum cordis mei, & flumina oculorum meorum.*

Q. 4. *Omnis ignorantia invincibilis excusatne à peccato?*

R. Affirmativè; sive illa sit facti, sive juris positivi, vel humani, vel divini, vel etiam naturalis, (si tamen hæc detur,) quia ejusmodi ignorantia excludit prorsus voluntarium: Atqui *peccatum usque adeò voluntarium est*, inquit S. Augustinus lib. de vera Religione cap. 4. *ut nullo modo sit peccatum, si non sit voluntarium.* Et hoc ita manifestum, ut nulla Doctorum paucitas, nulla indoctorum turba dissentiat.

Con-

Confirmatur responsio ex summis Pontificibus Pio V. & Gregorio XIII. qui damnarunt sequentes Baji propositiones, *Ad rationem & definitionem peccati non pertinet voluntarium.* Item. *Infidelitas negativa in in iis, quibus Christus non est prædicatus, peccatum est.* Alexander quoque VIII. anno 1690. perstrinxit hanc propositionem, *Tametsi detur ignorantia invincibilis juris naturæ, hæc in statu naturæ lapsæ operantem, ex ipsa non excusat à peccato formali.*

Dices; peccatum originale est peccatum proprie dictum, quia fuit voluntarium in Adamo: Ergo à pari quæ fiunt ex ignorantia invincibili contra legem, censeri debent voluntaria in primo parente, ac proinde formaliter peccata.

Nego consequentiam & paritatem; quia peccatum originale est peccatum naturæ, satisque est ad illud contrahendum, quòd tota natura fuerit in Adamo & per illius voluntatem, utpote toti generi humano communem, corrupta fuerit; at quæ fiunt ex ignorantia sive vincibili sive invincibili, sunt actus personales; Ergo debent esse voluntarii, propria voluntate, alioquin, si essent peccata naturæ, nasceremur rei non tantum peccati originalis, sed & omnium peccatorum, quæ in statu naturæ corruptæ committuntur.

Peccatum autem personale non potest esse voluntarium propria voluntate, nisi adsit cognitio vel directa, ut in iis, qui deliberatè peccant, vel indirecta, hoc est, in causa in qua prævideri potuit, & debuit. Porro posteri Adæ nec potuerunt nec debuerunt in illo providere quæ faciunt ex ignorantia invincibili. Ergo illa non sunt

sunt peccata formaliter, sed materialiter tantum.

Q. 5. *Daturne ignorantia invincibilis juris naturalis?*

R. 1. Non datur circa prima principia, neque circa conclusiones, quæ proximè deducuntur ex primis principiis, v. g. circa præcepta Decalogi, nisi fortè in quibusdam circumstantiis difficilioribus, in quibus crederet quis v. g. se graviter peccaturum, nisi proferret mendacium officiosum & necessarium ad vitandam mortem proximi. Et ratio est quia peccatum naturam humanam prorsus non corrumpit, alioquin homo per peccatum desineret esse homo, & in alienam naturam transmutaretur: Atqui si in eo nullum rationis lumen remaneret, quo perciperet prima principia per se nota & conclusiones cum iis evidenter connexas, jam non esset homo. Unde Aristoteles lib. 3. Moralium sic scribit: *Quæ agenda, quæve fugienda sunt, nullus improbus ignorat; non igitur idè quisque involuntarie agere dicitur: quia quod expedit, nescit; omnino enim ista ignorantia, qua quis eligit certum aliquod malum, non efficit ut involuntaria sit illa actio, sed ut mala sit. Talem enim ignorantiam vitio vertimus.* Illud ipsum agnoscit Sanctus Augustinus in Psalm. 116.

R. 2. Potest esse ignorantia invincibilis circa conclusiones legis naturalis, quæ nonnisi remotè deducuntur ex primis principiis, qualis est prohibitio usuræ, uxorum pluralitas, matrimonii indissolubilitas, etiam interveniente aliqua gravi causa. Ratio est, quia non deducuntur ex primis principiis, nisi longiori discursu, cujus moraliter capaces non sunt, ut plurimum homines indocti

indocti & tardioris ingenii; quin in iis aliquando sapientiores falluntur & contradictorias sequuntur opiniones.

Dices : Ex Gersone lib. de vita spiritali, *Concors est sententia, nullam in iis, quæ legis naturalis sunt, cadere ignorantiam invincibilem* : Ergo.

Distinguo antec. quæ legis naturalis sunt, si spectatur quoad prima principia, & primarias conclusiones, Concedo : si spectetur quoad conclusiones remotiores, Nego antec. si enim bona fides, præsertim eorum, qui ex consilio sapientiorum, vel etiam Pastorum moraliter certi sunt & operantur, à peccato non excusaret, omnibus de æterna salute desperandum foret. Unde meritò Clerus Gallicanus anno 1700. erroneam judicavit hanc propositionem, quam Alexander VIII. jam damnaverat anno 1690. *Non licet sequi opinionem, vel inter probabiles probabilissimam.*

§. III.

De Libero.

Q. 1. *Voluntarium estne idem ac liberum?*

R. Minime, crescente enim voluntario, per concupiscentiam, minuitur liberum. Quin amor beatificus est maxime voluntarius, & tamen liber non est, quia maximè est necessarius.

Q. 2. *Quotuplex est libertas?*

R. Duplex; alia dicitur libertas naturæ, alia libertas arbitrii.

Q. 3. *Quid est libertas naturæ?*

R. Est libertas, per quam habet quævis natura, ut sine impedimento tendat in suum finem & bonum sibi conveniens. Hoc sensu dicimus
aquam

aquam liberè fluere, quando violenter non retinetur, beatos liberè in Deum ferri, & SS. Aug. & Thomas scribunt Deum liberè vivere, & Deum liberè seipsum amare. Unde patet libertatem naturæ non excludere necessitatem, nec constituere actum humanum, qui cum deliberatione a voluntate procedit; Deus enim non vivit, nec seipsum amat, nec Beati Deum ex deliberatione.

Q. 4. *Quid est libertas arbitrii?*

R. Est potentia activa, quæ, positis omnibus ad agendum prærequisitis, potest agere & non agere.

Dicitur 1. *Potentia*; neque enim est actus, cum homo maneat liber, etiamsi non agat, Neque etiam est habitus, quia idem habitus non inclinatur ad actus contrarios, v. gr. ad actum temperantiæ & intemperantiæ: libertas autem arbitrii se habet ad utrumque.

Dicitur 2. *Activa*, ut distinguatur libertas arbitrii à potentia passiva, quæ est indifferens ad recipiendam hanc vel illam formam, puta calorem vel frigus, determinaturque non à seipsa, sed ab agente eam disponente. At libertas arbitrii est potentia indifferens ad agendum & non agendum, & sui ipsius determinativa.

Dicitur 3. *Positis omnibus ad agendum prærequisitis*; in quo distinguitur causa libera à causis necessariis. Hæ quippe, quamdiu non ponuntur prærequisita ad agendum, indeterminatæ quidem sunt & indifferentes ad hunc vel illum effectum, v. g. ignis ad comburendum lignum, vel ad liquefaciendum metallum; ubi verò ponuntur, necessario determinatæ sunt ab objectis & dispositionibus, ignis v. g. necessario comburit lignum præpara-

paratum & sibi applicatum. Causa verò libera, positis omnibus ad agendum prærequisitis, v. g. motione gratiæ efficacis, aut vehementis concupiscentiæ, potest suspendere suum actum, resistere huic motioni, nec nisi à seipsa determinatur.

Q. 5. *Quotuplex est libertas arbitrii?*

R. Duplex, nempe contrarietatis & contradictionis.

Libertas contrarietatis dicitur ea, qua quis potest eligere contraria, bonum & malum: contradictionis, qua quis potest ponere actum vel non ponere, velle & non velle.

Q. 6. *Quotuplex est libertas contradictionis?*

R. Duplex, scilicet specificationis & exercitii.

Libertas specificationis est ea, qua quis potest eligere actus diversæ speciei, v. g. jejunium aut eleemosynæ erogationem: exercitii; qua voluntas, etsi necessariò determinata ad unum, quemadmodum Christus Dominus erat determinatus ad mortem Crucis subeundam, indeterminata tamen manet ad hunc vel illum actum, potestque hunc potius eligere, quàm alium. Consule quæ ad hujusce divisionis intelligentiam diximus de merito Christi tractatu de Incarnatione, cap. 8, circa medium, ubi probavimus libertatem exercitii sufficere ad meritum, cum per eam agens verè sit Dominus sui actus, possitque illum ponere vel non ponere.

Q. 7. *Quæ arbitrii libertas competit homini?*

R. 7. In hoc statu competit illi libertas contrarietatis & contradictionis, sive specificationis, sive exercitii. *Ante hominem vita & mors, bonum & malum, quod placuerit ei: dabitur illi; Eccles. 15.*

Agit

Agit Deus ut velimus & credamus, inquit S. Augustinus lib. de Spir. & lit. cap. 33. *se consentire posse propriæ voluntatis est.* Et S. Bernardus lib. de grat. & lib. arb. cap. 2. *Ubi necessitas, ibi libertas non est, nec meritum ac per hoc nec judicium.* Cum ergo voluntas nil liberum habeat nisi se, meritò non judicatur nisi ex se. *Siquidem nec tardum ingenium, nec labilis memoria, nec inquietus appetitus reum per se statuunt hominem; sicut nec contraria innocentem: & hoc non ob aliud, nisi quia hæc necessario & præter voluntatem posse provenire probantur.* Denique summi Pontifices Innocentius X. & Alexander VII. tanquam hæreticam damnarunt hancce Jansenii propositionem. *Ad merendum vel demerendum in statu naturæ lapsæ non requiritur libertas à necessitate, sed sufficit libertas à coactione.*

R. 2. Beati non sunt liberi libertate contrarietatis, quia posse peccare est defectus, supponitque cæcitatem mentis & infirmitatem voluntatis, quæ vitia excludit status beatitudinis; in tanta enim luce malum obrepere non potest sub ulla specie boni, sine qua tamen amari nequit; cum per seipsum non sit amabile; ac proinde Beati sunt omninò impeccabiles.

Neque etiam Beati habent libertatem contradictionis respectu visionis Dei intuitivæ & amoris beatifici; quia actus illi sunt maximè necessarii, nec cum deliberatione à voluntate procedunt, utpote qui versentur circa ultimum finem, à quo voluntas sine peccato non deflecteret: voluntas autem Beatorum est impeccabilis.

Beati igitur sunt liberi libertate contradictionis, tum specificationis, tum exercitii circa objecta inferiora, quia cum sint bona finita, habeant-

que rationem mediorum, quorum est electio, ut docet Sanctus Thomas, possunt appeti, aut non appeti, salva lege æterna.

§. IV.

De Morali.

Q. 1. *Quid significat vox illa morale?*

R. Quod ad mores pertinet.

Q. 2. *Quid est mos?*

R. Generatim est frequens operandi modus communis vel generi, puta omnibus animalibus, vel speciei, v. g. homini.

Mos autem oritur vel ex naturali instinctu & naturæ determinatione, vel ex electione voluntatis liberè se determinantis ex rationis judicio. Primum constituit mores animalium irrationalium; secundum mores hominum, qui ut tales, non agunt nisi deliberatè & ex aliquo rationis judicio, ut advertit S. Bernardus lib. de grat. & lib. arb. c. 2. ubi sic scribit: *Habet sanè (voluntas) quocunque se verterit semper rationem comitem & quodammodo pedissequam, non quòd semper ex ratione, sed quòd nusquam absque ratione moveatur; ita ut multa faciat per ipsam contra ipsam, hoc est, quasi per ejus ministerium, contra ejus consilium, sive judicium. . . . Est verò ratio data voluntati, ut instruat illam, non ut destruat: destrueret autem, si necessitatem ei ullam imponeret.*

Q. 3. *Quid ergo morale dicit præter liberum?*

R. Dicit ordinem & relationem ad naturam rationalem & rectam rationem. Liberum quippè dupliciter spectari potest, vel præcisè prout cum deliberatione exit à voluntate ad actum; vel prout exit consentaneè aut dissentaneè ad naturam

ram rationalem, & rectam rationem; atque sub hoc respectu actus humanus dicitur moralis, bonus . vel malus, laude vel vituperio dignus.

Ergo omne liberum est morale, & vice versa omne morale est liberum; quia omnis actus liber vel est consentaneus naturæ rationali, & secundum rectum rationis iudicium; vel dissentaneus.

Dices: Operatio artificialis libera est, nec tamen moralis: Ergo omnis actio libera, non est moralis.

Nego antec. Neque enim artifex exiit hominem ut vacet suo operi, sed debet illud perficere, cum secundum artis suæ regulas, tum maximè secundum rectam rationem, actuum humanorum regulam: alioquin actus, licet ad normam artis expressus, erit simpliciter malus, & secundum quid bonus, scilicet in genere artificialium, & artifex ab eo verè denominabitur improbus homo, bonus verò artifex.

Haftenus de actu humano secundum essentiam spectato. Nunc quod caput est, dicendum de bonitate ejus morali & malitia, quæ sunt ejus proprietates.

CAPUT II.

De bonitate & malitia actuum humanorum.

Q. I. *In quo consistunt bonitas & malitia actionis humanæ?*

R. I. Bonitas seu honestas actionis humanæ consistit in conformitate & convenientia cum natura rationali, adeo ut rectè & ex virtute vivere idem sit homini ac rationabiliter agere. Res enim

quælibet est bona, cum facit ea ad quæ nata est. *Vitem laudamus*, inquit Seneca, *si fructus palmitem onerat In homine laudandum est quod ipsius est, consummaturque ejus bonum, si implet, cui natus est*: Atqui natura hominis est rationalis: Ergo bonus est, & bene agit; si rationabiliter & recto rationis judicio operatur.

Hæc responsio comprehendit actiones supernaturales, quamvis enim sint supra naturam, naturæ tamen rationali maximè conveniunt, cum ex Sanct. Augustino posse habere fidem, naturæ sit humanæ, non pecorinæ.

R. 2. Malitia actionis humanæ consistit in difformitate & repugnantia cum natura rationali. Responsio patet ex præcedenti; nam contrariorum contrariæ sunt rationes. Ergo si bonitas actionis humanæ est ejus conformitas cum natura rationali, malitia est ejus difformitas cum natura rationali.

Q. 2. *Quomodo definitur actio moraliter bona, & actio moraliter mala?*

R. Bona definitur, actio humana libera naturæ rationali consentanea. Mala verò, actio humana, libera, naturæ rationali dissentanea, & repugnans.

Dices: creatura rationalis debet prius attendere quid placitum sit Deo, & conforme ejus voluntati, quam quid ipsi conveniat. Ergo bonitas actuum humanorum reponenda est in conformitate ad legem æternam, & ad divinam voluntatem.

Confirmatur; actio mala est peccatum, & offensa Dei: atqui eatenus peccatum est & offensa, qua-

quatenus repugnat legi æternæ, & voluntati divinæ : Ergo.

Concedo antecedente, Nego conseq. quia cum natura rationalis sit ad imaginem, & similitudinem Dei, actus, qui ei conveniunt aut repugnant, hoc ipso conformes sunt aut diffformes legi æternæ, cujus recta ratio seu lex naturalis est irradiatio & divina impressio. Perinde ergo est definire bonitatem & malitiam actuum humanorum per ordinem, vel ad rectam rationem tanquam ad proximam regulam, vel ad legem æternam tanquam ad primariam regulam & omnium legum radicem.

Meliùs tamen & clarius explicantur bonitas & malitia actuum humanorum per ordinem ad naturam rationalem. Cur enim brutorum motus, qui ipsis sunt naturales, & secundum legem æternam diriguntur, in homine sunt vitia, repugnantque legi æternæ : nisi quia natura bestiarum non est ad similitudinem Dei, à qua homo recedit, cum brutorum more operatur & vivit ? Ergo satis non explicatur bonitas aut malitia actuum humanorum per convenientiam aut oppositionem ad legem æternam : optime vero per conformitatem & difformitatem ad naturam rationalem.

Q. 3. *Unde desumitur bonitas vel malitia actuum humanorum, seu, quod idem est, convenientia, & disconvenientia cum natura rationali?*

R. Ex tribus capitibus, nempe ex objecto, fine, & circumstantiis.

CAPUT III.

De objecto actuum humanorum.

Q. 1. *Quare bonitas & malitia actuum humanorum desumuntur ex objecto?*

R. Quia actus formam & speciem ab eo recipiunt, visio v. g. differt essentialiter ab auditu, estque eo melior & nobilior, quia habet objectum nobilius: ergo si objectum actus humani sit bonum aut malum, actus similiter erit bonus aut malus.

Q. 2. *Quotuplex est objectum?*

R. Duplex scilicet materiale, & formale, quod dicitur motivum.

Materiale est id circa quod versatur actio; v. g. miseria pauperis est objectum materiale actus misericordiæ, quia circa illam versatur.

Formale est ratio, sub qua actio tendit in objectum materiale; sic sublevatio pauperis est objectum formale actus misericordiæ, quia misericordia respicit pauperem, ut sublevandum.

Q. 3. *Ex quonam objecto actus desumit suam bonitatem, aut malitiam?*

R. Ex utroque, sed præcipuè ex objecto formali.

Ex materiali quidem; quia quo objectum materiale est præstantius, eo perfectior actus existit, cæteris paribus: quod verò naturæ rationalis magis repugnat, eo actus est pejor. Hinc amor Dei melior est amore proximi, licet uterque habeat idem objectum formale seu motivum, nempe Dei bonitatem; & odium Dei pejus est odio proximi. Deinde objectum per se malum, puta men-

mendacium, reddit actum malum, etiamsi voluntas feratur in mendacium motivo honesto, v.g. charitatis.

Ex objecto etiam formali, & quidem præcipue, actus humanus desumit suam bonitatem aut malitiam, quia objectum formale præsertim reddit actum voluntarium; est enim ratio propter quam voluntas fertur in objectum materiale. Unde S. Aug. Tract. 17. in 1. sancti Joan. *Non quid facit homo, inquit, considerandum est sed quo animo & voluntate faciat; in eodem facto invenimus Deum Patrem, in quo invenimus Judam: benedicimus charitatem, in quo Pater Filium, & Filius seipsum tradiderunt: detestamur iniquitatem qua Judas Dominum.*

Q. 4. *Quodlibet objectum bonum redditne actum similiter bonum?*

R. Si objectum sit bonum relativè ad operantem, reddit actum ejus bonum; secùs, si sit duntaxat absolutè bonum.

Ergo duplex est bonum, aliud absolutum, aliud relativum.

Bonum absolutum est res quælibet in se perfecta, quo sensu omnis creatura est bona juxta illud Gen. 1. *vidit Deus cuncta quæ fecerat, & erant valdè bona.*

Bonum relativum est res alterius perfectiva & consequenter ipsi conveniens, ac propterea appetibilis. Malum vero relative sumptum est res alteri nociva, & ideo dissidentanea & fugienda.

Ergo bonitas relativa essentialiter consistit in perfectivitate, seu virtute perficiendi, ex qua fluunt convenientia & appetibilitas tamquam ejus proprietates, ideo quippe res est appetibilis,

quia conveniens, & ideò conveniens, quia perfectiva.

Contra verò essentia mali relativi consistit in virtute nociva, ex qua sequuntur disconvenientia & fuga.

Ergo plura absolutè spectata sunt bona, quæ relativè sunt mala, calor v. g. absolutè & simpliciter est bonus; sed relative ad aquam est malus, quia eam corrumpit: naturale pecoris bonum, est vitium hominis.

Ergo sola actio humana censenda est bona; quæ est hominis perfectiva: studere autem rebus Mechanicis, Mathematicis, Medicis, &c. non perficit Sacerdotem, nec reddit meliorem, sed deteriorem, cum hinc avertatur ab iis, quæ decent Sacerdotem, ac ejusmodi occupationes quamvis absolute sint bonæ, relativè tamen ad Sacerdotem bonæ non sunt.

Ergo nec divitiæ nec voluptas, nec fama, seu honores sunt bonum hominis; quia illum non perficiunt, nec reddunt meliorem; imo, si hujusmodi adhæreat, illum deprimunt, deterioremque efficiunt: *fieri non potest*, inquit Sanct. Augustinus in Ps. 32. *ut res deterior te faciat meliorem. Homo es, deterius te est, quidquid cupis. Aurum, argentum, quælibet corporalia, quibus inhias acquirendis, inferiora te sunt.*

Ergo Deus est summum bonum cujuslibet rei, quia rerum omnium est summè perfectivus; perfectio enim effectus est assimilari suæ causæ.

Ergo actus humanus eo est melior, quo magis Deo conjungit, ut oratio & contemplatio; quia naturam rationalem magis perficit, pejor verò, quo magis à Deo avocat; quia naturæ ratio-

rationalis magis repugnat, eamque magis inficit, ac corrumpit.

Ergo Actus mali miserum hominem reddunt: cum enim sint contrarii & noxii naturæ rationali, non minus illam excruciant, quam pulvis & aliæ sordes oculum corporis. Hinc conscientiae stimuli.

Ergo observatio mandatorum Dei est verum hominis bonum; quia illum perficit, & meliorem reddit.

Ergo latum est discrimen inter legem naturalem & leges humanas, præsertim civiles: istæ nimirum plerumque sunt onera, quibus subjici servitus est, & subdi singularis gratia Principis. Contra vero legem naturalem implere usque ad minimos apices est vera hominis libertas, vera felicitas, & maximum Dei beneficium. Hæc est gratia, quam Filius Dei nobis promeruit, quamque continuò postulamus, ut mandata Dei adimpleamus, quia in illis custodiendis salus & perfectio nostra.

Ergo falluntur & fallunt, qui virtutis exercitium sibi & aliis proponunt, ut insuave & molestum, quia illud per se est delectabilius, quod naturæ convenientius & illam magis perficit; delectatio quippe est fructus operationis non impeditæ & naturæ convenientis, ut docent Philosophi, & experientia demonstrat; perceptio lucis verb. gr. delectat oculos sanos, & cibi delicatiores palatum benè affectum: Atqui actus virtutum naturæ rationali magis conveniunt, illumque magis perficiunt, quam quælibet sensatio: Ergo per se magis delectant, *fructus Spiritus est charitas, gaudium, pax*, ait Apostolus Galat. 5.

Q. 5. *Sicut existunt objecta nec bona nec mala, sed per se indifferentia, ut deambulatio, confabulationes, &c. ita dantur actus in individuo, seu in exercitio indifferentes, qui nec boni, nec mali sint moraliter?*

R. 1. In hoc statu naturæ corruptæ, ubi caro concupiscit adversus spiritum, ejusmodi actus vix indifferenter exercerentur, nisi enim ratio invigilet, attendatque ad honestatem, semper aut fere semper vel procedunt ex concupiscentia, hoc est, ex motivo voluptatis, cupiditatis, vanitatis, superbiæ; vel saltem carent debitis circumstantiis: Ergo nisi ad finem honestum dirigantur, semper aut ferè semper mali sunt. Unde isthæc quæstio, quæ magna contentione agitur in Scholis, magis ad theoriam, quàm ad praxim pertinere videtur. Nihilominus

R. 2. Etiam si detur quoddam actus illi de quibus est quæstio, non procedant ex carnis aut oculorum concupiscentia, aut superbia vitæ, nec in illis ulla interveniat circumstantia mala, in exercitio tamen non possunt esse indifferentes, quia homo non est purum animal, sed animal rationale: Ergo tenetur humano modo, id est, rationabiliter naturæ infirmitatem juvare, & necessitatibus ejus subvenire. Quod si hujusmodi more pecudum sensibus deserviat, imaginem Dei in se deturpat, & naturam rationalem deformat. *Honor enim hominis verus est, imago Dei, quæ non custoditur, nisi ad ipsum, à quo imprimitur, inquit S. Augustinus: dedecus vero ejus similitudo pecoris, dum sensibus ad ima deprimitur, id est, ad ea, quibus pecora delectantur.*

CAPUT IV.

De fine actuum humanorum.

Q. 1. *Quotuplex est finis acceptio?*

R. Finis dupliciter accipitur 1. improprie pro termino cuiusque rei, etiamsi ille non intendatur, quo sensu mors dicitur finis vitæ; & vespera finis diei. 2. proprie pro bono, in quod tendit agens, & quo obtento, cessat motus ejus. Ita sanctus Thomas 1. 2. q. 1. art. 3. Hoc posteriori sensu finem hic accipimus.

Q. 2. *Quomodo definitur finis?*

R. Definitur, id cuius gratia aliquid fit.

Dicitur 2. *Id*, hoc est, res bona saltem apparenter; quia voluntas non potest allici, aut moveri, nisi ab aliquo bono.

Dicitur 1. *Cujus gratia*, id est, cuius amore & fruendi desiderio agens operatur. His autem vocibus finis proprie dictis distinguitur tum à medio, tum à fine improprie dicto, seu & termino.

A medio quidem; quia licet multa fiant propter medium, puta propter Pharmacum præparandum, aut pecuniam lucrandam, Pharmacum tamen aut pecunia dici nequeunt finis, cum illa non fiant amore pharmaci, aut pecuniæ, sed amore dumtaxat sanitatis, aut commodæ sustentationis, in quibus agens requiescere intendit. *Quod enim amatur propter aliud, non illud amatur, sed aliud propter quod amatur*, inquit S. Augustinus.

Iisdem quoque vocibus finis distinguitur à puro termino, ad quem agens ita opera sua dirigit, ut illum non appetat, nec illius amore operetur, ut videre est in illo, qui, cum multa præparet
pro

pro tempore ægritudinis, ad quam scit certò terminandam sanitatem, non habet tamen ægritudinem pro fine, quia illam nec amat, nec appetit, sed quantum potest à se propellit. Sic carnales quædam bona opera ordinant ad futuram vitam, ad quam se transmittendos non ignorant, timentque ne in illa sint miseri. Sed finis illorum propriè non est, quia ad illam transire non appetunt, nec ejus amore operantur, quod est notatu dignissimum.

Dicitur 3. *Aliquid fit*, quo significatur finem esse primam omnium operationum, sive naturalium, sive artificialium, sive moralium causam, ut docet Sanct. Thom. 1. 2. q. 1. art. 2.

Ergo causalitas finis, seu ratio, per quam finis movet, constituiturque actu causans, est volitio seu complacentia & desiderium efficax boni consequendi, puta commodæ habitationis, propter quam domus construitur; quia posito illo amore & desiderio, finis movet agentem, & causat effectum; illo verò sublato, finis nec movet, nec ad agendum determinat.

Ergo bonum & finis non recipiuntur. Omnis quidem finis est bonus saltem apparenter, alias non expeteretur: sed non omne bonum est finis, quia finis est id, cujus gratia aliquid fit. Atqui multa sunt bona; propter quæ consequenda nihil fit: Ergo non sunt finis. Sic bonum victoriæ, aut scientiæ non est finis respectu ignavi & desidiosi, quia ad illud consequendam non contendit.

Ergo bonitas & malitia actuum humanorum potissimum ex fine repetuntur, quia ex dictis actio eatenus est bona aut mala, quatenus est deliberate

rate voluntaria ; voluntas quippe per amorem adhæret rei amatæ , ejusque conditiones induit , *facti sunt abominabiles , sicut ea quæ dilexerunt* , Osee 9. Atqui actio ex fine maximè est voluntaria , cum illum non ob aliud , sed propter se appetat. Ergo ex fine præsertim , denominatur quis bonus vel malus. *Non valde attendas* , inquit Sanct. Augustinus in Psal. 31. *quid faciat homo , sed quid cum facit , aspiciat.* Qui enim furatur propter adulterium , magis adulter est , quam fur , ex Philosopho , quia non tam furtum , quam adulterium amat.

Ergo satis non est , ut observat sanctus Bonaventura in 2. dist. 41. art. 1. quæst. 3. quòd quis manè ad Deum referat quidquid per diem acturus est , ut cuncta ejus opera censeantur in Deo & propter Deum facta ; quantumcunque enim ferveat pia ejus intentio , vix tamen influet in singula ejus opera , præsertim si varia sint ac disparata , nisi identidem iteretur ; quia corpus quod corrumpitur , aggravat animam , & caro continuo concupiscit adversus spiritum. Unde sicut aqua ad ignem semel calefacta , paulatim tepescit , ac tandem nativum frigus recipit ; sic & intentio nostra sensim remittitur , nisi per certa temporis intervalla nos ipsos admoneamus & mentem ad Deum erigamus. *Ideo* , inquit sanctus Augustinus Epistola 130. alias 121. *ab aliis curis atque negotiis , quibus ipsum desiderium quodammodo tepescit , certis horis ad negotium orandi mentem revocamus . . . ne quod tepescere cœperat omnino frigescat & penitus extinguatur , nisi crebrius inflammetur.*

Dixi , *si opera varia sint* ; nam si quis per totum diem vacaret unico operi , v. gr. peregrinaretur

motivo religionis, vel literis operam daret ex affectu charitatis, facilius intelligeretur virtualiter perseverare pia intentio matutina: maximè si initio remissa non fuerit, nec contrario affectu, puta vanitatis aut cupiditatis, oppugnetur.

CAPUT V.

De divisione finis.

Q. 1. *Quomodo dividitur finis?*

R. Dividitur 1. in internum & externum. 2. in intermedium & ultimum.

Q. 2. *Quid est finis internus?*

R. Est finis, ad quem opus natura sua proxime tendit, proptereaue dicitur finis operis: sic sublevatio pauperis est finis internus eleemosynæ, quia eleemosyna ex natura sua tendit ad sublevandum pauperem. Unde finis internus est ipsum objectum formale, à quo actus desumit suam essentiam, ut supra diximus.

Q. 3. *Quid est finis externus?*

R. Est ille, ad quem opus ordinatur, non ex natura sua, sed ex sola intentione agentis, & ideo vocari solet finis operantis. Sic remissio peccatorum est finis externus eleemosynæ à poenitentia imperatæ, & eo sensu finis est circumstantia actus humani imperati, cui tribuit bonitatem dumtaxat accidentalem.

Q. 4. *Quid est finis intermedius?*

R. Est bonum, quod ita propter se expetitur, ut nihilominus ad aliud ulterius consequendum ordinetur.

Ergo finis intermedius est finis simul & medium: finis quidem, quia propter se expetitur:
me-

medium autem , quia agens non vult in eo ultimè quiescere , sed per illud aliquid ulterius assequi intendit. Unde finis intermedius dicitur medium non purum ; purum enim medium , ut medicina , nullatenus amatur propter se , sed ex necessitate assumitur , ut id sine quo obtineri non posset quod amatur , expetitur , v. gr. sanitas.

Q. 5. *Quid requiritur ut res aliqua honeste constitui possit tamquam finis intermedius ?*

R. Debet esse bonum perfectivum & utile ad aliud majus assequendum : quia finis est propter se appetibilis. Atqui ex dictis solum bonum perfectivum est propter se appetibile : Ergo. Confirmatur responsio. Triplex est boni genus , nempe honestum & naturæ rationalis perfectivum , jucundum seu delectabile , & utile. Atqui nec bonum jucundum , seu delectabile , nec bonum utile rationabiliter possunt esse finis : Ergo.

Non bonum jucundum ; quia ex dictis delectatio est fructus operationis non impeditæ : Ergo si operatio sit inhonesta & naturæ rationali nociva , delectatio quoque erit turpis : si verò operatio sit honesta & naturæ rationali conveniens , delectatio consequitur etiam honesta ; ac proinde non ipsa delectatio , sed operatio honesta , seu naturam rationalem perficiens intendi debet.

Neque etiam bonum utile potest habere rationem finis ; cum etiam naturaliter ordinetur , ut medium necessarium & per se minime perfectivum ad bonum nostrum obtinendum , peccatum est illum tamquam in fine velle requiescere , *non est alia vita hominis vitiosa atque culpabilis , quam malè utens & malè fruens* , inquit sanctus Augustinus lib.

1. de Doctrina Christiana cap. 4. *frui autem est amore inhæ-*

inhærere alicui rei propter seipsum : uti autem , quod in usum venerit , ad id quod amat obtinendum referre , si tamen amandum est ; nam usus illicitus , abusus potius vel abusio nominanda est. Et c. 3. res illæ quibus fruendum est , nos beatos faciunt : illis , quibus utendum est , tendentes ad beatitudinem , adjuvamus & quasi adminiculamur , ut ad illas , quæ nos beatos faciunt , pervenire atque in his inhærere possimus.

Ergo virtus & observatio mandatorum Dei est honestus finis intermedius actuum humanorum. Finis quidem , quia perficit hominem , melioremque reddit , ac proinde propter se expetenda. *Quis dubitat , inquit S. Augustinus lib. 2. de pecc. mor. c. 18. voluntatem nullo modo justitiam diligentem , non modò esse malam , sed etiam pessimam voluntatem ?* Sed est finis intermedius , quia non ultimè perficit , nec proinde totaliter in eo quiescendum , sed ad aliquid melius , nempe ad Deum summum nostrum bonum referendus est. Unde sanctus Augustinus lib. 19. de Civ. Dei cap. 15. contra Stoicos ; qui summum bonum in virtutibus collocabant , sic scribit. *Virtutes dum propter se appetuntur , superba vitia sunt.*

Ergo bona temporalia , ut honores , fama , divitiæ , non possunt honestè habere rationem finis intermedii , sed pura sunt media , quia ex dictis nedum meliorem hominem reddunt , eum potius corrumpunt , si in iis quiescere concupiscat. Epicurus ait (referente S. Augustino) frui carne mea , sanitate mea bonum est : Stoicus , frui mente mea , virtute mea bonum est : Christianus verò , mihi adhærere Deo bonum est , & hoc totum bonum.

Q. 6. *Quid est finis ultimus ?*

R. Est

R. Est finis, ad quem omnia referuntur, quia eo obtento, possidentur omnia, quæ ad hominis perfectionem expeti possunt, ac proinde in illo appetitus plane conquiescit sine fastidio satiat, proptereaque finis ultimus dicitur hominis beatitudo.

Q. 7. *Quotuplici modo spectari potest beatitudo?*

R. Duplici, nimirum objectivè & formaliter.

Beatitudo objectiva est bonum summe perfectivum; beatitudo vero formalis est perfecta summi boni possessio.

Possessio autem illa debet esse operatio, & quidem perfectissima, ac perfectissimæ potentiæ, quia ultima hominis perfectio, sicut aliarum rerum, est operatio, cum res quælibet in tantum sit perfecta, in quantum est in actu; quæ enim sunt in potentia, censentur imperfecta, tenduntque ad operationem, propter quam natura instruitur facultatibus, facultates ornantur habitibus laudabilibus. Denique quies appetitus est gaudium & delectatio in bono possesso. Atqui delectatio ex istis exurgit ex operatione non impedita: ut autem delectatio sit plena & appetitum satians, operatio debet esse perfectissima, & potentiæ perfectissimæ, alioquin non esset ultima perfectio, nec quietaret appetitum. Porro in homine nihil est mente perfectius, in cujus obsequium naturaliter tendunt operationes inferiorum facultatum. Ergo perfectissima mentis operatio est ultimus ejus finis & beatitudo formalis.

Ergo beatitudo objectiva hominis est solus Deus; quia solus est summum hominis bonum, & summe illius perfectivum, ut supra diximus cap. 3. formalis verò beatitudo est visio Dei intuiti-

va : tum quia est perfectissima perfectissimæ facultatis operatio ; tum quia Deus est prima veritas & infinita sapientia : Atqui veritas & sapientia hoc ipso quia possidentur cognoscuntur , ut observat S. Augustinus : denique quia , qui videt Deum sicuti est , nihil aliud expetendum ipsi occurrere potest : Ergo in illa visione totaliter quiescit , ac proinde beatus est.

Dices : qui possidet sapientiam , non intelligitur beatus , nisi eam diligat : Ergo præter intuitivam Dei visionem requiritur amor , ut homo vere sit beatus.

R. 1. Ad antecedens , fieri non posse , ut quis possideat sapientiam , nec eam diligat , cum in ea possideat omne bonum , nihilque ei supersit expetendum.

R. 2. Distinguendo consequens , ut sit beatus beatitudine integrali , Concedo : beatitudine essentiali , Nego consequentiam ; amor enim , gaudium , & corporis immortalitas fluunt ex visione Dei intuitiva , tamquam proprietates ex essentia : *Tam potenti natura Deus fecit animam* , inquit S. August. Epist. 118. alias 56. c. 3. *ut ex ejus plenissima beatitudine , quæ in fine temporum sanctis promittitur , redundet etiam in inferiorem naturam , quod est corpus , non beatitudo quæ fruientis & intelligentis est propria , sed plenitudo sanitatis , id est , incorruptionis vigor.*

Q. 9. Teneturne homo dirigere omnia opera sua ad Deum tamquam ad ultimam finem sibi determinatum , & objectum suæ beatitudinis ?

R. Tenetur saltem intentione virtuali. Matth. 6. *Quærite ergo primum regnum Dei , & justitiam ejus ; & hæc omnia adjicientur vobis.* Quæ verba expendens S. Augustinus lib. 2. de serm. Domini in monte cap.

cap. 25. sic habet, *non dicit, deinde ista quærite quamvis necessaria . . . Ne cum ista quæeratis, illinc avertamini, aut ne duos fines constituatis, ut & regnum Dei propter se appetatis, & ista necessaria . . . Ergo simplici corde tantummodo propter regnum Dei debemus bonum operari ad omnes. Et Coloss 3. Omne quodcumque facitis in verbo aut opere, omnia in nomine Domini Jesu Christi. In quem locum S. Thomas lectione 3. sic scribit. Quidam dicunt quod hoc est consilium; sed hoc non est verum. Sed dicendum est quod non est necessarium quod omnia referantur in Deum actu, sed habitu.*

Dixi, *saltem intentione virtuali*; quia homo quamdiu mortalem hanc vitam vivit, non potest semper actu de Deo cogitare; sed satis est ut virtute intentionis actualis, quæ præcessit, opus per eam cœptum prosequatur.

CAPUT VI.

.De effectibus finis.

Quam maxime interest nosse qui sint effectus finis, quisve inter eos ordo; inde enim pendet tota morum disciplina. Itaque

Q. 1. *Quot sunt finis effectus?*

R. Octo numerantur. Primus est volitio, seu amor & complacentia. Secundus intentio, hoc est, desiderium efficax. Tertius consilium. Quartus consensus. Quintus electio. Sextus imperium. Septimus usus. Octavus fructio, seu quies in bono possesso.

Q. 2. *Quis est ordo illorum actuum?*

R. Ex bonitate objecti proposita voluntati,

primo loco exurgit amor, & complacentia, *prima immutatio appetitus ab appetibili vocatur amor*, inquit S. Thomas 1. 2. q. 26. art. 2. *qui nihil est aliud, quam complacentia appetibilis*. Hic actus cæteris necessario præsupponitur; nisi enim placeret bonum apprehensum, v.g. castitas, victoria, &c. nullus foret conatus ad illud consequendum.

Intentio proximè sequitur amorem seu complacentiam; naturale enim est velle possidere quod placet & amatur. Intentio autem est efficax desiderium finis, seu actus voluntatis efficaciter tendentis in bonum per media consentanea. Ergo intentio continet saltem virtualiter propositum inquirendi & adhibendi media; non enim censetur quis velle sincere & efficaciter finem consequi, v.g. vincere cupiditates, nisi cogitet de mediis, sine quibus finis non potest obtineri. Quare.

Consilium tertius finis effectus, sequitur intentionem, estque actus mentis inquirentis & ponderantis media, & de inventis, si plura sint, judicantis quodnam sit aptius, cæterisque præferendum. Porro sicut recta intentione, ita consilio veraci tota nititur morum disciplina & bonitas; quia deficiente regula, nimirum prudenti consilio, opus quod ad ipsam dirigitur, vitiosum reddi necesse est. Hinc monet sapiens gravissimis hisce verbis Eccli. 37. *Ante omnia opera tua verbum verax præcedat te, & ante omnem actum consilium stabile*.

Verum consilium illud verax & stabile non est expectandum ab eo, qui pura non ducitur intentione, nec dominatur privatis suis affectibus; voluntas enim inordinata pervertit rationis iudicium

cium & cogit mentem ad nutum suum cogitare, & consulere; cogitare quippe à cogendo dictum vult Sanctus Augustinus lib. 10. Conf. cap. 11. Sicut igitur in pendendis ponderibus æquantur lances, ne, si examinis sit aliqua inclinatio, iudicium iniquum feratur; ita qui deliberat (nisi seipsum decipere velit) omnem privatum affectum seponere debet.

Quæ cum ita sint, unicuique perspicuum est consilium seu deliberationem in iis, quæ spectant mores, esse periculi plenam, ac veluti scopulum, quem humana ratio non declinabit, nisi regatur Spiritu Christi, qui idcirco dicitur Consiliarius, magni consilii Angelus. Quin ipsemet Plato consultationem rem esse planè divinam agnovit.

Quartus finis effectus est consensus, qui describi potest, actus voluntatis adhærentis consilio rationis, & acceptantis media ab intellectu proposita; si intellectus consulat ex imperio voluntatis, naturaliter placebit ejus consilium, & facile consentiet voluntas. Sed si consilium sit aliunde datum, puta à sapiente, voluntas sæpè repugnat, & multa contra opponit, sicque consilium datur incassum, nisi duritia voluntatis tollatur, Deo interius eam præparante, & per gratiam suam eam inclinante.

Electio, quæ est quintus finis effectus, immediata sequitur consensum, describiturque actus liber voluntatis, quo ex pluribus mediis unum cæteris præfert in ordine ad finem intentum.

Ut autem electio sit recta & honesta, debet prudenter fieri; quod enim fit imprudenter, malum est. Contra prudentiam autem peccat, qui medium ad finem minùs idoneum eligit, convin-

citurque non eligere ex virtute, quæ est habitus electivus secundum rectam rationem, sed ex cupiditate, quæ præfuit deliberationi.

Sextus finis effectus dicitur imperium, estque actus practicus intellectus imperantis praxim mediorum, quæ post habitam deliberationem electa sunt tanquam ad finem magis idonea. Plerumque enim contingit voluntatem ea non exequi, quæ elegerat, & observanda proposuerat, propter nascentes difficultates, tum ex parte passionum, quæ rebellant, tum ex circumstantiis, quæ in deliberatione & electione non fuerant prævisæ; tum ex parte ipsiusmet voluntatis, quæ levis est & inconstans, quæque remisit ex pristino intentionis fervore, & ita evanescente causalitate seu motione finis, omnes suprâ enumerati effectus inutiles abeunt, & operans quasi in media via subsistit; nisi recta ratio opus urgeat, & prudentia stimulis conscientiæ voluntatem impellat.

Septimus finis effectus est ipsamet mediorum applicatio ad finem consequendum. Usus autem evadit abusus & peccatum; 1. Si sit superfluous, nihil ad finem conferens; 2. Si in fruitionem convertatur, hoc est, si purum medium propter se appetatur, & in illo voluntas quiescat. Unde metitò damnata est hæc propositio ab Innocentio XI. anno 1679. & à Clero Gallicano an. 1700. *Comedere & bibere usque ad satietatem ob solam voluptatem non est peccatum, modo non obsit valetudini, quia licite potest appetitus naturalis suis actibus frui.* Hæc propositio, inquit Clerus Gallicanus, temeraria est, scandalosa, perniciosa, erronea, & ad Epicuri scholam ableganda.

Octavus & ultimus finis effectus est fruitio, hoc est, quies in fine possesso. Unde usus terminatur ad fruitionem, sicut motus ad quietem, & desiderium ad possessionem.

Quies autem illa non est cessatio ab omni actu voluntatis, quemadmodum quies corporis est intermissio operis; sed est gaudium & delectatio, *frui mur rebus cognitis, in quibus voluntas delectata conquiescit*, inquit Sanctus Augustinus lib. 10. de Civit. cap. 10.

Ergo in usu est labor, in fruitione delectatio & quies: plena quidem, si possessio sit finis ultimi, utpote summi boni, ultra quod nihil ultra expetendum: inchoata autem & imperfecta, si possessio sit finis intermedii, qui appetitum omnino non explet, sed tanquam prælibatio quædam summi boni acrius incitat ad illud consequendum; namque ex Sancto Gregorio hom. 30. in Evang. *Qui mente integra Deum desiderat, profecto jam habet quem amat; neque enim quisquam posset diligere Deum, si eum, quem diligit, non haberet.* Non potest autem Deum habere, & de eo non gaudere. Gaudes de auro tuo, de cupa tua plena, inquit Sanctus Augustinus, & non gauderes Deo plenus? *Charitas sine gaudio esse non potest*: scriptum est enim Gal. 3. *fructus spiritus est gaudium, pax.*

Iusti igitur in Scripturis dicuntur beati, ut Ps. 118. *Beati immaculati in via*, non solum propter spem futuræ beatitudinis, quomodo beatum dicimus ægrum, qui sub manu periti Medici utiliter secatur & utitur ad sanitatem; sed insuper propter aliquam participationem beatitudinis, & ut loquitur Sanctus Thomas 1. 2. q. 5. art. 3. ad 1. aliqualem summi boni fruitionem, quæ tanta sua-

vitae perfundit animam, ut omnia mundi oblectamenta arbitretur detrimenta Phil. 3.

Ergo iustitia & virtus nullatenus habent rationem finis respectu eorum, qui illius bonitate non alliciuntur, nec ex amore operantur ea quæ sunt pietatis officia, sed ea obeunt ut pura media & conditiones necessarias, graves quidem & onerosas, ut ipsis videtur, sine quibus nec iram Dei, nec pœnas æternas vitarent. *Quis autem dubitat, aiebat supra Sanctus Augustinus, voluntatem nullo modo iustitiam diligentem, non modo esse malam, sed etiam pessimam?*

CAPUT VII.

De circumstantiis actuum humanorum.

Q. 1. *Quid sunt circumstantiæ?*

R. Sunt quædam conditiones morales seu accidentia, quæ humanos actus comitantur, ut tempus quo, & locus ubi exercentur.

Q. 2. *Quare bonitas & malitia actuum humanorum desumuntur ex circumstantiis?*

R. Quia sicut dantur objecta conformia, aut difformia naturæ rationali, ita & circumstantiæ; si enim decet, v. g. vestire nudum, quod est objectum misericordiæ; multo magis, si nudus ille est Sacerdos, si inimicus, si actus ille fit aliis exemplo. Item si turpe est spoliare proximum, turpius, si pauper sit, si beneficus.

Confirmatur. Bonitas operis naturæ, v. g. equi non consistit in sola equi essentia, sed ex variis accidentibus exurgit, puta ex recta membrorum habitudine, robore, &c. Item perfectio artefa-

artefacti, præter formam, quæ est forma artificialis, complectitur varium ornatum, concinnam partium dispositionem. Ergo similiter bonitas moralis actuum humanorum non à solo objecto, à quo formam & speciem accipiunt, ut diximus, sed etiam ab adjunctarum circumstantiarum concursu petenda est.

Q. 3. *Quot sunt circumstantiæ actuum humanorum?*

R. Septem vulgo numerantur, sequenti versu expressæ.

Quis, quid, ubi, quibus auxiliis, cur, quomodo, quando.

Quis, significat conditionem operantis; si iustus aut peccator, v. g. eleemosynam tribuat, si conjugatus, aut voto obstrictus fornicetur,

Quid, denotat conditionem objecti, an magna, aut levis plaga sit inflicta? an res furto sublata sit sacra? aut profana? an contra totam familiam odium exarserit, vel contra privatam personam?

Ubi, locum designat, an peccatum commissum sit in loco sacro, vel in publico & cum aliorum scandalo?

Quibus auxiliis, v. g. quibus instrumentis usus sit homicida; inde enim colligitur num homicidium fuerit casuale aut voluntarium? an consulens proximi commodo, mendacium adhibuerit? ex hac quippe circumstantia actus efficitur malus.

Cur, exprimit finem extrinsecum, qui est accidentalis actui, diciturque finis operantis, v. g. cur largitus est eleemosynam, an ut Deo satisfaceret pro peccatis, an ut famam popularem sibi conciliaret?

Quomodo, notat modum actionis, an facta sit remissè, aut intense? an ex malitia, aut ignorantia & infirmitate; an ex negligentia, aut contemptu formali?

Quando, significat tempus, utrum v. g. die Festo quis inebriatus sit, an agrum proximi mesuerit; quia in posteriori exemplo actus pugnat contra justitiam simul & religionem; in priori verò contra temperantiam & religionem.

Q. 4. *Quid observandum circa circumstantias?*

R. Expendendum an novam addant speciem bonitatis, aut malitiæ: an augeant duntaxat, aut minuant sive notabiliter, sive leviter intra eandem speciem.

Q. 5. *Quandonam circumstantiæ novam addunt speciem bonitatis, aut malitiæ; vel augent solummodo?*

R. 1. Addunt novam speciem, quando efficiunt, ut actus vel pertineat ad diversas virtutes, vel contra eas pugnet. Sic circumstantia Sacerdotis in paupere sublevando efficit, ut elemosyna pertineat ad misericordiam & ad religionem: sic malitia furti in loco sacro est contra justitiam & religionem, propter circumstantiam loci.

Hinc in genere moris plures peccati species possunt concurrere in uno & eodem actu propter multiplices ejus circumstantias, ut patet in Sacerdote, qui ad peccandum induxit suam consanguineam conjugem: Primo enim peccavit contra castitatem: Secundo contra charitatem ratione scandali, quatenus induxit aliam personam ad peccandum: Tertio contra religionem, ut quia sit persona sacra: Quarto contra justitiam erga maritum: Quinto contra reverentiam consanguineis debitam, quod peccatum dicitur incestus.

flus. Et hæc accuratè sunt observanda; cum in sacramentali Confessione ejusmodi circumstantiæ peccati speciem mutantès sint explicandæ, ut definiit Concilium Trident. sess. 14. can. 7.

Dixi, *quando pugnat contra aliam specie virtutem*, non verò contra duo præcepta eandem virtutem spectantia, ut contingeret in eo, qui jejunium quadragesimale violaret iis diebus, quibus occurrunt jejunia quatuor temporum; is enim unius specie peccatireus esset, quia duo illa jejunii præcepta eodem die occurrenceutia ad unam pertinent virtutem. Secus si solvens jejunium quadragesimale, ex alia virtute astringeretur præcepto jejunii, puta ex religione voti, vel ex injuncta à Confessario satisfactione, cum enim diversa illa præcepta spectent diversas virtutes, violatio jejunii quadragesimalis in illo casu esset duplex peccatum in confessione exprimendum.

R. 2. Circumstantiæ augent aut minuunt notabiliter bonitatem, aut malitiam actus intra eandem speciem virtutis, aut peccati, quando longè major, vel minor est honestas, sive turpitudoin cultu, aut violatione ejusdem virtutis. Sic longe laudabilior est qui pauperem sublevat ex necessariis, quam qui ex superfluis: qui cum fervore perseverat in bono opere arduo & difficili, quam qui remisse & leviter illud attingit. Contra vero gravius peccat contra justitiam; v.g. qui furatur ingentem pecuniæ summam, quam qui modicam: qui cum Sacerdos sit, peccat contra castitatem & religionem, quam si esset solum Diaconus, aut Subdiaconus. Utrum autem circumstantiæ, quæ malitiam notabiliter augent intra eandem peccati speciem, sint in confessione exponen-

ponendæ, expendetur ubi de Sacramento Pœnitentiæ.

Q. 6. *Quid requiritur ut actus humanus bonitatem aut malitiam trahat ex circumstantiis?*

R. Ut conferant actui bonitatem, necesse est ut sint prævisæ & aliquo modo intentæ, quatenus honestæ sunt, quia ex dictis nulla est bonitas moralis, nisi sit voluntaria. Ut autem conferant, satis est, ut cum vitari possint & debeant, nihilominus voluntas illas vitare negligat, malum enim est nolle declinare à malo.

CAPUT VIII.

De merito bonorum operum.

Q. 1. *Bona fidelium opera suntne meritoria?*

Lutheranis & Calvinianis nomen meriti adeò exosum est, ut Calvinus lib. 3. Instit. cap. 15. paragr. 2 & seqq. audeat scribere veteres Patres pessimè consuluisse fidei sinceritati, dum usi sunt vocabulis meriti & mercedis, sed vel ipsum Spiritum Sanctum reprehendat qui in Scripturis sacris ejusmodi vocabula usurpat, ut Matth. 5. vers. 10. *Merces vestra copiosa est in Cœlis.* 2. Tim. vers. 8. *In reliquo reposita est mihi corona justitiæ, quam reddet mihi Dominus in illa die justus Juxta : non solum autem mihi, sed & iis qui diligunt adventum ejus : vel, quod æquius est, fateatur se pessimè consuluisse suæ sectæ, dum apertè pugnat adversus Scripturam sacram & universalis Ecclesiæ traditionem. Quare ad propositam quæstionem*

R. De fide est bona opera justorum ex gratia elicita esse meritoria; sic enim definiit Concilium

Trid.

Trid. sess. 6. can. 32. Constatque definitio ex scripturæ testimoniis mox laudatis.

Dices 1. Roman. 6. habetur. *Gratia Dei vita æterna*. Psalm. 102. *Qui coronat in misericordia, & miserationibus*. Unde sanctus Augustinus in Ps. 70. *Cum, inquit, præmium venerit, sua dona coronabit*: Ergo vita æterna non est merces.

Distinguo antec. Vita æterna est gratia, & misratio, quia Deus gratuite ad eam eligit, vocat, & auxiliis efficacibus perducit, Concedo: est gratia duntaxat, nullamque habet rationem mercedis aut præmii, quasi eo digna non sint bona iustorum opera, Nego antecedens. Nam ex Sancto Augustino lib. de cor. & grat. cap. 15. *Vita æterna, quam certum est bonis operibus debitam reddi, à tanto Apostolo gratia Dei dicitur, cum gratia non operibus reddatur, sed gratis detur; sine ulla dubitatione confitendum est ideo gratiam vitam æternam vocari, quia his meritis redditur, quæ gratia contulit homini*. Sic dives, qui tempore hyemis pauperes aluit; injunctis operibus ipsi satis inutilibus, gratiam fecit & simul mercedem retribuit: gratiam quidem, quia gratis illos conduxit; mercedem vero, quia promissa alimenta ipsis exhibuit.

Instas: Lucæ 17. ait Christus. *Cum feceritis omnia . . . Dicite, servi inutiles sumus*: Ergo.

Nego conseq. Ideo enim servos inutiles nos existimare debemus: 1. Quia nihil utilitatis per bona nostra opera Deo conferimus: 2. Quia cum natura servi Dei simus, potest quidquid libuerit præcipere, etiam nulla proposita mercedis spe, *debitor factus est Deus*, inquit sanctus Augustinus ser. 158, alias 16. de verbis Apostoli, *non à nobis aliquid accipiendo, sed aliquid, quod ei placuit, pro-*

promittendo. *Aliter enim dicimus homini, debes mihi, quia promisisti mihi: & aliter dicimus, debes mihi, quia dedi tibi. Possumus exigere Dominum nostrum, ut dicamus, redde quod promisisti; quia fecimus quod iussisti.*

Dices 2. Rom. 8. *Non sunt condignæ passionēs huius temporis ad futuram gloriam, quæ revelabitur in nobis: Ergo.*

Distinguo antec. non sunt condignæ, si secundum entitatem & veluti materialiter spectentur, Concedo: si secundum virtutem & influxum Christi capitis nostri, unde procedunt, Nego antecedens.

Dices 3. Non potest sine Christi injuria aliquid tribui meritis nostris; quia videremur partiri gloriam inter ipsum & nos, dum salutem nostram, partim ad ejus merita, partim ad nostra, referremus: Ergo.

Nego antecedens. *Cum ille ipse Christus Jesus (verba sunt Concilii Tridentini sess. 6. cap. 16.) tanquam caput in membra, & tanquam vitis in palmites, in ipso justificatos jugiter virtutem influat; quæ virtus bona eorum opera semper antecedit, & comitatur, & subsequitur, & sine qua nullo pacto Deo grata & meritoria esse possent. Enim vero sicut in ordine naturæ elucet Dei omnipotentia & infinita virtus, per quam causis secundis tribuit vim & efficaciam producendi effectus, ad quos illa instituit: ita in ordine gratiæ Christus meritum & virtutem suæ passionis in eo maxime commendat, quod non solum in se, sed & in nobis sit merendi principium.*

Q. 2. *Quotuplex est meritum?*

R. Duplex, aliud de congruo, aliud de condigno. Primum est meritum secundum quid, & in

in latiori significatione. Secundum ita dicitur simpliciter & proprie.

Ad meritum de congruo evocantur dispositiones, quas diximus in adultis requiri ad justificationem; de iis enim sic scribit Sanctus Augustinus Epist. 194. alias 105. nec ipsa peccati remissio sine aliquo merito est; *neque enim nullum meritum fuit illius qui dicebat, propitius esto mihi peccatori.* Sed nemo absolute & simpliciter dixerit peccatorem, pœnitentia sua mereri remissionem peccatorum, quæ est opus misericordiæ, non verò justitiæ.

C A P U T IX.

De merito de condigno.

Q. I. *Quid est meritum de condigno?*

R. Est opus bonum, & supernaturale ab homine justo & viatore libere elicited, pro quo Deus mercedem promisit.

Dicitur 1. *opus bonum*; cuique enim notum est opus non esse laudabile, nec præmio dignum, nisi fuerit bonum, *stipendia peccati mors*, inquit Apostolus Rom. 6.

Huc igitur revocare necesse est, quæ de bonitate actuum humanorum præmisimus; cum ex iis omne pendeat meritum; neque enim satis est operari bonum, nisi & bene. An non artifex qui injectum opus elaboravit, laudabilem materiam adhibuit, puta pretiosum pannum, sed male & præter artis regulas concinnavit, pœnam meretur, nedum mercedem? Sic se habent apud Deum, qui operibus ex objecto & officio bonis

va-

vacant, publicam rem administrant, familiam regunt, agrum colunt, & quæ sunt honesti sui status ac conditionis strenue exequuntur, sed alio quam ad Deum & vitam æternam referunt, puta ad lucrum, auram popularem & favorem humanum. Unde Sanct. Augustinus concione 12. in Ps. 118. expendens hæc verba, *Averte oculos meos, ne videant vanitatem; in via tua vivifica me*, sic habet, *In qua vanitate præcipuum locum obtinet amor laudis humanæ, propter quam multa magna fecerunt, qui magni in hoc sæculo nominati sunt ad quam pervenientes perceperunt mercedem suam, vani vanam. Ab hac vanitate volens Dominus avertere oculos suorum, attendite, inquit, ne justitiam vestram faciatis coram hominibus, ut videamini ab eis, alioquin non habebitis mercedem apud Patrem vestrum . . . monuit, ne etiam propter pecuniam dicant, non potestis Deo servire & mammonæ. Monuitne propter ipsum necessarium victum, atque vestitum, dicens, ne solliciti sitis animæ vestræ, quid manducetis, neque corpori vestro, quid induamini; si enim vanum est propter hominum laudes bona facere, quanto vanius propter adipiscendam pecuniam, vel augendam, sive retinendam, & si quid ejusmodi est commodi temporalis, quod nobis accidit extrinsecus, quia omnia est vanitas &c.*

Enimvero ex communi omnium sensu nemo mercedem ab eo expectaverit, in cujus gloriam & obsequium non fuerit operatus: longe enim absurdissimum foret, si quis à te remunerari expeteret, ex eo quod sibi laborasset, suam vineam v. g. in proprium commodum diligenter excoluisset: Atqui ejusmodi sunt, qui suis commodis serviunt in operibus ex objecto honestis, & vitam æternam expectant à Deo, cujus gloriam & obsequium non intenderunt.

Oremus

Oremus igitur, & multum oremus, cum opus aliquod meditatur, ut, quod propriis viribus non possumus, avertat Deus oculos nostros, ne videant ejusmodi vanitates, vigilemusque ejus auxilio nixi, ne quod in nobis remanet cupiditatis in decursu operis sensim germinet, inficiatque quod ad ejus gloriam puro corde susceperamus; cupiditas enim est illa arbor, seu radix mala, quæ non potest bonos & condignos fructus facere.

Quæ cum ita sint, lugendi profecto, & quàm sæpissimè à Pastoribus commonendi innumeri homines, quibus pereunt opera, alioquin ex officio bona, & condigna vitæ æternæ pretia, si ad illam, ut par est, referrentur. Namque ad comparandum regnum Cælorum necessarias impensas faciunt agricolæ: nec plura exiguntur, quàm impenduntur ab artificibus & aliis, qui utiliter pro Republica laborant, ac divinæ providentiæ diu noctuque desudantes serviunt, finem tantummodo mutant non contemplantes quæ videntur, sed quæ non videntur, ut loquitur Apostolus, & æternum gloriæ pondus in præmium certo consequentur. Verum quia ad ejusmodi opera sola incitat cupiditas, sola vires, & animos subministrat, meritis exeunt vacui, tandemque ad lucem veritatis evigilantes, exclamare coguntur cum illo, qui dicebat, *Præceptor, per totam noctem laborantes, nihil cepimus*, Luc. 5.

Dicitur 2. *Supernaturale*; est enim fidei dogma in variis Conciliis definitum adversus Pelagianos, & Semipelagianos, & confirmatum in Concilio Tridentino sess. 6. can. 1. 2. 3. hominem viribus liberi arbitrii mereri non posse justitiam & vitam

æternam , omnem palmitem in me non ferentem fructum , (inquit Christus Joh. 15.) tollet eum , (Pater.) Sicut palmes non potest ferre fructum à semetipso , nisi manserit in vite , sic nec vos , nisi in me manseritis. Et ratio est , quia opus naturale , quantumcumque ex officio laudabile , nullum habet ordinem , nullam proportionem ad vitam æternam.

Duo autem necessario concurrere debent , ut actus sit supernaturalis , scilicet supernaturale principium & motivum seu finis supernaturalis.

Principium quidem , quia causa naturalis non nisi naturaliter operatur. Ut ergo voluntas , quam diximus esse principium actuum humanorum , supernaturaliter agat , Christo tanquam capiti jungatur , unumque cum ejus spiritu principium efficiatur , necesse est , juxta illud Joan. 15 *Qui manet in me & ego in eo , hic fert fructum multum.* Attrahitur autem vivificus ille Spiritus per orationem , ut habetur Psalm. 118. *os meum aperui , & attraxi Spiritum.* Ergo qui propria nituntur industria & neglecto orationis studio , toto naturæ impetu feruntur ad opera exteriora : puta lectionem , agriculturam , &c. non videntur operari supernaturaliter , nec proinde apud Deum mereri ; quia principium ex quo procedunt ejusmodi opera , est mere naturale.

Motivum quoque seu finis supernaturaliter movens concurrere debet ad actum supernaturalem , quia omnis actus speciem & essentiam desumit ab objecto motivo ; ac proinde actus erit naturalis , si motivum sit naturale , qualis est civilis honestas , familia alenda , scientia acquirenda , lucrum faciendum , captanda hominis benevolentia. Non movet autem bonitas finis , nisi per

per sui amorem. Amor vero non potest esse sine cognitione : Ergo ut motivum supernaturale moveat voluntatem , necessarium est , ut agens vel actu vel virtualiter attendat ad finem , & ejus amore operetur.

Dicitur 3. *Ab homine justo* ; ait enim Christus Joan. 15. *sicut palmes non potest ferre fructum à semetipso , nisi manserit in vite ; sic nec vos , nisi in me manseritis* : Atqui Christus non manet in nobis ; nisi per charitatem & gratiam sanctificantem , juxta illud 1. Joan. 4. *Qui manet in charitate , in Deo manet , & Deus in eo*. Enimverò peccatum lethale 1. animam separat à Deo. *Iniquitates vestrae dividerunt inter vos & Deum vestrum*. Isa. 59. 2. Odium Dei concitat juxta illud Sapientiae 14. *Odium sunt Deo impius & impietas ejus*. 3. peccatorem constituit obnoxium pænæ æternæ : Atqui repugnat eundem mereri damnationem simul , & vitam æternam.

Ad meritum igitur de condigno in primis requiritur personæ dignitas. *Respexit Dominus ad Abel , & ad munera ejus : ad Cain autem (peccatorem) & ad munera illius non respexit*. Gen. 4. in Societate humana accepta sunt amici munuscula , inimici vero ingrata & despecta. Denique actiones Christi Domini , licet secundum entitatem spectatæ essent finitæ , & ejusdem speciei cum bonis justorum operibus , infinitum tamen valorem & meritum hauriebant ab ejus persona , utpote infinite digna : Ergo meritum de condigno præcipue repetitur ex dignitate & sanctitate personæ. Unde summi Pontifices Pius V. & Gregorius XIII. merito damnarunt XIII. Baji propositionem , qua assererat bonum opus citra gratiam

adoptionis factum esse Regni cœlestis meritum. Quot igitur incentiva & stimuli, ut conscii peccati lethalis per pœnitentiam in gratiam Dei quam citissime redeant, & bonæ arbores effecti fructus ferant dignos vitæ æternæ!

Dicitur 4. *ab homine viatore*; quia ex sancto Hieronymo in cap. 9. Eccles. *viventes possunt bonæ opera perpetrare: mortui vero nihil valent adjicere ad id, quod secum tulere de vita*, ut habetur Joan. 9. *venit nox, quando nemo potest operari*.

Dicitur 5. *libere elicitum*; ad merendum enim & demerendum requiritur libertas à necessitate, ut definierunt summi Pontifices Innocentius X. & Alexand. VIII. adversus Jansenium.

Dicitur 6. *pro quo Deus mercedem promisit*: tum quia etiam in civilibus merces non debetur operario, nisi pro ea conductus fuerit: tum quia Deus pro suo absoluto dominio in creaturas jus habet exigendi omnia bona opera, nulla mercede proposita; tum denique, quia bona nostra opera non in Dei, sed in nostram utilitatem cedunt. Unde sanctus Augustinus ser. 169. alias 15. de verbis Apostoli, perpendens bonitatem, qua Deus nobis bene operantibus mercedem promittit, ait, *nihil addi ad istam benevolentiam potest. Quis est, qui dicat, sanem te, & do tibi mercedem?*

Ergo ad meritum de condigno sex requiruntur conditiones 1. Opus debet esse bonum & honestum. 2. Supernaturale. 3. Hominis justi. 4. Libere agentis. 5. In terris adhuc peregrinantis. 6. Adjunctam habere debet Dei promissionem. Sed tres primæ dumtaxat in Catechesibus sunt exponendæ, quia præterquam quod non nimis oneranda est auditorum memoria, si tres illæ adfuerint

rint conditiones, concurrent cæteræ; etiamsi auditores de illis non cogitent.

Q. 2. *Bona opera de condigno meritoria suntne ad salutem necessaria?*

Certum est parvulis non esse necessaria; ipsis enim per Baptismum regeneratis in adoptionem filiorum vita æterna debetur solo titulo hæreditatis, *si autem filii, & hæredes: hæredes quidem Dei, cohæredes autem Christi*; inquit Apostolus Rom. 8. Quæstio igitur solum esse potest de adultis. Unde

R. Bona opera de condigno meritoria adultis sunt omnino necessaria. *Carere meritis*, inquit S. Bernardus serm. 68. in cant. *satis ad iudicium est, perniciofa paupertas, penuria meritorum.* Et ratio est, quia ex Concilio Tridentino sess. 6. cap. 16. Vita æterna adultis proponitur sub triplici titulo, scilicet hæreditatis, mercedis, & coronæ gloriæ. Hæreditas autem necessario supponit gratiam adoptionis, merces bona opera, corona gloriæ victoriam. De Adoptionis gratia habetur Rom. 8. *Quos justificavit, illos (& non alios) glorificavit. De bonis operibus*, Luc. 19. *Negotiamini, dum venio.* Matth. 25. v. 30. *Inutilem servum ejicite in tenebras exteriores; & v. 34. possidete regnum.... esurivi enim & dedistis mihi manducare.* Et Matth. 7. *Omnis arbor, quæ non facit fructum bonum, excidetur & in ignem mittetur.* Fructum bonum ait utique de condigno meritorium; pro altero enim gloria cœlestis non rependitur. De corona gloriæ 2. Tim. 2. *Non coronatur, nisi qui legitime certaverit*, scilicet adversus concupiscentiam carnis & oculorum ac superbiam vitæ, propter quæ militia est vita hominis super terram, nec potest bonis

operibus insistere, quin simul cum animo suo depugnet, & exemplo Israelitarum (qui Nehemiæ 4. v. 17. cum instaurarent muros Jerusalem, una manu faciebant opus, & altera tenebant gladium) in omnibus sumat scutum fidei, ut monet Apostolus Ephes. 6. in quo possit omnia tela nequissimi ignea extinguere.

Singulorum ergo plurimi interest nosse, & Pastorum docere, qui sint characteres meriti condigni: & præveniendò futurum Dei examen perpendere, num operibus quæ bona apparent, desit aliqua ex conditionibus ad verum meritum requisitis, *ne sub auri specie æs lateat, aut hoc quod veraciter aurum est, monetæ reprobæ figura delibonestet*, inquit Sanct. Gregorius lib. 33. cap. 26. Verùm quomodo Parochiani ista recognoscent aut excutient, cum à Parochis non didicerent necessarias veri meriti conditiones, quemadmodum multoties experti sumus, dum lustrarentur eorum Paræciæ? Quid prodest plebem nosse Deum, unum in essentia, trinum in personis, & in fine sæculorum incarnatum, si ignoret quid observandum, ut operibus suis illum promereatur? an non Magister tota mente incumbit, ut ipsius tyrones ante omnia ediscant regulas artis quam profitentur, ac demum eas scite ac polite applicent? Atqui Parochus subditos existimet tanquam tyrones, quos ipse habens formam scientiæ, ut loquitur Apostolus, hoc est, regulam credendorum & agendorum, instituendos suscepit in disciplina Christiana: Ergo imprimis ipsi incumbit auribus & animis Parochianorum inculcare elementa & regulas actionis vere christianæ & Deo dignæ, alioquin in vacuum gratiam acci-

acciperent, si fructum, ad quem datur, id est, meritum condignum vitæ æternæ ex ea non colligerent; *cui autem non datur semper vivere, quid prodest bene vivere?* August. tractat. 45. in Joan.

Q. 3. *Ad meritum de condigno requiritur ne an opus supernaturale nulla lege sit præceptum, sitque, ut ajunt, supererogationis?*

R. Minimè, quin affirmans quorumdam sententia a Theologis communiter damnatur ut temeraria, & erronea; quia servantibus mandata vita æterna in mercedem promittitur Luc. 6. *Diligite inimicos vestros: & erit merces vestra multa.* Matth. 25. Datur regnum Dei propter opera misericordiæ, & quidem præcepta; qui enim ea omiserunt, puniuntur tanquam legis transgressores, mittuntur in gehennam ignis.

Q. 4. *Actus supernaturalis cujuslibet virtutis estne in homine justo meritorius de condigno?*

R. Non conveniunt Theologi: affirmant non pauci, negant vero alii etiam magno numero, inter quos appellare licet S. Thomam, qui prima secundæ quæst. 114. art. 4. sic habet. *Meritum vitæ æternæ primo pertinet ad charitatem; ad alias autem virtutes secundario, secundum quod earum actus à charitate imperantur.* Et in responsione ad tertium docet actus fidei, patientiæ, & fortitudinis in Martyribus non esse meritorios de condigno, nisi virtutes illæ per dilectionem operentur; quia Deus non promisit coronam gloriæ nisi diligentibus se, Joan. 14. v. 21. 1. Cor. 2. v. 9. Jac. 1. v. 12. Nec major gloria retribuetur ei, qui pro Christo plus laboraverit, sed quia eum plus dilexerit,

lexerit, ut patet in beata Virgine, quæ tot labores non sustinuit quot Apostoli; sed quia plus dilexit, sublimiorem gloriæ gradum consecuta est. Huic posteriori sententiæ in praxi est adherendum, cum sola sit segura in re tanti momenti.

Q. 5. *Quænam cadunt sub meritum de condigno?*

R. Vita æterna & augmentum gratiæ sanctificantis. Ita definiit Concilium Tridentinum sess. 6. can. 32. *Si quis dixerit ipsum justificatum bonis operibus, quæ ab eo per Dei gratiam & Jesu Christi meritum, cujus vivum membrum est, fiunt, non vere mereri augmentum gratiæ, vitam æternam, & ipsius vitæ æternæ (si tamen in gratia decesserit) consecutionem, atque etiam gloriæ augmentum; anathema sit.*

CAPUT X.

De merito de congruo.

Q. 1. *Quot conditiones requiruntur ad meritum de congruo?*

R. Quatuor. 1. Opus debet esse bonum. 2. Supernaturale. 3. Libere elicited. 4. Ab homine viatore. Probatur iisdem plane momentis, quibus supra demonstravimus ejusmodi conditiones requiri ad meritum de condigno; pro utroque enim merito æque sunt efficacia, ut legenti patebit.

Quod autem ad meritum de congruo non requiratur status gratiæ sanctificantis, nec Dei promissio, sicut ad meritum de condigno, constat ex dictis; namque 1. Dispositiones ad justificationem in peccatore pœnitente habent rationem meriti

riti de congruo. 2. Donum perseverantiæ & auxilia efficacia, quamvis nulla de iis extet Dei promissio, & continuo sit pro iis orandum, suppliciter tamen emereri possumus.

Q. 2. *Donum sequiturne infallibiliter meritum de congruo?*

R. Sequitur, si meritum habeat rationem ultimæ dispositionis: secus, si se habeat ut remota dispositio, quia motio Spiritus Sancti semper consequitur finem, nisi creatura ponat obicem: Atqui nullus est obex ex parte creaturæ, quæ mota à Spiritu Sancto, extremam manum operi imponit: secus, si retrahat. Hinc bona, quæ iustus aliis meretur de congruo, iis non semper obveniunt, quia plerumque ponunt obicem.

Q. 3. *Quænam cadunt sub meritum de congruo?*

R. Cadunt 1. Gratia efficaces, & donum perseverantiæ. 2. Bona temporalia, quatenus à Deo ordinata sunt ad nostram vel proximi salutem; quia ut sic, pertinent ad gratias exteriores, quas Christus nobis promeruit, & possunt esse effectus prædestinationis, ut alibi diximus, sed monendum iterum nec opus, nec orationem fore meritoria de congruo, nisi procedant ex motione Spiritus Sancti. Quodsi ex cupiditate proficiscantur, ferè semper peccata sunt, & iram Dei provocant.

Dices; Eccles. 9. *universa æque eveniunt iusto & impio*: Ergo bona temporalia non cadunt sub meritum.

Distinguo antec. *Æque veniunt in diversum usum & finem*, Concedo: *æque eveniunt in eundem usum & finem*, Nego antecedens; *quia* (inquit Sanct. Thomas prima secundæ quæst. 114.

art. 10. ad quartum) *boni per hujusmodi manus ducuntur ad Beatitudinem, non autem mali.* Impiis mala est sive prosperitas sive adversitas: prosperitas quidem, quia si miser est qui male concupiscit, fane miserior dicendus est ex Sancto Augustino, qui habet quod male concupivit. Inde enim exardescit superbia & cupiditas, sicut ex majori lignorum copia crescit incendium. Contra vero electis prosperitas est instrumentum bonorum operum, & adversitas veluti fornax, in qua probantur & excoquantur eorum virtutes. Unde Deus nonnumquam malis concedit iratus quod justis negat propitius; *novit enim Medicus, inquit Sanct. Augustinus Tract. 73. in Joan. quid pro sua, quid contra suam salutem poscat ægrotus. Quod si fecerit, non ut salvator facit, quod est nomen ejus fidelibus ejus. Est quippe impiis & damnator.*

CAPUT IX.

De divisione actuum humanorum.

Q. 1. *Quomodo dividuntur actus humani?*

R. 1. Dividuntur generatim 1. In bonos & malos. 2. in elicitos, qui immediate à voluntate procedunt, ut amor, desiderium, odium, &c. & imperatos, qui ab aliis facultatibus immediate proficiuntur, sed ex imperio voluntatis, quæ ejusmodi facultates applicat ad opus; v. g. intellectum ad cogitandum, deliberandum, manum ad erogandam eleemosynam, ad homicidium patrandum. 3. In interiores & exteriores.

R. 2.

R. 2. Speciatim actus boni dividuntur in bonos moraliter tantum, & bonos supernaturaliter, & hi rursus in meritorios de condigno, & meritorios de congruo.

De bonitate & malitia actuum humanorum generatim spectata, ac de eorum merito satis superque diximus. Sed superest nonnulla difficultas solvenda circa bonitatem actuum imperatorum & exteriorum. Itaque


Q. 2. *Competitne specialiter bonitas aut malitia moralibus actibus imperatis, & exterioribus?*

R. 1. Actus imperatus sive interior, ut cogitatio; sive exterior, ut erogatio eleemosynæ; oratio vocalis, nec bonus nec malus est moraliter, nisi extrinsece & denominatione petita ab interiori actu voluntatis. Ita Sanctus Thomas prima secundæ q. 20. c. 4. ad secundum. *Bonitas actus exterioris, inquit, non est alia à bonitate voluntatis, quam habet ex ipso actu voluto.* Et ratio est, quia actus imperatus sive interior sive exterior, eatenus est bonus moraliter, quatenus est voluntarius, liber & tendens ad honestatem, ut supra dictum est: Atqui per se formaliter nec est voluntarius, nec liber, nec tendens ad honestatem, nisi quatenus imperatur & dirigitur ab interno voluntatis actu libero, à quo denominatur voluntarius, liber & moralis: Ergo extrinsece tantum & denominative est bonus.

R. 2. Actus exterior indirecte & occasionaliter auget bonitatem actus interioris; quatenus difficultas, diuturnitas laboris, defatigatio, & alia, quæ solent comitari opera externa, occasiones sunt voluntati exerendi vires, majorem conatum adhibendi, actus internos multiplicandi,

di, quandiu perficiatur opus externum, quandiu v. g. Martyris corpus per varia tormenta dilaniatur; Ergo simpliciter & absolute melius est esse martyrem in re, quam in voto; longam & difficilem peregrinationem conficere Religionis causa, quam proponere tantum & vovere.

Ergo in confessione Sacramentali actus exterior est exprimendus, meritoque Alexander VII. proscripsit hanc propositionem. *Qui habuit copulam cum soluta, satisfacit confessionis præcepto dicens, commisi grave peccatum cum soluta, non exprimendo copulam.*



Tracta-



Tractatus DE VITIIS ET PECCATIS.

CAPUT PRIMUM.

De Notione vitii , & peccati.

Q. 1. *Quotuplici modo vitium seu peccatum sumitur?*

R. Duplici. 1. late pro quolibet defectu , siye naturæ , siye artis. 2. Strictè pro morali rationis defectu. Priores defectus dicuntur vitia & peccata naturæ , aut arte facti : posteriores simpliciter vocantur vitia & peccata. Et ratio est , quia cum natura , aut artifex deficit , peccat solum contra finem singularem , nec defectus utriusque , licet vitiosus , repugnat legi æternæ , reduciq; potest ad Deum ultimum re-
rum

rum omnium finem : contra vero defectus moralis adversatur legi æternæ , nec potest ad Deum referri.

Ergo peccatum seu vitium stricte sumptum , de quo solum hîc agimus , est deordinatio voluntaria naturæ rationalis in iis , quæ spectant mores.

Q. 2. *Vitium , & peccatum suntne unum , & idem?*

R. Aliquando promiscue accipiuntur : proprie tamen differunt.

Q. 3. *In quo differunt?*

R. Differunt sicut actus & habitus. Peccatum quippe est actus moraliter malus ; vitium verò est habitus , seu dispositio per se inclinans ad actum moraliter malum.

Ergo peccatum est quid pejus vitio , quia male agere pejus est , quam dispositum esse ad male agendum. Primum punitur , non secundum.

Q. 4. *Quomodo definitur peccatum?*

R. Definitur à S. Augustino lib. 22. contra Faustum , cap. 27. Dictum , vel factum , vel concupitum contra legem æternam. Hæc definitio probatur à Sanct. Thoma prima secundæ qu. 71. art. 6. & obtinuit in Scholis. Enimvero completitur omnes peccati species.

Ac primo quidem peccatum originale , quod dici potest factum voluntarium , ut observat S. Augustinus lib. 1. retract. cap. 11. ubi sic habet. *Illud quod in parvulis dicitur originale peccatum , cum adhuc non utantur arbitrio voluntatis , non absurde etiam vocatur voluntarium : voluntate scilicet primi parentis , quæ non solum erat voluntas privatæ personæ , sed etiam communis omnium hominum*

tan-

tanquam membrorum, quorum Adamus constitutus erat caput.

Secundo peccata omissionis, quia ex communi hominum usu in istis vocibus, *factum, dictum, concupitum*, intelliguntur negationes oppositæ; dicimus enim eum malè facere, qui omittit officium, qui non respondet interroganti, cum debeat, nec amat quæ ipsum decent. Ita Sanctus Thomas quæst. 76. art. 2. ad primum.

Tertio peccatum veniale, quia etsi absolute & simpliciter non sit contra legem, ab ea tamen aliquatenus deficit; *Peccatum veniale*, inquit S. Thomas q. 7. de malo art. 1. ad primum, *etsi in aliquo recedat ab ordine legis, non tamen ipsum corrumpit; quia non corrumpit dilectionem, quæ est plenitudo legis.*

Quarto eadem definitio extenditur ad peccata, quæ pugnant contra legem humanam; quia lex æterna, sicut & recta ratio, jubet, ut filii obediunt parentibus, servi Dominis, & subditi sibi præpositis.

Quinto peccatum habituale etiam continetur in illa definitione; peccatum enim habituale est actus malus præteritus, nec retractatus, moraliter remanens in macula, qua animam aspergit, juxta illud ad Tit. 1. *Inquinatæ sunt eorum & mens & conscientia.* Jac. 1. *abjicientes omnem immunditiam.*

Q. 5. *Quid est peccati macula?*

R. Est privatio gratiæ, non præcise, sed cum relatione & ordine ad actum malum præteritum, qui, ut diximus, quamdiu non fuerit retractatus, moraliter remanet, & privatio gratiæ censetur voluntaria conversio habitualis ad creaturam, quin & aversio similiter habitualis à Deo,
fi

si actus fuerit lethaliter malus. Namque propter actum præteritum non retractatum voluntas habitualiter adhæret objecto illicite amato, privaturque vel gratia sanctificante, si actus fuit lethaliter malus: vel fervore charitatis, si venialiter dumtaxat. Unde S. Thomas 3. part. q. 87. art. 2. ad tertium concludit ad abluendam maculam peccati mortalis requiri infusionem gratiæ sanctificantis: ad tollendam vero maculam peccati venialis, sufficere motum charitatis.

Dixi, *præcise*, tum quia privatio gratiæ, ut sic, non habet rationem culpæ, sed pænæ à Deo iustissime inflictæ: tum quia una & eadem est privatio gratiæ in omnibus peccatoribus, diversæ vero peccatorum maculæ pro diversitate peccatorum.

Q. 6. *Per quos actus contrahitur peccati macula?*

Respondet S. Thomas q. 86. art. 1. ad secundum, non contrahi præcise per cognitionem, sed per amorem rerum inferiorum. Quia proprium est intellectus per cognitionem assimilare sibi objecta, & eorum materialitatem & imperfectionem quodammodo eliquare & expurgare, adeo ut ex objectis materialibus & obscœnis sola in intellectu refulgeat veritas, qua perficitur; nedum inficitur. Unde Deus absque præiudicio infinitæ suæ puritatis & sanctitatis cognoscit omnia obscœna & turpissima, de quibus ipsi peccatores erubescunt. Amor vero est motus voluntatis ad res ipsas, ut in se sunt, illisque animam agglutinat, ac proinde, si turpes sint, commaculat. Quemadmodum enim vestis tum maculari dicitur, cum suum nitorem deperdit: deperdit autem per contactum alicujus impuri, puta luti; sic anima
amit-

amittit suam pluchritudinem adhærendo creaturæ, quod fit per amorem.

Dixi animam non maculari præcise per cognitionem, quia occasionaliter per eam aliquando sædatur. Nam attentio ad turpia inflamat libidinem; ad superflua, causat teporem & negligentiam; ad injuriam acceptam, provocat iram & vindictam. Hinc inter peccata numerantur cogitationes, quæ dicuntur morosæ, à mora, non temporis, cum peccatum etiam mortale uno momento consummari possit; sed rationis, quæ circa eas immoratur. Dicitur autem ratio in mora, quomodo debitor, qui non solvit debitum, cum potest & debet: ratio enim statim cogitationem debet avocare ab objecto, cum advertit ex ejus perceptione concupiscentiam delectari cogitatione odii, vindictæ, venereorum, &c. *Ex hoc ipso*, inquit S. Thomas prima secundæ q. 74. art. 7. ad secundum, *quod ratio superior non dirigit actus humanos secundum legem divinam, impediens actum peccati, dicitur ipsa consentire, sive cogitet de lege æterna, sive non*, (nota contra peccatum philosophicum) *cum enim cogitat de Lege Dei actu, eam contemnit; cum vero non cogitat, eam negligit per modum cujusdam omissionis.* Et art. 6. *Deficit (ratio) in directione passionum inferiorum dupliciter. Uno modo, quando imperat illicitas passiones: alio modo, quando non reprimit illicitum passionis motum.* Enimvero officium est Præpositi coercere seditiosos subditorum motus, quando id præstare potest, censeturque iis consentire, si dissimulet sine rationabili causa. Quanto magis si iis delectetur? *Totus homo damnabitur*, inquit S. Augustinus lib. 12. de Trinit. cap. 12. *nisi hæc quæ sine voluntate operandi, sed tamen cum*
D. Habert Theolog. Tom. VIII. U vo.

voluntate animum talibus oblectandi, solius cogitationis sentiuntur esse peccata, per mediatoris gratiam remittantur; quia nemo delectatur re illicita, nisi illam amet: Atqui amare rem lethaliter malam est peccatum lethale: Ergo & ea liberè delectari.

Ergo excusandi non sunt, qui in familiaribus colloquiis laudant vitæ superfluitates, ultionem de inimicis, & cætera, quæ lege divina prohibentur, ac de iis cogitando animam oblectant, eo prætextu, quod à lege ista vetante abstrahant: *Hæc, inquit, dicta sint secundum hominem.* Imo contra naturam hominis est, ac proinde peccatum, amare quæ per se mala sunt.

Dixi, *sine rationabili causa*; nullum enim est peccatum non amovere justam causam, qualis esse potest auditio confessionum, equitatio necessaria, &c. ex quibus delectatio venerea sequitur in appetitu sensitivo, modo absit periculum consensus; si enim adesset, ab iis omnino esset abstinendum, ut uno ore docent Theologi, inquit Azor. part. 1. lib. 4. c. 6. q. 5. Plura & scitu necessaria, quæ spectant ad cogitationes morosas, vide tomo 3. Tract. de Peccatis, cap. 9.

Q. 7. *Quotuplex est peccati macula?*

R. Triplex. Cum enim macula sit privatio nitoris animæ, totuplex distingui debet peccati macula, quotuplex est animæ nitor: Atqui nitor ille triplex est. Primus refulget ex lumine naturali rationem dirigente. Secundus ex lumine supernaturali, fidei & gratiæ. Tertius ex actibus charitatis & virtutum infusarum, quibus interior gratiæ nitor exterius splendet, juxta illud Matth. 5. *Luceat lux vestra coram hominibus, ut videant opera vestra bona, & glorificent Patrem vestrum,*
qui

qui in cælis est. Ergo ex peccato generatim sumpto nascitur triplex animæ macula. Prima consistit in privatione rectitudinis conformitatis ad rectam rationem; rectitudo quippe illa pulchritudo est & naturalis animæ decor. Secunda, in privatione gratiæ sanctificantis, quam inducit peccatum mortale, ratione cujus maculæ, homo denominatur & vere est malus, peccator, habitualiter à Deo aversus, & ideo ejus inimicus. Tertia, quæ oritur ex peccato veniali, consistit in privatione fervoris, qui est decor & pulchritudo relucens in homine ex actibus charitatis & aliarum virtutum. Sicut enim venustas corporis humani non solum exurgit ex apta omnium membrorum compositione, sed etiam ex vegeto & florido colore, adeo ut corpus pallidi & lividi coloris sit deforme, etiamsi ex integris & ordinate compositis constet membris: ita animæ pulchritudo consistit non solum in recta habitudine partis inferioris ad superiorem, & partis superioris ad Deum, quod habet per gratiam sanctificantem, virtutes infusas, & dona Spiritus Sancti; sed exterius maxime splendescit ex bonis operibus. Ergo macula aspergitur anima, quando ejus agendi ratio est remissior, multa facit aut prætermittit, quæ licet levia, displicent tamen, & oculos intuentium offendunt: ut leves rixæ, vaniloquia, &c.

Ergo macula unius peccati mortalis tolli non potest sine alia: quia homo non potest esse simul separatus à Deo, & conjunctus. Secus de macula peccati venialis, quia absolutè potest, quis fervere circa unum objectum, & remissius agere circa aliud.

Q. 8. *Quid est reatus peccati?*

U 2

R. Est

R. Est obligatio ad pœnam ex macula voluntarie contracta; vel æternam, si peccatum sit mortale, nec ejus macula deleta, vel temporalem, si peccatum leve, aut macula peccati mortalis jam sit deleta.

C A P U T II.

De divisione Peccati.

Q. 1. *Quotuplex est peccatum?*

R. Duplex, originale, quod in Adamo contrahitur; & personale, quod propria voluntate committitur.

Q. 2. *Quotuplex est peccatum personale?*

R. Multiplex.

1. Aliud est actuale, & est ipsemet actus inordinatus & inhonestus: aliud habituale, quod est macula ex actu inordinato consequens.

Ergo peccatum habituale aliter sumitur a Philosophis, aliter à Theologis. Apud Philosophos quippe peccatum habituale est habitus vitiosus, qui non contrahitur, nisi ex actibus malis sæpius repetitis; unus enim actus non producit habitum. Apud Theologos verò peccatum habituale est macula in anima remanens; vel ex uno actu malo non retractato.

2. Peccatum aliud dicitur commissionis, aliud omissionis. Commissionis est actus positivus contra præceptum negativum, quo prohibetur malum v. g. mendacium. Peccatum omissionis est omissio actus boni contra præceptum affirmativum, quo præcipitur ille actus, v. gr. non audire Sacrum die festo, non jejunare tempore Quadragesimæ. *Duobus modis constat esse peccatum, in-*
quit

quit Sanct. Augustinus lib. de perfectione justitiæ c. 3. *si aut fiant illa, quæ prohibentur; aut illa non fiant, quæ jubentur.* Porro peccatum commissionis, cæteris paribus, est gravius peccato omissionis; quia in eo major est recessus ab ordine rationis: pejus est v. g. odisse Deum, quam non amare, illum blasphemare, quam illum non laudare.

3. Aliud est peccatum simpliciter dictum, aliud peccatum in Spiritum Sanctum, quod, teste ipsa veritate, Matth. 12. *Non remittetur in hoc seculo, neque in futuro.*

Peccatum autem in Spiritum Sanctum est peccatum ex malitia procedens, quo repelluntur, impugnanturve spiritalia gratiæ dona, quæ, cum sint effectus amoris Dei erga homines, appropriantur Spiritui Sancto, utpote qui sit ratione processione suæ amor Patris & Filii.

Sex vero numerantur peccata in Spiritum Sanctum nempe desperatio, præsumptio, impœnitentia, obstinatio, impugnatio veritatis cognitiæ, & invidentia fraternæ gratiæ. Illo autem modo dicuntur irremissibilia, quo morbus corporalis per se sanabilis, tum curari non potest, cum freneticus non admittit salubria remedia. Nam ex S. Augustino lib. 1. de Serm. Domini in Monte, qui sic peccat, humilitatem deprecandi non subit, nec spe veniæ, ne timore pœnæ movetur ad pœnitentiam, sed vel de se præsumit, vel desperatione dejicitur: non acquiescit sanis consiliis, sed obstinato animo veritati resistit, quin & de ea detrahit: non accenditur aliorum exemplis, sed illorum gratiæ invidet. Porro si ne minima quidem peccata absque pœnitentia remitti queunt, quanto minus graviora?

4. Alia sunt peccata capitalia cæterorum origines; alia, quæ ex illis nascuntur.

Septem capitalia numerantur à S. Gregorio lib. 31. *Moralium* cap. 31. scilicet inanis gloria, invidia, avaritia, ira, luxuria, gula, & acedia, de quibus plura hic dicenda essent scitu maxime necessaria ad curandos animi morbos tum proprios; tum alienos, nisi fuisse de illis egissemus in praxi Sacramenti Pœnitentiæ gallice edita Parisiis apud SPIRITUM BILLIOT.

5. Peccata alia dicuntur spiritalia, quæ perficiuntur in delectatione spiritali, ut superbia, odium, invidia; alia carnalia, quæ carne consummantur, ut luxuria, gula. In latiori tamen significatione omnia fere peccata nonnumquam dicuntur opera carnis, ut Gal. 5. quia ex carne saltem occasionaliter oriuntur.

6. Alia sunt peccata ignorantiae, alia infirmitatis, alia malitiæ, de quibus Tractatu superiori, ubi de voluntario.

7. Alia sunt contra naturam rationalem, quæ in pecoribus non sunt vitia, ut solutus concubitus: alia contra naturam genericam omnium animalium, ut Sodomia, & ita simpliciter & absolute dicuntur peccata contra naturam.

8. Peccatum dividitur in peccata cordis, oris & operis, quæ divisio non est peccati in diversas species, sed in diversos gradus ejusdem speciei; peccatum enim incipit in corde, deinde per vocem foras prodit, denique ipso opere consummatur.

9. Celebris est peccati divisio in mortale & veniale, de quibus sicut de peccato originali separatim tractandum est.

CAPUT III.

De Peccato mortali & veniali.

Q. I. *Estne legitima peccati divisio in mortale & veniale?*

Philosophi Stoici olim asseruerunt contra omnem sensum generis humani, ut loquitur Sanctus Augustinus Epistola 167. alias 29. omnia peccata esse æqualia.

Jovinianus IV. seculo Stoicis adstipulatus est.

Pseudoreformati ad hunc errorem accesserunt contententes minima etiam peccata esse mortalia in reprobis, in prædestinatis vero gravissima etiam dici venialia, quia ipsis non imputantur propter firmam eorum fiduciam in Deum.

Joannes Gerson celeberrimus Academiae Parisiensis Cancellarius 15. seculo: contra communem Theologorum sententiam docuit, lib. de vita spiritali lect. 1. peccata venialia ex natura sua mereri damnationem æternam,tribuendumque misericordiae Dei, quod non ita severe puniantur.

Hæc fuit quoque vigesima Baji propositio damnata à Pio V. & Gregorio XIII. *Nullum est peccatum natura sua veniale, sed omne peccatum meretur pœnam æternam.*

Itaque circa propositam quæstionem de solo peccato veniali controversia est, utrum scilicet detur, nam Hæretici cum Catholicis conveniunt dari peccatum natura sua mortale.

R. De fide est dari peccata natura sua venialia, nam Matth. 7. v. 5. quædam peccata comparantur festucæ; utpote levi, alia trabi, quia graviora.

viora. Similis comparario habetur 1. Cor. 3. v. 12. *Si quis autem superædificat super fundamentum hoc (quod est Christus, seu fides in Christum) ligna, fœnum, stipulam . . . detrimentum patietur, ipse autem salvus erit.* Concilium Africanum in sua epistola docet plures justos vivere sine crimine, non tamen sine quotidianis & levibus offensionibus; idem quoque Concilium Tridentinum sess. 6. cap. 11. & sanctus Augustinus toto libro de perfectione justitiæ, & Serm. 351. alias hom. 50. *Quamvis, inquit, singula non lethali vulnere ferire censeantur; tamen omnia simul congregata velut scabies nostrum decus ita exterminant, ut ab illius sponsi speciosi forma præ filiis hominum castissimis amplexibus separent, nisi medicamento quotidianæ pœnitentiæ refectentur.*

Dices 1. Matth. 5. Christus sic pronunciat: Si quis solverit unum de mandatis istis minimis, minimus vocabitur in regno cœlorum, hoc est, in Dei judicio vilissimus habebitur, ac propterea in tenebras exteriores ejicietur, quemadmodum interpretantur Sanctus Chrysostomus, Theophylactus, Sanctus Thomas & alii: Ergo minima peccata merentur pœnam æternam.

Distinguo anteced. De mandatis minimis in mente Pharisæorum, apud quos leve peccatum erat concupiscentia uxoris alienæ, odium inimicorum; &c. quamvis re vera sint peccata lethalia, Concedo: de mandatis minimis in se levibus, Nego antecedens.

Instas: Grave est peccatum non diligere Deum ex toto corde: Atqui omnis peccans etiam mendacio officioso non diligit Deum ex toto corde. *Quæ enim vitiosa cogitatio obrepet in hominis animo,*
in-

inquit Calvinus, *si totus amore Dei occupetur?* Ergo nullus leviter peccare potest.

Distinguo majorem cum S. Augustino, grave est peccatum non diligere Deum ex toto corde, præponendo, aut æquando ipsi aliud quippiam, Concedo: non diligere actu continuo & intensissimo, Nego majorem. Primus modus diligendi Deum ex toto corde est proprius justorum in terris peregrinantium: secundus beatorum, excluditque omnem peccatum etiam veniale, sed est impossibile in hoc vitæ statu; proponitur tamen tamquam finis & scopus, ad quem peregrinantes tendere debent quotidie perficiendo, & quotidianos defectus minuendo. Charitas enim nascitur ut crescat, crescit donec perficiatur.

Instas iterum: Peccatum veniale non remittitur nisi ex Dei misericordia: Ergo in æternum puniri meretur.

Nego consequ. Neque enim Aulico alias Regi acceptissimo perpetuo debetur pœna propter levio-rem offensam, ex eo quod veniam sperare non possit, nisi ex indulgentia Principis. Misericordiæ itaque divinæ tribuendum quod gratiam justo concedat ad satisfaciendum pro venialibus, non vero quod justum in æternum non puniat.

Dices 2. Minima opera bona justii merentur vitam æternam: Ergo & minima peccata supplicium æternum.

Nego consequ. 1. Quia Deus ultra condignum remunerare potest, quia misericors est: punire vero non potest, quia justus est. 2. Quia sicut minimum opus bonum vitam æternam non meretur, nisi ex charitate procedat, sic peccatum ex

objecto leve, non est dignum pœna æterna, nisi ex formali Dei contemptu proficiscatur.

Instas : Malum culpæ etiam levissimæ majus est malo pœnæ gravissimo, alioquin licitum foret peccare leviter ad vitandum grave malum temporale. Ergo peccatum veniale juste puniri potest pœna gravissima, scilicet damnatione æterna.

Nego conseq. Quamvis enim malum culpæ sit superioris ordinis respectu mali cujuscumque pœnæ etiam infinitæ, inde tamen recte non concluditur nullam esse vindictam justam peccati etiam levissimi, quemadmodum non sequitur argentum, vel aurum, in qualibet quantitate appendatur, non posse esse justum pretium animalis, puta oviculæ, ex eo quod minutissimum animal perfectius sit quovis corpore inanimato. In his itaque servanda est aliqua proportio secundum justitiæ leges, ita ut pro culpa leviori decernatur pœna levior, sicut pro animali viliori statuitur minus pretium.

CAPUT IV.

De peccati mortalis differentia à veniali.

Q. I. *In quo conveniunt & differunt peccatum mortale & veniale?*

R. Conveniunt in conversione ad creaturam; ambo enim sunt inordinatus amor creaturæ.

Differunt autem essentialiter in eo, quod peccatum mortale sit aversio à Deo, non item veniale. Homo quippe per peccatum mortale simpliciter recedit à Deo, abjiciens ejus imperium, & consequenter suum finem ultimum in creatura
con-

constituit saltem implicite ; per peccatum autem veniale non desinit adhærere Deo ; nec ita ad creaturam animo convertitur , ut in ea constituat suum ultimum finem ; paratus quippe est potius dimittere ea , quæ inordinate diligit , & in quibus peccat , quàm à Creatore suo separari. Atque ut facilius sit utriusque peccati distinctio , finge duos cives , quorum alter ita suis privatis commodis & affectibus indulget , ut Regi suo nihilominus sit addictissimus , paratus pro ejus salute (ubi necesse fuerit) extrema adire pericula , alter vero , qui averfissimo à suo legitimo Principe est animo , & adversus illum petulanter se erigit. Primus nomen & officium probi civis retinet , secundus habetur ut perduellis læsæ Majestatis reus , & infensissimus Patriæ hostis. Sic distingue inter eos , qui peccant venialiter , & eos qui mortaliter. De prioribus sic docent Patres Tridentini sess. 6. cap. 11. *Licet in hac mortali vita quantumvis sancti & justi in levia saltem & quotidiana , quæ etiam venialia dicuntur , peccata quandoque cadant , non propterea desinunt esse justi.* De posterioribus vero Sanct. Thomas quæst. 28. de veritate art. 2. *Quicumque , inquit , in re temporali finem sibi constituit , QUOD FACIT OMNIS MORTALITER PECCANS , ex hoc ipso quantum ad effectum suum postponit Creatorem creaturæ , diligens plus creaturam , quàm Creatorem ; finis enim est qui maximè diligitur.* Cum ergo Deus in infinitum creaturam excedat , erit peccatum contra Deum infinita offensa ex parte dignitatis ejus , cui per peccatum injuria fit dum ipse contemnitur. Et lect. 3. in cap. 3. Ep. ad Philip. *Proprium Dei est , ut sit primum principium & finis ultimus.* Unde qui pro fine habet aliud , illud est Deus suus. Similia habet in c. 5. ad Ephes.

Ergo

Ergo peccatum mortale in duobus essentiâliter consistit; nempe in aversione à Deo, & conversione ad creaturam tamquam ad ultimum finem: peccatum vero veniale in sola conversione ad creaturam, salvo ordine ad Deum ut ad ultimum finem.

Ergo peccatum mortale ex aversione à Deo
 1. Inducit animæ mortem, à qua dicitur mortale; sicut enim expirat corpus, cum animam emit- tit; ita expirat anima, cum Deum amittit. Deus amissus, mors animæ; anima emissa, mors cor- poris. 2. Habet quod sit infinita Dei offensa, ac proinde mereatur pœnam æternam; quia per ejusmodi aversionem peccator aufert à Deo, ut supra docebat S. Thomas, rationem ultimi finis, ut eam vilissimæ creaturæ asserat. Porro Rex non potest majori affici injuria, quam cum regia ejus Majestas infra vilis mancipii conditionem de- primitur. 3. Est malum irreparabile; quia, ut ratiocinatur Sanct. Thomas 1. 2. q. 72. art. 5. *Deordinatio mortis, quæ est per remotionem principii vi- tæ, est irreparabilis secundum naturam: inordinatio au- tem ægritudinis reparari potest propter id quod salvatur principium vitæ. Similiter est in his, quæ pertinent ad animam . . . qui enim peccando avertitur ab ultimo fi- ne, quantum est ex natura peccati, habet lapsum irrepa- rabilem, & ideo dicitur peccare mortaliter, æternaliter puniendus: qui vero peccat circa aversionem à Deo, ex ipsa ratione peccati reparabiliter deordinatur; quia salva- tur principium, & ideo dicitur peccare venialiter, quia sci- licet non ita peccat, ut mereatur interminabilem pœnam.*

Dices 1. unus & idem numero actus potest ef-
 se peccatum veniale & mortale; Ergo peccatum
 mor-

mortale & veniale non differunt essentialiter, sed secundum majus & minus duntaxat, quemadmodum calor remissior & intensior.

Probatur antecedens duobus exemplis. Motus indeliberatus odii in Deum est peccatum veniale, deliberatus vero mortale. Item, si quis die Jovis produceret cœnam carnibus instructam ultra mediam noctem, peccaret venialiter ante mediam noctem, in hypothefi quod ederet cum aliqua intemperantia, mortaliter vero post mediam noctem, & tamen idem esset actus intemperantiæ.

Nego antecedens, & ejus confirmationem, in allatis enim exemplis, licet idem numero motus perseveret in sensualitate; novus tamen & essentialiter diversus exurgit in voluntate, quæ post advertentiam rationis vult quod antea nolebat, nempe separari à Deo.

Dices 2. Ex S. Augustino Tract. 12. in Joân. *Plura minuta peccata, si negligentur, occidunt, quemadmodum minuta grana arenæ, si multa sint, premunt atque opprimunt, & aqua paulatim per sentinam intrando, si non exhauriatur, mergit navem: Ergo.*

Distinguo antec. occidunt dispositive, quemadmodum levis febris, si non curetur, tandem extinguit calorem naturalem, & mortem infert, Concedo, occidunt per se formaliter, Nego antecedens.

Q. 2. *Quibus signis discerni potest peccatum mortale à veniali?*

R. Hæc duo sunt signa peccati mortalis. Primum, si sit in materia gravi. Secundum, si adfuerit sufficiens advertentia & deliberatio, alioquin si alterutrum desit, judicandum est peccatum

tum esse veniale. Quare mendacium officiosum & furtum unius assis, licet ex deliberata voluntate procedant, venialia sunt peccata propter levitatem materiæ, delectatio turpis, quamvis sit in materia gravi, si tamen desit sufficiens advertentia aut libertas, venialis censetur.

CAPUT V.

De peccato originali.

Q. 1. *Existitne peccatum originale?*

Negarunt Pelagiani, docueruntque Adamum peccando sibi soli nocuisse: morbos, mortem & concupiscentiam non esse effectus peccati illius, sed meros naturæ humanæ defectus. Postea tamen argumentis Catholicorum coacti sunt confiteri mortem corporis ex Adamo trahi, non vero peccatum. Priorem Pelagianorum errorem 16. sæculo amplexi sunt Anabaptistæ & Sociniani: posteriorem Zwingliani. Contra hos omnes extat definitio Concilii Tridentini sess. 5. can. 2. his verbis: *Si quis Adæ prævaricationem sibi soli, & non ejus propagini asserit nocuisse: . . . aut inquinatum illum per inobedientiæ peccatum, mortem & pœnas corporis tantum in omne genus humanum infudisse, non autem & peccatum, quod est mors animæ, anathema sit.* Quare ad propositam quæstionem

R. De fide est per Adæ prævaricationem omnes homines nasci peccato, morti & aliis miseriis obnoxios, *In iniquitatibus conceptus sum*, inquit Propheta Psalm. 50. Job 14. *Quis potest facere mundum de immundo conceptum semine, nonne tu qui solus es?* Quem locum sic vertunt septuaginta Interpretes,

tes, & ex iis Origenes hom. 12. in Levit. & alii ex antiquioribus Patribus. *Nemo mundus à forde, cujus est unius diei vita super terram.* Certe Textus ille non potest intelligi ad mentem Socinianorum de fordibus corporeis, cum homines illas emundare possint & soleant. Rom. 5. *Per unum hominem peccatum in hunc mundum intravit, & per peccatum mors; & ita in omnes homines pertransiit, in quo omnes peccaverunt:* Ergo ne ipsi parvuli immunes sunt à peccato, cum obnoxii sint morti, quæ per peccatum in omnes homines pertransiit: Ergo ubi dicit Apostolus, nempe v. 19. *Per inobedientiam unius hominis peccatores constituti sunt multi; ex S. Augustino lib. 6. contra Julianum cap. 24. Ipsi sunt multi, qui & omnes.*

Dices 1. Ezech. 18. habetur, *Anima, quæ peccaverit, ipsa morietur: filius non portabit iniquitatem patris sui:* Ergo.

Nego conseq. namque peccatum originale non est peccatum Adami, sed ex Concilio Tridentino sess. 5. Can. 3. inest cuique proprium. Et ex sancto Augustino lib. 3. de pecc. mer. cap. 8. *Imputat (Deus) non jam aliena, sed propria, carnali generatione jam eorum sunt, quibus nondum spiritali regeneratione dimissa sunt.*

Dices 2. Citato cap. 5. Rom. *Regnavit mors ab Adam usque ad Moysen, etiam in eos, qui non peccaverunt in similitudinem prævaricationis Adæ:* Ergo mortem duntaxat, non peccatum ex Adamo trahimus.

Distinguo antecedens cum S. Augustino lib. 6. contra Julianum cap. 4. Qui non peccaverunt in similitudinem prævaricationis Adæ, hoc est, propria voluntate sicut Adamus ex deliberata sua volun-

voluntate peccavit, Concedo : qui non peccaverunt simpliciter, & voluntate Adami, quæ erat voluntas totius generis humani, Nego antecedens. Mors enim, quæ regnavit usque ad Moysen, est pœna iusta : Atqui non esset iusta, nisi supponeret peccatum. Unde Apostolus expresse dicit, eodem cap. 5. *Usque ad legem peccatum erat in mundo : peccatum autem non imputabatur*, id est non agnoscebatur ; per legem enim cognitio peccati.

Dices 3. S. Clemens Alexandrinus lib. 3. stromatum. S. Gregorius Nyssenus oratione de infantibus, &c. S. Chrysostomus Hom. ad Neophytos, Theodoretus lib. 5. hæreticarum fabularum, docent infantes nullo inquinatos esse peccato : Ergo.

R. Difficiles quidem esse textus præsertim sancti Clementis, nec aperte solvi posse sine longiori dissertatione consulenda tom. 3. de pecc. cap. 7. Parag. 1. Hic autem breviter distinguo : nullo peccato inquinatos propria voluntate commisso, concedo ; voluntate Adami, Nego antecedens. *Manifestum*, inquit sanctus Chrysostomus Hom. 10. in Epist. ad Rom. *quoniam non ipsum peccatum, quod ex legis transgressione*, (Nota sanctum Doctorem in objectionem loqui de peccato personali,) *sed illud peccatum, quod ex Adæ inobedientia, hoc erat quod omnia contaminavit.*

Q. 2. *Quomodo traducitur peccatum originale?*

Sanctus Augustinus lib. 5. contra Julianum c. 3. hæret circa propositam quæstionem. *Hic libentius disco, quam doceo*, inquit, *nec audeo docere quod nescio* ; additque Epistola 167. alias 29. ideo Scripturam in hac parte obscurius loqui, quam cum agitur de existentia peccati originalis : quia prius
non

non est ita ad salutem necessarium ac posterius. Sed scholæ tandem circa obscuram hanc quæstionem convenerunt, quibuscum

R. Traducitur peccatum originale per generationem, & seminalem propagationem. Ita S. Thomas 1. 2. q. 81. art. 4. *Peccatum originale*, inquit, à primo parente traducitur in posteros, in quantum moventur ab ipso per generationem, sicut membra moventur ab anima ad peccatum actuale nam ratio seminalis nihil aliud est, quam vis activa in generatione, Si autem aliquis formaretur virtute divina ex carne humana, (sicut Adamus ex luto,) manifestum est quod vis activa non derivaretur ab Adam, unde non contraheret peccatum originale; sicut nec actu manus pertineret ad peccatum humanum, si manus non moveretur à voluntate hominis, sed ab aliquo extrinseco movente. Hinc Christus nec actu contraxit, nec debuit contrahere peccatum originale; quia non est conceptus virtute activa, & seminali Adami, sed de Spiritu Sancto: nec Eva, si ex costa Adami post ejus peccatum formata fuisset, peccato originali fuisset inquinata; quia non extitisset in Adam secundum rationem seminalem.

Neque propterea singas cum Gregorio Ariminenſi qualitatem quandam morbidam, propter quam Adamus peccator generet peccatorem, sicut in semine leprosi est quædam realis corruptio, propter quam generat leprosum; quia omne peccatum, utpote voluntarium, sedem habet in voluntate: semen vero est solummodo instrumentum, quo traducitur peccatum in Adami posteros, quemadmodum si Adamus stetit in iustitia originali, eam transmississet semine tanquam instrumento.

Q. *Peccatum originale transmittiturne absque ulla exceptione in omnes Adami posteros, via ordinaria pro-
genitos?*

R. Beata Virgo peccatum originale actu non contraxit. Hæc propositio, quamvis non sit de fide, *cum nondum æterna sapientia*, inquit Gregorius XV. ad Regem Hispaniæ, *Ecclesiæ suæ tantæ Mysteriorum penetralia patefecerit*: est tamen fidei consona, ut declaravit Concilium Basileense sess. 36. anno 1439. Cui declarationi adhæsit Theologiæ Facultas Parisiensis, statuitque anno 1497. neminem deinceps è suo gremio ad Gradum Doctoralem promovendum; nisi prius Sacramento solemniter ad tenendam hanc doctrinam se obstrinxisset; id ipsum postea præstiterunt Academia Colonien- sis & Moguntina in Germania, Salmanticensis, Toletana, & Complutensis in Hispania. Summi Pontifices Sixtus IV. Pius V. Paulus V. & Gregorius XV. huic sententiæ admodum faverunt, quin Pius V. & Paulus V. prohibuerunt sub pœna suspensionis, ne publice, ubi promiscua viro- rum & mulierum multitudo convenire solet; sen- tentia negans Immaculatam Beatæ Mariæ Vir- ginis Conceptionem propugnaretur, quod ta- men permiserunt in publicis Academiae disputa- tionibus, ubi nulla videbatur subesse scandali occasio. Sed cum nihilominus inde pax turba- retur, Gregorius XV. sub iisdem pœnis prohi- buit, ne in Scholis & privatis colloquiis quis- quam auderet asserere beatam Virginem in pec- cato fuisse conceptam, *nisi*, inquit, *aliquibus fuerit specialiter indultum*. Cavent autem omnes illi Pontifices, ne quis ex prædictis Bullis & Constitutionibus colligat contrariam sententiam

ab iis esse dānātam, aut improbatam, ac speciātim Gregorius XV. prohibuit, ne in officio festi Conceptionis addatur nomen adjectivum Immaculatæ, aut aliud simile.

Dixi beatam Virginem actu non contraxisse peccatum originale; quia juxta communem Theologorum sententiam; cum esset in lumbis Adæ secundum rationem feminalem, vi generationis suæ peccato erat obnoxia, sed à Christo Domino redempta est, quatenus anima ejus in primo suæ creationis instanti fuit ornata gratia sanctificante, & ita à peccati macula liberata, quam quidem actu & de facto non incurrit, sed quam incurrisset, nisi gratia Dei per merita Christi fuisset præventa. Redempta est igitur, *Quemadmodum*, inquit S. Augustinus in Psal. 85. *si Medicus videat tibi imminentem ægritudinem forte ex aliquo labore, & dicat, parce tibi, requiesce: recte dicis Medico, liberaisti me ab ægritudine, non in qua jam eras, sed in qua futurus eras.*

CAPUT VI.

De natura & essentia peccati originalis.

Q. *In quo consistit formalis ratio peccati originalis?*

R. 1. Cum Sancto Augustino lib. de moribus Ecclesiæ cap. 22. *Hoc peccato antiquo nihil est ad prædicandum notius, (scilicet in Scripturis & traditione) nihil ad intelligendum secretius.*

R. 2. Lutherani & Calvinistæ docent peccatum originale esse formaliter ipsam concupiscentiam: *Videtur ergo*, inquit Calvinus (lib. 3. Institut. cap. 1.) *peccatum originale hæreditaria natura*

nostræ pravitas, & corruptio in omnes animæ partes diffusa atque id est proprie quod à Paulo sæpius peccatum nominatur. Atque ex hoc falso principio deducunt peccatum originale per baptismum non deleri, sed tegi duntaxat in prædestinatis; cum in iis concupiscentia remaneat, bona etiam iustorum opera inficiens. Quam impietatem Concilium Tridentinum sess. 5. Can. 5. anathemate percussit. Nihil enim damnationis est iis qui sunt in Christo Jesu, Rom. 8. Sanguis ejus emundat nos ab omni peccato, Jo. 1.

Dices : Concupiscentia, quæ remanet in baptizatis peccatum vocatur ab Apostolo, Rom. 7. v. 20. Ergo.

Distinguo anteced. cum Patribus Tridentinis laudato canone 5. peccatum metaphorice, quia vel ex peccato est, sicut idioma vocatur lingua, & scriptura manus, vel ad peccatum inclinatur, sicut Spiritus Sanctus dicitur postulare, quia nos postulare facit, Concedo : est peccatum vere proprie & formaliter, Nego antecedens. *Si quis autem contrarium senserit, anathema sit*, inquiunt laudati Patres.

R. Peccatum originale formaliter consistit in habituali aversione a Deo, hoc est, in privatione gratiæ sanctificantis propter actuale prævaricationem Adæ, in quo omnes fuimus & peccavimus; ita ut ipsa privatio gratiæ sanctificantis sit materiale peccati, & aversio à Deo formale. Quia peccatum originale non est actuale, sed habituale : Atqui peccatum habituale ex dictis est privatio gratiæ sanctificantis cum relatione ad aliquem actum malum præcedentem, & moraliter rema-

remanentem, ratione cujus est voluntarium :
Ergo.

Ergo peccatum originale est mortale, cum
sit habitualis aversio à Deo.

CAPUT VII.

De pœnis Peccati Originalis.

Q. 1. *Quænam sunt pœnæ peccati originalis?*

R. Aliæ spectant corpus, aliæ animam : aliæ mortalem hanc vitam, aliæ futuram.

Q. 2. *Quæ sunt pœnæ corporis in hac vita?*

R. Mors, morbi, & aliæ miseriæ. Est de fide ; sic enim definiit Concilium Tridentinum sess. 5. Can. 1. Præiverat Concilium Arausicanum II. can. 2. *Per unum hominem peccatum introivit in mundum, & per peccatum mors, Rom. 5.*

Q. 3. *Quæ sunt pœnæ animæ in hac vita?*

Respondet sanctus Thomas prima secundæ q. 85. art. 3. Per peccatum quatuor vulnera animæ fuisse inflicta, nempe ignorantiam in intellectu, malitiam in voluntate, quam sanctus Augustinus vocat difficultatem recti, infirmitatem in appetitu irascibili, & concupiscentiam in concupiscibili.

Q. 4. *Homo estne vulneratus in naturalibus?*

R. Cum glossa, quæ Venerabili Bedæ tribuitur, homo spoliatus est gratuitis, & vulneratus naturalibus. Et ratio est, quia si homo sine peccato in puris naturalibus conditus esset, eam intelligentiam haberet, unde seipsum posset ex-

colere, in virtute proficere, & ultimum finem adipisci; repugnat enim Sapientiæ divinæ negare creaturæ innocenti media, sine quibus finem, ad quem illam ordinavit, consequi non posset: Atqui homo in statu naturæ corruptæ adeo depravatus est in mente & in affectibus, ut propriis viribus finem etiam naturalem assequi non possit. *Quidam tantæ sunt fatuitatis*, inquit Sanct. Augustinus Epist. 166. alias 28. *ut non multum à pecoribus differant.* Ipsimet Philosophi Gentiles, ut refert idem S. Doctor, ex tanta naturæ humanæ depravatione collegerunt præcessisse aliquod peccatum, ad quod esset referenda.

Q. 5. *Quænam est pœna peccati originalis in altera vita?*

R. De fide est parvulos sine Baptismo decedentes privari vita æterna; ita definierunt Concilium Florentinum sess. ultima, & Concilium Tridentinum sess. 5. Can. 4. Scriptum est enim Joan. 3. *Nisi quis renatus fuerit ex aqua & Spiritu Sancto, non potest introire in Regnum Dei.*

Q. 6. *Parvuli sine Baptismo defuncti fruunturne aliqua beatitudine naturali?*

Affirmarunt Catharinus, Pighius, quibus se adjunxit Cardinalis Fondratus, contendentes hujusmodi parvulos post judicium universale habituros super faciem terræ, tanquam in Paratiso terrestri, plenos sapientia & virtutibus moralibus, identidemque fruituros consortio Angelorum. Sed communiter rejicitur hæc sententia, utpote quæ accedat ad hæresim Pelagianorum. Quare

R. Fi-

R. Fictitia est beatitudo illa naturalis, pugnatque contra Ecclesiæ traditionem, *non baptizatis parvulis*, inquit Sanct. Augustinus lib. 1. de Origine animæ cap. 9. *nemo promittat inter damnationem regnumque Cælorum, quietis vel felicitatis cuiuslibet, atque ubilibet medium locum: hoc enim est hæresis Pelagiana.* Et Concilium Florentinum citato loco declarat. *Illorum animas, quæ cum actuali peccato, vel solo originali decedunt: mox in infernum descendere, pœnis tamen disparibus puniendas.* Si aliquibus pœnis sunt puniendæ: Ergo tristitia saltem afficiuntur ob privationem visionis beatificæ.

Q. 7. *Parvuli, qui nondum regenerati decedunt, afficiuntur pœna ignis?*

R. Non una est Catholicorum sententia.

Affirmant 1. Sanct. Augustinus pluribus in locis, ac præsertim serm. 294. cap. 3. & 4. *Nul-
lus relictus est medius locus, ubi ponere queas infantes:
alii erunt ad dexteram, alii ad sinistram, non novi
aliud Ecce exposui tibi quid sit regnum, & quid
sit ignis æternus, ut quando confiteris parvulum non fu-
turum in regno, fatearis futurum in igne æterno.* 2.
S. Fulgentius lib. de Fide ad Petrum cap. 27. 3.
Episcopi in Sardinia relegati ex eodem Sanct. Ful-
gentio lib. de Incarnatione & Gratia capit. 14. &
30. 4. Sanct. Gregorius lib. 9. Moral. cap. 12.
*Perpetua, inquit, tormenta percipiunt, qui nihil ex
propria voluntate peccaverunt.*

Sanctus tamen Augustinus lib. 5. contra Ju-
lianum cap. 11. lenit suam sententiam, fatetur-
que se esse ancipitem circa pœnas ejusmodi par-
vulorum, ac tandem concludit, *Quis dubitave-
vit parvulos non baptizatos in damnatione omnium levif-*

suma futuros? Quæ, qualis, & quanta erit, quamvis definire non possim; non tamen audeo dicere, quod eis, ut nullibi essent, quam ut ibi essent, potius expediret. Atqui, inquam ego, dicendum vidèretur melius eis fuisse non nasci, si ignis per totam æternitatem in eos sæviret, quemadmodum hic sævit in corpora eorum, qui flammis pereunt.

Negant vero parvulos non baptizatos igne torqueri 1. sanctus Gregorius Nazianzenus orat. 40. in sanctum Baptisma. 2. Sanct. Gregorius Nyssenus orat. 1. de infantibus. 3. Sanct. Thom. q. 1. de Malo; art. 2. Eiusdem sunt sententiæ S. Bonaventura, Scotus in secundum.

Ceterum monendi sunt Clerici in Catechesibus primam sententiam non esse exponendam tanquam Fidei dogma; experientia quippe constat fideles ægre admodum audire parvulos sine Baptismo decedentes, mitti in ignem æternum, & propter ejusmodi sermones scandala interdum oriri in Ecclesia; sine causa tamen; parvuli quippe pro opinionem diversitate, nec melius, nec pejus habebunt.

Nihilominus poterunt data occasione, prudenter uti priore opinione adversus matres, quæ ex negligentia, vel alio quovis modo, fætus in utero suffocant, aut præmature effundunt: posteriore vero, utpote benigniore, lenire dolorem earum, quæ acerbius lugent filios suos sine gratia Christi decessisse.


CAPUT VIII.


De causa efficiente peccati.

Q. I. *Quenam est causa efficiens peccati?*

R. *Proprie & directe sola voluntas; Matth. 15. v. 19. De corde enim exeunt cogitationes, malæ, homicidia, &c. hæc sunt, quæ coinquinant hominem. Et Sanct. Augustinus lib. 2. de Civit. Dei, cap. 6. Mala voluntas efficiens est operis mali: malæ autem voluntatis efficiens est nihil. Et cap. 7. Nemo quærat causam malæ voluntatis; non enim est efficiens, sed deficiens.*

- Dixi, *proprie & directe*; nam multa voluntatem ad peccatum impellunt, ut caro, mundus, & Dæmonens: & ideo occasionaliter & improprie dici possunt causa efficiens peccati.





Tractatus DE REGULA MORUM.

CAPUT UNICUM.

De ejus necessitate & existentia.

Q. 1. *Estne necessaria aliqua morum regula?*

R. Affirmative; quia facultas, quæ deficere potest, ut manus pictoris pingendo, indiget regulis; v. gr. Artis Pictoriæ, per quas certo & infallibiliter dirigatur: Atqui voluntas humana, ex qua procedunt actus humani & morales, deficere potest: Ergo.

Q. 2. *Quenam est regula actuum humanorum?*

R. Du-

R. Duplex statuitur, interior scilicet & exterior: interior est conscientia; exterior vero lex.

Q. 3. *Quare conscientia non est unica actuum humanorum regula?*


R. Quia cum possit errare, & à vero deficere, ut patebit ex dicendis, lege debet dirigi.


Ergo temere agunt, qui sine notitia legis ex propria conscientia seu cerebro decernunt quid hic & nunc ipsis & aliis sit agendum.

Ergo actus humanus non est moraliter bonus, nisi dirigatur conscientia simul & lege; sed est simpliciter malus, si alterutrum desit. *Duobus modis aliquis ad peccatum obligatur, inquit Sanct. Thomas quodlib. 8. qu. 6. art. 3. Uno modo faciendo contra legem, ut cum aliquis fornicatur: alio modo faciendo contra conscientiam, etsi non sit contra legem, ut si conscientia dicat alicui quod levare festucam de terra sit peccatum mortale.*

Q. 4. *Quare actus humanus legi conformis, sed conscientiae repugnans, est malus?*

R. Quia hominis natura, utpote rationalis, exigit, ut omnes ejus actiones rationabiliter fiant, hoc est, ratione regantur, *rationabile obsequium vestrum*, inquit Apostolus Rom. 12.





Tractatus DE CONSCIENTIA.

CAPUT PRIMUM.

De Notione Conscientiæ.

Q. I. *Quid est conscientia?*

R. Est iudicium actuale practicum dictans quid in particulari sit faciendum aut omitendum.

Dicitur 1. *Judicium*, quo significatur conscientiam esse actum elicited ab intellectu : sed plerumque imperatur à voluntate, quæ prout est bene vel male affecta, efficit bonam vel malam conscientiam. Unde in peccatoribus mala est conscientia; quia prava eorum voluntas pervertit iudicium practicum: nulla est apud eos vera prudentia, nec in agendis consilium ab eis quærendum.

Dicitur 2. *Actuale*; quia conscientia neque est potentia, neque habitus, sicut prudentia, sed actus.

Dicitur 3. *Dictans*; quia conscientiæ est dirigere actus humanos.

Dici-

Dicitur 4. *Quid in particulari sit faciendum aut omittendum*, ut distinguatur, tum à synderesi, tum à prudentia universali. Synderesis enim est habitus mentis nobis naturaliter inditus, qui versatur circa prima principia practica, v. g. *quod tibi fieri non vis, alteri ne feceris*. Prudentia vero universalis est habitus sive acquisitus, sive infusus, qui ex illo primo principio, quod à nemine ignorari potest, deducit conclusiones universales, v. g. non debemus alteri facere, quod nobis fieri nolumus: Atqui nolumus rem nostram subripi: Ergo non debemus rem proximi subripere. Ex hac autem universali conclusione conscientia subsumit: atqui hæc pecunia usuraria, est res aliena: Ergo non licet mihi eam accipere.

Ergo conscientia est ultimus prudentiæ particularis actus, & veluti ejus conclusio. *Conscientia*, inquit S. Antoninus, *est concludens scientia*.

Ergo conscientia, ut sit recta, necessario præsupponit præmissas veras & notas; namque vera & certa non potest esse conclusio, nisi eliciatur ex propositionibus veris & notis; ac proinde ex temeraria conscientia concludunt hoc aut illud hic & nunc esse faciendum, qui nullam habent firmam rationem, aut certam auctoritatem, ex qua ejusmodi conclusionem eliciant.

Q. 2. *Quare conscientia plerumque vocatur fides, ut Rom. 14. v. 23. damnatus est, quia non ex fide, hoc est, ex conscientia; omne autem quod non est ex fide, peccatum est?*

R. Quia conscientia non habet scientiæ strictæ sumptæ certitudinem & evidentiam, sed ut plurimum nititur fide, sive divina, sive humana, ac proinde non immerito quis dicitur agere bona aut

aut mala fide, quando agit ex bona aut mala conscientia.

CAPUT II.

De divisione conscientiae?

Q. I. *Quomodo dividitur conscientia?*

R. 1. Generatim & adæquate dividitur in bonam & malam. Gravis autem est difficultas, ac præ ceteris accuratius examinanda, quæ conscientia dici mereatur bona; nusquam enim in moralibus periculosius erratur, quam in definienda bona conscientia, testante Clero Gallicano anno 1700. *Hoc initium malorum esse, atque omnium corruptelarum caput, & doctrinae consecutio & series temporum ostendit.* Atque ut in re tam lubrica secure procedamus, operæ pretium est referre sigillatim singulas conscientiae divisiones, & varias ejus species, tumque licebit de unaquaque judicium ferre. Itaque

R. 2. Conscientia specialius dividitur 1. in veram seu rectam, & falsam seu erroneam: & hæc vel invincibiliter est erronea, vel vincibiliter.
2. In certam, & incertam.

Conscientia est certa, quando mens judicat practice nullum esse errandi periculum: incerta vero, quando oppositum judicat. Potest autem quis vel prudenter vel imprudenter esse certus: prudenter quidem, quando nulla est vera ratio erroris suspicandi: imprudenter verò, quando ejus certitudo oritur vel ex cupiditate excæcante juxta illud Sapientiae 2. *Excæcavit eos malitia eorum*, vel ex fallaciis dæmoniis, qui ex Apostolo
2. Cor.

2. Cor. 5. *Excæcavit mentes infidelium.* Et hæc conscientia dicitur cæca & erronea, estque in pluribus causa impænitentiæ finalis & damnationis æternæ: *Error conscientie non habet vim excusandi*, inquit sanctus Thomas quodlib. 8. qu. 6. art. 5. *quando ipse error peccatum est, ut cum procedit ex ignorantia ejus, quod quis scire tenetur & potest.* Ergo frustra quis objicit bonam fidem in facto, quod discit postea esse v. g. simoniacum, nisi ejus ignorantia sit eorum, quæ nec scire potuit, nec debuit, alioquin ejus fides mala censenda est.

Q. 2. *Quotuplex certitudo competere potest conscientie?*

Nota triplicem esse certitudinem, scilicet Metaphysicam, Physicam, & Moralem.

Metaphysica habetur certitudo, quando res, quæ concipitur, non potest aliter se habere, ne quidem divinitus, ut mons sine valle, homo sine rationalitate, Deus sine bonitate; hæc enim sunt contradictoria.

Physica: cum cognitio est rei, quæ naturaliter & secundum ordinem à Deo institutum alio modo se habere nequit, quamvis supernaturaliter possit. Sic certi sumus stupam in ignem conjectam brevi consumendam, licet per miraculum possit conservari.

Moralis adest certitudo, quando spectatis circumstantiis ratio dicat non esse timendum, ne res aliter se habeat, quamvis naturaliter & absque miraculo aliter possit contingere, imo sic aliquando contigerit: sic cum Morali certitudine quis ambulat per plateas tranquillo aere, vel cum fratre, quem benevolum expertus est; solus egreditur in campum, licet è tectis tegulæ in caput ejus decidere naturaliter possint, ut aliquando

do contigit, aut frater in ipsum insurgere, quemadmodum Cain in Abelem. Nam imprudens & ridiculus videretur, si timore incurrendæ mortis in hujusmodi circumstantiis domi non se contineret. Cum eadem certitudine iudex credit duobus testibus consentientibus, plebs docenti Parocho; nec nisi imprudenter fidem denegarent eo prætextu, quod duo testes, & Parochus fallere possint, & aliquando deceperint, etenim rariora & remotiora sunt, quam ut timeri debeant. His prænotatis,

R. Certitudo conscientiæ non est Metaphysica, nec Physica, sed moralis tantum. Hoc agnovit Aristoteles lib. 21. Metaph. *Certitudinem Metaphysicam, inquit, non oportet in cunctis quærere, sed in his, quæ non habent materiam.* Et Sanctus Thomas 2. 2. qu. 70. ar. 2. *In actibus humanis non potest haberi certitudo demonstrativa, eo quod sunt circa contingentia & variabilia. Et ideo sufficit probabilis certitudo, quæ ut in pluribus veritatem attingat, etsi in paucioribus à veritate deficiat.* Eadem docet Sanctus Antoninus 2. part. tit. 3. cap. 10. parag. 34. Cum autem certitudo moralis possit esse major vel minor, conscientia certa subdividitur in tutam & tutiorem.

Q. 3. *Quotuplex est conscientia incerta?*

R. Quadruplex, scilicet dubia, perplexa, scrupulosa, & probabilis.

Dubia est conscientia, quando mens inter rationes æqualis ponderis manet suspensa & quasi in æquilibrio, ut si ex duobus testibus æquali fide dignis alter affirmet, alter neget, hæret mens iudicis, nec in unam partem magis quam in aliam inclinare potest.

Per-

Perplexa conscientia est intellectus practici judicium dictans subesse peccatum, quamcumque agens amplectatur partem, v. g. siue mentiatur ad impediendum homicidium iniustum, siue aperiat veritatem, ex qua sequatur ejusmodi homicidium. Sed prudentia dictat in hac hypothesi minus malum esse eligendum, & ita nunquam potest quis esse in vera peccandi necessitate.

Scrupulosa conscientia est intellectus practici judicium, quo aliquid frivolis rationibus esse bonum aut malum aestimatur, adeoque trepidatur timore in agendo, ubi non est timor.

Probabilis conscientia seu opinio est mentis assensus cum formidine oppositi. *Opinio*, inquit S. Bernardus lib. 5. de Consideratione c. 3. *certi nihil habens; verum per similia quærit potius, quam apprehendit.*

Q. 4. *Quotuplex est conscientia seu opinio probabilis?*

R. Duplex. Alia fulcitur ratione, alia auctoritate sapientiorum. Prima dicitur probabilis probabilitate intrinseca: secunda probabilis probabilitate extrinseca.

Q. 5. *Quotuplici modo spectari potest opinio probabilis probabilitate siue intrinseca, siue extrinseca?*

R. Duplici 1. Absolute, quomodo rusticus probabiliter judicat hunc contractum, puta societatis, esse licitum, quia ejus Parochus, vel Confessarius illum approbavit. 2. Comparetæ cum alia opposita, ut si idem rusticus postea audiret à concionatore fide digno ejusmodi contractum esse illicitum & usurarium.

Q. 6. *Quid observandum in concursu probabilium opinionum oppositarum?*

R. Observandum utrum illæ propositiones sint æque probabiles aut altera ex illis sit minus vel

magis probabilis. Si sint æque probabiles, conscientia efficitur, aut saltem effici debet dubia; quia mens propter æqualia rationis vel auctoritatis pondera non magis in unam inclinat partem, quam in aliam. Si opposita opinio sit minus probabilis, conscientia in illo concursu non solum est dubia; sed, nisi impediatur pravo voluntatis affectu, judicabit opinionem minus probabilem probabilius esse falsam.

Dixi, *nisi conscientia impediatur pravo voluntatis affectu*; quia hujusmodi affectus judicium præcipitat, nec finit mentem attendere, nisi leviter & superficie tenus, ad ea, quæ dubium ingerere, & voluntatis impetum cohibere deberent, quod quam timendum sit monet Clerus Gallicanus anno 1700. hisce gravissimis verbis: *Neque quisquam in dubio salutis ad actum profiliat, nisi ipso dubio NON AD NUTUM VOLUNTATIS, AUT EX CUPIDITATIS INSTINCTU, sed ex reſtatione diſpoſito, dicente Scriptura, rationabile obsequium veſtrum, Rom. 12. Omnia probate, quod bonum est, tenete, 1. Theſſ. 5.*

Q. 7. *Conscientia quæ fulcitur opinione probabiliori, estne certa?*

R. Distinguendum est. Vel enim vis argumenti, quo nititur opinio minus probabilis, stat cum altera probabiliori, vel prorsus exploditur. Si primum conscientia non est certa, quia opposita opinio, quamvis minus probabilis, verisimilitudine non caret, quæ prudenti injicere debet errandi formidinem. Judex v.g. non potest certo judicare testem fide digniorem vera dicere, quandiu alterum contradicentem non potest falsi arguere. Si secundum, hoc est, si opinio probabi-

babilior explodit momenta oppositæ minus probabilis, efficaciterque ostendit non esse verisimilia, efficit conscientiam certam saltem moraliter. Expositis variis conscientiæ speciebus, superest ut definiamus quæ conscientia sit bona, statuique possit pro Regula Morum.

CAPUT III.

De bona malave conscientia.

Certum est 1. ex dictis capite præcedenti malam esse conscientiam vincibiliter erroneam id est, quæ procedit ex ignorantia eorum, quæ quis scire potest & debet.

Certum est 2. ad bonam conscientiam non requiri omnimodam certitudinem, nempe Metaphysicam, aut Physicam. *Absit vero*, inquit Clerus Gallicanus anno 1700. *ut probemus eorum errorem, qui negant licere sequi opinionem vel inter probabiles probabilissimam.* Quem errorem Alexander Octavus proscripsit anno 1690. Sed gravis est controversia, an certitudo moralis necessaria sit ad bonam conscientiam. Itaque

Q. 1. *Quid sentiendum est de conscientia dubia?*

R. Mala est, nec ea innitendum, sed suspendendus consensus, donec efficax ratio, aut indubitata auctoritas dubium dispulerit; quia *qui amat periculum, in illo peribit.* Eccli. 3. v. 21. *Graviter peccaret in rebus ad salutem animæ pertinentibus*, inquit S. Augustinus lib. 1. de Bapt. c. 3. *vel ex eo solo, quod certis incerta proponeret.* Cap. *Juvenis*, tit. de Sponsalibus. *In his, quæ dubia sunt, quod certius existimamus, tenere debemus.* Generale quoque Concilium Viennense cap. *Exivi*, de Verb. signif. *In his,*

quæ salutem animæ respiciunt, ad vitandos graves remorsus conscientiæ, pars securior est tenenda. Addit Celerus Gallicanus anno 1700. neque id consilii, sed præcepti loco habemus.

Ergo ex mala conscientia agit & peccat, qui in concursu oppositarum opinionum æque probabilium quamlibet eligit, & ex ea operatur; quia agit ex conscientia dubia. *Beatus Thomas & alii, inquit sanctus Antoninus 3. parte, tit. 3. cap. 10. paragr. 16. dicunt quod ille qui agit id, de quo est dubium, utrum sit mortale, vel non, peccat mortaliter; quia periculose exponit se mortali. Cum ergo in aliqua materia morali sunt variae & contrariæ opiniones, ille qui adhæret latiori viæ, videtur se exponere periculo mortis, quia est in dubio, cum possit illa opinio esse falsa, & contraria vera. Notent qui plures consulunt, donec acceperint consilium, quod cupiditati eorum faveat.*

Ergo à fortiori peccat, & agit ex mala conscientia, qui in praxi sequitur opinionem minus probabilem; quia opinio minus probabilis, cum probabiliore collata, est verisimilius falsa: quis autem imprudentissimum ac stultissimum non dixerit, qui poculum haurit, quod probabilius creditur veneno infectum?

Q. 2. *Quæ igitur conscientia censenda est bona & recta?*

R. Ea sola & omnis quæ est moraliter certa; namque ex dictis conscientia dubia & incerta est mala. Ergo non potest esse bona & recta, nisi sit certa saltem moraliter. Dico moraliter; quia ut observavimus, in praxi non potest haberi certitudo Metaphysica nec Physica.

Dices

Dices 1. Est regula juris, in dubiis melior est conditio possidentis, & benignior sententia est eligenda: Atqui privatus quisque est in possessione suæ libertatis: Ergo in concursu oppositarum opinionum benigniorem licite eligit.

R. 1. Distinguendo majorem, est regula juris in materia justitiæ, Concedo: in qualibet materia, Nego majorem; obstant enim supra laudatæ regulæ. *In iis quæ dubia sunt, quod certius existimamus, tenere debemus.* Item. *In iis quæ salutem animæ respiciunt, pars securior est tenenda.* Ideo autem in materia justitiæ melior est conditio possidentis; quia quando est dubium, num res aliqua pertineat ad Petrum vel ad Paulum; Paulus in illa controversia non potest illam auferre à Petro, qui illam possidet; nec Petrus tenetur ea se spoliare: cui enim eam restitueret? Potest ergo eam sibi retinere, maxime cum præsumatur eam justo titulo possidere, quandiu contrarium evinci non potest.

R. 2. Negando minorem. Imo stat possessio 1. pro lege naturali & divina; Deo quippe semper obligata fuit nostra libertas; cum ab illo essentialiter dependeat: Ergo in dubio juris naturalis & divini nefas est contra Deum litigare & libertati humanæ favere. 2. stat quoque possessio pro lege humana; homo enim naturaliter est animal sociabile: societas autem consistere nequit sine aliquo Duce & Præsidente; nascimur ergo Cives & Subditi Reipublicæ.

Fatendum tamen est in hypothese quod lex humana sit obscura, nec de ejus sensu constet apud peritiores, liberum & tutum esse in conscientia amplecti alterutram ex oppositis opinio-

nibus ; quia præscribitur adversus legem humanam , præsumiturque Legislatores consentire in oppositas legis suæ interpretationes.

Dices 2. Ex laudatis regulis , in dubiis certior & securior pars est eligenda : Ergo ad bonam & rectam conscientiam satis non est , ut sit moraliter certa , sed debet esse certior & securior.

Distinguo anteced. Eligenda est pars certior & securior , securior , inquam , secundum communem usum loquendi , Concedo securior secundum Grammaticæ leges , Nego antec. Itaque juxta communem loquendi morem dicimus aliquid esse certius & tutius comparatè ad incertum & periculosum v. g. tutius est terra proficisci , quam periculosa navigationi se committere , ubi tutius non opponitur tuto , quemadmodum apud Grammaticos , apud quos tutius sumitur comparate ad tutum ; sed opponitur incerto & periculoso. Porro perspicuum est legenti in laudatis regulis certius & securius accipi , prout opponuntur incerto & dubio.

Dices 3. cum Guimenio : potest quis opinionem amplecti , licet à principiis intrinsecis falsam & improbabilem existimet , quam Doctorum turba docet in praxi esse tutam & certam : Atqui viginti & supra Doctores idipsum testantur : Ergo.

Nego majorem , *Hoc enim novum , hoc inauditum , hoc postremo demum sæculo proditum , & pro regula morum positum repugnat huic effato à Patribus celebrato , quod ubique , quod semper , quod ab omnibus ; nec habere potest Christiana regula securitatem ,* inquit Clerus Gallicanus de opinionum probabilitate usu anno 1700. qui ibidem hanc nobis tradit
regu-

regulam, ut in rebus Theologicis ad fidei & morum dogmata spectantibus Theologos quidem etiam modernos audiamus, si tamen consonas sanctis Patribus tradant sententias. Si autem ab eis recedant, harum opinionum inhibeatur cursus, nedum earum aliqua ratio babeatur, aut ulla eis tribuatur auctoritas.

Q. 3. Conscientia potestne esse speculative dubia, & in praxi certa ac tuta?

R. Distinguendum est. Si ex quibusdam circumstantiis concurrat ratio practica & quidem certa, poterit ex ea deduci conclusio seu conscientia in praxi certa ac tuta manente dubio speculative: secus, si non interveniat ejusmodi indubitata ratio. Responsio elucidatur exemplo. Tonfor qui speculative dubitat, an radere barbas sit opus servile die Festo prohibitum, non potest certo concludere sibi licere eodem die radere, nisi ipsi præsto sit alia ratio certa in praxi, nempe, legem Ecclesiasticam non obligare cum magno familiæ dispendio, quod evidenter pateretur, si clausa ejus officina, omnes confluerent ad alios tonfores, qui palam & publice radunt Festis diebus, nemine prohibente, ex qua ratione certa, conscientiam format moraliter certam in praxi sibi licitum esse radere die Festo, quamvis speculative dubitet, num opus illud sit servile & ab Ecclesia prohibitum: sic mulier speculative est dubia de veritate matrimonii bona fide initi, nec dubium illud potest displicere, quacumque diligentia adhibita; potest tamen practice esse certa teneri se marito exigenti debitum reddere; quia occurrit ipsi alia certa ratio, scilicet neminem in dubio privandum esse jure suo.

Ergo in praxi periculosum est statuere simpliciter & absolute conscientiam posse esse practice certam simul & speculative dubiam; quia facile quis in quolibet dubio ad nutum voluntatis sibi formaret conscientiam, omnes dubitandi rationes abjiceret, certumque se in operatione crederet eo ipso, quo vellet esse certus.



DE LEGE.

CAPUT PRIMUM.

De Notione Legis.

Q. 1. *Quid est Lex?*

R. Definitur, rationis ordinatio stabilis ad bonum publicum promulgata ab eo, qui curam habet communitatis cum intentione obligandi subditos.

Dicitur 1. *Rationis ordinatio*, quia lex est actus prudentiæ, quo legislator membra Reipublicæ inter se componit & mediis aptis dirigit ad suum ultimum finem. Unde 1. Ethic. cap. 9. lex dicitur: *Sermo ab aliqua prudentia & mente profectus.*

Dicitur 2. *Stabilis*, hoc est, non ad tempus, sed in perpetuum duratura, nisi abrogetur: quo differt lex à mandato vel præcepto, quod non est ita firmum & stabile; quia non solet dirigi nisi ad privatas personas aut familiam, quæ successu tem-

temporis extinguatur : Lex vero imponitur toti communitati, quæ numquam interit.

Ergo lex ligat non solum præsentēs, sed & eorum successores, non vero præceptum aut mandatum.

Ergo defuncto Episcopo, statuta ejus obligant, quandiu non revocantur à successore. Secus sentiendum de ejus mandatis, quæ non sunt lata per modum legis aut statuti.

Dicitur 3. *Ad bonum publicum*; quia potestas legislativa est à Deo, Rom. 13. v. 1. & Principibus, sive Ecclesiasticis, sive Politicis concessa non in eorum privatam utilitatem, sicut potestas dominativa Domini in servum & rem domesticam, sed in totius Reipublicæ ædificationem. 2. Cor. 10. v. 8. turpe enim est totum ad partem referri, cum pars naturaliter ordinetur ad totum. Unde 4. Ethic. c. 1. Leges ad Rempublicam sunt accommodandæ, non Respublica ad Leges.

Ergo vera lex non est, nec ligat subditos, quæ contraria est juri vel naturali, vel divino.

Dices; hæc definitionis particula subditorum inobedientiam fovet, & ad seditionem inducit; familiare quippe est subditis conqueri se gravari legibus iniquis & superfluis: Ergo.

Nego antec. namque 1. Non ex vulgi opinione, sed ex Sapientum judicio æquitas legum pensanda est. 2. in dubio sitne lex justa an injusta, utilis an superflua? præsumptio debet esse pro Legislatore; quia, ut jam dictum est, in dubiis melior est conditio possidentis: Atqui legislator est in possessione regendi subditos: Ergo in hoc dubio non est ei deneganda obedientia, maxime cum subditi motiva & rationes ignorent,

propter quas leges feruntur. 3. Quamvis leges nonnumquam habeant aliud iniqui respectu unius aut alterius privati, justæ nihilominus censendæ sunt, cum toti communitati expediant. Si enim medicus laudatur, dum secundum artis regulas membrum alioquin sanum, cauterio inurit ut totius corporis saluti consulat, quidni & Legislator, qui lege sua nonnullos gravat ex necessitate procurandi boni publici?

Instas, cessante fine legis, ipsa quoque lex cessare dicitur: Ergo privatus non tenetur parere legi, quando est ipsi inutilis.

Distinguo antec. cessante fine legis universaliter & respectu totius communitatis, Concedo: cessante dumtaxat respectu quorundam, Nego antecedens. Unde clericus, qui contra statutum Diœceseos manducat in taberna sub eo prætextu, quod tabernarius sit amicus, servetque temperantiæ & honestatis leges, nec proinde finis statuti in ipsum cadat, nihilominus peccat; quia finis ejusdem statuti in tota Diœcesi subsistit, rectusque ordo postulat, ut pars toti cohæreat.

Dicitur 4. *Promulgata*, id est, enunciata & intimata, regula enim morum innotescere debet: innotescit autem per promulgationem.

Ergo etiam si ante promulgationem didicerint subditi quid Princeps decreverit, illud tamen decretum non habet rationem legis & regulæ observandæ, ad promulgationem autem necesse non est, ut lex singulis personis intimetur ex C. *Ad hæc*. De Prælatorum postulatione.

Ergo post promulgationem subditi tenentur diligentiam adhibere, ut discant quid lex ferat, peccantque si ex ignorantia vincibili illam transgrediantur.

Di-

Dicitur 5. *Ab eo, qui curam habet communitatis.* Quibus verbis duo designantur in Legislatore necessaria. Primum ut sit superior; quia omnis lex est præceptum, quamvis non omne præceptum habeat rationem legis, ut jam observavimus: Atqui solus superior præcipere potest: Ergo. Secundum, ut jurisdictionem exterioriorem habeat, hoc est ut præsit communitati perfectæ, v.g. Regno, Diœcesi. Quinam autem censeantur subditi, an & quomodo advenæ & peregrini, consule Tom. 3. de Legibus, part. 2. cap. 6.

Dicitur 6. *Cum intentione obligandi*, ut distingua-
tur lex à consilio, quod dari potest æqualibus ac
superioribus; nec per se inducit obligationem.
Lex vero cum præceptum contineat, non impo-
nitur, nisi inferioribus & subditis.

Q. 2. *Omnis lex obligatne in conscientia & sub peccato?*

R. Obligat etiam aliquando sub peccato mor-
tali, de lege naturali & divina nulla potest esse
difficultas, cum transgressio illius sit vera Dei of-
fensa, pugnaretque contra ejus voluntatem. Nam
ex Tertulliano lib. 1. contra Marcionem cap. 26.
Deus necessario offenditur facto, quod non vult fieri,
cum offensa sit comes frustratæ voluntatis. De lege au-
tem humana sive Ecclesiastica, sive civili, con-
stat ex Apostolo Rom. 13. *Qui resistit potestati,*
Dei ordinationi resistit; qui autem resistunt, ipsi sibi dam-
nationem acquirunt. Ideo necessitate subditi estote, non
solum propter iram, sed etiam propter conscientiam.

Q. 3. *Unde colligitur legem obligare sub mortali peccato?*

R. Ex materiæ gravitate; nam vis & efficacia
legis pendet à voluntate Legislatoris, quæ ut sup-
ponitur

ponitur recta, longe magis expetit servari ea, quæ sunt graviora, ac proinde magis offenditur, si ea negligi contingat.

Ergo transgredi legem in re levi, levis est etiam culpa, nisi adsit formalis contemptus; nam ex Sancto Bernardo lib. de præcept. & disp. cap. 8. *ubique culpabilis neglectus, & contemptus damnabilis; quia qui contemnit, adversus superiorem se erigit, auctoritatemque ejus deprimit. Porro ejusmodi elatio, inquit Sanctus Bernardus citato loco, in minimis mandatis culpam facit non minimam, & convertit in crimen gravis rebellionis novum satis leve simplicis transgressionis. Non est enim id ipsum nolle obedire, & non obedire. Hoc quippe interdum erroris est, nonnumquam & infirmitatis: illud vero aut odiosæ pertinaciæ, aut contumaciæ non ferendæ.*

Dices: dantur leges pœnales, quæ non obligant sub culpa, sed solum sub pœna: Ergo.

Nego antecedens; quia omnis pœna, si justa sit, supponit necessario culpam; nisi constet voluntatem Legislatoris non esse obligare sub peccato. Unde autem constare possit consule Tom. 3. de Legibus, part. 2. cap. 15. ubi plura de lege pœnali.

Q. 4. *Acceptatio legis estne necessaria, ut vim habeat obligandi?*

R. Minime, quia si leges vim & efficaciam acciperent à subditorum consensu, potestas legislativa minus esset penes superiorem, quam penes subditos. Unde merito Alexander VII. & Clerus Gallicanus anno 1700. damnarunt hanc propositionem, ut scandalosam, seditiosam, & Apolicæ doctrinæ contrariam, *Populus non peccat, etiamsi absque*

absque ulla causa non recipiat legem à Principe promulgatam.

Ergo peccant, qui sine justa causa legi promulgatæ primi contradicunt, resistunt enim potestati obedientiam exigenti.

Dixi, *qui primi contradicunt*, 1. Quia licet cum debita reverentia Principi exponere, si quæ prævideantur ex lege incommoda secutura, & interim executionem differre. 2. Quia cum superior legi à se latæ non insistit propter subditorum resistantiam, præsumitur acquiescere, ut lex effectu careat; cum enim lex feratur in bonum publicum, optimi Principis est obligationem relaxare, quando videt legem à se latam turbare pacem, & vergere in boni publici detrimentum.

CAPUT II.

De divisione Legis.

Q. 1. *Quotuplex est Lex?*

R. Generatim dividitur in æternam, naturalem & positivam.

Q. 2. *Quid est Lex æterna?*

R. Est summa ratio, secundum quam Deus cuncta regit & gubernat, diciturque à sancto Bernardo Lex Dei, quam tanquam regulam divina ejus providentia sequitur in actuali rerum gubernatione.

Ergo, cum nemini liceat ignorare Dei existentiam & providentiam, notum quoque omnibus esse debet legem æternam existere; evidens quippe est Deum, utpote sapientissimum & optimum, ea regere, quæ ipse condidit & conservat.

Ergo

Ergo lex æterna una est, immutabilis, & indefectibilis, quia realiter est Deus ipse, unus & immutabilis.

Ergo à lege æterna omnes leges derivantur; quia in regimine Monarchico omnes Ministri ad mentem & voluntatem Principis attendere debent, à quibus si devient, iniqua illorum judicia censentur. *Lex Dei*, inquit sanctus Augustinus quæst. 58. in Exod. *sempiterna est, quam consulunt omnes piæ mentes, ut quod in ea invenerint, vel faciant, vel jubeant, vel vetent, secundum quod illa incommutabili veritate perceperint.*

Q. 3. *Quid est Lex naturalis?*

R. Est legis æternæ fulgor & radius, creaturæ rationali à Deo impressus, dictans & præcipiens quid agere aut fugere debeat. *Unde patet*, inquit sanctus Thomas prima secundæ qu. 91. art. 2. *quod lex naturalis nihil aliud est, quam participatio legis æternæ in rationali creatura, quemadmodum illuminatio oculorum est ipsamet lux Solis in oculos sese diffundens.* *Hoc lumen*, inquit Sanctus Augustinus in Psalm. 4. *est totum hominis, & verum bonum.* *Signatum autem dicit in nobis, tanquam denarius signatur Regis imagine, homo enim factus est ad imaginem & similitudinem Dei.*

Q. 4. *Potestne deleri lex naturalis?*

R. Obumbrari quidem potest in conclusionibus, præsertim remotioribus, ut dictum est ubi de ignorantia Tract. de Act. Hum. sed deleri omnino non potest; alioquin homo desineret esse rationalis, & imago Dei. *Potest obumbrari*, inquit Tertullianus lib. de Anima cap. 41. *quia non est Deus; extinguere non potest, quia est à Deo.*

Ergo cum natura rationalis una sit ubique &
in

in omnibus, lex quoque naturalis ubique & in omnibus est una, quamvis in applicatione propter varias circumstantias sit diversa, ut docet Sanct. Thomas quæst. 94. art. 4.

Q. 5. *Quid est lex positiva?*

R. Est ea, quæ legi naturali superaddita est ex libera Legislatoris voluntate.

Q. 6. *Quomodo dividitur lex positiva?*

R. Dividitur in divinam & humanam.

Divina habet Deum auctorem, humana hominem.

Q. 7. *Quotuplex est lex divina?*

R. Duplex, scilicet scripta, diciturque lex vetus, Mosaica, quia per Moysen promulgata est, vetus Testamentum: & lex gratiæ, non scripta atramento, sed spiritu Dei vivi in eorum cordibus, qui eam receperunt, vocaturque lex nova, novum Testamentum.

Q. 8. *Quotuplex est lex humana?*

R. Duplex, alia est communis omnibus Nationibus, diciturque jus Gentium: alia, in qua non omnes conveniunt, & hæc, si à potestate Ecclesiastica procedat, dicitur lex Canonica, seu Ecclesiastica: si à potestate politica, dicitur lex civilis.

Q. 9. *Quotuplici modo lex naturalis distinguitur à lege positiva, sive divina, sive humana?*

R. Triplici; 1. Lex naturalis simul cum natura indita est, nihilque præscribit, quod quisque in corde suo (si attendere velit) cernere non valeat, v. gr. Deum colendum, parentes honorandos, nemini nocendum: lex vero positiva extrinsecus supervenit; & ordinat quæ ratio naturalis non dictaret observanda, v. gr. Baptismus
fusci-

fufcipiendum, à carnibus abftinendum diebus Veneris. 2. præcepta legis naturalis neceffaria funt, nec pendent à libero Dei, aut cujufvis Legislatoris voluntate : præcepta vero legis pofitivæ funt mere arbitraria. Deus v. g. nec prohibere poteft juftitiam, religionem, pietatem erga parentes, nec imperare mendacium, adulterium, odium proximi; hæc quippe repugnant naturæ tum divinæ, tum humanæ, quæ eft ad imaginem Dei condita : fed liberum illi fuit primo præcipere circumcifionem, efum Agni Pafchalis; quæ funt legis pofitivæ, & eadem poftmodum in lege nova prohibere. Hinc 3. & maxime quæ prohibentur lege naturali funt per fe mala, & ideo prohibita, ut mendacium, injuftitia &c. & quæ præcipiuntur, adeo funt neceffaria, ut turpe effet ea prætermittere, v. g. amare Deum, colere parentes. Quæ verò vetantur lege pofitiva, per fe funt licita, plerumque etiam indifferentia, nec mala evadunt, nifi quia prohibita, ut apud Judæos efus carnis fuillæ ac fuffocatae, & apud Chriftianos opera fervilia, carnisque efus certis quibusdam diebus. Similiter quæ eadem lege præcipiuntur, etfi aliquando funt utilia, tamen neceffaria non funt, nec eorum omiffio repugnaret rationi, fi non præciperentur, ut jejunium Quadragefimale, cœlibatus Clericorum, &c.

Ergo ex craffa ignorantia Clerici obmurmurant, aut obmurmurarent contra Diœcefeos fuæ ftatuta, quibus prohibentur venatio, ludus aleæ & chartarum, popinarum frequentatio & alia fimilia, eo prætextu quod per fe mala non funt, fed indifferentia; nulli enim Clericorum ignorare licet

licet allatum discrimen legem naturalem inter & positivam, Prælatisque à Deo concessam potestatem statuendi & fanciendi, quæ ad bonum publicum promovendum expedire judicaverint.

Ergo lex naturalis est immutabilis, nullam abrogationem, derogationem, dispensationem admittit, nec adversus illam usu contrario præscribi potest; quia nunquam licet facere quæ per se mala sunt, quæve repugnant naturæ divinæ & rationali. Lex vero positiva iis modis mutari potest; quia præcepta ejus sunt arbitraria, pendenteque ex libera Legislatoris voluntate.

Dices 4. Deus sæpius dispensavit in lege naturali; namque permisit 1. In prima generis humani generatione fratres in matrimonium ducere sorores. 2. Judæos auferre Ægyptiorum vasa pretiosa, & usuras ab alienis accipere. 3. Plures simul habere uxores, & matrimonia dissolvere, dato libello repudii. 4. Abrahamum immolare filium suum. 5. Prophetam Oseæ filios fornicationis suscipere ex meretrice. 6. Potestatem concessit Ecclesiæ dispensandi in votis & juramentis, quæ omnia sunt juris naturalis. Ergo lex naturalis Dei dispensatione mutari potest.

Distinguo antec. dispensavit improprie, mutando materiam legis, & efficiendo ut non pertineret ad legem naturalem, v. g. transferendo in aliquem dominium rei alienæ, Concedo: dispensavit proprie, permittendo v. g. ut quis rem alienam invaderet, Nego anteced. Itaque cum Deus sit rerum omnium Dominus; dedit Judæis Ægyptiorum divitias, & aliarum Gentium, à quibus usuras exigebant, (nisi tamen hoc poste-

rius toleraverit potius quàm concesserit.) Dedit Abrahamo potestatem sibi immolandi filium unigenitum : dedit Oseæ dominium in corpus meretricis, fecitque ut esset ejus uxor, ac etiam nunc ministerio Prælatorum condonat facta sibi promissa etiam juramento firmata : Osee, inquit sanctus Thomas quæst. 110. art. 8. *accedens ad uxorem fornicariam, vel mulierem adulteram non est mæchatus vel fornicatus ; quia accessit ad eam, quæ sua erat secundum mandatum divinum, qui est author institutionis matrimonii.* Item Deus, utpotè supremus societatis humanæ auctor & moderator, potuit quod non possunt homines ordini ab ipso instituto subditi, nempe justis de causis uni & eidem viro tribuere jus in corpora plurimum fœminarum, & libello repudii revocare quod prius concesserat ; nec in extraordinaria illa dispositione violavit jura societatis humanæ, quemadmodum, cum operatur miracula, vim naturæ non infert, sed agit supra naturalem rerum ordinem, ut docent Theologi. At ubi materia legis est immutabilis, Deus nec proprie, nec improprie dispensare potest, v. g. permittere mendacium, perjurium, blasphemiam, idololatriam, quia illa semper per se sunt mala.

Dices 2. Præceptum observandi Sabbati ad legem naturalem pertinet, cum in prima Decalogi tabula tertium locum obtineat : Atqui præceptum illud, adveniente lege Evangelica, mutatum est : Ergo lex naturalis non est immutabilis.

Distinguo majorem : ad legem naturalem pertinet sub alio respectu, Concedo : sub omni respectu, Nego majorem. In præcepto itaque observandi Sab-

Sabbati duo sunt distinguenda, nempe res ipsa quæ præcipitur, & tempus, quo executioni est demandanda. Præcipitur primo ut homo aliquamdiu vacet rebus divinis, & propriæ salutis prospiciat: deinde determinatur tempus, quo id præstare debeat, scilicet, dies Sabbati. Primum pertinet ad Legem naturalem; ratio quippe naturalis dicitur propriæ salutis consulendum, vacandum orationi & meditationi rerum cœlestium, ne usu rerum temporalium noster in Deum amor tepescat, aut etiam extinguatur. Quod autem his spiritualibus exercitiis homo incumbat diebus Sabbatorum potius, quam aliis, pertinet ad Legem positivam; neque enim ratio dicitur ejusmodi dies præ cæteris necessario esse eligendos.

Ergo qui in Republica terrenis occupationibus die Dominica toti detinentur, nisi spiritale damnum, quod inde incurrunt, aliis hebdomadæ diebus refarciant, contra Legem naturalem peccant & propriæ salutis periculum subeunt; opus enim salutis perficitur, non corporis, sed animi viribus, quæ sicut uberiori Dei cognitione & amore crescunt; ita ejusdem oblivione sensim evanescent.

CAPUT III.

De Lege humana.

Q. I. *Præter Legem naturalem & divinam estne necessaria Lex humana?*

R. Affirmative; tum quia in humana societate plura ordinanda occurrunt, tum circa cultum divinum, tum circa contractus, quæ lex divina

prætermittit, nec ex lege naturali necessario deducuntur : tum quia plures inveniuntur protervi & ad vitia proclives, qui, ut scribit Sanct. Thomas quæst. 96. art. 1. *Verbis de facili moveri non possunt.* *Necessarium ergo fuit quod per vim & metum cohiberentur à malo.*

Q. 2. *Lex humana debetne prohibere omnia vitia?*

Negat Sanct. Thomas cit. quæst. art. 2. Quia lex essentialiter est ordinatio ad bonum commune; Atqui lex humana omnia mala prohibens esset bono communi noxia, utpote observatu difficilia; in societate enim humana plures reperiuntur infirmi, quam sani: quæ autem possibilia sunt sanis, infirmis sunt moraliter impossibilia. Unde multiplicarentur transgressionibus, & cives evaderent peiores, cum tamen sit legis officium illos efficere bonos. Ita S. Thomas.

Q. 3. *Quot modis lex humana potest desinere?*

R. Quatuor. 1. Per revocationem, aut aliam legem contrariam. 2. Per privilegium. 3. Per dispensationem. 4. Per consuetudinem.

Q. 4. *Quid est dispensatio?*

R. Est relaxatio juris communis cum cognitione causæ, facta in quibusdam casibus à Superiore ob rationabilem causam.

Dicitur 1. *Relaxatio juris communis*, ut distinguatur 1. ab interpretatione Legis, quæ est mera Legis explicatio, in qua Superior simpliciter & juridice declarat Legem ad casum sibi propositum non extendi, v. g. votum non obligare in iis circumstantiis. Vulgo tamen hæc interpretatio vocatur dispensatio, sed improprie; Prælati quippe Legem naturalem, aut divinam non relaxat: 2. A privilegio, quod plerumque non est con-

contra , sed præter legem , ut privilegium Clericale.

Dicitur 2. *Cum cognitione causæ* : quia lex non est relaxanda, nisi adhibita diligenti consideratione , ut habetur cap. *Necessaria*. Causa 1. q. 7. per dispensationem enim plaga infligitur disciplinæ, quod non debet fieri absque magna cautione.

Dicitur 3. *In quibusdam casibus* , in quo differt iterum à privilegio , quod conceditur in perpetuum , & per modum legis.

Dicitur 4. *Facta à Superiore* ; quia ex S. Thoma q. 97. art. 4. *Periculosum esset , ut hoc iudicio cuiuslibet committeretur ; & ideo ille , qui habet regere multitudinem , habet potestatem dispensandi in lege humana , quæ sua auctoritate nititur.*

Ergo inferior non potest dispensare in Lege superioris, nisi id ipsi sit concessum vel jure , vel consuetudine , vel delegatione , *Lex superioris per inferiorem tolli non potest* , cap. *Romani*. Clementina, tit. de Elect. Et ratio est , tum quia Lex Superioris nititur ejus auctoritate ; tum quia inferior ipse Lege Superioris constringitur , eique parere debet sicut cæteri.

Dixi. *Nisi id ipsi sit concessum , &c.* Ex usu enim, Episcopi dispensant in Canonibus & præceptis universalibus Ecclesiæ, nisi dispensatio sit specialiter reservata Summo Pontifici.

Dicitur 5. *Orationabilem causam* , quia ex Concilio Tridentino sess. 25. cap. 18. de Reform. *Frequentius legem solvere , nihil aliud est , quam unicuique ad leges transgrediendas aditum aperire.* Et sanctus Bernardus lib. 3. de Confid. cap. 4. *Ubi necessitas urget , inquit , excusabilis dispensatio est : ubi utilitas provocat , dispensatio laudabilis est , utilitas , dico , communis.*

munis, non propria: nam cum nihil horum est, non plane fidelis dispensatio, sed crudelis dissipatio.

Ergo peccant, qui sine causa dispensationes petunt, aut ut petantur consulunt, quia dispensatorem ad peccandum inducunt; peccatum autem illud ex natura sua est mortale, ut docent communiter Thologi; quia est in materia gravi, & contrarium bono publico. Dico, *ex natura sua*; quin potest esse veniale, vel ex ignorantia, vel ex levitate materiæ.

Q. 5. *Dispensatio sine causa estne valida?*

R. Si facta sit ab ipso Legislatore, vel ab ipsius successore, valida est, quamvis illicita; quia ex dictis lex positiva non habet vim obligandi, nisi ex voluntate Legislatoris. Si autem facta sit ab inferiore, irrita est, & prorsus nulla; quia inferior non potest dispensare secum in lege superioris: Ergo nec cum aliis. Nec præsumitur superior dedisse inferiori potestatem dispensandi sine causa in sua lege, cum non potuerit absque peccato ejusmodi potestatem concedere.

Ergo nulla est dispensatio sine causa à Summo Pontifice obtenta in voto, & juramento, censeturque subreptitia; quia lex voti & juramenti est Juris divini, cui subest Summus Pontifex.

Ergo sine causa valide non dispensaret Episcopus in impedimentis matrimonii; quia hujusmodi impedimenta sunt Leges universalis Ecclesiæ, quæ est supra Episcopum.

Quam plurimæ in praxi occurrunt difficultates circa dispensationes, præsertim quæ emanant à Sede Apostolica, quas attigimus tom. 3. de Legibus, cap. 11. 12. 13. & tom. 7. de Matrimonio, cap. 10.

Q. 6.

Q. 6. *Lex definitne per quamlibet consuetudinem contrariam?*

Certum est adversus Legem naturalem, aut divinam positivam præscribi non posse per ullam consuetudinem, etiamsi supponatur universalis & omnium hominum memoria antiquior: tum quia utraque illa lex non pendet à voluntate hominum, ut pro eorum nutu & contrariis moribus mutari possit: tum quia Lex naturalis est ipsamet veritas & recta ratio, adversus quam agere est per se malum; Lex vero Evangelica ex Christi institutione permanebit usque ad consummationem seculi, Matth. 24. v. 14. Unde cap. *Qui contempta*, distinct. 8. hæc referuntur ex Sanct. Augustino: *In Evangelio Dominus ait, Ego sum veritas: non dixit; Ego sum consuetudo. Itaque cedat consuetudo veritati. Et cap. Frustra, ex eodem S. Doctore, Frustra quidem, qui ratione vincuntur, consuetudinem nobis objiciunt; quasi consuetudo major sit veritate.*

Ergo consuetudo, quæ in aliquibus Provinciis obtinuit lucrum percipiendi ex mutuata pecunia, etiam pupillorum, & mera corruptela est; quia adversatur Legi naturali & divinæ, cui nemo præscribere potest, non spatia temporum, non patrocinia personarum, non privilegia nationum, inquit Tertullianus lib. de Velandis Virginibus cap. 1. Frustra ergo opponuntur spatia temporum, *Cum tanto graviora sint peccata quanto diutius infelicem animam detinent alligatam*, ut habetur cap. *Cum tanto*, tit. de Consuetudine. Frustra patrocinia personarum illustrium & magni nominis; quia non ex personis legem, sed ex lege personas judicamus. Frustra privilegia Provinciæ, aut Nationis: quia, ut dicitur citat. cap. *Cum tanto*, quod est Grego-

rii IX. *Nemo sanæ mentis intelligit naturali juri (cujus transgressio periculum salutis inducit) quacumque consuetudine (quæ dicenda est verius in hac parte corruptela) posse aliquatenus derogari. Itaque de lege humana dumtaxat potest esse quæstio, ad quam*

R. Consuetudo præscribit adversus Legem humanam, modo tria concurrant. 1. Legislatores non contradicant. 2. Sit universalis etiam apud Sapientiores: si enim Legislatores, vel sanior pars communitatis resistit, consuetudo non præscribitur censeturque prævaricatio in legem. Hinc 3. quando non constat de voluntate Legislatoris, forte ignorat consuetudinem, vel ad illam non attendit. Ut consuetudo deroget Legi Civili, requiritur decennium; Legi vero Ecclesiasticæ spatium 40. annorum.

Q. 7. *Consuetudo potestne habere vim Legis, & esse regula morum?*

R. Potest, modo sit utilis bono publico, inducaturque sit animo se obligandi: *Mos populi Dei*, inquit Sanct. Augustinus Epist. 36. alias 86. & *instituta majorem pro Lege sunt tenenda: & sicut prævaricatores Legum divinarum, ita & contemptores consuetudinum Ecclesiasticarum coercendi sunt.*

CAPUT IV.

De veteri Lege divina.

Q. 1. *Lex vetus fuitne bona?*

Negarunt Marcionitæ, deinde Manichæi & Priscillianistæ statuentes duo rerum principia; alterum malum, quod fingebant esse auctorem Legis veteris, & ideo malæ in eorum sententia;

tentia; alterum bonum, à quo exiit Lex Evangelica, & secundum eos bona. Adversus quos

R. De fide est, Legem veterem fuisse bonam, & à Deo conditam, Rom. 4. v. 12. *Itaque lex quidem sancta, & mandatum sanctum, & justum & bonum.* Hebr. 1. *Multifariam multisque modis Deus loquens olim in Prophetis.*

Dices 1. Deus Ezech. 10. de Lege veteri sic loquitur, *Dedi eis præcepta non bona*: Ergo Lex vetus est mala.

Nego conseq. Nam pater ad frangendam cervicem filii protervi laboriosa & duriora opera ipsi injungit, quæ secundum se spectata bona sunt & utilia; comparate vero ad ea, in quibus exercet fratres ejus egregiæ indolis, bona non sunt.

Dices 2. Gal. 3. Lex vetus est *ordinata per Angelos in manu mediatoris*, id est, Moyfis: Ergo non est à Deo.

Distinguo anteced. Per Angelos tamquam Dei ministros & ejus nomine agentes & loquentes: per Moysen vero tamquam Legis promulgatorem, Concedo: per Angelos & Moysen tamquam Legis auctores, Nego antecedens; nam Moyses Exod. 24. *Narravit Plebi omnia verba Domini, atque judicia; responditque populus una voce, omnia verba Domini, quæ locutus est, faciemus.*

Q. 2. *Quotuplicis generis erant præcepta in Lege veteri?*

R. Triplicis. 1. Moralia, quæ pertinent ad morum Disciplinam, digito Dei descripta in duabus Tabulis, Exod. 20. solentque dici Decalogus, eo quod sint numero decem. 2. Cæremonialia, quæ cultum Dei spectant, ut Sacrificiorum & Purificationum Leges. 3. Judicialia, quæ

sunt Leges Civiles & Politicæ, quibus Judæorum societas regebatur.

Q. 3. *Quare Deus Legem naturalem in tabulis scribi voluit, cum ex dictis in cordibus hominum ita sit expressa, ut omnino deleri non possit?*

Respondet S. Augustinus Enarr. in Psalm. 57. *Scriptum est in tabulis, quod in corde non legebant: non enim scriptum non habebant, sed legere volebant. Oppositum est oculis eorum, quod in conscientia legere cogerentur*: Adde quod concupiscentia & affectus inordinati, etsi Legem naturalem omnino delere non possint, illam tamen valde obscurant rationemque ita perturbant, ut facile homo malum tamquam bonum apprehendat. Unde Apostolus Rom. 7. ait, *Concupiscentiam nesciebam, nisi lex diceret, non concupisces.*

Q. 4. *Lex vetus obligabatne omnes Gentes?*

R. Præcepta Decalogi, cum sint Legis naturalis, omnes obligant; sed præcepta cæremonialia & judicialia solis data sunt Judæis, Deut. 4. *Quæ est alia gens tam incluta, quæ habeat cæremonias & iusta judicia?* Gentilibus tamen licebat amplecti Legem quamvis sine ea absolute salvari potuissent, Exod. 12. v. 48.

Q. 5. *Lex vetus debuitne in æternum durare?*

R. Minime; sed data est ad tempus, donec veniret semen, cui promiserat; Galat. 3. v. 19. tum quia finis Legis est Christus, Rom. 10. v. 4. Atqui obtento fine, cessare debent ea, quæ sunt ad finem tum quia Lex erat umbra futurorum, Hebr. 10. v. 1. Atqui fulgente luce & veritate, evanescunt umbræ & figuræ.

Q. 6. *Quando Lex mutata est?*

R. 1. Abrogata est in morte Christi; quia Lex
no-

nova tunc sancita est, & novum Testamentum conditum, Hebr. 9. v. 16. & 17. *Ubi testamentum est, mors necesse est intercedat testatoris; testamentum enim in mortuis confirmatum est.* 2. Desit obligare Judæos die Pentecostes, quo Lex Evangelica promulgata est, ut patet ex c. 2. Aët. tunc enim Lex nova obligare cœpit, & consequenter Judæi ex illo tempore veteri Lege non fuerunt constricti.

Supereſt gravis difficultas utrum statim post promulgatum Evangelium Lex vetus fuerit mortifera, adeo ut cultus ejus fuerit superstitiosus, nec observari potuerit absque peccato?

Affirmavit S. Hieronymus Epistola, quæ est 75. inter Epistolas S. Augustini, ubi contendit S. Petrum & alios Apostolos ea usos simulatorie, hoc est non in honorem ejusdem Legis, nec ad Dei cultum, quemadmodum si quis nunc à suffocato abstineret, non Religionis, sed solius sanitatis causa, vultque S. Doctor, S. Petrum à S. Paulo reprehensum, Galat. 2. in speciem tantum & ex composito, ut per ejusmodi reprehensionem Judæi legalibus nimis addicti, intelligerent ea non amplius esse servanda. Sed patet ex cap. 8. lib. 1. quem scripsit idem sanctus Hieronymus adversus Pelagianos, ipsum tandem descendisse in sententia Sancti Augustini, quæ est communis Catholicorum, nempe observationem Legis veteris aliquamdiu post Pentecosten fuisse per se licitam, cum ipsi Apostoli eam observaverint. Sanctus Paulus Timotheum circumcidit Aët. 18. vers. 23. Ritus purificationis Legalis observavit suadentibus Sancti Jacobo, & Senioribus, Aët. 21. v. 26. Quin Apostoli in Concilio Hierosolymitano Aët. 15. v. 29. præceperunt eis, qui ex Gentibus Religionem

gionem Christianam amplexi fuerant, ut abstinerent ab immolatis simulacrorum, & sanguine suffocato, & fornicatione, quam Gentiles crimen non existimabant, quamvis ejus prohibitio pertineat ad Legem naturalem. Quod autem hæc Apostolica Constitutio, quoad priora capita sit lata dumtaxat ad vitandum Judæorum scandalum, patet, tum ex cap. 14. ad Rom. tum ex cap. 10. I. ad Cor. ubi Apostolus cibus hujusmodi uti permittit, quando id fieri potest absque aliorum scandalo.

Dici autem non potest ista per simulationem facta & dicta ab Apostolis, cum ejusmodi simulatio fuisset mendacium & quidem grave. Assumere enim signum falsæ Religionis, v.gr. coram idolo thus incendere, etiam sine animo colendi idolum, est grave peccatum contra Religionem: Atqui in hypothesi S. Hieronymi, quod Lex fuisset superstitiosa & mortifera, Apostoli Legalia cum Judæis observantes, tanti criminis reos se constituissent.

Certo certius est ergo Apostolos ex animo observasse Legalia, *non ex necessitate salutis, sed ex consuetudine solemnitatis*, inquit S. Augustinus, hoc est, ut Synagoga honorifice sepeliretur, persuasum redderent Legem veterem per se non esse malam, & Judæos suis ritibus valde addictos facilius ad fidem adducerent.

Dices: Apostolus ait Gal. 5. v. 2. *Si circumcidamini, Christus vobis nihil proderit.* v. 4. *Evacuati estis à Christo, qui in Lege justificamini, à gratia excidistis,* v. 9. *Modicum fermentum totam massam corrumpit*, hoc est, minima legis observatio Evangelium Christi pervertit: Ergo observatio Legis tem-

tempore Apostolorum vere fuit illicita & mortifera.

Distinguo consequens : Fuit illicita & mortifera in iis, qui illam credebant ad salutem necessariam, quemadmodum docebant Ebionitæ, Cerebantiani, & Nazaræi, adversus quos strenue militavit Apostolus, ac propterea multas persecutiones sustinuit, Concedo : fuit per se illicita & mortifera : Nego consequentiam. Namque ut jam observavimus, Apostolus Rom. 14. & 1. Cor. 10. permittit fidelibus vesci carnibus immolatis, ubi id fieri potest absque infirmorum offensione, prohibet vero juxta Constitutionem Apostolicam, Act. 15. si inde alii scandalum patiuntur. *Si quis autem dixerit, inquit 1. Cor. 10. v. 28. hoc immolatum est Idolis, nolite manducare, propter illum qui indicavit, & propter conscientiam : conscientiam autem dico non tuam, sed alterius.* Atque ea ratione ipse Apostolus, qui circumciderat Timotheum, numquam adduci potuit, ut Titus circumcideretur Gal. 2. v. 3. & 5. quia in uno erat scandali periculum, non in altero. Quod periculum cum Sanct. Petrus non satis cavisset ex inadvertentia, palam in faciem ei restitit. *Quia reprehensibilis erat, Gal. 2. v. 11.* Sed in illa reprehensione rarius & sanctius exemplum Petrus posteris præbuit, inquit Sanct. Augustinus Epist. 82. *quo non dedignarentur . . . etiam à posterioribus corrigi ; quam Paulus, quæ confidenter auderent etiam minores majoribus pro defendenda Evangelica veritate, salva fraterna charitate, resistere.* Porro certum est peccatum illud non fuisse lethale, cum S. Petrus & cæteri Apostoli essent in gratia confirmati.

Q. 7. Quando ergo observatio Legalium evasit mortifera?

R. Communior est sententia evasisse mortiferam à destructione Templi Hierosolymitani: tum quia Synagoga tunc temporis fuit omnino extincta; & ex tunc cessarunt Sacrificia Aronica, & alia Judæorum solemnia: tum quia Evangelium jam erat prædicatum in universa creatura, quæ sub cælo est, Col. cap. i. v. 23.

CAPUT V.

De Lege Evangelica.

Q. 1. *Quotuplici modo accipi potest Lex Evangelica?*

Respondet Sanct. Thomas prima secundæ quæst. 106. art. 1. dupliciter accipi. 1. Pro ipsamet gratiæ & charitatis largitione. 2. Pro doctrina sive verbo, sive scriptis tradita tamquam signo quo nobis innotescit gratia, quæ per Christum facta est, Joan. i. v. 17. Sic in civilibus testamentum duobus modis sumitur. Pro ipsamet donatione facta, causa mortis. 2. Pro instrumento seu scriptura, qua testator significat hanc fuisse ultimam suam voluntatem. Verba sunt Angelici Doctoris, *Quod est potissimum in Lege novi Testamenti, & in quo tota ejus virtus consistit, est gratia Spiritus Sancti, quæ datur per fidem Christi: & ideo principaliter Lex nova est ipsa gratia Spiritus Sancti. . . . Habet tamen Lex nova quædam sicut dispositiva ad gratiam Spiritus Sancti, & ad usum hujus gratiæ pertinentia, quæ sunt quasi secundaria in Lege nova, de quibus oportuit instrui fideles Christi & verbis & scriptis, tam circa credenda, quam circa agenda.*

Q. 2.

Q. 2. *Quomodo definitur lex Evangelica?*

R. Describi potest, gratia per Spiritum Sanctum cordibus indita, qua creduntur & amantur, quæ Christus nos docuit.

Dicitur 1. *Gratia*, quæ voce Lex nova distinguitur à veteri, quia *Lex per Moysen data est; gratia & veritas per Jesum Christum facta est*, Joan. 1. vers. 17.

Dicitur 2. *Cordibus indita*; sic enim de ea habetur Jerem. 31. & Hebr. 8. v. 10. *Ecce dies veniunt, dicit Dominus; & feriam domui Israel & domui Juda fœdus novum Dabo Legem meam in visceribus eorum, & in corde eorum scribam eam.*

Dicitur 3. *Per Spiritum Sanctum*, ut Lex Evangelica distinguatur etiam à Lege naturali, quæ ita est indita, ut sit innata, & refulgens instar cuiusdam radii à principiis naturæ rationalis, quæ cum sit per peccatum originale vitiata & debilitata, Lex ab ipsa emanans, infirma quoque sit necessum est. At Lex Evangelica, 1. est naturæ rationali superaddita, & in cordibus *scripta non atramento, sed Spiritu Dei vivi*, 2. Cor. 3. v. 3. 2. Obscuratam legem naturalem illustrat, & debilitatas naturæ vires reparat, auget ac perficit, *virtus enim Dei est in salutem omni credenti*, Rom. 1. v. 16.

Dicitur 4. *Qua creduntur & amantur*, quibus vocibus significatur Legem novam non solum ostendere, sicut veterem, quæ sint credenda, amanda, & fugienda; sed etiam dare, ut illa credantur, amentur, & ista rejiciantur. Hinc dicitur Rom. 8. vers. 2. *Lex spiritus vitæ in Christo Jesu: Lex vero vetus: ministratio mortis litteris deformata in lapidibus*, 2. Cor. 3. v. 7.

Dici-

Dicitur 5. *Quæ Christus nos docuit*, ut ostendatur materiam circa quam versatur Lex Evangelica, seu Fides per dilectionem operans, esse ea omnia, quæ Christus verbo docuit, & Apostoli postmodum magna ex parte scripto tradiderunt.

Dices : Gratia non convenit definitio Legis, non enim est ordinatio rationis ad bonum commune, facta à superiore, habens vim obligandi : Ergo gratia proprie non est Lex.

Nego antecedens, gratia quippe est ordinatio, vel efficax vel sufficiens, facta à Deo summa ratione ad finem ultimum supernaturalem, quo nihil est melius, & quisquis ab illo ordine deficit, peccat, & reus pænæ efficitur.

Instabis : Lex Evangelica data est omnibus : Atqui hæc gratia paucorum est : Ergo non est lex Evangelica.

Distinguo majorem ; Lex Evangelica data est in omnibus, id est, lata est pro omnibus, Concedo : Recepta est ab omnibus, Nego majorem ; scriptum quippe est de Spiritu Sancto, per quem charitas diffunditur in cordibus, *Quem mundus non potest accipere*. Joan. 14. v. 17. nomine autem mundi, interprete Sanct. Augustino, Tract. 74. in Joan. significat mundi dilectores & concupiscentiis carnis servientes.

Ergo sicut erant in Lege veteri, qui pertinerent ad Evangelium, ut SS. Patriarchæ & Prophetæ Deo servientes in novitate Spiritus & non in vetustate litteræ : ita in Lege Evangelica plures non re, sed nomine dumtaxat Christiani, pertinent ad legem veterem, utpote qui non receperint, nisi litteram Legis Evangelicæ, jugum
ipsis

ipsis gravissimum, quia ex Apostolo Rom. 8. *Si quis Spiritum Christi non habet, hic non est ejus.*

Q. 3. *Lex Evangelica estne præceptiva?*

Negant Pseudoreformati, contenduntque nihil præcipi in Evangelio præter fidem, seu fiduciam in promissionibus Christi, quam impietatem proscripsit Concilium Tridentinum sess. 6. Can. 19. & 21. Quare

R. De fide est legem Evangelicam multa præcipere præter fidem, idque patet vel ex cap. 5. Matth. ubi Christus plura tradit præcepta, subditque. *Qui ergo solverit unum de mandatis istis minimis, & docuerit sic homines, minimus vocabitur in Regno Cælorum.*

Ergo per fidem in Christum salvamur, quemadmodum Æger desperatus ab omnibus Medicis, uno excepto, cui credidit & sanatus est: annon recte diceretur sanatus per fidem in Medicum? Per quam autem fidem? An per fidem inertem & otiosam? Imo si Medici præcepta contempsisset, visus esset non habuisse in eum fidem: Ergo fides operans illum à morbo liberasset.

Similiter humanum genus peccato primi Parentis vulneratum: nec Moyses per plura Legis præcepta, nec cæteri Dei Prophetæ curare potuerunt. Prædicatus est Salvator mundi, & quotquot in illum credidere, per fidem in ipsum salvi facti sunt: per fidem, inquam, quæ per charitatem operatur.

Dices: *ubi Spiritus Domini, ibi libertas.* 2. Cor. 3. Ergo.

Distinguo antecedens: Libertas à timore servili, à peccato & à iugo veteris Legis, Concedo:

D. Habert Theolog. Tom. VIII.

Aa

ab omni præcepto, Nego antecedens. *Nolite errare*, inquit Apostolus 1. Cor. 6. v. 9. *neque fornicarii, &c. Regnum Dei possidebunt.*

Q. 4. *Quotuplicis generis sunt præcepta Legis Evangelicæ?*

R. Triplicis : alia sunt fidei, ut præceptum credendi Mysterium Trinitatis, Incarnationis, &c. alia moralia, quæ continentur in Decalogo, quæque Christus sua auctoritate confirmavit & explicuit, Matth. 5. Unde si quæ in iis occurrat difficultas, eorum interpretatio quærenda est ab Ecclesia, & à Patribus, meritoque damnata est à Clero Gallicano anno 1700. *isthæc quorundam modernorum propositio, Doctrina morum magis à junioribus petenda.* Alia denique sunt præcepta cærimonialia, quæ spectant usum Sacrificii & Sacramentorum.

Q. 5. *Lex nova estne alia à veteri?*

Respondet S. Thomas prima secundæ quæst. 107. art. 1. non esse aliam secundum substantiam & essentialia, sed differre solum in accidentalibus, sicut imperfectum differt à perfecto, puer v.g. à viro, quia utraque lex habet eundem Legislatorem, nempe Deum; eundem finem, eadem præcepta scilicet fidei in Christum & charitatis, in dilectione enim Dei & proximi tota Lex pendet & Prophetæ, Matth. 22. v. 4.

Lex ergo vetus differt à nova in accidentalibus, quatenus erat disciplina rudior, puerorum imbecillitati accommodata, qui, cum non alliciantur virtutis honestate, neque intelligant nobiles fructus, quæ ex illa percipiuntur, urgenti sunt pœnarum timore, & incitandi infantibus quibusdam promissis; Lex quippe eadem Mysteria, quæ

quæ nunc explicite credimus, obscure & sub figurarum velamine commendabat, carnalesque Judæos tum pœnarum temporalium metu, tum terrenæ felicitatis pollicitatione impellebat ad ea, quæ virtutis sunt. At ubi venit plenitudo temporis, & splendidior effulsit lux Evangelicæ prædicationis, *jam non sumus sub Pædagogo*, ait Apostolus Gal. 3. dispelluntur veteres umbræ, spernuntur mundi terricula & promissa, unus animarum ardor, rapere Regnum Cœlorum: unus timor, à tanta spe excidere. *Non contemplantibus nobis quæ videntur, sed quæ non videntur*, 2. Cor. 4. v. 18. Unde tota Christianorum vita & actio est in Fide, Spe, & Charitate, de quibus nunc dicendum.





Tractatus DE VIRTUTIBUS THEOLOGICIS FIDE, SPE, ET CHARITATE.

CAPUT PRIMUM.

De definitione & divisione virtutis
Theologicæ.

Q. 1. *Unde virtus dicitur Theologica?*

R. A nomine Græco Θεός, Latine *Deus*; quia omnis virtus Theologica habet Deum pro objecto.

Q. 2. *Quomodo definitur virtus Theologica?*

R. Definitur virtus infusa, quæ habet Deum pro objecto materiali primario, & aliquod ejus attributum pro formali.

Dicitur 1. *Virtus infusa*, ut distinguatur à virtute naturali, quæ potest naturaliter acquiri, cum
vir-

virtus Theologica fit omnino supernaturalis, & speciale Dei donum.

Dicitur 2. *quæ habet Deum pro objecto materiali primario*; quia omnis virtus Theologica primario versatur circa Deum, & secundario circa alias res à Deo revelatas. Fide v. g. primario credimus Deum esse unum trinum, secundario septem esse Sacramenta, Spe primario speramus beatitudinem, quæ consistit in Dei possessione, secundario necessaria gratiæ auxilia ad consequendam beatitudinem, Charitate primo diligimus Deum, secundo proximum.

Dicitur 3. *Et aliquod ejus attributum pro formali*, quia ex sæpius dictis objectum formale est motivum & ratio sub qua habitus vel actus versatur circa objectum suum materiale; v. g. objectum formale artis Medicæ est sanabilitas; quia res Medica versatur circa corpus naturale sub hac ratione, scilicet quatenus est sanabile: Atqui virtus Theologica versatur circa suum objectum materiale sub ratione & motivo alicujus divini attributi; credimus v. g. quæ Deus revelavit propter summam ejus veracitatem: speramus Dei possessionem, quia Deus est summum nostrum bonum, Deum primo charitate diligimus; propter infinitam bonitatem, quæ in eo est, deinde proximum propter eandem Dei bonitatem, qua vult ipsum salvum fieri: quemadmodum propter patremfamilias nobis charissimum diligimus & charos habemus ejus filios & domesticos. Ergo omnis virtus Theologica habet pro objecto formali aliquod Dei attributum; atque ea ratione distinguitur à virtutibus moralibus infusis, quæ

pro objecto tum materiali, tum formali habent bonum creatum.

Q. 3. *Cur virtutes Theologicæ non dicuntur morales, cum longe perfectiori modo mores dirigant?*

R. Sunt quidem morales; sed proprium nomen sibi vindicant, tanquam nobilissimæ virtutum species, quemadmodum homo, licet sit & ipse animal, quia tamen habet aliquid præstantius, speciali nomine vocatur.

Q. 4. *Quot sunt virtutes Theologicæ?*

R. Tres, scilicet Fides, Spes, & Charitas, quia tres illæ virtutes, nec aliæ habent Deum pro objecto materiali & formali.

Dices: Religio versatur circa Deum; cum tota sit ad illum colendum. Ergo.

Nego antecedens; Religio enim versatur circa cultum Deo exhibendum, quemadmodum misericordia circa eleemosynam pauperi erogandam; Ergo sicut pauper non est objectum misericordiæ, sed finis, cui eleemosyna tribuitur; ita Deus non est objectum Religionis, sed finis, cui honos & cultus exhibentur.

Ergo virtutes Theologicæ præsumunt omnibus virtutibus moralibus; quia pro objecto habent finem omnium virtutum moralium, scilicet Deum, ad quem omnes virtutes morales tendunt, tanquam média: quemadmodum enim ars equestris, quæ immediate occupatur ad regendum equum, imperat arti scenofactoriæ & ceteris ipsi inferioribus; ita Fides, Spes & Charitas, quæ circa Deum versantur, imperant omnibus virtutibus moralibus. *Sancti per fidem vicerunt Regna, operati sunt justitiam, Hebr. 11. Omnia vestra in charitate fiant. 1. Cor. 6.*

In

In arduis autem & adversis spem sicut anchoram habemus animæ tutam ac firmam, Hebr. 6. sicque tota vita Christiana & actio est in Fide, Spe & Charitate, ut supra diximus.

Ergo virtutes Theologicæ non consistunt in medio; quia cum habeant objectum infinitum, in iis non potest esse excessus, sed solum defectus. Notum est S. Bernardi effatum, modus diligendi Deum, est diligere sine modo. Contra vero in virtutibus moralibus servanda est mediocritas, quia habent objectum creatum & finitum, ac proinde moderate diligendum. Unde potest quis in cultu divino esse nimius & superstitiosus, & ultra modum abstinere à cibo, compati miseriis alterius, nempe in præjudicium boni communis, *pauperis non misereberis in iudicio.* Exod. 23.

C A P U T II.

De Fide.

Q. I. *Quid est Fides?*

R. Duplex in Scholis profertur Fidei definitio.

Prima est inspirata & dictata à Spiritu Sancto, Hebr. II. v. I. in hunc modum, *est autem fides sperandarum substantia rerum, argumentum non apparentium.*

Dicitur I. *Substantia*, quia sicut substantia sustentat accidentia, ita Fides est fundamentum & basis rerum, quas speramus. Græce pro substantia habetur hypostasis, id est, subsistentia; quia per fidem futura bona quæ speramus, in mente nostra subsistunt, tanquam præsentia.

Dicitur 2. *Argumentum non apparentium* : id est, convictio ; quia facit fides , ut res , quæ non apparent , propemodum cernamus , ac si essent evidenter præsentis.

Ideo autem Apostolus fidem describit per ordinem ad res sperandas ; quia officium fidei est dirigere actiones voluntatis ad vitam æternam , non quidem secundum dictamen rectæ rationis , (illud enim ad prudentiam pertinet) sed juxta verbum Dei , & regulas ab ipso revelatas : virtus enim recte definitur per ordinem ad suum actum , charitas v. g. definitur virtus inclinans ad diligendum Deum super omnia , & proximum sicut seipsum.

Ergo Fides Christiana proprie & stricte sumpta non est firmus assensus quibuslibet rebus à Deo revelatis , v. g. quod canis secutus sit Tobiam peregrinantem , & domum reversus blandimento suæ caudæ lætitiâ prætulit , Tob. 11. quamvis enim illud & similia Fide divina credi debeant (utpote à Deo revelata ,) Fides tamen illa ad mentem Apostoli , non est Christiana , quia res sic creditæ , nec sunt sperandæ , nec diligendæ.

Ergo Fides est habitus practicus , sicut prudentia ; totus enim est ad dirigendas actiones humanas juxta Verbum Dei.

Altera affertur fidei definitio magis exacta secundum Dialecticæ regulas , nempe , Fides est virtus Theologica divinitus infusa , qua firmiter assentimur propter divinam veritatem omnibus , quæ Deus revelavit , & nobis per Ecclesiam credenda proposuit.

Q. 2. *Quare in definitione additur*, nobis Ecclesia credenda proposuit?

R. Quia ad fidem concipiendam necesse non est, ut Deus per se cuilibet immediate revelet, quemadmodum contendunt Novatores docentes neminem teneri credere voci Pastoris, nisi Spiritus Sanctus ipsis intus revelet vera esse quæ dicuntur, quem errorem longe absurdissimum & perniciosissimum confutavimus Tom. 1. in Prolegomenis, cap. 7. §. 4.

Dixi, *Cuilibet immediate*, ut innuerem immediatam revelationem aliquando esse necessariam; ut in Moyse, qui Legem à Deo immediate acceptam Israelitas docuit, & in Apostolis, qui cum à Christo immediate edocti essent, universum orbem suis prædicationibus ad fidem attraxerunt.

Cum igitur Religione jam stabilita, Deus per seipsum credenda singulis immediate non revelet, sequitur nos ad fidem concipiendam aliquo medio debere fieri certiores rem fuisse à Deo revelatam, ac proinde in hoc statu præter revelationem requiri fidei propositionem.

Est autem duplex Fidei propositio: alia privata, quæ solet fieri à parentibus in familia, à Ludimagistro in Schola, à Parocho in Parœcia, ab Episcopo in Diœcesi: alia publica, quæ fit à communi fidei Magistro, & supremo controversiarum Judice, nempe universali Ecclesia.

Discrepant ambæ illæ propositiones, namque privata propositio quantumcumque videatur credibilis, absolute tamen potest esse falsa cum fiat à privata persona, quæ falli potest & fallere: publica vero propositio est infallibilis auctoritatis.

Q. 3. *Quodnam est objectum fidei?*

R. Materiale adæquatum sunt res divinitus revelatæ, primum est Deus: formale vero est veracitas divina, seu veritas Dei in dicendo: Ergo à tempore Apostolorum articuli seu propositiones Fidei non creverunt quoad substantiam; quia Ecclesiæ non fit nova revelatio, cum Christus omnia revelaverit Apostolis & Discipulis suis, Joan. 15. v. 15. *Omnia quæcumque audiivi à Patre meo, nota feci vobis.* Et cap. 16. v. 13. *Cum autem venerit ille Spiritus veritatis, docebit vos omnem veritatem.* Unde Patres in Conciliis Generalibus non expectant novam revelationem; sed ex Scripturis & Traditionibus definiunt quæ sint credenda & agenda.

Dixi, *quoad substantiam*; quia certum est Ecclesiam ea quæ fuerunt ab Apostolis obscurius tradita, in dies magis explanare ob nascentes hæreses & controversias, quo fit ut plebs successu temporis evadat doctior.

Ergo fides non est habitus compositus, sicut habitus disciplinarum naturalium, sed est simplicissimus; quia unicum ac simplicissimum habet formale objectum, sicut Spes, & Charitas.

Ergo in eo, qui vel unam fidei propositionem contumaciter negat, aut in dubium revocat, ut hæretici, nulla remanet fides Theologica; quia fides Theologica non potest stare sine objecto suo formali: Atqui objectum formale fidei, nempe Dei revelatio per Ecclesiam proposita, non afficit, nec movet hæreticum: Ergo Hæreticus hoc ipso, quo pertinaciter negat unam fidei propositionem, cæteras non credit fide Theologica, sed humana dumtaxat, quemadmodum

modum rusticus per Philosophiæ scientiam non cognoscit Lunæ eclipsem; quia causam illius ignorat. Sic qui vel unum hominem odit, aut in aliquo desperat, charitatem aut spem Theologicam prorsus amittit, ita ut alios jam homines non nisi humano affectu diligat, aut in cæteris non speret, nisi humana fiducia.

Q. 4. *Ubi continentur ea, quæ Deus revelavit Ecclesiæ?*

R. In Scriptura & Traditione.

Q. 5. *Quid est Scriptura?*

R. Est verbum Dei scriptum ipso afflante, id est inspirante & ad scribendum movente. Vide multo plura Tom. 1. in Prolegomenis cap. 6. ubi de variis sensibus scripturæ, de ejus divisione & de variis ejus editionibus.

Ergo Canones & Symbolum Apostolorum, in materia fidei non sunt Scriptura sacra licet contineant verbum Dei, quia non sunt scripta Spiritu Sancto afflante, sed solum assistente, ne irreperet error.

Q. 6. *Quid est Symbolum?*

R. Est brevis fidei summa seu regula collecta ex variis articulis fidei, & fidelibus proposita tanquam signum Christianæ & Catholicæ professionis.

Q. 7. *Quotuplex est Symbolum?*

R. Quatruplex, scilicet Apostolorum, quod ab Apostolis conscriptum est: Nicænum, quod in Concilio Nicæno est editum; Constantinopolitanum, quod à Nicæno non differt nisi aliqua additione facta in Concilio Constantinopolitano. Hinc dicitur aliquando Constantinopolitanum, aliquando Nicænum: Symbolum Sancti Athanasii, quod est ab Ecclesia receptum, proponiturque

turque in Concilio Florentino tanquam regula fidei.

Q. 8. *Quid est articulus fidei?*

R. Est propositio fidei primaria immediate revelata, ab initio explicite proposita ad credendum, & confectarias quasdam propositiones in se continens, quemadmodum membrum, quod est pars corporis præcipua, complectitur carnem, ossa, nervos, & quæ sunt corporis particulæ.

Ergo non omnis propositio fidei est articulus; quia non omnes propositiones sunt primariæ; ut ista, *Saul fuit Rex Israel*; nec fuerunt ab initio expresse ad credendum propositæ, ut propositiones, quas nunc primum definit Ecclesia, nec alias in se continent, sicut aliquando articulus, ut videre est in quarto articulo Symboli Apostolorum, *Passus sub Pontio Pilato, crucifixus, mortuus, & sepultus*: quia qui credit Christum fuisse passum, absque difficultate credet cætera, quæ in illo articulo continentur.

Q. 9. *Quid est Traditio?*

R. Est verbum Dei sine scripto traditum Ecclesiæ. Quotuplex autem sit traditio, & utrum necessario sit admittenda; diximus in Prolegomenis cap. 7. §. 1. & 2.

Q. 10. *Quid est Ecclesia?*

R. Est cœtus fidelium baptizatorum, tam corpori reliquo, quam suo capiti visibili in terris legitime adhærentium. Supremum autem Ecclesiæ caput visibile est Romanus Pontifex.

Ergo Ecclesia est corpus Monarchicum admixtum Aristocratico; quia Christus non unum constituit, qui eam regeret, sed plures, nempe sanctum Petrum Matth. 16. v. 18. & 19. cui succedit
sum-

summus Pontifex Romanus ; & alios Apostolos, Matth. 18. v. 18. quibus succedunt Episcopi ; & septuaginta duos Discipulos, Luc. 10. v. 1. quibus succedunt Parochi. Hi omnes à Christo positi sunt ad regendam Ecclesiam , sed cum subordinatione.

Ergo Hæretici non sunt in Ecclesia , quia non sunt fideles , nec Cathecumeni , quia non sunt baptizati : voto tamen ad Ecclesiam pertinent, *suntque conceptionibus similes*, inquit Sanct. Augustinus, *Non tantum autem concipi , sed & nasci necesse est* : Nec Schismati, nec Excommunicati , quia capiti aut reliquo corpori Ecclesiæ non adhærent.

Ergo Peccatores sunt in Ecclesia , quia sunt fideles baptizati ; & adhærent reliquo corpori ; etsi ægra , sed sanabilia.

Cætera quæ pertinent ad Ecclesiam , scilicet ejus notas, infallibilitatem in definiendis controversis fidei & morum , expendimus in Prolegomenis cap. 5.

C A P U T III.

De Actibus Fidei.

Q. 1. *Quotuplex est actus Fidei?*

R. Duplex , scilicet internus & externus ; Corde enim creditur ad justitiam : ore autem confessio fit ad salutem , Rom. 10. v. 10.

Q. 2. *Quid est internus fidei actus?*

R. Est firmus mentis assensus rei revelatæ & ab Ecclesia propositæ propter summam Dei veritatem in dicendo.

Q. 3. *Quot requiruntur ad illum assensum?*

R. Re-

R. Requiritur 1. perceptio eorum quæ prædicantur; ex Apostolo quippe cit. cap. Rom. 10. *Fides ex auditu, auditus autem per verbum Christi.* 2. mentis inquisitio & examen, utrum qui verba facit, fidem mereatur: *Nam qui credit cito, levis corde est*, Eccl. 19. Assensus autem fidei, utpote actus virtutis, debet esse prudens. 3. Judicium, quo mens, ponderatis motivis credibilitatis, v. g. Prophetiis, miraculis, certo judicat omnino credibilia esse quæ dicuntur. 4. Pia affectio in voluntate, qua imperat intellectui; ut firmum rei revelatæ, & sufficienter propositæ assensum præbeat; nam ex sancto Augustino lib. de Prædest. Sanctorum cap. 5. *Credere, vel non credere est in arbitrio voluntatis humanæ.* Et ratio est quod veritas proposita, quantumcunque credibilis appareat, maneat semper obscura & inevidens, nec proinde mentem necessario determinet ad credendum, quemadmodum conclusio, quæ evidenter deducitur ex principio per se noto, per sui evidentiam, intellectum cogit ad assensum.

Q. 4. *Omnes illi actus ad assensum fidei prærequisiti, suntne supernaturales?*

R. 1. Tres primi actus possunt naturaliter elici; quivis enim infidelis v. g. naturaliter audit & percipit quæ ab Evangelii præcone dicuntur, potest naturaliter perpendere prophetias ac miracula, quæ in confirmationem proferuntur. Negandum tamen non est, quin Deus gratia sua aliquando inclinet corda hominum ad audiendum concionatorem, & ad ponderanda, quæ in doctrinæ suæ confirmationem profert; habetur enim Act. 16. v. 14. de Lydia, *cujus Dominus aperuit cor intendere his quæ dicebantur à Paulo.*

R. 2.

R. 2. Pia voluntatis affectio seu credulitatis affectus, est supernaturale Dei Donum. Responsio est de fide, *nemo potest venire ad me, inquit Christus Joan. 6. nisi pater . . . traxerit eum.* Et sanctus Fulgentius lib. de Incarnatione & Gratia cap. 18. ait, *Ut velimus credere, misericordie praevenientis illuminamur dono.* Denique can 7. Concilii Arausiaci II. damnantur Semipelagiani asserentes initium fidei esse à nobis.

Ex his sequitur, actum fidei ultimo resolvi in motiva credibilitatis. Quærenti enim, cur credam? respondeo, quia Deus dixit. Deum autem dixisse habeo ex Scriptura & traditione: Scripturam vero & traditionem esse verbum Dei habeo ex Ecclesia, *Evangelio non crederem, nisi me Ecclesie Catholicae commoveret auctoritas,* inquit Sanct. Augustinus lib. contra Epistolam fundamenti cap. 4. Unde autem mihi constat Ecclesiam esse auctoritatis infallibilis? ex motivis credibilitatis, nimirum innumeris prodigiis, quibus perspicuum fit eam esse à Deo institutam, nec nisi vera docere. En ultima resolutio, nihilque superest quærendum, quia mens plane convincitur eam societatem vera docere, cujus doctrinam Deus confirmat signis indubitatis.

Q. 5. *Quotuplex est internus actus fidei?*

R. Duplex, nimirum implicitus, quo confuse creditur quidquid docet Ecclesia, quamvis prorsus ignoretur quid illa doceat; & explicitus, quo distincte & speciatim hæc & illa creduntur.

Q. 6. *Actus fidei implicitus sufficitne ad salutem?*

R. Minime, quia fides implicita est lucerna sub modio absconsa, quæ mentem nullatenus illustrat,

lustrat, nec proinde potest dirigere mores ad fidem supernaturalem.

Q. 7. *Quanam credenda sunt explicite?*

R. Alia sunt explicite credenda necessitate medii, alia necessitate præcepti.

Q. 8. *Quid necessitate medii credendum est explicite?*

R. 1. In omni statu etiam naturæ, necessarium est necessitate medii explicite credere Deum esse, remunerare servientes sibi, & animam esse immortalem, *Credere enim oportet accedentem ad Deum; quia est, & inquirentibus se remunerator sit*, Hebr. 11. Unde merito contraria quorundam modernorum opinio damnata est ab Innocentio XI. tanquam scandalosa, anno 1679. & à Clero Gallicano tanquam hæretica, anno 1700.

R. 2. Eadem necessitate medii necesse est præterea in lege Evangelica explicite credere Mysteria Trinitatis & Redemptionis, ut suo loco probavimus, nec proinde absolutionis capaces sunt, qui ea ignorant.

Q. 9. *Quæ in lege nova sunt explicite credenda necessitate præcepti?*

R. Symbolum Apostolorum. C. vos de consecr. dist. 4. hæc referuntur ex Sanct. August. *Ante omnia Symbolum & Orationem Dominicam & vos ipsi tenete, & illis, quos suscepistis de sacro fonte, ostendite.* Ista duo Ecclesia ab initandis semper exegit.

Q. 10. *Quotuplex est actus fidei explicitus?*

R. Duplex, informis, & formatus. Fides dicitur informis, quæ est sine charitate, ut in peccatoribus: formata vero quæ est cum charitate conjuncta, ut in justis. Ex hanc autem duplici fidei acceptione Theologi post. S. August. & S. Thomam, distinguunt inter hos actus, *Credere*

dere Deum, credere Deo, credere in Deum. Credere Deum est credere Deum esse seu existere. Credere Deo est credere vera esse, quæ Deus dixit. Credere in Deum est affectus charitatis, credendo tendere in Deum tanquam in ultimum finem. Credere primo & secundo modo est commune omnibus fidelibus, justis & peccatoribus; credere autem tertio modo, est proprium justorum. Credere primo & secundo modo dumtaxat, est actus fidei informis & imperfectæ: credere tertio modo, est actus fidei formatæ, perfectæ & vivæ. Hanc fidem exigunt Scripturæ Joan. 6. *Hoc est opus Dei, ut credatis in eum, quem misit ille,* quæ verba expendens sanctus August. Tract. 29. in Joan. ait, *ut credatis in eum, non, ut credatis ei.* Sed si creditis in eum, creditis ei: non autem continuo qui credit ei, credit in eum. Nam & Dæmones credebant ei, & non credebant in Deum Quid est ergo credere in eum? Credendo amare, credendo in eum ire, & ejus membris incorporari. Ipsa est ergo fides, quam de nobis exigit Deus, & non invenit quod exigit, nisi donaverit quod inveniat. Quin ipsa est Fides, quam profitemur in Symbolo, *Credo in Deum Patrem Omnipotentem . . . & in Jesum Christum Filium, ejus Unicum . . . Credo in Spiritum Sanctum.* Hæc professio non est sincera in peccatoribus, utpote qui amore in Deum non tendant, tanquam in suum ultimum finem.

Dices, Pro Lutheranis & Calvinianis, qui contendunt amitti fidem per quolibet peccatum lethale, fides informis est fides mortua: Atqui fides mortua non est vera fides, sicut homo mortuus, non est verus homo: Ergo Fides Christiana non debet dividi in fidem informem & fidem

formatam. Unde juxta Sanct. Augustinum fides sine operibus & mortua, est fides dæmonum, fides vero, quæ per charitatem operatur, est fides Christianorum.

Distinguo maj. Fides informis est mortua, sicut corpus sine anima est mortuum, Concedo : est mortua. sicut homo, recedente anima, est mortuus, Nego majorem : hanc solutionem ipse Apostolus Jacobus cap. 2. v. 26. Catholicis sup-
peditat adversus Novatorum Sophismata ; Sicut enim corpus sine spiritu mortuum est, inquit, ita & fides sine operibus mortua est. Porro corpus sine spiritu, verum est corpus, sed exsiccum, fœdum, mortuum, & sine motu ; Ergo & fides sine charitate, est vera fides, sed elanguis, & deformis instar cadaveris, quia sicut anima non est de essentia corporis ; sed ei advenit debite præparato & organizato, ut spiraculum vitæ ; similiter charitas non est essentialis forma fidei, sed accidentalis dumtaxat, fides informis & fides formata non differunt nisi accidentaliter ; accidens autem potest abesse ab aliqua re absque illius interitu. Contra vero anima rationalis est forma essentialis hominis ; nec potest recedere quin pereat homo, licet remaneat ejus corpus.

Q. II. *Estne necessitas medii & præcepti aliquando eliciendi interiores actus fidei ?*

R. Affirmative, Rom. 10. *Corde creditur ad justitiam*, Hebr. 11. *Credere oportet accedentem ad Deum, quia est, & inquirentibus se remunerator sit.* Favet ratio, quia opera supernaturaliter bona sunt adultis necessaria necessitate medii & præcepti ad remissionem peccatorum & vitam æternam obtinendam. Atqui fides actualis est principium & radix
 ope.

operum supernaturalium, *nihil sine ea sanctum, nihil vivum*, inquit S. Leo Ser. 4. de nat.

Q. 12. *Quoties tenetur adultus elicere actus fidei?*

Fuit quorundam Modernorum hæc propositio damnata ab Innocentio XI. anno 1679. & à Clero Gallicano anno 1700. *Satis est actum fidei semel in vita elicere.* Quare

R. Fidei actus quam sæpissime sunt eliciendi. *Accipite armaturam Dei . . . in omnibus sumentes scutum fidei*, Eph. 6. v. 13. & 16. *justus ex fide vivit*, Gal. 3. & Heb. 10. & Sanct. Augustinus Serm. 58. alias Hom. 42. de Symbolo, ait, *Ne dicatis, dixi heri, dixi hodie . . . sint divitiæ tuæ, sint quotidiana ista quodammodo indumenta mentis tuæ.* Nunquid non quando surgis, vestis te? sic & commemorando Symbolum tuum, vesti animam tuam, ne forte eam nudet obli-
vio, & remaneas nudus ipsa fides & tunica est & lorica: tunica contra confusionem: lorica contra ad-
versitatem. Hæc obligatio eliciendi actus fidei maxime urget, 1. In articulo mortis, ut constat ex praxi Ecclesiæ, 2. Initio usus rationis; cum quisque tenetur se convertere ad Deum, quod sine fide non potest fieri. Notent parentes & Pastores.

Q. 3. *Extatne præceptum exterius profitendi fidem?*

R. Extat Rom. 10. ore autem Confessio fit ad salutem. Unde S. Augustinus lib. de Fide & Symbolo c. 1. *Fides*, inquit, à nobis duplex officium exigit, cordis, & linguæ.

Q. 14. *Quotuplex est præceptum confessionis fidei?*

R. Duplex: Affirmativum, quo fidei confessio imperatur; & negativum, quo prohibetur fidei negatio sive verbis, sive factis, quæ signa sint falsæ religionis, ut Cœnam manducare cum hæ-

reticis, thus incendere coram idolo, quamvis absque animo illud colendi, vestes deferre, quæ sint signa determinata falsæ religionis, secus si distinguant solum nationem à natione, v.g. Turcam ab Hispano, aut conditionem à conditione, Laicum à Sacerdote. Unde fidem non negaret, qui falso negaret se esse Sacerdotem, aut audivisse Sacrum.

Q. 15. *Quandonam obligat præceptum profitendi fidem.*

R. Negativum obligat semper & pro semper: quia nunquam licet male agere: atqui negare fidem est malum: Ergo affirmativum obligat, ex Sanct. Thoma q. 3. art. 2. *Quando per omissionem hujus confessionis, subtraheretur honor debitus Deo, & etiam utilitas proximis impendenda, puta si aliquis interrogatus de fide, taceret, & ex hoc crederetur, vel quod non haberet fidem, vel quod fides non esset vera, vel alii per ejus taciturnitatem averterentur à fide. In hujusmodi enim casibus confessio fidei est de necessitate salutis.*

CAPUT IV.

De Peccatis fidei oppositis.

Q. 1. *Quot sunt peccata fidei opposita?*

R. Tria; scilicet infidelitatis, hæresis, & apostasia.

Q. 2. *Quid est infidelitas?*

R. Est privatio fidei in eo qui nec baptizatus, nec catechumenus fuit.

Q. 3. *Quotuplex est infidelitas?*

R. Duplex, nempe negativa, & positiva.

Nega-

Negativa est in eo qui non credit ; quia non audivit, nec audire potuit.

Positiva , qua quis repugnat Myſteriis fidei ad credendum propositis.

Q. 4. *Utraque infidelitas estne peccatum?*

R. Negativa non est peccatum , quia non est voluntaria ; sed pœna peccati saltem originalis : positiva vero est peccatum , quia est transgressio præcepti , *qui non crediderit , condemnabitur* , Marci 16. Ergo fideles negativi non damnabuntur præcise quia non crediderunt , sed quia peccaverunt saltem in Adamo. Ita S. Thomas secunda secundæ quæstione 10. art. 1.

Q. 5. *Quotuplex est infidelitas positiva?*

R. Quadruplex, nempe Atheismus , Paganismus, Mahumetismus & Judaismus. Atheus nulum agnoscit Deum , Paganus agnoscit , sed falsum. Mahumetanus verum Deum agnoscit , sed illum colit cæremoniis , quæ nunquam fuerunt licitæ. Judæus verum Deum colit cæremoniis olim licitis , nunc autem superstitionis.

Q. 6. *Quid est hæresis?*

R. Est error cum pertinacia contra aliquam fidei veritatem in eo qui fidem suscepit. Ergo qui ex ignorantia vincibili seu crassa contrarium fidei credit , hæreticus non est ; quia non est pertinax.

Q. 7. *Quotuplex est hæresis?*

R. Duplex, nempe interior seu mentalis , & exterior. Utraque est peccatum lethale, sed sola posterior habet annexam excommunicationem reservatam.

Q. 8. *Quotuplex est Apostasia?*

R. Quadruplex vulgo numeratur , nempe

apostasia à fide, ab obedientia, à Religione, & ab ordine. Sed prima dumtaxat pertinet ad materiam, de qua hic agitur.

Apostasia à fide est infidelitas, qua Christus & fides Christiana jam suscepta penitus deferuntur. Unde apostasia in eo differt ab hæresi, quod sit totalis desertio fidei & auctoris ejus; hæresis vero sit desertio dumtaxat quorundam dogmatum. Quare Calviniani non sunt Apostatæ, si stricte loquamur; sed hæretici, utpote qui ut Christo adhæreant, & plura fidei dogmata retineant.

Apostasia ab obedientia est ea, qua quis Prælati mandata non solum negligit, quod est inobedientiæ; sed insuper iis formaliter se opponit, eaque contumaciter rejicit.

Apostasia à Religione est criminosa recessio à quolibet ordinis Religiosi instituto cum proposito non revertendi sive retineatur habitus, sive rejiciatur.

Dicitur 1. *Criminosa recessio*; quia qui licite recedit, ut electus ad dignitatem Episcopalem, non est apostata.

Dicitur 2. *A quolibet ordinis Religiosi instituto*; quia si quis sine dispensatione recedit ad laxiorem, quamvis graviter peccet, imo excommunicationem incurrat, si sit ex ordine Mendicantium, ut habetur Extravag. 1. de Regularibus, non est tamen apostata.

Dicitur 3. *Cum proposito non revertendi*; qui enim habet animum redeundi, aut permanendi in statu Religioso, vagus est, non apostata, etiamsi habitum dimiserit ad tempus. Sed Religiosus Professus habitum temere dimittens incurrit excommunicationem cap. *Ut periculosa*; tit. ne Cle.

Clerici vel Monachi, in sexto. Censetur autem habitum dimittere, qui eum omnino abscondit, ita ut nullum signum præferat, quo Religiosus deprehendi possit.

Apostasia ab ordine est ea, qua quis, dimisso habitu, à sacris ordinibus transit ad statum Lai-
cæ conversationis, puta conjugii.

CAPUT V.

De Spe.

Quamvis de sola spe Theologica sermo sit institutus, operæ pretium tamen est exponere naturam spei generatim spectatæ, ut ex ea colligamus, quid sit spes Theologica; effatum enim est in Scholis etiam Philosophicis receptum, scilicet ea quæ conveniunt generi necessario convenire ea & speciei. Itaque

Q. I. *Quid est spes generice spectata?*

R. Definitur communi Philosophorum & Theologorum suffragio, motus appetitus efficaciter tendentis in bonum absens, arduum, apprehensum ut possibile.

Dicitur 1. *Motus appetitus*, sive sensitivi, si spes sit passio & actus necessarius, sive rationalis, si spes sit actus liber, tendens in bonum mente apprehensum.

Dicitur 2. *Efficaciter tendentis in bonum absens*, ut distinguatur à simplici complacentia & desiderio inefficaci, quale potest esse desiderium inefficax victoriæ in imbelli, beatitudinis supernaturalis in peccatore; spes enim est desiderium efficax obtinendi bonum concupitum: tum autem

desiderium censetur efficax, quando eliguntur media necessaria.

Dicitur 3. *Arduum*, hoc est obtentu difficile, ut distinguatur spes à desiderio, quod est etiam boni absentis, sed obtentu facilis. Hinc dives esuriens v.g. non sperat; sed desiderat alimenta; pauper vero desiderat simul & sperat: ille, quia alimenta ipsi apponentur statim ut iusserit; iste, quia ipsi cum difficultate comparanda sunt.

Dicitur 4. *Apprehensum ut possibile*, quia ex S. Thoma prima secundæ quæst. 40. art. 1. ad tertium. *Nullus movetur ad id, quod æstimat impossibile adipisci.*

Ergo objectum spei generice spectatæ, materiale quidem est res bona, formale vero est ejus bonitas absens, ardua & possibilis; illud enim est objectum materiale actus vel habitus, circa quod actus vel habitus versatur: formale vero quod est ratio sub qua actus vel habitus versatur circa objectum materiale: Atqui spes versatur circa rem bonam quatenus bona est, ardua, & possibilis: Ergo.

His præmissis de spe generatim spectata, quæ necessario convenire debent spei Theologicæ, utpote nobilissimæ generis speciei,

Q. 2. *Quid est spes Theologica?*

R. Est virtus infusa Theologica, per quam certa cum fiducia futuram beatitudinem, & media illius assequendæ expectamus per Dei auxilium.

Dicitur 1. *Virtus*, quia facit bonum habentem se, *beatus vir qui sperat in eo*; Psalm. 33. & opus ejus bonum.

Dices: Spes est in peccatoribus: Ergo non facit bonum habentem se.

Di-

Distinguo consequens, non facit bonum simpliciter & absolute, Concedo; quia à sperante non excludit omne peccatum lethale: non facit bonum secundum quid, Nego consequentiam: peccator enim quatenus sperat in Deo, ut decet, bonus est, & laudabiliter operatur, licet aliunde sit vituperandus.

Dicitur 2. *Infusa*, quia est supernaturale Dei donum, juxta illud Rom. 15. *Deus autem spei repleat vos omni gaudio & pace in credendo, ut abundetis in spe & virtute Spiritus Sancti.*

Dicitur 3. *Per quam certa cum fiducia futuram beatitudinem expectamus*; quia spes veluti anchora animam tentationibus & procellis hujus vitæ agitatam firmat in promissis Dei, Hebr. 6. v. 19. & 20. *Confugimus ad tenendam propositam spem, quam sicut anchoram habemus in anima tutam ac firmam.*

Dicitur 3. *Expectamus per Dei auxilium*; quia beatitudo naturæ viribus non est possibilis, *infinitæ virtutis est*, inquit S. Thomas secunda secundæ quæst. 17. art. 2. *ad infinitum bonum perducere.*

Ergo primum spei objectum materiale est Deus possidendus; *non enim minus aliquid ab eo sperandum est, quam sit ipse*, inquit Sanct. Thomas cit. qu. 17. art. 2. Secundarium vero media, per quæ Deus decrevit nos ad seipsum perducere; qui enim Deum veraciter sperat, aliud non intendit, quam ad Dei possessionem pervenire, *homini qui anhelat ad aliquid magnum, parvum videtur omne aliud, quod est eo minus*, ait idem Angelicus Doctor cit. q. 17. art. 2. *ad tertium.*

Ergo objectum formale Spei est beatitudo nostra per divinam misericordiam & omnipotentiam possibilis, seu Deus, quatenus possidendus ut sum-

num nostrum bonum obtentu possibile per ejus misericordiam & omnipotentiam; objectum enim formale ex sæpe dictis est motivum, seu ratio, sub qua voluntas per Spem tendit ad Deum quatenus est nobis bonus, & cætera tanquam media ad hunc finem ordinat: Ergo.

Dices: Appetere Deum ut bonum nostrum, est referre Deum ad nos tanquam ad finem, & amare illum amore concupiscentiæ: Atqui inordinatus est ille amor, rectus enim ordo postulat, ut omnia ad Deum tanquam ad ultimum finem referantur: Ergo.

Distinguo maj. est referre Deum ad nos, tanquam ad finem *cui*, Concedo: tanquam ad finem *cujus gratia*, Nego majorem.

Finis *cui*, est persona *cui* bonum optamus: finis *cujus gratia*, est ille, cujus amore cætera assumuntur tanquam media propter illum dumtaxat experibilia, ut remedia propter sanitatem. Turpe quidem ac flagitiosum est Deum ad se referre isto posteriori modo; hoc est, Deum minoris facere, quam seipsum, & perverso ordine, uti fine ultimo, veluti medio propter aliud solummodo expetibili; *boni utuntur mundo*, inquit Sanct. Augustinus lib. 15. de civ. cap. 7. *ut fruantur Deo: mali è contra, ut fruantur mundo, uti volunt Deo.* Sed honeste & pie Deum ad nos referimus tanquam ad finem *cui*: in eo quippe testamur summam ejus bonitatem & omnimodam perfectionem; sic refertur causa ad effectum, fons ad rivulum, plenitudo ad vacuum, misericordia ad miserum, perfectivum ad perfectibile.

Q. 3. *Spes estne certa?*

R. Est certa respectu sui, *Spes non confundit,*
Rom.

Rom. 8. non est certa respectu nostri, *cum metu & tremore salutem vestram operamini.* Philip. 2.

Ergo ex Spe nascitur timor, illud enim timet homo amittere quod amat, inquit S. Thomas secunda secundæ qu. 19. art. 2. & quo ardentius desideratur possessio boni obtentu difficilis, eo major est timor illius amittendi.

Q. 3. *Quotuplex est timor?*

R. Duplex, scilicet timor Dei, & timor mundanus. Hic malus est, & opponitur Spei; in Spe enim Theologica tria intelliguntur, 1. desiderium beatitudinis & conatus ad illam. 2. timor illius amittendæ, qui dicitur timor Dei. 3. fiducia in Dei bonitate & omnipotentia: Atqui timor mundanus tria illa impugnat; qui enim ejusmodi timore percellitur, primo inordinate concupiscit bona temporalia, quæ Spes Theologica contemnit, *non contemplantibus nobis quæ videntur, sed quæ non videntur*, inquit Apostolus 2. Cor. 4. Deinde ex ejusmodi cupiditate, tanquam ex mala radice, nascitur timor amittendi temporalia, quæ aliquando conservari nequeunt sine peccato; puta perjurio, injustitia: &c. *Et ita expellit à se timorem Dei hujusmodi hominis timor*, Eccli. 23. vers. 27. Tertio timor mundanus sola nititur prudentia carnis & sapientia sæculi, ac proinde adversatur fiduciæ, qua Spes Theologica Christianos firmos & defixos tenet in omnipotentia Dei, & misericordia.

Q. 5. *Quotuplex est Dei timor?*

R. Triplex, nempe servilis, quo timet quis puniri à Deo; filialis, quo timetur offensa Dei: & initialis, quo timetur simul pœna & culpa, sed plus saltem appetitive, culpa quam pœna.

Q. 6.

Q. 6. *Timor servilis estne bonus?*

R. 1. Certum est ipsam servilitatem, quæ est extranea & accidentalis timori Dei, esse malam; quia est formale odium justitiæ & legis eam præcipientis, proceditque ex mala voluntate, *quomodo justus est, justitiæ talis inimicus*, inquit sanctus Augustinus epist. 145. alias 144.

R. 2. De Fide est timorem servilem secundum essentiam spectatum, esse bonum; ita enim definiit Concilium Tridentinum contra Pseudoreformatos, sess. 6. can. 8. *Timete Dominum*, ait Christus Luc. 12. *qui postquam occiderit, habet potestatem mittere in gehennam; ita dico vobis, hunc timete.*

Q. 7. *Quænam peccata sunt Spei opposita?*

R. Desperatio & præsumptio: prior contra Spem pugnat per defectum; est enim diffidentia assequendi beatitudinem, & obtinendi à Deo gratias ad id necessarias: posterior vero per excessum, scilicet ex parte subjecti sperantis, quod Deus non promisit; nam ex parte objecti excessus esse nequit, sed solummodo defectus, ut supra diximus.

Q. 8. *Desperatio & præsumptio suntne cum infidelitate conjunctæ?*

R. 1. Sunt aliquando, cum scilicet oriuntur ex judicio speculative falso, ut si quis desperaret credens cum Pseudoreformatis Deum aliquos antecederet prædeterminasse ad malum culpæ & ad supplicia æterna. Cum autem illa circumstantia addat desperationi novam peccati speciem, scilicet hæresim, in Confessione Sacramentali est explicanda. Idem dicendum de præsumptione; potest enim oriri ex falsa & Hæretica opinione, vel Pelagianorum, quod solis liberi arbitrii viri-
bus

bus vitam æternam promereri possimus, vel Novatorum quod fide sola sine bonis operibus justificemur & salvemur. Quare inquirendum est a pœnitentibus quam ob causam desperaverint, vel præsumpserint, an ex judicio falso & hæretico, an ex ignavia, aut ex superbia?

R. 2. Desperatio, & præsumptio plerumque in Catholicis sunt sine infidelitate, attamen semper denotant fidem modicam & imperfectam. Vide plura & in praxi necessaria Tom. 3. part. 2. de Spe, cap. 5.

Q. 9. *Actus Spei suntne ad salutem necessarii?*

R. Affirmative Ps. 67. *Sperate in eo omnis congregatio populi.* Osee 12. *Spera in Deo tuo semper.* In Oratione Dominica ab omnibus Fidelibus recitanda secundo loco petendum est, *Adveniat Regnum tuum.* Quin Alexander VII. & Clerus Gallicanus anno 1700. damnarunt hanc propositionem. *Homo nullo unquam vitæ suæ tempore tenetur elicere actum Fidei, Spei, & Charitatis, ex vi præceptorum divinarum ad eas virtutes pertinentium.*

CAPUT VI.

De Charitate.

Q. 1. *Quid est Charitas?*

R. Est virtus divinitus infusa Theologica, qua Deum propter se super omnia diligimus, & cætera propter Deum.

Dicitur 1. *Virtus*, quia habentem se facit simpliciter bonum, cum Fides, Spes & aliæ virtutes bonum faciant secundum quid tantum, ut supra diximus; Charitas enim excludit omne peccatum

catum faltem grave, hominem Deo conjungit & ad illum omnes virtutes movet: agitque tanquam earum forma & vita, sine qua dicuntur deformes, imperfectæ ac mortuæ, *habere charitatem, & malus esse non potest*, inquit S. Augustinus Tract. 7. in 1. Joan.

Dicitur 2. *Divinitus infusa*, juxta illud Rom. 5. *Charitas Dei diffusa est in cordibus nostris per Spiritum Sanctum*, qui datus est nobis; & ita virtus charitatis distinguitur à Spiritu Sancto, rejiciendaque est opposita sententia Magistri sententiarum lib. 1. distinct. 17.

Dicitur 3. *Theologica*, Nulla enim virtus æque ac charitas occupatur circa Deum, *totus desiderabilis est dilectus meus*, Can. 3. quia sicut in amico impense dilecto omnia placent, ejus ingenium, forma corporis, sermo, modus agendi, amantem mirifice recreant; sic diligenti Deum ex charitate placent ejus sapientia, justitia, verba mandata, judicia, decreta, providentia, sive in prosperis, sive in adversis, totus est desiderabilis.

Dicitur 4. *Qua Deum propter se super omnia diligimus*, ut significetur charitatem esse amorem benevolentiae, & distinguatur à Spe; quæ est amor concupiscentiæ; benevolentia enim definitur amor; quo quis alteri bene vult, & facit, quantum in ipso est, non sui, sed illius gratia: Atqui homo per Charitatem bene vult Deo & facit, quantum in ipso est, ut ab omnibus colatur, non sui, sed illius gratia, *charitatem voco*, inquit Sanct. Augustinus lib. 3. de Doctr. Christ. cap. 10. *motum animi ad fruendum Deo propter ipsum, & se atque proximo propter Deum*. Unde solus amor Charitatis est absolute & simpliciter super omnia. Spes qui-

quidem Deum concupiscit ut suum bonum , & tantum bonum , ut sperans illud præferat omnibus suis commodis , v. g. sanitati , quam nollet recipere per magicas artes , & divitias , quas viis illicitis non compararet , sicque dici potest Deum amare super omnia secundum quid , & in aliquo genere , scilicet comparate ad bona temporalia , sed per spem Deum sibi ipsi non præfert , nec proinde Deum super omnia simpliciter & absolute diligit , cum illum non plus quam seipsum diligit , hæreatque in amore sui , non quidem positive , quasi seipsum constituat ultimum finem , & Deum habeat veluti medium suæ felicitatis , quod est immane crimen , sed negative tantum , quatenus qui propter se Deum diligit , præparatur ad sublimiorem gradum , ut diligit Deum non jam propter se , sed propter ipsum , ut docet Sanct. Bernardus lib. de diligendo Deo cap. 15. Porro in illo gradu constitutus seipsum totum , beatitudinemque suam , & cætera refert ad Dei gloriam ; sicque amor ejus est simpliciter & absolute super omnia.

Dicitur 5. *Et cætera propter Deum* ; res enim amici sunt in ejus usum & commodum convertendæ. Atqui omnia , sive parentes , sive domestici , sive prospera , sive adversa , quin & nos ipsi , sumus res Dei summe dilecti : Ergo per charitatem ea omnia propter Deum diliguntur , & in ejus bonum , hoc est , in ejus gloriam & honorem convertuntur :

Ergo objectum charitatis materiale primarium est Deus , secundarium proximus ; eadem enim virtute charitatis diliguntur Deus & proximus : formale vero est divina bonitas in se spectata.

Q. 2. Quomodo fieri potest, ut bonitas divina in se spectata sit motivum propter quod & nos ipsos, & proximum diligimus, cum sit quid nobis, & proximo extrinsecum?

R. Res elucidatur experientia eorum quæ in civilibus contingunt, atque in exemplum professorum patrumfamilias ab altero impense dilectum ob mores ejus candidos, affabilitatem, sapientiam, & cæteras animi dotes præclarissimas. Quæro autem quodnam sit motivum arctissimæ illius amicitiae, quæve diligendi ratio, nisi singularis illa perfectio, & bonitas patrisfamilias secundum se spectata; An non propter eam charum est quidquid ad patremfamilias pertinet, ejus liberi & domestici? In hoc exemplo cogita charitatem, quia primario diligimus Deum, secundario nos ipsos, proximum, & res omnes ad Deum pertinentes, utpote creatas in ejus gloriam: & intelligens quomodo infinita Dei perfectio & bonitas sit tota ratio illum & nos & proximum amandi amore benevolentiae: illum quidem, quia est ipsamet originalis bonitas; nos vero & proximum quia divina illa bonitas per communionem aut præparationem bonorum spiritualium in nobis & proximo relucet tanquam in ejus filiis & domesticis. Unde si quis sit à Deo totaliter & absque ulla spe rejectus, ut damnati, nullam habemus ad eum amicitiam, quemadmodum si paterfamilias, de quo supra, aliquem è domesticis suis ejecerit, nostra in eum cessat propensio.

At, inquires, quomodo diligere potest homo iniquissimus, crudelis inimicus, qui nos quovis modo perdere nititur cum voluntas amore ferri non possit, nisi in bonum?

R. Di-

R. Diligi potest, quomodo diligimus membrum vitiatum, quod acutissimis doloribus nos diu noctuque cruciat; nempe distinguimus substantiam inter, & vitium doloris causam: substantia est nobis chara & pretiosa, utpote pars nostri, quam sanam peroptamus, ideoque contra vitium eam infestans pugnamus, illudque qua arte, qua industria propellere nitimur. Sic Christus caput omnium hominum, cum adhuc peccatores essemus, propter nimiam suam charitatem dilexit nos tanquam propria sua membra, sed ægra & pessime affecta: pretiosissimo Sanguinis sui balsamo morbum, hoc est, peccatum extinxit, sanitati ac justitiæ nos restituit, & ex inimicis amicos recepit, quod longe gloriosius est; nam ex S. Augustino multo est optabilius inimicum non habere, quam ulciscendo vincere. Ita & nos, (si charitas & Spiritus Christi habitat in nobis) diligimus fratres, bonos quidem, quia boni sunt, malos autem, ut à vitiis sanentur & boni evadant.

Q. 3. *Quotuplici modo Deus super omnia diligitur?*

R. Duplici, scilicet intensive & appretiative.

Deus diligitur intensive super omnia, cum voluntas in eum fertur ardentissimo amoris actu, qualis est amor beatificus: appretiative vero supra omnia diligitur, cum voluntas tam forti amoris vinculo adstricta est Deo, ut nulla res eam inde avellere queat. Hoc amore appretiative summo dicebat Apostolus Rom. 8. *Certus sum enim, quia neque mors, neque creatura alia poterit nos separare à charitate Dei.*

Q. 4. *Uterque amor estne præceptus?*

R. Amor summus appretiative est præceptus;

D. Habert Theolog. Tom. VIII.

C c

hoc

hoc enim ad minus significat illud præceptum, *Diliges Dominum Deum tuum ex toto corde tuo*, &c. intensive autem summus, quamvis semper ad illum sit enitendum, tanquam ad nostrum ultimum finem & beatitudinem formalem non tamen præcipitur, utpote qui non sit in nostra potestate.

Q. 5. *Potestne dari amor Dei summus appetitive, qui non sit etiam summus intensive?*

R. Non solum potest dari, sed actu & de facto datur, ut patet exemplo iusti, qui intensiori & vehementiori dolore afficitur quod mortem patris impense dilecti, quam ob præterita peccata, quamvis appetitive plus doleat se in Deum peccasse, quam patrem amisisse, paratusque sit ejusmodi orbitatem sustineri potius, quam Deum offendere, & ejus amicitia privari.

Q. 6. *Quandonam obligat præceptum amoris Dei & proximi?*

Nonnulli Theologi moderni in hac materia abierunt in absurdas & scandalosas sententias. Prima eorum propositio fuit. „Præceptum affirmativum amoris Dei & proximi non est speciale, „sed generale, cui per aliorum præceptorum „adimpletionem satisficit. Secunda; Præceptum „amoris Dei per se tantum obligat in articulo „mortis. Tertia; An peccet mortaliter, qui „actum dilectionis Dei semel tantum in vita eliceret, condemnare non audemus. Sed ejusmodi propositiones jam proscriptas partim ab Academia Parisiensi anno 1665. partim ab Innocentio XI. anno 1679. Clerus Gallicanus declaravit anno 1700. ut scandalosas, perniciosas, piarum aurium offensivas, & impias, primum & summum mandatum irritum facientes, atque Evangelicæ

gelicæ Legjs Spiritum extinguentes. Quare ad propositam quæstionem

R. 3. Præceptum amoris Dei quam sæpissime obligat, atque semper enitendum est ad ejus observationem, sic enim habetur Deut. 6. *Diliges Dominum Deum tuum, &c. eorumque verba hæc, quæ ego præcipio tibi hodie, in corde tuo; & narrabis ea filiis tuis (notent parentes) & meditaberis in eis sedens in domo tua, & ambulans in itinere dormiens atque confurgens.* Etratio est, quia præceptum illud habet rationem finis, *finis præcepti*, inquit Apostolus 1. Tim. 1. *est charitas de corde puro, de conscientia bona, & fide non ficta.* Atqui finis non debet esse primo in intentione & movere ad ea, quæ sunt observanda tanquam media ad finem.

R. 2. Præcepto divino tenemur diligere proximum data occasione, interno amore amicitiae. Matth. 22. *Diliges proximum sicut teipsum.* Quæro autem ab adversariis quomodo seipso diligant? an externo dumtaxat amore? Joan. 15. *Hoc est præceptum meum ut diligatis invicem, sicut dilexi vos.* Quis autem nesciat Christum nos dilexisse interno amore amicitiae: pro nobis sæpius orasse, & ex illo intimo affectu pro nobis in sacrificium se Deo Patri obtulisse? Et cap. 17. v. 21. vult ut omnes sive dominus, sive famulus & mancipium, sive bello victor; sive captivus, unum sint tum ad invicem, tum cum ipso & Patre. (Notent qui ita subveniunt necessitatibus famulorum suorum & aliorum infimæ plebis, ut indignum judicent iis intimo charitatis affectu conjungi & esse cum illis cor unum & animam unam, ut legitur Act. 4.

Q. 7. *Estne servandus ordo in charitate?*

Cc 2

R. Af-

R. Affirmative, *ordinavit in me charitatem*, inquit Sponsa, 2. Cant. v. 4. Et ratio est, quia ibi est ordo, ubi unum est causa & principium cæterorum : Atqui in charitate amor Dei est causa & principium amoris proximi : Ergo.

Q. 8. *Quomodo est ordinanda charitas?*

R. Amore affectivo præferendi sunt meliores effectivo qui nobis magis sunt conjuncti, cæteris paribus : omnis enim causa prius agit in viciniora, quam in remotiora, fons prius satiatur suis aquis, quam derivetur in rivulum.

Dixi, *Cæteris paribus*; quia si externus aut peregrinus in majori versetur necessitate, prius ei subveniendum est.

Ergo Deus est super omnia diligendus amore tum affectivo, tum effectivo; quia est infinite bonus, & nobis conjunctissimus, intimiorque nostro intimo.

Ergo Pater in extrema necessitate amore effectivo cæteris hominibus est præferendus, quia conjunctior est Filio, respectu cujus habet rationem principii. Sed si necessitas non sit extrema, uxor cum filiis est præferenda, juxta illud Gen. 2. & Matth. 19. *Dimittet homo patrem & matrem & adhærebit uxori suæ* : est enim unum in societate cum uxore sua; cum patre vero in natura. Nec debent filii parentibus thesaurizare, sed parentes filiis 2. Cor. 12. quia si filius conjugatus exhauriret familiam ad sustentandam domum paternam, magna sequeretur perturbatio in familiis & in tota Republica, re enim familiari dilapidata, filii convenienter non instituerentur, nec decenter collocarentur; qui in Republica aliorum aurum gerunt, ut Magistratus, Pastores, officio suo, ut par

par est defungi non possent, utpote minus liberales & munifici, sed contra undique corradentes propter consanguineos, quæ subditorum animos à Præposito prorsus avertunt, & multorum malorum seminaria existunt, inquiunt Patres Tridentini sess. 25. cap. 1. de Reform.

Q. 9. *Quinam sunt effectus Charitatis?*

R. Alii sunt interni, alii externi. Interni sunt, amor, gaudium. pax, quæ ex servato ordine efflorescit, & tristitia propter Dei offensam. Externi sunt beneficia, qua alteri ex affectu charitatis confertur beneficium, eleemosyna, & correctio fraterna; illa temporalem proximi miseriam ex commiseratione expellere nititur ista spiritualem.

Q. 10. *Quando facienda est eleemosyna?*

R. Quando proximus est in necessitate?

Q. 11. *Quotuplex est necessitas?*

R. Triplex: Communis, qualis est mendicantium: gravis, quando proximus à suo statu caderet, nisi ei subveniretur: extrema, quando proximus est in periculo mortis. Ex superfluo juvandi sunt mendicantes & alii, qui necessitatem communem patiuntur; ex aliqua parte necessarii ad statum iis subveniendum est, qui in gravi sunt necessitate constituti: ex proprio statu decidendum, si necesse sit, ut subveniatur extrema necessitate laborantibus. Hinc peccant qui superfluum sui status consumunt in ludo, comestationibus, & aliis superfluitatibus, quibus in Baptismo abrenunciavimus.

Q. 12. *Correctio fraterna estne necessaria necessitate præcepti?*

R. Est necessaria necessitate præcepti tum naturalis, tum divini positivi, tum Ecclesiastici. Naturalis quidem; quia præceptum est diligere Deum ex toto corde, & proximum sicut se ipsum: Atqui diligere ex dictis est bene velle & bene facere dilecto, amovendo malum ab ipso, si fieri potest. Porro peccatum lethale est grave malum tum Dei, utpote gravis ejus offensa, tum proximi, cum spiritualiter occidat animam, & reatum æternæ damnationis inducat. Ergo si lege naturali tenemur per eleemosynam subvenire proximo corporaliter indigenti, à fortiori per correctionem spiritualiter periclitanti; nam ex Philosopho lib. 9. Ethic. cap. 3. magis in moribus, quam in facultatibus ferendum est auxilium.

Correctio fraterna est etiam necessaria necessitate præcepti divini positivi, Lev. 19. *Non oderis fratrem tuum in corde tuo, sed publice argue eum, ne habeas super illo peccatum.* Matth. 18. *Si autem peccaverit in te frater tuus, vade & corripe eum inter te & ipsum solum. Si te audierit; lucratus eris fratrem tuum.* Quæ posteriora verba lethale peccatum arguunt in eo qui non corripit occasione opportuna. Ita S. Augustinus Serm. 82. alias 16. de Verbis Domini. *Tu vulnus fratris tui contemnis? Tu vides eum perire vel periisse, & negligis? Pejor es tacendo, quam ille conviciando.*

Denique correctio fraterna est præcepti Ecclesiastici, C. *Qui alios, Tit. de Hæreticis. Qui alios, cum potest, ab errore non revocat, seipsum errare demonstrat.*

Q. 13. *Correctio estne omnibus præcepta?*

R. Quæ

R. Quæ fit cum auctoritate, pertinet ad solos Superiores; quæ vero fit ex fraterna charitate, est omnibus omnino hominibus præcepta, tum Superioribus, tum subditis, si sit spes emendationis, quia præceptum charitatis ad omnes se extendit, *unicuique mandavit* (Deus) *de proximo suo*, Eccli. 17.

Q. 14. *Quandonam obligat præceptum correctionis fraternæ?*

R. Quando occurrunt quatuor circumstantiæ. Prima, quando constat de peccato proximi præsertim mortali, scriptum quippe est Eccli. 20. *Priusquam interrogas, non vituperes quemquam.* Unde scrupulosi, qui solent deprehendere malum, ubi non est, non debent facile alios corrigere. Secunda, quando spes aliqua affulget correctionis profuturæ; sicut enim remedia, quæ prævidentur fore inutilia, non sunt corporibus adhibenda; maxime si subsit periculum ne noceant; ita nec correctio fraterna (fraternam dico, non judicalem) ubi nulla est emendationis spes nequidem dubia; tum enim fere semper periculum subest, ne proximus deterior fiat. Tertia, quando nullus adest magis idoneus, v. g. Superior, qui possit & velit corrigere. Dico & *velit*; si enim noluerit aut contempserit, perinde est ac si nullus adesset. Quarta, quando non speratur tempus correctionis opportunius; si enim commodius & utilius proximo foret eam differre, differenda esset; cum ejusmodi dilatio non sit occasio cupiditatis, sed consilium charitatis, ut loquitur sanctus Augustinus lib. 1. de Civ. Dei cap. 9.

Q. 15. *Quænam peccata sunt charitati opposita?*

Cc 5

R. 1.

R. 1. Omnia peccata dici possunt charitati opposita saltem indirecte. Mortalia quidem ; quia destruunt charitatis habitum , & actum ejus excludunt : venialia etiam , quia licet charitatis habitum non destruunt nisi dispositive , ejus tamen actum excludunt & fervorem minuunt , nam ex Sanct. Augustino , ubi major cupiditas , minor est charitas.

R. 2. Sanct. Thomas à q. 34. ad q. 43. numerat decem peccata , quæ directe & formaliter pugnant adversus proprios charitatis actus , qui sunt amor Dei & proximi , gaudium de bono Dei & proximi , pax & correctio fraterna. Amori Dei & proximi opponitur odium sive Dei , sive proximi : gaudio de bono Dei , tristitia , seu accedia , Gallice, *degout des choses spirituelles* : gaudio de bono proximi , invidia : paci , discordia , quæ est voluntatum contrarietas , contentio seu verborum contrarietas cum inordinata acrimonia , rixa , quæ est pugna manuum & verborum , ita ut ex contrarietate voluntatum oriatur pugna verborum , quæ dicitur contentio , & ex pugna verborum , pugna verberum ; seditio quoque , bellum injustum & schisma pacem solvunt. Denique adversus correctionem pugnat scandalum.

Q. 16. *Quid est scandalum?*

R. Definitur à Sanct. Thoma q. 43. art. 1. & ex aliis communiter Theologis , dictum vel factum minus rectum præbens alteri occasionem ruinæ. Hæc definitio desumpta est ex S. Hieronymo in cap. 15. Matth.

Dicitur 1. *Dictum vel factum* ; quia sola voluntas , nisi exterius se prodat dictis vel factis , non potest esse aliis offensio. Nomine autem dicti

dicti & facti intelligitur etiam externa omiffio ; qui enim omittit loqui aut agere cum deberet , v. g. subditum blasphemantem corrigere , aut ali- quod præceptum implere , est aliis scandalo , iis- que præbet peccandi occasionem.

Dicitur 2. *Minus rectum* , five illud sit per se malum , five habeat dumtaxat speciem mali ; species enim mali æque inducit ad peccandum ac malum ipsum , imo si res per se mala haberet speciem boni , non moveret alios ad peccandum , v. g. incæstus , qui domum consanguineæ frequenter ingreditur sub specie negotii necessarii , neminem scandalizat : contra vero Clericus , qui apud se juniorem puellam retinet , quamvis castimoniam illibate servet ; nihilominus aliis est malo exemplo & offendiculo , quia factum habet speciem mali , *pudicitia bonum* , inquit S. Cyprianus vel quivis author lib. de singularitate Clericorum , *frustra intrinsecus laborioso agone custodit , quod forinsecus efficit infamari* PEJUS EST QUAM MOECHARI ! *continentiam ducere criminofam , & infamem ferre sanctimoniam.*

Dicitur 3. *præbens alteri occasionem ruinæ* ; quia necesse non est ad rationem scandali , ut ruina actu sequatur , sed satis est quod ruinæ detur occasio.

Q. 17. *Quotuplex est scandalum ?*

R. Duplex , alterum datum five activum , cuius mox definitionem attulimus : alterum acceptum seu passivum , quod est effectus scandali activi , seu peccatum , cuius causa fuit scandalum datum.

Q. 18. *Quotuplex est scandalum datum ?*

R. Duplex, scilicet directum & indirectum : directum, cum quis dictis, vel factis proximum in ruinam impellere intendit, puta in fornicationem, detractionem, &c. Indirectum, cum quis non intendens ruinam proximi, nonnulla dicit aut facit in proprium commodum aut animi oblectamentum, quæ tamen sunt alteri occasio peccati.

Q. 9. *Quotuplex est scandalum passivum seu acceptum?*

R. Duplex : alterum dicitur pusillorum, quod ex proximi ignorantia aut infirmitate oritur propter dictum aut factum alterius : alterum Pharisæorum, quod nascitur ex sola malitia accipientis. Ideo autem dicitur Pharisæorum ; quia insignis fuit eorum malitia, qua ex dictis & factis Christi Domini ab omnibus evidenter probandis, & laudandis peccandi occasionem sumpserunt.

Q. 20. *Scandalum datum estne peccatum?*

R. Ex genere suo est peccatum lethale, & quidem specie distinctum, etiamsi sit indirecte datum ; quia pugnat contra specialem virtutem scilicet charitatem proximi, cum est occasio ruinæ. *Qui scandalizaverit unum de pusillis istis qui in me credunt*, inquit Christus Matth. 18. *expedit ei, ut suspendatur mola asinaria in collo ejus & demergatur in profundum maris. Væ mundo à scandalis.* Similia habet Apostolus 1. Cor. 8. in quem locum Sanct. Chrysostomus hom. 2. scribit, quovis vulnere gravius esse scandalizare, seu offensionem afferre.

Ergo satis non est, ut quis in Confessione Sacramentali exponat se obscœna colloquia habuisse, fornicatum fuisse aut furatum cum aliis, sed tenetur insuper explicare an author fuerit ejusmodi colloquiorum, aut fornicationis & furti aliorum ; si enim aliis fuit causa ruinæ, dupliciter

citer peccavit, 1. contra charitatem per scandalum ab ipso datum. 2. contra castitatem in primo & secundo exemplo & contra iustitiam in tertio. Imo scandali peccatum in eo multiplicatur pro numero eorum, quibus dedit occasionem peccandi, quemadmodum reus esset duplicis homicidii, qui uno ictu interficeret duos homines. Ita Navarrus Man. 6. num. 19. & alii.

Ergo frustra in sui excusationem opponunt nonnulli quod soli infirmi & imbecilles, eorum dictis, vel factis offendantur, ait enim Christus cit. c. 18. v. 10. *Videte ne contemnatis unum de pusillis istis.* Nec Scripturæ, nec SS. Patres meminere scandalum fortium, sed infirmorum dumtaxat: fortes quippe & in virtute roborati non solent scandalizari.





Tractatus DE JURE & JUSTITIA.

CAPUT PRIMUM.

De Juris notione & divisione.

Q. 1. *QUID est Jus?*

R. Omissis variis ejus acceptionibus, jus prout hic sumitur, definitur, facultas quam habet quis ad utendum re aliqua, vel ad eam obtinendam in judicio, vel ad eam retinendam.

Q. 2. *Quomodo jus dividitur?*

R. Dividitur in jus in re & in jus ad rem.

Jus in re est potestas legitima in re obtenta: tanquam sua, diciturque jus reale.

Jus ad rem est potestas legitima ad rem obtinendam sibi que obligandam, qualis contigit per stipulationem, donationem, vel emptionem ante traditionem rei.

Jus in re dat actionem in rem ipsam: jus vero ad rem in personam dumtaxat. Unde si res tibi vendita sit, & tradita quocumque transeat, po-
test

test eam vindicare, non vero si non fuerit tradita, sed solum habes actionem personalem in venditorem, ut tradat quod tibi vendidit.

Q. 3. *Quænam sunt species juris in re?*

R. Dominium, usus fructus, servitus, jus hypothecæ & pignus, emphyteusis, feudum, libellus, superficies & possessio.

Q. 4. *Quotuplex est dominium?*

R. Duplex, nempe dominium jurisdictionis, & dominium proprietatis.

Dominium jurisdictionis est potestas gubernandi subditos, quo sensu Principes Domini dicuntur, sed de hoc dominio hic non agitur

Dominium proprietatis est jus in re se extendens ad omnem ejus usum & dispositionem, nisi lege prohibeatur: nam pupillus v.g. licet sit Dominus, ut habetur Gal. 4. lege prohibetur alienare sua bona usque ad certum tempus.

Q. 5. *Quid est ususfructus?*

R. Est jus utendi, fruendi rebus alienis, salva earum substantia. Sic locator utitur & fruatur domo aliena, sed non potest eam destruere aut alteri vendere, quemadmodum Dominus proprietatis.

Q. 6. *Quid est usus?*

R. Est jus utendi tantum re aliena ad suum, non vero ad alienum usum. Unde multo minus juris competit usufructuario, quam fructuario; qui enim fundi nudum habet usum, nihil amplius habere intelligitur, quam ut oleribus, pomis, fœno ad usum quotidianum utatur, nec ex iis quidquam potest alteri donare aut vendere sicut usufructuarius.

Q. 7. *Quid est emphyteusis?*

R. Est

R. Est contractus, quo res aliqua immobilis utenda fruenda ac melioranda traditur sub certa pensione. Unde nomen illud emphyteusis deducitur à verbo Græco, quod latine significat, *infero*, vel *confero*; quia hic contractus inventus est, ut agri steriles & inculti meliorentur, quod fit ferendo, plantando.

Q. 8. *Quid est feudum?*

R. Est contractus, quo traditur res immobilis pro fidelitate & servitio personali exhibendo, retenta proprietate, ut si Rex det castrum viro nobili. Feudum autem dicitur à fide seu fidelitate. Qui dat, dicitur infeudator; & qui accipit, vassallus; seu feudatarius.

Q. 9. *Quid est libellus?*

R. Est contractus, quo emphyteuta aut vassallus rem emphyteuticam vel feudalem ab aliquo acceptam, dat tertio in emphyteusim aut feudum.

Q. 10. *Quid est superficies?*

R. Est jus, quo quis habet superficiem fundi alieni, atque in eo ædificare potest. Proprietas autem domus superficiariæ pertinet ad dominum fundi: sed superficiarius habet dominium utile, seu usumfructum.

Q. 11. *Quid est servitus?*

R. Est jus, quod quis habet in re aliena ut sibi serviat v.g. per agrum alterius transeat, vetet, aquas in alienum fundum deducat.

Q. 12. *Quotuplici modo accipitur possessio?*

R. Duplici. 1. materialiter pro re possessa, quo sensu ager dicitur possessio. 2. Formaliter pro actu vel jure possidendi. Actus possidendi dicitur possessio facti: jus vero possidendi, possessio juris.

Q. 13.

Q. 13. *Quomodo definitur possessio facti?*

R. *Definitur, detentio rei adminiculo corporis & animi, & juris.*

Dicitur 1. *Detentio rei, five corporeæ, ut agri; five spiritualis, ut beneficii.*

Dicitur 2. *Adminiculo corporis; quia, ut res incipiat possideri, debet aliquo modo apprehendi vel in se, ut pedum positione, à qua dicitur possessio, vel scriptura seu instrumento, in quo res ipsa contineri censetur.*

Dicitur 3. *Et animi adminiculo, quia debet apprehendi animo possidendi. Unde tutor non habet possessionem bonorum pupilli, quia non sibi ea retinet.*

Dicitur 4. *Et juris adminiculo, non quod omnis possessio iusta sit; sed quia jus facit ut ab illa detentione, si per tempus fuerit pacifica, possessor deturbari non possit sine auctoritate publica.*

Dixi, *Si per tempus fuerit pacifica*; quia possessor expulsus à sua possessione, potest eam repetere, modo id fiat statim, & non ex intervallo.

Usitatissima est divisio possessionis in civilem, & naturalem.

Civilis est detentio rei adminiculo solius animi; quamvis enim ad inchoandam possessionem civilem opus sit adminiculo corporis, & animi, tamen ad illam continuandam sufficit animus eam retinendi. Hoc modo absens possidet domum, quam semel apprehendit, quia eam retinet animo.

Possessio naturalis potest conjungi cum civili, ut quando quis est præsens per se vel per alium rebus quas civiliter possidet; diciturque civiliter & naturaliter possidere; & hæc possessio est
firmis-

firmissima. Potest etiam esse separata à civili, ut si invasor occupet rem tuam immobilem, ille naturaliter possidet, tu vero civiliter.

Q. 14. *Quinam sunt fructus possessionis?*

R. Plures in jure recensentur, sed præcipuus est usucapio seu præscriptio.

Q. 15. *Quid est præscriptio?*

R. Definitor, acquisitio dominii & juris per possessionem legitimo tempore continuatam ex legis præscripto.

Q. 16. *Præscriptio valetne in foro etiam interiori, ita ut qui legitime præscripsit, non teneatur in conscientia restituere priori domino rem præscriptam?*

R. Affirmative, probaturque tum ex definitione allata, tum ex Jure Civili tit. de Usucapionibus, & Jure Canonico tit. de Præscriptionibus.

Dices. Nemo privatur re sua sine sua culpa aut voluntate. Ergo.

Nego antec. Nam ex regula 23. Juris in 6. *sufficit aliqua causa nimirum si ratio boni publici id exigat.*

Q. 17. *Quæ conditiones requiruntur ad legitimam Præscriptionem?*

R. Quinque. Prima, ut res quæ præscriptione acquiritur, à jure non prohibeatur præscribi. Nequeunt autem præscribi quæ sunt contra jus naturale vel divinum, ut habetur cap. ultimo, Extravag. de Consuetudinibus.

Secunda, ut res, quæ præscribitur possideatur; nam sine possessione præscriptio non procedit ex regula 3. *de Regulis Juris*, in 6.

Tertia ut sit legitimus titulus: sive verus, sive probabiliter præsumptus & coloratus, id est qui bona fide putatur validus, etsi talis non sit in
rei

rei veritate. Titulus autem dicitur ratio, propter quam quis censetur iuste possidere rem aliquam. Possideo v. g. hunc librum, quia illum emi. Emptio est titulus & quidem verus, si emi à vero domino: coloratus vero, si emi ab eo quem putabam verum dominum, cum non esset. Porro titulus requiritur ad præscriptionem longi temporis, scilicet triennii in rebus mobilibus, decennii, & vicenni in immobilibus: non requiritur autem saltem ordinarie ad præscriptionem longissimi temporis, hoc est triginta & quadraginta annorum.

Quarta ut sit bona fides; nam possessor malæ fidei non præscribit ullo tempore ex regula 2. *de Regulis Juris*, in sexto.

Quinta, denique ut sit tempus sufficiens ad præscribendum ex tit. *Extrav. de præscriptionibus*.

Q. 18. *Dubitatio impeditne bonam fidem & præscriptionem?*

R. 1. Dubitatio, quæ omnem possessionem præcedit, impedit bonam fidem; quia in dubio favendum est possessori.

R. 2. Dubitatio possessioni superveniens non impedit bonam fidem; quia in pari causa potior est conditio possidentis ex regula 65. *de Regulis Juris*, in sexto; tamdiu enim bonæ fidei possessor recte dicitur, quamdiu se possidere ignorat alienum ex cap. *si virgo*. causa 34. q. 1.

Dices per litis contestationem interrumpitur possessio, etiamsi bona fide inchoata sit. Ergo & per dubitationem interrumpitur.

Nego consequ. ideo enim per litis contestationem interrumpitur præscriptio, quia impeditur

pacifica possessio, quæ requiritur ad præscriptionem : at dubitatio pacificam possessionem non interruptit.

Q. 19. *Quale tempus requiritur ad præscribendum?*

R. 1. Res mobiles cum titulo per possessionem triennalem bona fide continuatam præscribuntur, institut. Parag. 1. tit. de Usucapionibus.

R. 2. Res immobiles privatorum inter præsentem cum titulo præscribuntur decennio, inter absentes vicennio.

Dixi, *privatorum*; nam ex cap. *Illud*, cap. *Quia* & cap. *Ad aures*. tit. de Præscrip. requiruntur 40. anni ad præscribendum contra Ecclesiam distinctam à Romana.

De aliis acquirendi modis egimus tom. 4. quem operæ pretium est consulere; non enim satis abbreviari possunt quæ ibi dicuntur de occupatione bestiarum, & venatione, de inventis thesauris, & rebus recens perditis, an fiant occupantis.

CAPUT II.

De devinitione & divisione justitiæ.

Q. 1. *Quid est justitia?*

R. Definitur à Jurisconsultis constans, & perpetua voluntas jus suum cuique tribuendi. Clarius & magis ad Logicæ Regulas definiri potest, virtus moralis firmans voluntatem ad perpetuo reddendum alteri jus suum ad æqualitatem.

Q. 2. *Quotuplex est justitia?*

R. Triplex, nempe legalis, distributiva & commutativa.

Q. 3. *Quid est justitia legalis?*

R. Est

R. Est virtus firmans voluntatem, ad tribuendum Reipublicæ debitum, scilicet procurando bonum Reipublicæ præ bono privato.

Q. 4. *Quotuplex est justitia legalis?*

R. Duplex. Prima dicitur imperans & nomotetica: secunda exequens seu ministerialis. Illa residet in Principe, vel in Magistratu & Superiore quatenus dirigit actus sibi subditorum ad bonum commune: hæc in civilibus, & inferioribus, quando amore boni communis obediunt, & observant ea, quæ legibus continentur.

Ergo sicut charitas comites habet omnes virtutes, quia proprius ejus effectus est servare omnia mandata, juxta illud Joan. 14. *Si quis diligit me, sermonem meum servabit*; sic nec justitia legalis consistere potest sine cæteris virtutibus, cum omnes concurrere debeant ad bonum publicum.

Ergo rara est admodum justitia legalis. Quis enim subditus amore boni publici obedit Magistratibus? Quis capeffit dignitatem aut aliquod officium in Republica intuitu boni publici? nonne ista quærentur aut emuntur? si emere liceat, quomodo emeretur aliquis fundus propter proprium commodum? Quid attendunt plerique in dignitatibus constituti, nisi quid & quantum propter illas ipsis debeatur, quanta obedientia, quantus honos, quanta retributio, aut quantus proventus? Atque utinam hujusmodi vitia usque ad sanctuarium non penetrarent.

Q. 5. *Quid est justitia distributiva?*

R. Est virtus moralis inclinans eum, qui communitati præest, ad distribuenda officia & præmia, juxta meritum, si sit remuneratoria, vel ad

irrogendas pœnas juxta modum culpæ si sit vindicativa.

Q. 6. *Quid est justitia commutativa?*

R. Est virtus moralis inclinans privatum ad reddendum alteri privato quod suum est, juxta proportionem arithmeticam, seu ad æquale.

Q. 7. *Quid est proportio arithmetica?*

R. Est proportio numeri ad numerum, arithmetica enim deducitur à verbo græco, quod latine significat numerare: proportio autem in numeris servatur, quando æquantur, ut duo & duo. Unde si debeantur centum nummi decem creditoribus, justitia commutativa exigit, ut singulis distribuantur decem nummi, nec plures nec pauciores. Atque in eo differt justitia commutativa à justitia distributiva, quod ista non servet proportionem arithmeticam, sed geometricam tantum, in qua non confertur numerus cum numero, sed una proportio cum altera proportionem, ut si centum nummi sint distribuendi militibus secundum eorum dignitatem & meritum, & ille cujus dignitas est ut duo, accipere debeat sex nummos, alter, cujus dignitas est ut quatuor, debet juxta justitiam distributivam accipere duodecim. In hac distributione non servatur proportio arithmetica; sex quippe & duodecim sunt numeri inæquales; sed in ea reperitur proportio geometrica; sicut enim sex duobus partibus superant duo, pari proportionem duodecim superant quatuor.

Ergo justitia distributiva non confert rem cum re, quemadmodum justitia commutativa, sed meritum & dignitatem unius personæ cum merito & dignitate alterius.

Ergo

Ergo justitia commutativa non attendit dignitatem & meritum personarum, quemadmodum justitia distributiva, sed exæquat debitum cum jure creditoris sive iste sit pauper aut dives, sive justus, aut peccator, *nulla erit distantia personarum*, ait Dominus Deut. 1. vers. 17. *ita parvum audietis ut magnum, nec accipietis cujusquam personam.* Hinc justitia commutativa vocari solet æquitas, seu æqualitas, quia proprium ejus est æquare debitum cum jure, pretium cum merce, restitutionem cum damno illato. Contra vero justitia distributiva spectat ad meritum & dignitatem, ita tamen ut non exæquet præmium cum merito recipientis, sed proportionem dumtaxat servet, ut qui plus habet meriti, plus quam cæteri, accipiat proportionem servata. Unde Episcopus digniorem eligens ad beneficium vacans, justitiam distributivam servat, licet electus omnium judicio amplius mereatur; quia in ejusmodi distributione non exæquatur beneficium cum merito accipientis, in quo consistit proportio arithmetica, sed confertur ejus meritum cum aliorum longe inferiore, ac proinde iis præfertur, servata proportionem geometrica.

CAPUT III.

De peccatis justitiæ oppositis.

Q. 1. *Quodnam est peccatum justitiæ distributiæ oppositum?*

R. Acceptio personarum, ut habetur Jacobi 2.

Q. 2. *Quomodo definitur acceptio personarum?*

R. Definitur, peccatum quo in distributione

Dd 3

bono-

bonorum communium non attenditur causa seu titulus, cur aliquis plus minusve debeat accipere, sed altera ratio ad prædictam distributionem non pertinet, ut si Magistratus aut Prælatus omiſſis dignioribus, conferat minus dignis officia Reipublicæ vel Ecclesiæ beneficia, quia sunt consanguinei, aut amici.

Q. 3. *In quorum bonorum distributionibus locum habet acceptio personarum?*

R. Locum habet

1. In exhibitione honoris. Titulus autem ob quem debetur alicui honor, est excellentia naturæ rationali congruens, quæ consistit in sapientia, virtute & gradu dignitatis, quam quis obtinet in Republica; nullæ enim aliæ perfectiones reddunt hominem excellentem & honore dignum. Unde Sanct. Jacobus citato loco carpit eos qui honorem deferunt diviti propter splendidam ejus vestem.

2. In distributione onerum Reipublicæ; hæc enim justa proportionem distribui debent cum quilibet jus habeat, ne nimis gravetur; necessario autem quidam nimis gravantur; ubi non servatur justa proportio.

3. In distributione Officiorum sæcularium; hæc enim sunt bona quædam communia Reipublicæ instituta in ejus commodum, quorum distributio pertinet ad Principem, unde tenetur jure naturæ maxime idoneis & Reipublicæ utilibus ea conferre.

4. In electione & præsentatione ad beneficia Ecclesiastica, ac in eorum collatione, resignatione & permutatione; ista quippe sunt communia Ecclesiæ bona dignioribus distribuenda.

Q. 4.

Q. 4. *Quale est peccatum acceptio personarum?*

R. Ex genere suo est mortale; quia fit cum injuria proximi. Potest tamen esse veniale ob levitatem materiæ.

Q. 5. *Estne peccatum lethale eligere vel præsentare ad beneficia minus dignos spretis dignioribus?*

R. Affirmative, si quæstio sit de beneficiis, quibus cura animarum est annexa. Ita enim declaravit Concilium Trident. sess. 24. cap. 1. de reform. Cumque recentiores nonnulli, quos Casuistas vocant, Decretum Concilii tam claris verbis conceptum depravarent hac sua interpretatione, nempe Concilium, vel per DIGNIORES significare voluisse dignos sumpto comparativo pro positivo, ut excluderet solummodo indignos, vel intelligendum quando sit concursus, in quo digniores ex justitia præferendi sunt ob fidem eis datam, Innocentius XI. anno 1679. & Clerus Gallicanus anno 1700. ejusmodi interpretationem damnarunt ut scandalosam, perniciosam & Decreto Concilii Trident. contrariam.

De aliis beneficiis sine cura non ita constat apud Theologos; nonnulli enim existimant ea absque peccato lethali posse conferri vere dignis, spretis dignioribus. Verum illa sententia absolute & universaliter falsa est, januamque multis abusibus & corruptelis aperit. Quare merito rejicitur à sancto Antonino 2. part. tit. 1. cap. 22. paragr. 1. à Covarruvia 2. parte paragr. 7. num. 4. à Cajetano q. 67. art. 2. à Navarro de oratio-Miscel. 38. & ab aliis, quibus Lessius ex parte astipulatur lib. 2. de beneficiis cag. 34. dub. 13. num. 66. scribitque grave esse peccatum, si ejusmodi beneficia ordinarie conferantur minus di-

gnis; quia patroni peccant in re magni momenti contra intentionem fundatoris, & fidelitatem quam debent Ecclesiæ. Magni enim interest ad Religionis Christianæ decus, ut divina Officia, quam decentissime ac devotissime celebrentur, Canonici præsertim Cathedralium Ecclesiarum doctrina & pietate præluceant, Episcopi cooperatorum esse possint, meritoque Ecclesiæ Senatus dicantur; quemadmodum loquitur Concil. Trid. sess. 24. c. 12. de reformatione ubi propterea expetit, ut saltem dimidia pars Canonicatum in Cathedralibus Ecclesiis, & Collegiatis insignibus conferatur tantum Magistris & Doctoribus, aut Licentiatis in Theologia vel Jure Canonico. Sed ista fusius prosecuti sumus tom. 4. cap. 3. de jure & ubi confutavimus quæ contra solent objici.

Q. 6. *Acceptio personarum inducitne restituendi obligationem?*

R. Non inducit, nisi cum justitia distributiva concurrat (ut nonnumquam contingit) justitia commutativa; quia privati quantumcumque digni, non habent jus strictum ad bona Reipublicæ communia, v. g. ad officia & beneficia, liberumque est Superiorem ex dignis, aut dignioribus eligere quos voluerit, quemadmodum qui accepit pecunias pauperibus distribuendas, si in distributione aliquos prætermittit, non facit illis injuriam, nec isti habent potestatem exigendi partem pecuniæ distribuendæ, quia liberum est distribuenti eligere, quos voluerit pauperes.

Dixi, *nisi cum justitia distributiva (ut nonnumquam contingit) concurrat justitia commutativa*, quia si ista violetur, dispensator restituere tenetur, ut patet sequentibus exemplis.

I. Cum

1. Cum Magistratus oneribus, tributis, militum hospitio privatos gravat, nec in his servat proportionem; privatus enim quilibet jus strictum habet, ne supra facultates suas gravetur. Quare Magistratus tenetur ad restitutionem, si ut seipsum, parentes, familiares; amicos levet, alios premit.

2. Quando in concursu minus dignum præfert digniori; per concursum enim Superior cum iis, qui se offerunt, init pactum dandi Beneficium ei qui superaverit: ex pacto autem nascitur jus strictè sumptum.

3. Quando bona communia sunt specialiter aliquibus destinata, contra justitiam commutativam peccaret, qui ea aliis distribueret. Dux v. g. qui secundum intentionem Principis debet distribuere spolia urbis expugnatae militibus, qui eam expugnarunt, tenetur ex justitia commutativa iisdem dividere spolia juxta proportionem Geometricam, dando dupliciter ei qui habet meritum duplo majus: alias injustus est, teneturque ad restitutionem. Idem sentiendum de Prælato, qui nollet conferre Beneficium digno, qui ad illud electus est, aut nominatus à patrono; hic enim jus habet ad rem.

Ergo nulla peccata quantumcumque gravia inducunt obligationem restituendi, nisi pugnent adversus justitiam commutativam, violentque jus, sive in re, sive ad rem. Exemplis elucidatur propositio. Petrus ex odio quo flagrat in Paulum, non impedit, cum possit; ne bona ejus à prædonibus diripiantur, ne ager ejus devastetur, vel amicum deducit à concilio eidem Paulo opitulandi, quæritur an Petrus teneatur ad restitu-

tionem. Distinguendum est : si Petrus in primo exemplo tenebatur ex officio impedire, ut Magistratus, custos agrorum, obnoxius est restitutioni; quia peccavit contra justitiam commutativam, quatenus iniit contractum cum Republica, quo se obstrinxit arcere prædones : secus si ex sola charitate id præstare tenebatur. Similiter distinguendum est in secundo exemplo : Petrus advocavit amicum vel mendaciis & aliis malis artibus, vel non, sed solis precibus : si primum, tenetur restituere; quia jus habet proximus, ne mendacia sibi noxia componantur. Si secundum, non tenetur, nisi forte amicus ex officio debuerit opitulari : quia non violavit justitiam, sed charitatem dumtaxat.

Ergo injustitia proprie & stricte sumpta, restituendi obligationem pariens, est violatio juris alieni, sive jus illud sit in re, sive sit ad rem tantum. Cum autem triplicis generis sint bona proximi in quæ jus strictum habet, scilicet vitæ, famæ & fortunæ, triplicis quoque generis sunt peccata justitiæ commutativæ opposita, nempe homicidium, mutilatio, quibus eripitur vita & personæ incolumitas, ac libertas : calumnia, detractio, contumelia, &c. quibus læditur fama & honor : furtum, rapina, fraus, dolus, &c. quibus affertur nocumentum in rebus fortunæ.

Ergo injustus est, qui pro ejusmodi damnis proximo illatis restituere, aut pro iis satisfacere quantum potest, non satagit, quia non reddit alteri quod suum est.

Ergo præceptum restituendi, negativum est, licet sonet aliquid positivum; quia præceptum
nega-

negativum dicitur quod prohibet malum : Atqui præceptum restituendi primario prohibet retinere rem proximi , ipso invito , quod est per se malum : Ergo.

Dixi *quantum potest* ; qui enim totum restituere non valet , quam potest partem restituere tenetur.

Ergo qui restitutionem differt , v. g. solvere debita , domino rationabiliter invito continuo peccat : quia continuo male facit , teneturque exponere in confessione Sacramentali , quamdiu fuit in mora culpabili , quoties vel occurrit occasio restituendi , quam neglexit , vel advertit se esse injustum detentorem rei alienæ , nec serio proposuit eam quam primum restituere , aut pro ea satisfacere. Quin si proximus ex hujusmodi injusta dilatione nova damna passus est , ea refarcire tenetur. Hæc attendere debent Confessarii præsertim in Nobilibus , qui ære alieno gravati sumptibus parcere non curant , magno mercatorum & artificum dispendio , cujus injustitiæ plures conscii sacramenta indigne percipiunt , eorumque confessiones sunt iterandæ.

Q. 7. *Quo sensu accipi debet ista regula Juris in 6. Scienti & consentienti non fit injuria?*

R. Sensus est eum , qui accipit aut detinet rem alienam , domino nullatenus invito , nec decepto , non peccare contra justitiam ; quia non violat jus alterius ; qui enim cedit juri suo : perinde est ac si gratis donaret quod suum est.

Dixi 1. *Domino nullatenus invito* ; satis enim non est ; ut absolute velit , & secundum quid nolit ; ut si concedat metu , puta incurrendi offensam potentioris , non obtinendi jus , quod in judicio postu-

postulat ; vel aliqua necessitate pressus , si v. g. indigeat mutuo accipere , aut habere longiorem terminum ad solvendum , ac propterea munera largiatur , usuras condonet , contractum certum & nulli periculo obnoxium viliori pretio offerat. Una omnium Theologorum vox est eum injustum esse , qui ex alienis incommodis sua comparat commoda , quia invitus secundum quid non cedit juri , quod habet disponendi de re sua cum plena voluntate & libertate.

Dixi 2. *Nec decepto* ; quia error & ignorantia impediunt voluntarium , ut patet ex ejus definitione ; voluntarium quippe est quod procedit à principio interno cognoscente singula in quibus est actio. Ergo qui in commutationibus , seu contractibus consensum alterius obtinet per fraudem & circumventionem , facit illi injuriam , & restituere tenetur quantum sua interest non fuisse deceptum. Cum autem ejusmodi malæ artes diversis modis pro diversitate contractuum contingant , operæ pretium est de contractibus dicere.

C A P U T IV.

De contractibus in genere.

Q. I. *Quid est contractus ?*

R. Definitor perfectus actus externus inter duos vel plures , ex eorum consensu ultro citroque obligationem pariens. Excipe tamen contractus imperfectos , seu non reciprocos ; ut sunt donatio & promissio , in quibus solus donans , aut promittens se obligat.

Q. 2.

Q. 2. *Quænam impedire possunt consensum in contractu requisitum?*

R. Tria. 1. Lex, quæ vel absolute reddit personas inhabiles ad contrahendum, puta tutorem cum pupillo, conjugem cum uxore, & vicissim; vel non permittit contrahere nisi sub certis conditionibus, seu solemnitatibus, v. gr. matrimonium celebrare, nisi in præsentia, Parochi. 2. Metus injustus cadens in constantem virum. 3. Error, seu dolus & fraus.

Q. 3. *Defectus conditionis, seu solemnitatis per legem appositæ redditne consensum irritum & consequenter contractum?*

R. Si conditio seu solemnitas sit essentialis, irritat: secus, si sit tantum accidentalis; multa enim prohibentur, quæ facta tenent.

Q. 4. *Quomodo cognoscitur conditionem per legem contractui appositam esse essentialem, aut accidentalem?*

R. Colligitur esse essentialem. 1. Ex verbis ipsius legis, ut si expresse pronuntiet contractum esse nullum, ex eo non posse peti debitum, sive in judicio, sive extra judicium: si obliget eum ad restituendum, qui ex tali contractu quidpiam accepit. 2. Si posito quod constaret Legislatori nullam in contractu fuisse fraudem, v. gr. in matrimonio clandestino, nihilominus contractum declaret esse irritum. Censetur vero accidentalis solemnitas, quando per legem ita præcipitur, ut ea tamen omissa, contractus non habeatur nullus.

Ergo præceptum præmittendi matrimonio tres denuntiationes, & prohibitio celebrandi matrimonium tempore Quadragesimali pertinent ad solemnitates accidentales tantum, cum sine iis
matri-

matrimonium non sit irritum, sed illicitum dumtaxat. Contra vero præsentia Parochi, aut alterius Sacerdotis de Parochi, vel Episcopi consensu, & duorum testium est essentialis matrimonio, cum sine ea nullum sit matrimonium.

Ergo solemnitates præscriptæ pro testamentis & legatis sunt essentielles, cum iis omissis, testamenta & legata in foro externo declarentur nulla; ita ut hæredes in conscientia non teneantur ea exequi, etiam si apud eos constet de voluntate Testatoris, modo tamen ipsi viventi non promiserint se vota ejus impleturos; ex ejusmodi enim promissione obligantur, si testator poterat dare. Utrum autem Legata ad pias causas sint excipienda, penes est judicem. Consule quæ in hanc rem diximus tom. 4. de Donationibus.

Ergo secundum plures leges municipales, donationes conjugem inter & uxorem nullum effectum pariunt, & bona sic accepta hæredibus sunt restituenda, etiam ante sententiam judicis; quia ejusmodi donationes iisdem legibus declarantur irritæ. Quare locorum consuetudines tam pro testamentis & legatis, quam pro donationibus vel unius conjugis in gratiam alterius, vel parentum in gratiam unius liberi præ aliis dilecti, sunt omnino consulendæ & observandæ. Utrum autem & quomodo fideicommissum possit esse licitum & validum, diximus tom. 4. loco citato.

Q. 5. *Contractus per metum initus estne validus?*

R. Jure positivo Contractus metu gravi & injusto initi irritari possunt; sed actu & de facto non sunt irriti, exceptis tamen quibusdam contracti-

tractibus. Colligitur ex lege ultima, Cod. *de his quæ vi.*

Dixi 1. *Metu gravi*; tum quia ex Regula 144. Juris in 6. *Vani timoris iusta excusatio non est*: tum quia metus levis non præsumitur dedisse causam contractui.

Dixi 2. *Et injusto*; nam si fuerit iuste inceptus, contractus irritandus non est. Quare si quis ex iusta sententia iudicis cogatur matrimonium contrahere, firmum erit ejus matrimonium.

Dixi 3. *Quibusdam contractibus exceptis*: contractus enim matrimonii & professio Religionis ex metu gravi, & injusto nullum pariunt effectum.

Q. 6. *Valetne contractus ex errore, vel dolo initus?*

R. 1. Si error vel dolus sit circa substantiam, ut si quis crederet emere vas aureum, cum esset æneum, nullus est contractus, quia nullus est consensus; numquam enim voluit emere vas æneum.

R. 2. Si error sit circa accidentia tantum, non irritat contractum, etiam si ei causam dederit, tum quia adest sufficiens cognitio rei, de qua contrahitur; & consensus in eam: tum quia vix ullus contractus validus foret, cum fere semper occurrant aliquæ circumstantiæ, quas si quis prævidisset, non contraxisset.

Si tamen dolus contigit ex altero contrahente, rescindendus est contractus requirente parte decepta; & decipiens tenetur resarcire damna ex dolo secuta.

Sed si error contigit vel à parte decepta, vel à tertia persona, vel ab altero contrahente, sed sine ejus culpa, contractus rescindendus non est, faltem

saltem in foro conscientiae, nec refarciendum damnum, quia non fuit injuste illatum, sed refundendus est excessus pretii, ut reponatur aequalitas.

Q. 7. *Quam obligationem parit contractus?*

Nota triplicem esse obligationem. Prima dicitur naturalis tantum, qua quis obligatur in conscientia, quamvis adversus eum non detur actio in foro exteriori, sic qui per quinque annos censum annum non solvit, naturaliter obligatur solvere, quamvis creditor qui per illud tempus repetere neglexit, actionem non habeat in foro externo adversus debitorem. Secunda obligatio est civilis tantum, datque actionem in foro externo, quamvis in conscientia non obliget: sic emptor, qui non potest proferre apocam, qua constat ipsum solvisse pretium rei emptae, civiliter obligatur ex contractu, cogiturque in foro externo iterum solvere. Tertia obligatio est naturalis simul & civilis, ligatque tam in foro conscientiae, quam in foro externo. His praemissis,

R. Contractus parit obligationem naturalem & civilem, nisi forte lex specialis prohibeat; quia contractus est lex quaedam privata, quam contrahentes sibi imponunt, cogunturque in foro externo fidem sibi mutuo datam servare.

Dixi, *Nisi forte Lex specialis prohibeat*; quia Legge Civili instit. tit. de inutilibus stipulationibus, paragr. *Pupillus*. Minores aetate & pupilli pubertati proximi non obligantur civiliter; sed tantum naturaliter, ita ut venditor pupillum, qui sine tutoris consensu emit, invitum compellere non possit ad solvendum pretium; sed solum

ad

ad reddendas merces, quæ si consumptæ fuerint absque dolo, pupillus in foro externo cogitur solum solvere, id quo factus est ditior. Dico in foro externo: quia naturaliter & in conscientia totum pretium refundere tenetur.

Extat enim Edictum Regium Ludovici XIII. promulgatum anno 1629. circa ludum Aleæ, qui est species quædam Contractus, in quo Edicto sic sanxit Rex Christianissimus: *Nous defendons & interdisons à tous nos Sujets de recevoir dans leurs maisons les assemblées pour le jeu, qu' on appelle Academie ou Berlans. Déclarons à présent tous ceux qui y contreviendront, ou qui se prostitueront à un si pernicieux exercice, infames; intestables, & incapables de tenir jamais Offices Royaux. Déclarons toutes ces contractées pour jeu, & toutes obligations & promesses faites pour jeu, quelques déguisées qu'elles soient, nulles & de nul effet, & decharges de toutes obligations civiles & naturelles.*

Q. 8. *Quomodo dividitur Contractus?*

R. Generatim dividitur in justum & injustum.

Justus est Contractus, cum servatur æqualitas & contrahentium conditio ita æquatur, ut viri prudentis judicio par sit utriusque & spes lucri & damni periculum. Contra verò injustus est contractus, in quo reperitur inæqualitas, & fors unius contrahentis evidenter deterior est sorte alterius. Hæc regula brevis quidem est, sed certissima & sufficiens ad omnes conscientiæ quæstiones solvandas circa Contractus rerum commutationes. Habeant Negotiatores & Mercatores in suis tabernis & artifices in officinis scriptum ad parietem, JUSTITIA EST ÆQUALITAS; IN-

D. Habert Theolog. Tom. VIII. E e ju-

JUSTITIA EST INÆQUALITAS, & uno intuitu intelligent quid observare, & quid vitare teneantur. Verum quia pro diversa Contractuum naturā, diversimodè adhibenda est isthæc regula, de Contractibus in specie dicendum.

CAPUT V.

De Contractibus in specie.

Eas dumtaxat Contractuum species attingam, quæ sunt magis in usu, & in quibus justitia sæpius læditur. Sunt autem illi Contractus, venditio & emptio, mutuum, societas, & cambium, galicè, *change*.

§. I.

De venditione & emptione.

Q. I. *Quid sunt venditio & emptio?*

R. Definitur venditio, pactio mercis pro pretio: emptio verò, pactio pretii pro merce.

Dicitur *pro pretio*; nam si merx daretur pro alia merce, non esset venditio aut emptio, sed permutatio.

Q. 2. *Quodnam est justum, aut injustum rei venalis pretium?*

R. Pretium æquale valore rei venalis secundum communem hominum æstimationem, est justum ejus pretium; inæquale verò est injustum. Ita omnes Theologi, quia ex dictis justitia consistit in æqualitate, injustitia verò in inæqualitate:

te: Ergo ut licitus & justus sit contractus emptio-
nis, aut venditionis, mensurandum est pretium
cum merce, vel cum opere artificis, *secundum di-
vinam Legem*, inquit sanctus Thomas secunda se-
cundæ q. 77. art. 1. ad 1. *illicitum reputatur si in
venditione & emptione non sit æqualitas justitiæ observa-
ta: & tenetur ille qui plus habet, recompensare ei, qui
damnificatus est.* Notent Pastores & Confessarii.

Dices: Ex Lege, *Explicito*, Digest. Paragr.
si Hæres, res tantum valet, quantum vendi po-
test: Ergo.

Distinguo anteced. Quantum vendi potest
intra altitudinem justii pretii, Concedo: extra
latitudinem, Nego anteced. aliàs Lex citata in-
justa foret & per aliam Legem correctâ, nempe
Lege Rem majori, de rescindenda venditione, & in Ju-
re Canonico, cap. *Cum causa*, tit. *de Empt. &
vendit.*

Q. 3. *Quomodo æstimanda est latitudo justa pretii?*

R. Duplex pretium est distinguendum: aliud
dicitur legitimum seu legale, quod est fixum
decreto Magistratus: aliud dicitur naturale &
vulgare, quod ex hominum æstimatione consti-
tuitur independentem à Magistratus decreto.

Pretium legale consistit in indivisibili, ita ut
si Magistratus determinaverit pretium panis talis
ponderis, injustus sit venditor & ad restitutio-
nem teneatur, si minimum quid ultra ab emptore
exigat; quia non servat æqualitatem à Lege
taxatam. Contra verò pretium naturale seu vul-
gare certam habet latitudinem; quia homines va-
riè de rebus judicant, ita ut quod alii censent va-
lere decem, alii æstiment undecim, alii etiam
duodecim.

Q. 4. *Quomodo Theologi describunt latitudinem pretii justi vulgaris?*

R. Pretium naturale vulgò dividunt in infimum, medium & supremum, docentque licitum esse venditori vendere supremo & rigoroso pretio, si possit id obtinere ab emptore, cui concessum est licitari, ut venditor descendat ad medium, aut infimum pretium. Quòd si secundum communem hominum æstimationem res tanti non valeat quanti empta est, venditor excessit limites justii pretii, & in foro conscientiæ restituere tenetur. Contra si emptor, secundum communem æstimationem minoris emit, quàm valeat res vendita, debet venditori satisfacere, nisi ille condonaverit.

Q. 4. *Licet-ne vendere credito supra latitudinem pretii naturalis?*

Licitum non est, nisi inde lucrum cesset, aut damnum emergat; quia res tanti non valet, quanti emitur.

Dixi, *Nisi inde lucrum cesset*; quia eo titulo aliquid accipere, non est vendere usum pecuniæ; sed damnum vitare, ut docet S. Thomas 2. 2. q. 78. art. 2. ad 1.

Hinc sequitur injustum esse & usurarium emere infra pretium vulgare ob anticipatam solutionem; quia hæc anticipata solutio habet rationem mutui, ex quo lucrum percipere usurarium est ex S. Thoma cit. art. 2. ad 7.

Q. 6. *Unde augetur rei venalis pretium?*

R. Ex his circumstantiis. 1. Ex penuria vel copia mercium. 2. Ex pecuniæ abundantia vel raritate. 3. Ex multitudine emptorum & paucitate vendentium, & contra. 4. Ex modo vendendi,

dendi, nam vilis res venduntur sub hasta & voce præconis; quàm apud mercatorem; contra verò quando minutatim & per patres, carius venduntur, quàm cum in magna quantitate.
5. Ex majori vel minori emptorum indigentia, modò tamen communis sit.

Dixi, *modò communis sit*; nam indigentia unius emptoris aut venditoris non mutat communem hominum æstimationem, nec efficit, ut carius res vendenda sit, aut vilis emenda.

Ergo meritò Academia Parisiensis anno 1665. damnavit hanc propositionem uti falsam, scandalosam, charitati & justitiæ contrariam. *Potest aliquis emere rem vilis ab illo, qui vendit necessitate compulsus.*

Ergo Mercator non potest sine injustitia augere pretium suarum mercium, ex eo quòd vel domus ejus in qua servabantur, conflagraverit, vel in iis advehendis majores sumptus fecerit, quàm alii Mercatores, vel quòd dolo deceptus sive artificum sive prioris Mercatoris vitiosas merces comparaverit, quas integras & optimas existimabat; quia merces in illius taberna vulgò non pluris æstimantur, quàm in tabernis aliorum Mercatorum, iniquum est omnino, ut damnum quod solus pati debet, in alios transferat.

Ergo injustus est, qui supra vulgare pretium rem suam, putà domum, agrum, &c. vendit, quia emptori admodum commoda est, & maximè ea indiget, iis enim æqualitatem non servat.

Q. 7. *Quid observandum est circa penuriam & raritatem mercium?*

R. Num illa raritas ex monopolio contigerit ?

Q. 8. *Quid est monopolium ?*

R. Et conventio unius pluriumve Mercatorum, ut ipsi soli vendant, emanve quo voluerunt pretio.

Ad monopolium refertur

1. Quando Mercatores supprimunt merces suas, ut inde earum pretium crescat.

2. Quando aliquis congerendo omnes ferè merces, inducit raritatem & caritatem : secus, si non induceret.

3. Si quis vi vel fraude impediat, ne merces aliunde advehantur, unde oritur caritas.

4. Quando opponitur fictus licitator, ut alter augeat pretium,

5. Si multi conveniant, ut opus ab uno inchoatum, alter non perficiat, quod expressè prohibetur lege *Jubemus*, Cod. de Monop.

6. Si Artifices conveniant non docere artem suam, nisi filios suos aut nepotes, aut nisi certo pretio injusto.

Q. 9. *Monopolium pugnat-ne contra justitiam ?*

R. Affirmativè, & ad restituendum obligat, nisi autoritate publica constituatur, quia cum pretium naturale rerum venalium quandam latitudinem habeat, singuli habent jus contrahendi intra illam latitudinem ; Ergo fit eis injuria, quando per monopolium coguntur emere tantum riguroso pretio aut vendere infimo. A fortiori injusti essent Monopolæ, si supra rigorosum pretium venderent, aut infra infimum emerent.

Dixi, *Nisi autoritate publica constituatur*, quia aliquan-

aliquando Reipublicæ interest, ut vel rerum venalium pretium taxetur, vel privilegium Mercatori aut Artifici detur; alioquin negotiationem aut artificium in Reipublicæ detrimentum deferere cogeretur. Nec in eo fit cuiquam injuria, modo curent Magistratus ne Mercatores aut Artifices prætextu privilegii pretium immoderatum exigant.

§. II.

De Mutuo.

Q. I. *Quid est mutuum?*

Est contractus, quo transfertur in alterum dominium rei in numero, pondere, & mensura consistentis, cum obligatione reddendi aliam ejusdem speciei & bonitatis, post lapsum temporis. Singulæ partes hujus definitionis sunt notandæ, & accuratiùs exponendæ ad refellendas plures pactiones injustas & usurarias. Itaque

Dicitur I. *Quo transfertur in alteram dominium*, in quo mutuum convenit cum venditione, differtque à multis aliis contractibus, ut à locatione, præsertimque à commodato, quod secundum linguam Gallicam confunditur cum mutuo; mutuum enim & commodatum dicuntur Gallicè, *prest*, quamvis essentialiter differant; commodatum quippe est de rebus, quæ usu saltem unico non consumuntur ut equus, liber, vestis, &c. mutuum verò est eorum, quorum usus est consumptio, ut frumentum, panis, vinum, pecunia.

Res prioris generis non mutuo, sed commo-

dato dantur in usum tantum, non in proprietatem. Unde si liber aut equus sine culpa commodarii pereat, perit commodanti, utpotè ejus domino.

Res verò posterioris generis mutuo dantur, non commodato; neque enim dicimur commodare pecuniam aut panem, sed mutuare: mutuando autem, dominium earum rerum transferimus, non secus ac si eas venderemus; quia usus earum non distinguitur à substantia & proprietate, cum mutuatarius iis uti non possit, nisi eas consumendo.

Ergo damnum aut fructus rei mutuatae non pertinet ad mutuantem, quia juxta regulam juris, *res perit, aut fructificat domino suo*. Sicut ergo domus per venditionem tradita, si tempestate corruat, corrui in damnum solius emptoris; ita si pecuniam mutuo recens acceptam latrones auferant, non mutuans, sed mutuatarius damnum illud pati debet. Si verò ex ea mutuatarius utiliter negotietur & ditescat, nihil inde mutuans repetere potest, cum res illa ad ipsum non pertineat. Atque hac ratione refelluntur; qui eo prætectu usuras exigunt, quòd mutuatarius ex pecunia ab ipsis mutuo accepta lucretur.

Dicitur 2. *Rei in numero*, &c. quia mutuum versatur circa res usu consumptibiles, quæ vel dantur in numero, ut pecunia, vel in pondere, ut panis, vel in mensura, ut vinum, frumentum, oleum, &c.

Dicitur 3. *Cum obligatione reddendi aliam ejusdem speciei & bonitatis*. Hæc est enim æqualitas & justitia, quam recta ratio exigit, ac proinde ab omni-

omnibus observanda, etiam à Tutoribus & Curatoribus, ut nec plus nec minus, sed tantum reddatur quantum mutuò acceptum est.

Dicitur 4. *Post lapsum temporis*, ut distingua-
tur mutuum à cambio, ubi pro nummo aureo
dato v. g. statim redduntur nummi argentei, Tem-
pus autem vel est determinatum in contractu mu-
tui, vel non: si primum, mutuans pecuniam
non potest repetere ante lapsum temporis præfi-
niti: si secundum, potest absque iniustitia repe-
tere quo tempore voluerit, modò non repetat
statim atque mutuo dedit, ac propterea mutua-
tarium mox in jus vocet, ut defectu solutionis
cogatur pendere usuras.

Dixi, *absque iniustitia*; peccaret enim & qui-
dem graviter contra charitatem, si tùm repete-
ret, cùm mutuatarius nonnisi cum magno detri-
mento reddere posset, & ipse mutuans nullum
damnum ex dilatione pateretur.

Ergo intrinsecum est contractui mutui quòd
mutuans per aliquod tempus pecunia sua careat,
periculoque se exponat eam amittendi. Quare
ratione carentiæ pecuniæ aut periculi, mutuans
non potest quicquam exigere ultra quàm conce-
dunt Leges mutui, secundum quas mutuatarius
tenetur solum æquale reddere.

Ergo meritò damnatæ sunt sequentes propo-
sitiones ab Innocentio XI. anno 1679. à Clero
Gallicano anno 1700. & priùs ab Academia Pari-
sensi anno 1665.

Prima, *Cùm numerata pecunia pretiosior sit nume-
randa, potest creditor aliquid ultra sortem à mutuatario
exigere, Et eo titulo ab usura excusari.*

Secunda, *Licetum est mutuantibus aliquid ultra sortem*

exigere, si se obliget ad non repetendam sortem usque ad certum tempus.

Tertia, non est usura, si recipiat ratione periculi tantum, ut pretium periculi.

Quarta, Nullus potest esse ita securus, quin possit aliquod intervenire periculum, vel saltem aliqua difficultas, vel labor in re habenda. Quo fit ut secundum illam novam doctrinam semper licitum sit ex mutuo usuram percipere, & quidem majorem à pauperibus, cum pecunia ipsis mutuata majori exponatur periculo.

Q. 2. Quomodo æquanda est bonitas rei reddendæ cum bonitate rei mutuo acceptæ, v. g. mutuo dati sunt decem nummi aurei, vel totidem modii tritici, quorum valor seu pretium postea crescit aut decrescit?

R. Reddendum est juxta valorem aut pretium rei, quando accepta est; nisi aliter contrahentes justo pacto convenerint, ita ut si valor cujuslibet nummi erat decem libellarum, reddendæ sint centum libellæ; nec plus nec minus.

Dixi; Nisi aliter contrahentes convenerint, si enim mutuans prævideret valorem nummi aut pretium tritici esse augendum, velletque propterea ista servare, non peccaret contra Legem Contractus & Justitiæ, si exigeret à mutuatario, ut tot nummos in specie aut modios redderet, deductis tamen expensis ad triticum servandum necessariis; quia mutuans per hujusmodi pactum, nihil lucratur ex mutuo, sed solum se indemnem reddit. Idem dicendum juxta Cap. Naviganti, Tit. de Usuris, si dubium sit, utrum valor nummi aut pretium tritici, crescat aut decrescat; quia æqualis est spes lucrandi in mutuante, & mutuatario æquale quoque periculum incurrendi damnum.

De Usura.

Q. I. *Quid est usura?*

R. Definitur ab omnibus sive Philosophis, sive Theologis & Canonicis, lucrum ex mutuo immediatè proveniens.

Dicitur 1. *Lucrum* indefinitè, sive immodicum, sive modicum, sive sit nummus, sive onus à mutuante impositum mutuatario, v. g. veniendi ad ejus furnum, denique quicquid est pretio æstimabile. Luc. 6. *Mutuum date nihil inde sperantes.* Et causa 14. quæst. 3. cap. 1. *Si mutuo dederis pecuniam tuam, à quo plus quam dedisti expectas, non pecuniam solum, sed aliquid plus quam dedisti, sive illud triticum sit, sive vinum, sive quodlibet aliud, si plus quam dedisti expectes accipere, fœnerator es, & in hoc improbandus, non laudandus.*

Dicitur 2. *Ex mutuo proveniens*, 1. Quia contractus mutui totus est in gratiam mutuatarii, aded ut si mutuans principaliter intendat ex mutuo sibi lucrum provenire, usuram mentalem committat. 2. Quia si quis præter sortem accipiat ratione lucri cessantis, aut damni emergentis, usuram non committit, cum ex mutuo non lucretur, nec fiat ditior propter mutuum; sed damnum refarciat, quod ex mutuo patitur, v. g. petenti dat mutuo pecuniam, qua vel censum annum extinguere, vel agrum emere, vel mercaturam exercere paratus erat, justè & absque usura exigit à mutuatario ut refundat, quod ipse mutuando deperdit.

Ut autem justus sit ille titulus ultra sortem accipiendi, mutuum debet esse vera causa lucri cessan-

cessantis aut damni emergentis ; si enim mutuans non habeat occasionem moraliter certam lucrandi ex pecunia mutuo data, vel si sponte pecuniam ex mercatura, aut ex quovis lucrando modo subtrahit, quia tutius aut utilius sibi existimat mutuo dare quàm negotiari, fundos emere, contractum consignativum inire, usurarius est, nec potest prætexere lucrum cessans aut damnum emergens. Unde falsum est absolutè licere mercatoribus lucrum ex mutuo percipere, etiamsi inde nullum damnum patiantur.

Dicitur 3. *Immediatè* ; quia usura debet provenire directè ex vi mutui, nam si secundariò, & mediante solum liberalitate aut gratitudine mutuatarii proveniret, non esset usura ex Glossa in Cap. *Consuluit*, Tit. *de Usuris* ; & ex S. Thom. cit. q. 78. art. 2. *Si accipiat, inquit, aliquid hujusmodi, non quasi exigens, nec quasi ex aliqua obligatione tacita vel expressa ; sed sicut gratuitum donum, non peccat.* Exponit autem S. Antoninus 2. parte, tit. 1. cap. 7. parag. 1. quandonam mutuans censeatur non intendere principaliter gratuitum donum ex parte mutuatarii ? *Cum, inquit, etsi sperat mutuans aliquid sibi dari ab eo, cui mutuavit, ex sua liberalitate, tamen non illud eum movet ; sed magis benevolentia, ita ut etiamsi non crederet sibi aliquid dari ultra sortem, adhuc tamen mutuaret.* Unde patet meritò damnatam fuisse ab Innocentio XI. anno 1679. & à Clero Gallicano anno 1700. hanc propositionem, quam Clerus vocat cavillatoriam, & usurarum palliativam : *Usura non est, dum ultra sortem aliquid exigitur tanquam ex benevolentia & gratitudine debitum : sed solum si exigatur tanquam ex justitia debitum.*

Q. 2. Quo jure usura est prohibita?

R. Prohibita est 1. Jure naturali; quia tollit æqualitatem, quæ competit contractui mutui, ut constat ex ejus definitione. 2. Jure divino, Ezech. 18. ubi de dante ad usuram & amplius quam dedit accipiente ait Dominus: *Cum universa hæc detestanda fecerit, morte morietur.* Et Luc. 6, *Mutuum date, nihil inde sperantes*, quibus verbis prohiberi usuram definiunt Concilium Lateranense III. generale, referturque Cap. *Quia*, Tit. *de Usuris*; Concilium Lateranense V. Alexander III. Cap. *Super eo*, Tit. *de Usuris*; Urbanus III. Cap. *Consultuit*, eodem Tit. Quin Concilium Viennense Clementina, *Ex gravi*, statuit eum velut Hæreticum esse puniendum, qui pertinaciter affirmat usuram non esse peccatum.

Ergo adversus legem prohibentem usuras non præscribunt spatia temporum, non privilegia nationum, non patrocinia personarum, non judicia hominum. *Cælum & terra transibunt*; ait Dominus Matth. 24. *verba autem mea non præteribunt.*

Ergo sicut mentiri non licet pro alterius vita, inquit Alexander III. cit. Cap. *Super eo*, ita nec usuras exercere pro redimenda vita captivi, multo minus pro augendis aut fovendis bonis pupillorum. Et S. Thomas Opusculo 73. cap. 6. *Sicut non licet furari ad augendum patrimonium pupillorum, sic nec usuras accipere.* Regula generalis apud omnes Doctores hæc firma esse debet. Hanc secutus est Conventus Mediolanensis anno 1579. & Concilia Mediol. primum, Burdigal. primum, & Mechlin. ubi expresse prohibetur, ne pecuniæ pupillorum dentur ad usuram.

Dices

Dices 1. Deus ipse Deut. 23. permisit Judæis usuras accipere ab extraneis: Ergo.

Nego conseq. Quemadmodum enim Deus, utpotè supremus rerum omnium Dominus, Judæis concessit vasa pretiosa Ægyptiorum; sic in eorum dominium transtulit ea quæ Cananæorum erant. Ita sanctus Ambrosius lib. de Tobia cap. 15.

Dices 2. Per Legem in Regno universaliter acceptam licet recipere ex mutuo denarium vigesimum: Ergo.

Nego anteced. Imò omnes Christianissimi nostri Reges hætenus ab octo sæculis id constanter prohibuere, ut videre est in nostro Tomo 4. sæpius citato Cap. de Usuris. *Defendons à toutes personnes, inquit Henricus III. in Comitiis Blesensibus, de quelque qualité qu'elles soient d'exercer usure par eux, ou par gens introposez. In quem locum Bochellus in sua Bibliotheca sic habet: Cette proposition d'usure portée par la Loi de France est generale, & ne recoit limitation pour la faveur des pupilles ou autres personnes. Ainsi fut-il jugé par Arrest sur Plaidoyer le 13. jour de Juin, la Cour seante aux Augustins.*

Lex itaque Civilis in Regno permittit solum ex Contractu Consignativo, Gallicè, *Contrat de Constitution*, lucrum percipere, olim ad denarium decimum quartum, postea ad decimum octavum, nunc verò ad vigesimum. Porro Contractus Consignativus non est mutuum, sed vera emptio; definitur enim ille Contractus, venditio & emptio juris quoad solos redditus singulis annis certisque temporibus ex alia re vel persona solvendos.

Instas.

Instas. In Comitiiis Aurelianensibus sic statuit Carolus IX. articulo 60. *Contre les condamnés à payer certaines sommes de deniers dus par cédulés ou obligations, seront adjugés les dommages & intérêts requis pour le retardement du payement, à compter du jour de l'ajournement: & ejusmodi statutum servatur in omnibus Regni Tribunalibus: Ergo Lex Civilis permittit accipere lucrum ex mutuo.*

Nego consequ. Laudatum enim statutum nullum lucrum concedit mutuanti propter dilationem solutionis; sed solum decernit certam summam propter damna quæ præsumitur incurrisse ob moram mutuatarii, ut perspicuum est ex ipsismet verbis statuti: *Seront adjugés les dommages & intérêts requis.* Ergo si nullum sit damnum aut interesse lucri cessantis, mutuans nihil potest accipere supra sortem principalem.

Ergo usurarius est ille, qui dat mutuo cum intentione lucrandi auctoritate Judicis, cujus sententiam mavult obtinere, quam pecuniam mutuatam.

Dices 3. Justè quis percipit lucrum ex re sua locata, putà ex equo, domo, &c. Ergo & ex pecunia sua alteri tradita.

Nego consequentiam & paritatem. Disparitas, est quòd in locatione retinet quis dominium rei suæ locatæ, ac proinde ex ea fructum justè percipit; res enim perit aut fructificat domino suo: at per mutuum transfer dominium pecuniæ suæ in mutuatarium: Ergo pecunia mutuo data, perit aut fructificat soli mutuatario.

Q. 3. *Licetne pecuniam accipere sub usura?*

Respondet S. Thomas secunda secundæ q. 78. art. 4. Licitum esse, si mutuans sit in gravi mutuan-
di ne-

di necessitate; secùs si non indigeat, sed ex mera cupiditate mutuum petat.

Q. 4. *Quomodo dividitur usura?*

R. Dividitur 1. in apertam & palliatam seu velatam aliquo honesto titulo, putà donationis, cambii, societatis, venditionis, ut si quis vendat suprà pretium rigorosum ob dilatam solutionem, aut emat infrà pretium infimum ob anticipatam solutionem.

Dividitur 2. in realem & mentalem.

Realis, quæ in mutuo deducitur in pactum, sive expresse, sive tacite.

Mentalis, quæ per mutuum principaliter intenditur, sed in pactum non deducitur.

Q. 5. *Estne obligatio restituendi pro usura etiam mentali?*

R. Affirmativè, ita enim habetur Cap. *Consuluit*, Tit. *de Usuris*.

Q. 6. *Hæredes usurarii obligantur ad restituendum?*

R. Obligantur ex Cap. *Tua nos*, Tit. *de Usuris*. Difficultas solum est, an obligentur in solidum. Canonistæ affirmant, arbitranturque id colligi ex citato Cap. *Tua nos*; sed eorum sententiæ non favet. Quare communior est Theologorum sententia negans; æquum enim est, inquiunt, ut qui tantummodo commodum ex parte percipit, onus quoque duntaxat sentiat proportionem servata. Si tamen res per usuras accepta extaret in sua specie apud unum hæredem, teneretur eam integram restituere, sed actionem haberet de eviçtione contra cæteros.

§. IV.

De Contractu Societatis.

Q. I. *Quid est Contractus Societatis?*

R. Est conventio duorum vel plurium ad commune lucrum & damnum, secundum proportionem rerum contributorum.

Dicitur 1. *Ad commune lucrum & damnum*, quo distinguitur Contractus Societatis, 1. à Contractu locationis; qui enim locat suas operas, non venit in partem lucri vel damni, puta gregis quem pascit; sed solummodo accipit stipendium debitum suo labori. 2. A Contractu mutui; namque mutuans cum transferat in mutuatarium rei mutuatae dominium, ex ea non percipit lucrum, sicut nec venditor ex re vendita. At qui societatem ineunt, retinent dominium rerum quas conferunt, & ideo res illae singulis sociis vel fructificant, vel pereunt.

Dicitur 2. *Secundum proportionem rerum contributorum*; in hoc enim servatur æqualitas & justitia, si is, qui plus ad societatem confert, sicut majus damnum pateretur, si quod confert, periret; ita etiam majus lucrum ex ejus fructibus repetet.

Ergo contra justitiam & contra naturam hujus contractus peccat, qui ea conditione societatem init, ut pecunia vel animalia, quæ exponit, non sibi, sed sociis pereant, quamvis ex eorum culpa. Consuetudo Bituricensis, Nivernensis & Borboniensis vocant Leoniam ejusmodi societatem. Sixtus V. in sua Bulla *Detestabilis*, eam damnavit anno 1586. Et Academia Parisiensis anno 1663. sequentem propositionem falsam & scandalosam declaravit: *Si contractui societatis su-*

peraddantur Contractus affecurationis capitalis & venditionis lucri incerti pro lucro certo, ex vi horum licitum est exigere lucrum certum salva sorte.

Licet tamen addere contractui societatis Contractum emptionis lucri incerti, modo non affecretur capitale, dare v. g. vaccas, aut apes in societatem, ita ut si pereant sine culpa conferentis operas, pereant danti; sed hac conditione quod quamdiu vivent illa animalia, is qui eorum curam gerit, singulis annis solvat pro vacca, aut alveolo certum quid æqualitate servata; quæ enim sunt in spe, minoris æstimantur, quam quæ sunt in re, v. gr. spes capiendi decem pisces ex uno jactu retis, non tanti valet, quanti decem pisces jam capti. Unde quo majus est periculum non lucrandi, minus quoque pro spe lueri solvi debet. Sed ista fusius & accuratius explicantur Tom. 4. Cap. de Societate.

§. V.

De Cambio.

Q. 1. *Quid est Cambium?*

R. Est permutatio pecuniæ pro pecunia cum legitimo lucro.

Dicitur 1. *Permutatio*; Cambire enim idem est ac permutare; Campsor est nummularius, gallice; *Banquier*, Campsarius vero, qui ab ipso pecuniam accipit.

Dicitur 2. *Pecunia pro pecunia*; quæ vel statim reddenda est, ut in Cambio manuali, quo permutatur moneta, v. g. aurea pro argentea, majora pro minoribus, unde dicitur Cambium minutum:

nutum : vel alio transferenda , quando v. g. datur Lugduni , ut recipiatur Lutetiæ.

Dicitur 5. *Cum legitimo lucro* , quo Cambium differt à mutuo , in quo reddendum est nec plus , nec minus , quam acceptum sit.

Q. 2. *Cambium estne licitum ?*

R. Per se est licitum ; quia præterquam quod ejusmodi Contractus est admodum utilis & necessarius Reipublicæ , Campsor multa sustinet onera , paratam debet habere pecuniam , coacervare pecunias diversarum specierum , quas alioquin negotiationi exponeret. Præterea suscipit onus pecuniam transferendi proprio periculo in eum locum , ubi Campsarius iis indiget. Quod si aliquando non transferat , sed per procuratores solvat , idtribuendum est ejus industriæ , quæ in Mercatore est pretio æstimabilis.

Ergo qui officium Campsoris non exercet , nec ad Cambium pecunias negotiationi subtrahit , sine justo titulo lucrum percipit.

Dixi Cambium per se esse licitum , ut innuerem per accidens fieri illicitum. 1. Si quis Cambium non exercet , nec sua interest habere majorem vel minorem monetam , sive Lugduni ubi manet , sive Lutetiæ , quo negotiorum causa transmittenda est ipsi pecunia , adeo ut occasio Cambii ipsi sit commoda , nedum onerosa , & ita absque justo titulo lucrum perciperet. 2. Si absque authoritate Regia Campsoris officium exerceat ; id enim prohibitum est Edictis Regiis , ut Ludovici XII. Henrici II. Caroli IX. 3. Si cum propria authoritate Campforem se constituerit , tantum lucri percipit , quantum Campsores legitimi , cum enim pretio magno constet ejusmodi

Officium, Princeps majora emolumenta iis concedit, quos Campsores constituit, quibus emolumentis sine injustitia gaudere nequeunt, qui ultro se huic muneri immiscent. Unde non solum tenentur Officium illud dimittere; sed & restituere, si quid plus acceperint habita communi ratione expensarum, lucri cessantis & damni emergentis. 4. Peccant qui cum fatis non habeant, unde onera Campsoribus communia sustineant, undique pecunias sub usuris colligunt; nam ex dictis non licet mutuo petere ab usurariis, nisi adsit vera necessitas.

Q. 3. *Quomodo dividitur Cambium?*

R. Dividitur in reale & siccum.

Reale est, quod in allata definitione exprimitur.

Siccum est Cambium fictum, & verum mutuum specie Cambii nomine velatum; per illud enim non permutantur pecuniæ præsentis pro præsentibus alibi reddentis. Titius v. gr. lucri cupidus negat Lugduni mutuum ei qui pecunia indiget; sed offert Cambium ea conditione, quod alter eam reddet Lutetiæ; quamvis sciat reddendum Lugduni post temporis lapsum, quod est verum mutuum, & fictum Cambium; ideo siccum, quia caret humore justitiæ, seu vero titulo ad lucrum pariendum. Quare lucrum inde proveniens est injustum & usura palliata velatum.

De Testamentis & Legatis nihil hic addendum iis, quæ diximus Capite præcedenti.

CAPUT VI.

De Restitutione.

Q. 1. *Quid est Restitutio?*

R. Est actus justitiæ commutativæ reddentis cuique debitum suum ad æqualitatem.

Q. 2. *Restitutio estne necessaria?*

R. Est, & quidem jure naturali, quia auferre rem alienam, & eam detinere invito Domino idem reputantur; *Le bien d'autrui tu ne prendras, ni retiendras sciemment.* Hinc præceptum restitutionis potius est negativum, quam positivum, ut supra observavimus.

Q. 3. *Unde nascitur obligatio restituendi?*

R. Ex injustitia; quia ex dictis justitia commutativa est æqualitas in commutationibus, v.gr. inter operas & mercedem, inter mercem & pretium, injustitia vero inæqualitas. Ergo ad tollendam injustitiam reponenda est æqualitas, quod fieri nequit, nisi per restitutionem.

Ergo nulla facienda est restitutio, quantumcumque grave fuerit crimen; ubi nulla injustitia, nullave reponenda æqualitas.

Ergo totuplex est radix restitutionis, quotuplex est modus violandi justitiam & tollendi æqualitatem.

Q. 4. *Quotuplici modo justitia violari potest?*

R. Triplici. 1. Ratione injustæ acceptionis, quando quis bona proximi invadit. 2. Ratione damni illati, ex quo nihil in manus damnificatoris venit, ut si vastet agrum alienum, domum proximi incendat, personam ejus mutilet. 3. Ratione injustæ detentionis, quomodo injustus est,

qui non solvit debita julte contracta, aut non restituit bona inventa.

Q. 5. *Quotuplex est injusta acceptio?*

R. Triplex. Prima fit occulte, & est furtum. Secunda palam, & est rapina. Atque hoc posteriore modo injusti sunt, qui usuras accipiunt, qui majori pretio vendunt, aut viliori emunt, quam merces valeant; qui pro Officio stipendium aut honorarium exigunt ultra, quam lege constitutum est. Tertia fit dolo & fraude, ut si quis mercem vitiatam pro integra vendat, misceat aquam cum vino venali, paleas cum tritico, malis artibus proximum circumveniat in ludo, contractibus, &c.

Q. 6. *Quotupliciter damnum potest inferri?*

R. Dupliciter; nimirum physice, cum quis propria manu interficit, vastat, &c. & moraliter, quando non per se, sed per alium injuriam facit, quod iterum dupliciter contingere potest; vel positive, influendo in damnum; vel negative, non impediendo damnum, cum ad id ex officio teneatur.

Q. 7. *Quænam sunt causæ positivæ damni, quæ vero negativæ?*

R. Sex numerantur positivæ, & tres negativæ, his versibus comprehensæ.

Jussio, consilium, consensus, palpo recursus, Participans, mutus, non obstans, non manifestans.

Circa ejusmodi causas consule nostrum tomum 4. de Restitutione, cap. 4.

Q. 4. *Qui ex charitate tantum tenetur impedire damnum proximi, debetne restituere, si non impedierit?*

R. Mi-

R. Minime, quia peccat solum contra charitatem : constat autem ex dictis non esse obligationem restituendi, nisi peccatum violet justitiam & tollat æqualitatem.

Mutus ergo hoc loco est qui ex officio, vel ex pacto tenetur clamare, reprehendere, dissuadere, accusare, aut testari, & tacet. Non obstand, qui similiter ex officio & pacto tenetur obstaré, & non obstat, ut Patres, Tutores, Domini; non impediétes Filios, Pupillos, servos, ne aliis noceant; aut famuli sinétes diripi bona Dominorum: item Princeps, Dux belli, Advocati, Ministri Justitiæ, Custodes sylvarum, agrorum, & alii stipendio conducti. Non manifestans, qui ratione officii vel pacti tenetur damnicatorem manifestare, vel ante, vel postquam damnum illatum est.

Q. 9. *Quantum est restituendum?*

R. Tantum, quantum ablatum est, quia præcipitur restitutio, ut cesset injustitia: injustitia autem tolli non potest, nisi tollatur inæqualitas, quod non fit nisi tantum restituendo, quantum ablatum est.

Q. 10. *Sufficitne ad ponendum æqualitatem, ut reddatur res ablata, si extet, vel ejus pretium, si consumpta sit?*

R. Aliquando sufficit, aliquando vero non.

Q. 11. *Quibus in casibus non sufficit reddere rem ablatam, aut ejus pretium?*

R. In duobus. 1. Quando ex re ablata novum damnum emerfit personæ læsæ, v. g. si ex defectu pecuniæ furto sublatae magnas expensas passus est à creditoribus. 2. Quando lucrum cessavit.

Q. 12. *Quotuplici modo per injuriam acceptam lucrum cessare potest?*

R. Duplici. 1. Si re illa utebatur tamquam instrumento ad lucrandum, v. gr. non potuit negotiari, nec solidas operas, quibus sustentabatur, perficere. 2. Si res ablata erat fructifera.

Q. 13. *Quotuplicis generis sunt fructus?*

R. Triplicis: alii dicuntur naturales, ut herbae in pratis; alii mere industriales, ut lucrum perceptum ex pecunia aliena, pretiosum opus confectum instrumento furtivo: alii mixti, qui partim naturaliter, partim industria proveniunt, ut frumentum, vinum, &c. quæ non nascuntur sine cultura.

Q. 14. *Omnes ejusmodi fructus suntne restituendi?*

R. 1. Artificiales non sunt restituendi, quia proprie non sunt fructus rei ablatae, sed industriae, quæ pertinet ad furem; unde si lucratus sit ex pecunia aliena, sive ludo, sive mercatura, nihil ex eo fructu debet restituere.

R. 2. Fructus naturales & mixti sunt restituendi, deductis impensis, quas verus Dominus fecisset, quia res fructificat Domino suo.

Q. 15. *Quid si ejusmodi fructus fuerint consumpti?*

R. Si mala fide, restituendi sunt: si vero bona fide, restituendum est solum id quo factus est ditior, qui consumpsit, quia ex Reg. Juris in 6. *locupletari non debet aliquis cum alterius injuria vel jactura.*

Censetur autem ditior factus, qui minus de propriis expendit, dum bona fide consumpsit rem alienam, v. g. domi non cœnavit, qui alibi cum fociis manducavit agnum, quem non credebatur esse furtivum, non tenetur restituere agnum,
ne-

neque partem agni, sed solum quod expendisset domi cœnando. Quod si non minus expendit, nihil restituere tenetur.

Q. 16. *Quis censendus est bonæ fidei?*

R. Qui sine omni culpa rem alienam accipit, consumit aut detinet: Tutor v. g. ex consilio Pastoris secundum consuetudinem Provinciæ pecuniam pupilli dedit ad usuram, bona fide eam in commodum pupilli convertit non tenetur restituere, cum postea monitus est ejusmodi contractum esse usurarium, quia ex illo non est di-
tior factus.

Q. 17. *Quando plures ad damnum concurrerunt, quo ordine debet fieri restitutio?*

R. Vel participes fuerunt tantum rei injuste acceptæ, v. g. comederunt ovem, quæ ipsis nescientibus furto sublata erat: vel injustæ acceptionis, v. g. concurrerunt vel positive, vel negative ad ovem capiendam; si primum, quilibet tenetur tantum restituenti partem, quam mala fide consumpsit, sciens ovem esse furtivam, & aliis non restituentibus, pro ipsis restituere debet, nisi suo consilio aut alio modo in causa fuerit, cur res injuste ablata vero Domino non sit reddita; quia non fuit causa majoris damni.

Si secundum, quilibet, aliis recusantibus satisfacere, & totum damnum reparare tenetur, quia totius damni fuit causa, cum in illud totum influxerit.

Q. 18. *Si singuli parati sunt restituere, quis ordo servandus est?*

R. Primo loco restituere debet, qui rem alienam detinet, vel qui eam consumpsit, nisi mandato aut aliorum nomine consumpserit, quia est

prima & præcipua causa damni, nec alii reputantur, nisi ut causæ instrumentales. Quare ipso restituente, alii nihil ipsi refundere debent.

Dixi, *Nisi mandato aut nomine*, &c. in hac enim hypothese ipse habet rationem instrumenti, aut causæ ministerialis respectu mandantis. Hinc Dominus, qui famulis suis incendendam domum adversarii præcipit, indemnes illos servare debet. Contra vero si plures inito inter se consilio communem adversarium impetant, & unus ex illis eum occidat, occisor non magis tenetur ad damna reparanda, quàm alii; sed æqualiter singuli ea reparare debent, quia homicidium factum est omnium nomine.

Si tamen qui consumpsit rem alienam ex mandato alterius, ex ea factus sit ditior, debet ante mandantem, restituere in quo factus est ditior, cum habeat plusquam debet habere.





Tractatus DE RELIGIONE.

CAPUT PRIMUM.

De definitione Religionis & ejus actibus.

Q. 1. *Quid est Religio?*

R. Est virtus moralis, per quam Deo tamquam primo rerum omnium principio debitus cultus exhibetur.

Nomine autem cultus intelligitur actus sive internus, sive externus, quo alicui exhibemus honorem ac reverentiam cum aliqua nostri submissione, qualis est genuflexio, capitis inclinatio.

Cultus ergo in eo distinguitur ab honore, quod cultus necessario includat sui dejectionem, minime vero honos præcise sumptus; Deus enim sanctos honorat, ne proprie dici potest eos colore, quia coram eis non dejicitur.

Q. 2. *Quinam sunt actus Religionis?*

R. Alii sunt elicit, qui immediate à Religione pro-

procedunt, ut adoratio, sacrificium, alii imperati, qui immediate ab aliis virtutibus eliciuntur, sed imperante Religione, quæ illos ad divinum cultum ordinat; ut eleemosyna collata Sacerdoti, quia Dei Minister est.

R. 3. *Quotuplex est actus Religionis elicitus?*

Q. Præcipui & primarii sunt Devotio, Oratio seu Adoratio, Votum, Juramentum.

CAPUT II.

De Dévotione.

Q. 1. *Unde nomen Devotionis?*

R. S. Thomas secunda secundæ, quæst. 8. art. 1. illud deducit à verbo, *devovere*. *Devoti dicuntur, inquit, qui seipsos quodammodo Deo devoverunt, ut eis se totaliter subdant. Sic apud Gentiles devoti vocabantur, qui seipsos Idolis devovebant in mortem pro salute Reipublicæ.*

Q. 2. *Quomodo definitur Devotio?*

R. Definitur voluntas tradendi se prompte ad ea, quæ pertinent ad Dei famulatum.

Dicitur 1. *Tradendi se*, non aliqua dumtaxat ad se pertinentia, ut fit per votum. Unde qui unum, aut alterum actum alacri & fervida mente ad cultum Dei refert, potest quidem dici talem actum devote exercere; sed propterea non denominatur devotus, nisi & seipsum tradiderit.

Ergo latius patet devotio, quam votum, quia votum potest esse de aliquo singulari opere; devotio vero simpliciter dicta non unum actum, sed totum hominem cultui divino consecrat.

Dicitur 2. *Prompte*; qua voce exprimitur voluntatis modus, & omnium actionum, quæ à Religione

ligione five eliciuntur, five imperantur; nimirum ad devotionem requiritur, ut quæ sunt Dei cultus, expedito, & alacri animo persolvantur.

Ergo qui abdicatis secularibus negotiis, totos se cultui divino mancipant, ut Religiosi, & Clerici non sunt quod profitentur; (si tamen profitentur,) quando tepide & segniter circa Dei cultum se gerunt.

Dixi: *Si tamen profitentur*; quamvis enim Clericatus sit devotionis professio, Clericos tamen cernere est, qui gloriosum devoti nomen tamquam probrum, & dedecus à se eliminant, & aliis quasi contumeliam impingunt.

Dicitur 3. *Ad ea quæ pertinent ad Dei famulatum*; quibus verbis significatur devotionem esse primum, & perfectissimum Religionis actum, à quo cæteri dependent.

Q. 3. *Quænam est devotionis causa?*

R. Duplex statuitur à S. Thoma; extrinseca, & intrinseca.

Extrinseca eaque præcipua, Deus est, non ars, aut humana industria. *Deus quem vult Religiosum facit*, inquit Sanctus Ambrosius in cap. 9. Luc. Unde per orationes nostras attrahenda est vera devotio: ea enim suppliciter promereri possumus.

Altera devotionis causa, quam S. Thomas vocat intrinsecam, quia se tenet ex parte nostra, est meditatio, voluntas enim nascitur ex intelligentia, ex S. Augustino lib. 14. de Trinit. cap. 8. *In meditatione mea exardescet ignis*, nempe Charitatis, ut interpretatur sanctus Thomas.

Ad concipiendum vero illum Charitatis ignem, duplex consideratio requiritur ex eodem Angelico

lico Doctore; scilicet bonitatis & excellentiæ divinæ, & humanæ infirmitatis ac defectuum. Prior consideratio excitat Devotionis fervorem, qui est proxima Devotionis causa. Posterior excludit præsumptionem, per quam impeditur quis, ne Deo se subiciat, propriæ virtuti innixus.

Q. 4. *Quanam sunt genuini & proprii Devotionis effectus?*

R. Duos agnoscit S. Thomas ita Devotionis proprios, ut ab ea separari nequeant, scilicet spiritalem lætitiā ex consideratione infinitæ Dei bonitatis: *Memor fui Dei, & delectatus sum.* Psalm. 76. & sui displicentiam, ac tristitiā ex conscientia priorum defectuum: *Atque ex ista permixtione delectabilis & tristabilis:* inquit S. Thomas a. 4. ad 3. nonnumquam prorumpunt lacrymæ, quæ veluti panis suavis & solidus devotam mentem reficiunt, ut habetur Psalm. 41. *Fuerunt mihi lacrymæ meæ panes die ac nocte.* Quo enim anima magis se sentit infirmam, eo ardentius in Deum fertur, indeque suavius experitur immensam ejus bonitatem, quæ rursus novum est ipsi incentivum deferendi proprios defectus; sicque crescente Charitate ac Religione, crescit humilitas & sui displicentia. Sic velut ad Lydium lapidem probatur vera Devotio.

Ergo fucata est illorum Devotio, qui propter exteriorem, quam præferunt, pietatis speciem, cæteris melius sapere sibi videntur: infirmioribus indignari noverunt, nullatenus compati; corrigenda ubique invenire se putant, præterquam in seipsis, nimium sibi placentes, & ut facile de aliis malum cogitant, bellum omnibus temere indicunt; pacem perturbant sub Religio-
nis

nis prætextu, salutaria sapientum monita non admittunt, nonnumquam etiam dominationem contemnunt audaces, ut scribit Apostolorum Princeps 2. Epist. cap. 2.

CAPUT III.

De Oratione.

Q. I. *Quid est Oratio?*

R. Est petitio rerum decentium Deo facta sive immediate, sive mediante Sanctorum intercessione, ut aliquid ab ipso impetretur.

Dicitur I. *Petitio*; id est, intimatio sui desiderii alteri facta ad obtinendum aliquid ab eo.

In petitione autem quatuor intelliguntur.

Primum conscientia propriæ indigentiae & infirmitatis: absurde enim quis peteret, quod jam habet, aut credit habere, in sua potestate, ut S. August. Lib. de prædest. Sanct. argumentatur adversus Pelagianos, probans ex Oratione necessitatem gratiae, quam illi negabant.

Secundum est desiderium rei quæ petitur: quod si nullum fuerit, petitio non est, sed ludus & derisio; ut si dives pauperem se fingens, petat eleemosynam, paratus oblatam rejicere. Tales sunt qui in Oratione Dominica sanctificari nomen Dei, & in tentationem non induci sic petunt, ut nolint amovere scandala, quibus nomen Dei blasphematur, nec à peccato recedere.

Tertium est spes obtinendi quod petitur; nemo enim supplex accederet ad eum, quem certo nosset numquam ad vota flectendum. Hinc damnati Deum orare non possunt.

Quar.

Quartum est postulatum perceptio in eo, ad quem petitio dirigitur, quia petitio est quædam locutio quæ supponit audientem. Hinc Oratio dicitur à S. Joanne Damasceno Lib. 3. *Orthod. Fidei* c. 24. *Ascensus mentis in Deum*; quia ex S. Thoma, oportet accedere ad eum, à quo petimus.

Dicitur 2. *Rerum decentium*; impium enim est à Deo petere, quod non decet illum dare & nos accipere. Si à *secularibus abstinere jubemur*, inquit S. Chrysostomus Homil. 42. in Joan. *quæ miseria, quæ amentia est ea à Domino postulare?* Et S. Augustinus in Psal. 85. *Deum adiutorem ponis cupiditatum*. Unde ejusmodi Oratio contraria Religioni & cultui Dei, convertitur in peccatum. Graviter ergo monendi sunt Fideles, ut attendant quid à Deo petant, & quo motivo, an ex cupiditate & amore rerum temporalium, an ex desiderio vitæ æternæ. *Ad hoc pertinet*, pergit Sanctus Doctor Tract. 73. in Joan. *ne nos inducas in tentationem; neque enim parva est tentatio, si contra tuam sit causam, tua postulatio*.

Dicitur 3. *Deo facta*; à quo nempe bona cuncta procedunt, quorum per orationem illum agnoscimus authorem.

Dicitur 4. *Sive mediante Sanctorum intercessione*; quia ad Religionem etiam pertinet deprecari Sanctos uti Dei amicos, quibus ipse inspirat pro nobis deprecandi affectum, ut monemur pluribus Ecclesiæ Collectis: *Interveniat pro nobis quæsumus, Domine, beata Virgo Mater tua, vel, Sanctus tuus Lucas Evangelista. Ejus qui tibi placuit, precibus adjuvemur, &c.* Sicque in invocatione Sanctorum Deum profiteamur omnium bonorum authorem.

Ex hac definitione colliges duo ad veram Orationem tam necessariò requiri, ut alterutro deficiente, Oratio non sit; imò fiat in peccatum. Primum est mentis attentio; quia non sine magna irreverentia quis hominem alloqueretur, tanquam insanus non attendens ad ea quæ proferret. Secundum est pia voluntatis affectio, & serium desiderium obtinendi quæ petuntur; alioquin seria non esset Oratio, sed illusoria.

Q. 2. *Quotuplex est attentio?*

R. Sanctus Thomas secunda secundæ q. 83. art. 13. & ex eo alii Theologi triplicem distinguunt. Prima est ad verba quæ ore proferuntur. Secunda, ad sensum verborum. Tertia, ad finem Orationis, scilicet ad Deum, & ad rem pro qua oratur.

Prima attentio requiritur in iis, qui ex præcepto tenentur ad Orationem vocalem, ut Clerici; quia præceptum Ecclesiasticum cadit in ipsam etiam pronuntiationem; ac proinde præcepto non satisfaciunt, qui oculis & mente duntaxat legunt, lingua quiescente. Secunda est utilis, sed non est necessaria; cum idiotæ lingua peregrina & ipsis ignota verè orent. Tertia est maximè necessaria; ita ut duæ priores solæ non sufficiant. Non prima, quia ex sancto Augustino, *Deus non vocis, sed cordis auditor est*. Non etiam secunda; quia Oratio est petitio: petitio autem est desiderii nostri directio ad eum, cui supplicamus. Unde Clerici, qui dum Choro assistunt, lectioni incumbunt, non ut Devotionem acuant, sed, ut nova discant, distributiones non lucrantur, nec satisfaciunt præcepto audiendi Sacri.

D. Habert Theolog. Tom. VIII.

Gg

Q. 3.

Q. 3. *Oratio estne actus bonus & utilis?*

R. Affirmativè; eam enim Christus commendat, ac præcipit Matth. 7. & Luc. 18. *Petite & accipietis. Omnis qui petit, accipit.*

Dices: Eatenus Oratio utilis esse potest, quatenus vel patefacit alteri orantis indigentiam & desiderium, vel mutare potest ejus voluntatem, & ad sua vota inclinare: Atqui Oratio ad Deum neutrum præstare potest; omnia enim nuda & aperta sunt Deo, repugnatque ipsum velle in tempore, quod non voluit ab æterno; aut desiderare velle, quod semel voluit: aliàs esset mutationi obnoxius. Ergo impium, nedum utile videtur Deum orare, quasi ignorantiae & mutationi subiaceat.

R. 1. Negando absolute majorem; quia Deus multa voluit ab æterno sub conditione, v.g. terram fructus proferre, si homines in ea plantent aut seminent. *Constat Deum alia nonnisi orantibus præparasse*, inquit S. Augustinus lib. de Dono persever. cap. 16. Ergo sicut agricola voluntatem Dei non mutat, sed adimplet, dum colit agrum; ita & Fideles, dum Orationibus vacant.

R. 2. Distinguendo majorem cum Guillelmo Parisiensi in Opere de Rhetorica divina cap. 2. Oratio quæ dirigitur ad creaturas, eò tendit, ut deprecans suam patefaciat indigentiam, ac desiderium, voluntatemque alterius indifferentem, fortè etiam averfam ad se convertat; Concedo. Oratio, quæ dirigitur ad Deum; Nego majorem. Itaque diligenter observandum, & Fideles seriò monendi nos aliter hominem, aliter Deum deprecari.

Cum oramus hominem, 1. exponimus nostram
indi.

indigentiam & miseriam, quæ ipsi perspecta non erat. Deinde rationibus & obsecrationibus eum urgemus, ut ex nolente fiat volens, & benè nobis faciat. Sed cum Deum nihil lateat, & quæ semel ab æterno absolutè decrevit, revocare non possit, utpote immutabilis, si à Christo orare didicisti, non oras ut ipsum doceas, sed ut ab ipso docearis & illumineris; non ut tua, sed Dei voluntas fiat in te: *Non mea voluntas*, inquit Luc. 22. *sed tua fiat.*

Enimverò nulla pœna fingi potest major, quàm si Deus dimittat hominem desiderii cordis sui; pravum quippe est cor hominis; Jer. 17. in omne malum præceps, & à summo bono aversum; alioquin cur non omnes salvi fiunt, cum Deus velit omnes salvos fieri, nisi quia ipsi nolunt? ut observat Sanctus Augustinus lib. de Spir. & Lit. cap. 33. in Oratione igitur peccata nostra Deo confitemur, animæ nostræ vulnera exponimus, non ut Deo pateant, sed ut per humilem confessionem pervenire mereamur ad verissimam nostri cognitionem, qua practicè nobis vilescat, & displiceat quod sumus. Oratio est mentis ascensus ad Deum: Atqui in illo motu terminus à quo recedendum est, ex sancto Thoma, est superbia, & amor sui; terminus verò ad quem accedendum, est unitas spiritus cum Deo, & perfecta consensio cum divina ejus voluntate quæ, ut optima & omnipotens, diligentibus se fons est omnium bonorum, & adversa quæque in bonum ipsorum sapienter, ac insuperabiliter convertit.

Ergo Orationem nostram ad aures Dei tum pervenisse credendum est, cum liberiores nos

reddit à curis mordacibus vitæ temporalis , anxietates quæ cruciabant , compescit , fugat tristitiam ex adverso casu conceptam , sicque in Dei beneplacito quiescere facit , ut ex toto corde dicamus contra rebelles carnis , & concupiscentiæ motus : *Non mea voluntas , sed tua fiat.*

Ergo Oratio est actus bonus , & quidem Religionis post devotionem præstantissimus. Is enim actus Religionis cæteris est præstantior , quo creatura rationalis magis se dejicit , & subjicit in testificationem infinitæ Dei excellentiæ : Atqui Oratio est hujuscemodii ; qui enim petit à Deo intellectum bonum , cor mundum , & novum , spiritum cogitandi , & agendi quæ recta sunt , inferiores potentias , sensus & appetitum colligit , & quodam modo mortificat , omnem actum , quantum fieri potest , illis interdicens , unde laboriosa existit Oratio , alioquin per se delectabilis ; nonne totum se coram Deo dejicit , ac pro nihilo reputat ? Ita Sanctus Thomas art. 3. ad tertium.

Ergo Oratio est omnino necessaria : *Non habetis propter quod non postulatis* , Jac. 4. & Sanctus Augustinus seu Author de Ecclesiasticis Dogmatibus , cap. 56. *Nullum credimus ad salutem , nisi Deo invitante , venire nullum nisi orantem auxilium promereri.*

Ergo Oratio necessaria est necessitate tum præcepti , tum medii. Christus enim dicendo *Petite* , præceptum imponit , interprete sancto Thoma ; art. 2. & addendo *Accipietis* , medium necessarium ad obtinendum demonstrat.

Q. 4. *Quando , & quoties urget orandi præceptum ?*

R. Ait

R. Ait Dominus Luc. 18. *Oportet semper orare, & non deficere*, Verbum *oportet*, denotat non esse consilium, sed præceptum; sed ut caveatur hæreticorum error, quos Theodoretus Messalianos vocat lib. 4. de Fabulis hæreticorum, qui totam legem ad Orationem coarctabant, cum Christus multa alia pietatis opera præcipiat, ut vestire nudos, visitare infirmos, hospitium præbere peregrinis,

Nota duo in Oratione esse distinguenda. Primum, est desiderium vitæ æternæ & mediorum, scilicet divini auxilii, sine quo acquiri non potest. Secundum, est ipsa petitio, quæ ex dictis est nostri desiderii intimatio Deo facta. Desiderium, ex quo procedit petitio, pertinet ad Charitatem, ipsa verò petitio, seu desiderii expositio & intimatio, in qua formaliter consistit Oratio, est actus Religionis, cum per eam testemur omnimodam nostram à Deo dependentiam, ipsique subjiciamur tanquam bonorum omnium principio. His ita observatis,

Desiderium charitatis, ex quo procedit Oratio, continuum esse debet vel actu, vel virtute, quatenus virtute hujus desiderii tenemur semper agere, dicente Apostolo 1. Cor. 10. *Omnia in gloriam Dei facite*; & S. Augustin. Epist. 130. aliàs 121. *In ipsa Fide, Spe & Charitate continuato desiderio semper oramus*. Sed ipsa actualis petitio nec debet, nec potest esse continua, quia aliis bonis operibus vacandum est: crebrius tamen frequentanda, ne Charitatis desiderium extinguatur: *Ideo*, inquit S. August. cit. Epist. *ab aliis curis atque negotiis, quibus ipsum desiderium quodammodo tepest, certis horis ad negotium orandi mentem*

revocamus , verbis Orationis nos ipsos admonentes in id, quod desideramus , intendere ; ne quod tepescere cœperat , omnino frigescat , & penitus extinguatur , nisi crebrius inflammetur.

Quo autem tempore , & quoties orandi præceptum urgeat , præcisè definiri non potest , cùm id pendeat non solum ex Dei ordinatione , sed etiam ex cujusque dispositionibus , tentationibus , & aliis circumstantiis : *Uniuscujusque enim rei quantitas debet esse proportionata fini* , inquit S. Thomas , *sicut quantitas potionis sanitati.* Denique illud pro certo habeamus sæpius esse precandum , nec sine salutis æternæ periculo illud Religionis opus diu omitti posse.

Q. 5. *Suntne aliqua determinatè à Deo petenda?*

Negant Mystici nostræ ætatis (quos Quietistas vocant) quidquam determinatè esse petendum in statu perfectionis ; sed omnia divinæ voluntati sic esse committenda , ut homo perfectus passivè se habeat in Oratione , quem errorem Innocentius XII. perstrinxit sua Constitutione in Galliis solemniter recepta anno 1699. Quare

R. Catholica Doctrina est quædam à Deo determinatè esse petenda , id enim docuit Christus tum exemplo ; oravit enim determinatè pro persecutoribus Joan. 17. & pro resurrectione Lazari Joan. 11. tum verbo , dum precandi formam dedit septem petitionibus distinctam ; de qua sanctus Augustinus Epist. 157. aliàs 99. sic scribit : *Omnibus necessaria est Oratio Dominica , quam etiam ipsis arietibus gregis , id est , Apostolis suis Dominus dedit Si quos futuros Dominus prævideret meliores utique , quàm extiterunt ejus Apostoli , aliam Orationem illos doceret.*

Q. 6.

Q. 6. *Quanam determinatè petere debemus?*

R. Quæ continentur in Oratione Dominica adedò necessaria ex S. Cypriano in ejus Expositione, *ut aliter orare quam docuit (Christus) non ignorantia sola sit, sed & culpa.* Et S. Thomas hic Art. 9. *In Oratione Dominica, inquit, non solum petuntur omnia quæ rectè desiderare possumus, sed etiam in eo ordine, quo desideranda sunt, ut sic hæc Oratio non solum instruat postulare, sed etiam sit informativa totius nostri affectus.* Singula divinæ hujusce Orationis verba exponemus ad Calcem Compendii.

Q. 7. *Oratio habetne infallibilem effectum?*

Nota Orationem tripliciter spectari posse. 1. Ut est actus supernaturaliter bonus. 2. Ut est opus pœnale; elevatio enim mentis ad Deum non fit sine lucta cum sensibus, & sine aliqua corporis defatigatione, præsertim si sit diuturna. 3. Ut est mera petitio, ut in mendico petente eleemosynam, cujus orationes, & obsecrationes respectu divitis, non habent rationem operis meritorii, cum non fiant in ejus honorem aut obsequium, sed meræ petitionis ad impetrandum ordinatæ.

Certum est Orationem spectatam primo modo, scilicet ut opus bonum, in justo esse meritoriam de condigno vitæ æternæ & augmenti gratiæ sanctificantis; habet quippe omnes conditiones meriti. Secundo modo, esse satisfactoriam; ita enim definiit Concilium Tridentinum, Sess. 14. Can. 14. Sed Oratio duobus hisce modis hîc non spectatur. Quæstio solum est de Oratione tertio modo spectata, utrùm scilicet quatenus est mera petitio apud Deum, infallibiliter impetret quod postulatur?

R. Affirmativè, si fiat cum debitis conditionibus. Deus enim, qui id expressè promisit, fidelis est, seipsum negare non potest, 2. Tim. 2. Ait autem Marci 11. vers. 24. *Omnia quaecumque orantes petitis; credite quia accipietis, & evenient vobis.* Nihil expressius habetur in Scriptura de efficacia Sacramentorum.

Dixi, *Cum debitis conditionibus*; quia sicut Sacramenta novæ Legis, quantumcunque per se efficacia, non habent effectum in iis qui ponunt obicem; ita nec Oratio, ubi desunt conditiones requisitæ. *Petit, & non accipit, eò quod malè petat.* Jacob 4.

Q. 8. *Quæ requiruntur conditiones, ut Oratio habeat infallibilem effectum?*

R. Quatuor debet fieri, 1. Piè. 2. Cum fiducia. 3. Pro seipso. 4. Perseveranter. Ita ferè sanctus Thomas art. 15. ad secundum.

Q. 9. *Quæ observari debent, ut cum pietate fiat Oratio?*

R. Tria.

Primum. Attentè ac devotè fiat necesse est; peccat enim contra Religionem & reverentiam Deo debitam, qui orat negligenter, & cum voluntaria mentis evagatione; ac proinde ex sua Oratione pœnam, non gratiam expectare debet.

Secundum. Non petantur contraria saluti, sed ea dumtaxat quæ ex Dei ordinatione conducunt ad vitam æternam, quam solam in Orationibus intendere debemus, dicente Domino Matth. 6. *Quærite primum regnum Dei, & justitiam ejus*; nec addit, ut observat sanctus Augustinus in hunc locum; lib. 2. de Sermone Domini in monte cap. 205. deinde temporalia quærite, sed,

sed, & hæc omnia adjicientur vobis, id est, consequitur, ne cum ista quæeratis, illinc avertamini, aut ne duos fines constituatis; ut & regnum Dei propter se appetatis, & ista necessaria; sed hæc potius propter illud, quia duobus Dominis servire non potestis. Vult ergo Magister noster, ut ad Deum per Orationem recurramus, sicut ægrotus ad medicum. Quid autem aliud æger petit à medico, quam ut sanetur? Adhibebit quidem ille necessaria remedia; sed nihilominus æger, quamvis & istud exoptet, unam sanitatem quærit; quia ubi multa ordinantur ad unum, non censentur multa, sed unum; nec propterea duplicatur ejus intentio: quod enim propter aliud amatur, ex Sancto Doctore, non ipsum amatur, sed illud propter quod amatur. Secus si æger usum vini à medico noxium judicante, extorquere vellet, jam enim convinceretur duo concupiscere; sanitatem nempe, & voluntatem. Atque in isto exemplo intelligit Lector, quid Christianus in Orationibus suis cavere debeat, ne scilicet temporalia propter se expetat; ut sic enim non sunt materia Orationis, sed cupiditatis, quæ tum maximè timenda est, ex Sancto Augustino cit. lib. cap. 23. cum non superflua, sed necessaria petimus. Et idè non videmur peccare, quamvis propter ipsa cor duplicetur, & ad ea deprimatur mentis nostræ intentio; quantò melius hoc petitur, ut etiam ab isto cupiditatis malo liberet, cui dicimus: *Libera nos à malo.* Ita S. Augustinus Epist. 130. aliàs 121. cap. 12.

Tertium. Ut Oratio sit pia & impetratoria, debet procedere à Spiritu Sancto. Rom. 8. v. 15. *Accepistis spiritum adoptionis filiorum, in quo clamamus:*

G g 5

Abba,

Abba , Pater. Et vers. 26. Spiritus adjuvat infirmitatem nostram ; nam quid oremus sicut oportet , nescimus : sed ipse Spiritus postulat pro nobis gemitibus inenarrabilibus ; id est , postulare facit , & gemere gravatos infirmitatibus. Quibus locis Sanctus Augustinus lib. de Dono Persev. cap. 13. urget Semipelagianos negantes Orationem esse Dei donum : Attendant ergo , inquit , quo modo falluntur , qui putant esse à nobis , non dari nobis ut petamus , quæramus , pulsemus Nec volunt intelligere etiam hoc divini muneris esse , ut oremus Quod vidit beatus Ambrosius ; ait enim , & orare Deum gratiæ spiritualis est. Absit autem ut quis orandi studium eo prætextu prætermittat , quòd non habeat donum Orationis , cum puderet eum ejusmodi simulatione excusare quod non servet. Dei & Ecclesiæ præcepta , quæ sine dono obediendi observari nequeunt , ut oportet. Porro nusquam minus diffidere licet de Dei adjutorio , quàm ubi de Oratione agitur , utpotè que sit medium à Deo ordinatum , justis & peccatoribus necessarium , ad obtinendum quod illis deest ad salutem consequendam ; adeò ut multi interdum careant gratia proxima ad operandum , cum illis præsto sit gratia ad orandum. Deus , inquit Concilium Tridentinum sess. 6. cap. 11. jubendo monet & facere quod possis , & petere quod non possis.

Ergo cum in plerisque nulla aut pene nulla sit Orationis instantia pro obtinendis à Deo bonis spiritualibus , maxima verò pro consequendis temporalibus , non temere colligitur Orationes eorum non procedere à Spiritu Sancto , sed à cupiditate ; nec proinde esse impetratorias , ut supra monuit Sanctus Jacobus : *Petitis & non accipitis,*

cupitis, eo quod malè petatis, ut in concupiscentiis vestris insumatis.

Q. 11. *Quæ debet esse orantis fiducia ad infallibiliter impetrandum?*

R. Non debet esse absoluta, sed hypothetica & conditionata; nempe si petat ut oportet, & omnes concurrant conditiones. Firma fit & inconcussa ex parte Dei; extat enim ejus verbum & promissum infallibile; *Omnis qui petit, accipit*, Matth. 7. Qui autem in hoc verbo hæsitat: *Non æstimet homo ille quod accipiat aliquid à Domino.* Jac. 1. Sed *quilibet, dum seipsum suamque propriam infirmitatem & indispositionem respicit; verba sunt Concilii Tridentini Sess. 6. cap. 9. de sua gratia formidare & timere potest.* Verùm isthæc sui ipsius diffidentia excitat fiduciam in Dei misericordia, & ad precandum ardentius ac perseverantius impellit; quia *nemo aliquando ad eum flens accessit, qui non quod postulavit, accepit*, inquit S. Chrysostomus Hom. de Moyse, & Sanctus Bernardus Serm. 11. in Cant. *Si de vobis in humilitate sentitis, sentite & de Domino in bonitate.* Publicanus pro sua reverentia & animi dejectione, exauditus est, Pharisæus vero ob nimiam sui ipsius fiduciam repulsus. Luc. 18.

Q. 12. *Quid sentiendum est de Oratione, quæ fit pro aliis?*

R. 1. Si ex charitate fiat, infallibiliter est oranti meritoria; quia est opus bonum, 2. Negari non potest quin aliquando sit utilius, pro quibus intercedimus; Deus enim Ecclesiæ donavit & Saulum precibus sancti Stephani, & Augustinum lachrymis sanctæ Monicæ. 3. Non semper pro aliis est impetratoria; quia plerumque

que ponunt obicem. Ita sanctus Thomas art. 7. ad secundum : *Pro se orare, inquit, ponitur conditio Orationis : non quidem necessaria ad effectum merendi, sed necessaria ad indeficientiam impetrandi. Contingit enim quandoque quod Oratio pro aliis facta non impetrat, etiamsi fiat piè & perseveranter, & de pertinentibus ad salutem secundum illud Jeremiæ 25. Si steterunt Moyses & Samuel coram me, non est anima mea ad populum istum.*

Q. 13. *Quo sensu perseverantia est conditio necessaria ad impetrandum ?*

R. 1. Non est semper necessaria ; namque Daniel, ubi se dedit Orationi, statim exauditus est, Dan. cap. 1. Deinde si Deus nonnulla concedit nobis non orantibus ; à fortiori, cum pie precamur. Sed sæpius perseverantiæ datur quod primæ petitioni negatum fuit, ut patet in Chananaea, Matth. 15. At proinde certum non est omnem Orationem statim exaudiri. Quare

R. 2. Oratio infallibiliter non impetrat, nisi sit perseverans : *Oportet semper orare, & non deficere*, ait Dominus Luc. 18. Illudque confirmat exemplo viduæ, quæ sæpius ab iniquo Judice repulsa, per importunas preces tantum fregit illius duritiam. Et cap. 11. docet non solum petendum, sed & quærendum, & pulsandum, donec aperiatur.

Q. 14. *Quare Deus differt precantium vota ?*

R. 1. Ut crescant nostra desideria, dilatentur corda nostra, ut capere possint ejus dona.

Petendo autem & quærendo crescis ; ut capias. Servat Deus, quod non vult cito dare, ut & tu discas magna magnè desiderare. S. Augustinus Ser. 61. alias 5. de verbis Doimi. 2. Ut nos in humilitate contineat

tineat, per experientiam propriæ indigentiae & infirmitatis. 3. Ut dona ejus habeantur in majori pretio & sollicitius conserventur, *Cum aliquando tardius dat*, inquit Sanctus Augustinus cit. Ser. *commendat dona, non negat: diu desiderata dulcius obtinentur; cito autem data vilescunt.* Veniæ facilitas peccandi occasionem præbet; difficultas vero cautiores reddit. 4. Ut nos tanquam parvulos infirmos sibi devinciat: *Oratio*, inquit Sanct. Chrysostomus in Psal. 4. *non parvum vinculum est dilectionis in Deum Si enim qui cum magno aliquo viro multum versatur, ex ejus consuetudine maximum fructum percipit, quanto magis qui cum Deo perpetuam habet consuetudinem?*

Ergo vera ratio, cur plures in melius non mutantur, vel in gratia non perseverent, ea est, quod instanter ac perseveranter non orent. *Quis iustorum non orando pugnavit?* ait Sanctus Chrysostomus Hom. de Moyse. *Cum levaret Moyses manus, vincebat Israel; ubi autem submiserat, vincebat Amalech.* Bellum Christianis inditum hoc exemplo monstratur belli effectus, orationis instantia aperitur. *Orat enim Moyses, & vincit; cessat & vincitur.* Didicit Christianus unde vincat & vincatur. Nec quisquam poterit excusari, qui hostem vincere noluit, dum orare cessavit. Similia habet S. August. Ser. 352. alias Hom. 27. lib. 50. Hom.

Q. 15. *Quomodo dividitur Oratio?*

R. In mentalem, quæ fit sola mente; & vocalem, quæ fit addita voce corporali. Dico *addita*, quia vocum prælatio præcisè sumpta, non est Oratio; namque ex dictis Oratio est nostri desiderii coram Deo explicatio, nec prodest strepitus oris, muto corde. Oratio igitur vocalis, ut sit vera

vera Oratio, mentalem necessario includit, ut advertit Navarrus in Manuali cap. 18.

Q. 16. *Cur Orationi mentali adjunguntur voces?*

R. Quia ex Sancto Augustino Epist. 130. alias 121. verbis & aliis signis ad devotionem nos ipsos acrius excitamus. *Et ideo*, inquit S. Thomas art. 12. *in singulari oratione tantum est vocibus utendum; quantum proficit ad excitandam interius mentem. Si vero mens per hoc distrabatur, vel qualitercunque impediatur, est à talibus cessandum; quod præcipue contingit in iis, quorum mens sine hujusmodi signis est sufficienter ad devotionem parata.*

Q. 17. *Quid est Oratio mentalis?*

R. Est studiosa investigatio veritatis ad concipiendum devotionis fervorem.

Dicitur *ad concipiendum devotionis fervorem*, ut significetur meditationem non esse meram speculationem, sed opus rationis practicæ incitantis voluntatem ad fugam mali, & prosecutionem boni.

Q. 18. *Meditatio estne necessaria?*

R. Aliqua meditatio omnibus est necessaria necessitate medii. Probatur ex Scriptura. Jer. 12. *Desolatione desolata est omnis terra, quia nullus est qui recogitet corde.* Eccli. 5. *Quæ præcepit tibi Deus, illa cogita semper.* Matth. 13. & Luc. 8. Verbum Dei auditum & non recogitatum, est fenum cadens vel secus viam, & conculcatum, vel in spinas, & suffocatum. Spinæ sunt, interprete Domino, sollicitudo sæculi, fallacia divitiarum ac voluptatum, à quibus retrahendam mentem monet Isaias cap. 46. *Redite prævaricatores ad cor; scilicet ut recogitetis, quam vana sint quæ sub sole geruntur; quam magna quæ Deus diligentibus*

tibus se promittit ; quam vero terribilia quæ mundanis minatur. David , licet negotiorum multitudine pressus , meditationibus mundabat cor suum , ut testatur Psal. 76. *Meditatus sum nocte cum corde meo , & exercitabar , & scopebam spiritum meum* , adeo meditatio illi videbatur necessaria. Et vero quotide experimur multos graviorum peccatorum conscios resipiscere meditationis ope , atque eo gressu in via virtutis proficere , quo ad piam illam exercitationem confugiunt ; adeo ut si quid de illa remittants , tepescat eorum ardor , & ubi illam prorsus neglexerint , in pristina crimina relabantur.

Dices : effatum est , qui studet , orat : Ergo lectio sufficit ad salutem.

Distinguo antec. Qui studet meditando , & orando ; C. Qui studet simpliciter ut discat , Nego antec. *Quid enim prodest lectione continua tempus occupare* , inquit Author de modo orandi inter opera Sancti Bernardi , *Sanctorum gesta & scripta legendo transcurrere , nisi ea etiam masticando & ruminando , succum eliciamus , & transglutiendo usque ad cordis intima transmittamus ? Item quid prodest homini , si per meditationem , quæ agenda sunt videat , nisi Orationis auxilio & Dei gratia , ad ea obtinenda convalescat ? Oratio sine meditatione tepida est ; meditatio sine Oratione infructuosa.*

Q. 19. *Quotuplex est Oratio vocalis ?*

R. Duplex. Privata : quæ fit proprio nomine , quamvis pro omnibus ; & publica , quæ fit nomine totius Ecclesiæ à Ministris ab ipsa ad Deum deputatis , ut Horæ Canonice , quæ per solvuntur à Clericis.

Q. 20. *Quænam est præstantior & præferenda ?*

R. Pu.

R. Publica. Quid enim sublimius, quidve magis arduum, quam legatum ab universali Ecclesia ad Deum deputari, atque ejus nomine apud divinam Majestatem intercedere, ne peccatis nostris provocata in ira contineat misericordias suas, sine quibus frustra laborarent qui ædificant, aut prius ædificata conservare niterentur? Nullus enim potest corrigere, quem Deum despexerit iratus; contra vero omnis ad eum certo veniet, si illum eo, quem novit congruere, modo vocaverit placatus. Hinc est quod cum Ecclesia, ex sacro Clericorum Ordine, aliquos duntaxat assumat ad verbi divini ministerium, omnes & singulos lege sua astringit diu noctuque stans horis, absque necessitate nullatenus mutandis, levare manus suas ad Deum, & orationes veluti murum firmissimum iræ Dei opponere, ut dicitur Ezech. 13. Quibus perpensis, nemo non videt quanti faciendæ sint Horæ Canonicae, quàm studiosè & devotè sint persolvendæ.

Ergo magna est eorum hallucinatio, qui, ut lectioni, scriptioni & exhortationi vacent, studium orandi remittunt, & Horas Canonicas perfunctorie decurrunt.

Ergo sicut in privata Oratione nostris malis privatis tangimur & afficimur, sic & in publica communibus Ecclesiæ necessitatibus commoveamur necesse est. *Portabitque Aaron, ait Dominus Exod. 28. nomina filiorum Israel in rationali judicii super pectus suum; quando ingreditur Sanctuarium, memoriale coram Domino in æternum; id est, ut meminerit in publica Oratione singula Ecclesiæ membra ferre in rectore per compassionis amorem.*

Ergo

Ergo Clericus, ut dignè obeat hujusce legationis ministerium, ea vitæ sanctitate & conscientiae puritate, promeruisse debet facilem ad Deum accessum, ut docet S. Gregorius 2. part. Pastor. c. 10. gravissimis hisce verbis: *Si homo apud hominem, de quo minimè præsumit, fieri intercessor erubescit, qua mente apud Deum intercessionis locum pro populo arripit, qui familiarem se ejus gratiæ esse per vitæ merita nescit? Cuncti enim liquidò norunt, quàm, cum is qui displicet ad intercedendum mittitur, irati animus ad deteriora provocatur.*

CAPUT IV.

De Voto.

Q. I. *Quid est votum?*

R. Definitur, promissio deliberatè & spontè Deo facta de meliori bono, & possibili.

Dicitur 1. *Promissio*; quo nomine intelligitur deliberata & spontanea fidei obligatio in gratiam alterius. Unde promissio tria includit diligenter notanda, cum ex iis solvantur innumeræ difficultates, quæ in praxi occurrunt circa Votum.

Primus. Est deliberatio; promissio enim est actus liber: Atqui libertas sine rationis advertentia stare nequit.

Ergo irritum est votum ex errore procedens, quia est sine advertentia, & debita deliberatione.

Notandum tamen est triplicem esse errorem. Alius est circa substantiam actus; ut si rusticus, audita concione, in laudem terræ sanctæ, voveat illuc peregrinationem, existimans paucis distare leucis. Alius est causa finalis, sine qua votum

non fieret: Sic præsumpta paupertas Petri, qui reverà dives, est causa finalis vovendi eleemosynam in ejus gratiam. Alius denique est causa, solum impulsiva, qua non stante, nihilominus staret Votum, sed ex minori affectu; v. g. dandi eleemosynam pauperi; quia pius videtur, cum tamen non sit.

Votum non stat cum primo & secundo errore; quia ut sic, est involuntarium; benè cum tertio, cum non desit voluntarium & præcipuum vovendi motivum, nempe paupertas.

Porrò ad Votum major deliberatio non requiritur, quàm ad peccatum mortale: quapropter si quis sciens & volens consentit tentationi, peccat mortaliter, si materia sit gravis, quamvis non attendat ad multa, quæ haud dubiè actum ejus suspendissent. Similiter Voto tenetur, qui licèt ex præcipiti devotionis motu, liberè tamen Deo promittit; non attendens ad ea, quæ à proposito deterruissent. Sed hæc mentis levitas & præcipitatio solet esse justa dispensationis causa.

Secundum, quod in promissione intelligitur, est spontaneum propositum, seu voluntatis decretum, quo quis firmiter statuit, decernit se quidquam præstiturum.

Ergo metus cadens in constantem virum, & injustè incussus ad vovendum, jure canonico irritat Votum, C. 1. *De his quæ vi & metu*. Dico, *cadens in constantem virum, & injustè incussus ad vovendum*; quia valet Votum tum ex metu gravi, sed justo; tum etiam aliquando ex injusto, quando scilicet non injicitur ad vovendum. Hinc qui vovet ad vitandas manus latronis, Voto astringitur, quia sponte vovet.

Tertium,

Tertium, quod includitur in promissione, est fidei obligatio, quæ acceptata, revocari non potest, & omnino ligat. Dubium autem non est quin Deus acceptet quod melius est; ac proinde promissio de meliori bono Deo facta statim obligat.

Ergo nullum est votum, nisi adsit fidei obligatio præter firmum propositum. Cum autem propositum soleat exprimi per verbum *promitto*, pœnitens v. g. in tribunali pœnitentiæ proponens se eadem peccata non commissurum, utitur verbo *promitto*; qua loquendi ratione procul dubio Votum non emittit; Confessarii est expendere quæ fuerit illius mens, qui dicit se promississe Deo servare castitatem; nimirum an solum proposuerit, an verò fidem obligarit. In dubio recentiores non pauci existimant judicandum pro libertate pœnitentis; nimirum ipsum non promississe. Sed Vasquesius, & Generalis Minister Societatis Jesu Thyrsus Gonzales Dissert. 7. paragr. 13. refellunt hanc sententiam, utpotè veteribus ignotam, contenduntque standum pro Religione Voti, juxta illud effatum; In dubiis tutior pars est eligenda.

Dicitur 2. *De meliori bono*; de bono quidem, quia promissio de re illicita repugnat divino cultui: de re autem indifferenti, est cultus vanus; ut si mulier vovisset non nere die Sabbathi; ac proinde non est Votum, nec actus Religionis. De meliori verò; quia promissio, quæ impedit majus bonum, sub hoc respectu de cultu Dei detrahit; nec potest esse illi grata. Unde qui prius voverat inire matrimonium, ad vitandam fornicationem

cationem, nunc cupit in Religione profiteri, non tenetur Voto ineundi matrimonii.

Dicitur 3. *Et possibili*; ineptè enim quis se obstringeret ad id, quod præstare non posset; displicet autem Deo stulta promissio. Eccl. 5.

Q. 2. *Estne obligatio adimplendi Votum*;

R. Affirmativè, tum jure Divino: *Vovete & reddite Domino Deo vestro.* Psal. 75. tum jure naturali, quia omnis promissio acceptata naturaliter obligat.

Q. 3. *Quotuplex est Votum*?

R. Triplex. Nempe personale, quo promittitur actio; v. g. peregrinatio ad pium locum. Reale, quo promittitur res aliqua; v. g. eleemosyna. Mixtum, quo promittitur & actio, & res aliqua; ut si quis simul voveat peregrinationem ad pium locum, & ibi calicem offerre. Obligatio Voti personalis non transit ad hæredes; sed sola Voti realis aut mixti, quatenus reale est. Unde hæredes non tenentur peregrinari pro defuncto ad locum pium; sed satis est si per alium offerant calicem, quem defunctus voverat.

Q. 4. *Quotuplex est Votum personale*?

R. Duplex. Solemne, quod fit per susceptionem Ordinis sacri, vel professionem alicujus status religiosi ab Ecclesia approbati; & simplex, ut Votum ingrediendæ Religionis.

Q. 5. *Quotuplex est Votum simplex*?

R. Duplex. Nempe absolutum, cui nulla ponitur conditio, & conditionatum, quod fit cum conditione; v. g. si evasero ex periculo naufragii.

Q. 6. *Quot modis potest cessare obligatio Voti*?

R. Tribus, irritatione, dispensatione, & commutatione.

Q. 7.

Q. 7. *Quæ vota irritari possunt ?*

R. Omnia quæ sunt in præjudicium tertii. Talia autem censentur, quorum materia vel causa efficiens, nempe persona voventis, & sub potestate dominativa alterius, qui voto non consensit; Deus enim non acceptat oblationes cum alterius injuria. Num. 30. v. 6. *Si contraxerit pater, & vota, & juramenta ejus (filix) irrita erunt. Et vers. 14. Si voverit, (uxor) & juramento se constrinxerit, ut per jejunium, vel cæterarum rerum abstinentiam, affligat animam suam in arbitrio viri erit, sive faciat, sive non faciat.*

Dixi *sub potestate dominativa*, juxta quam unus ita pendet ab alio, ut non possit absque ejus injuria de seipso, vel de re sua contra ejus voluntatem disponere; ut famulus de operationibus quas locavit; nam potestas jurisdictionis non sufficit ad irritanda vota.

Ergo Summus Pontifex non potest irritare omnium Fidelium vota; quia non habet potestatem dominativam in Fideles, sed solum in Religiosos professos.

Ergo Superiores Religiosorum possunt irritare omnium subditorum vota, tum realia, tum personalia, excepto Voto strictioris Religionis.

Ergo pater irritare potest omnia vota filiorum impuberum, tum realia, tum personalia, ex c. *Puella*. Causa 20. q. 2. etiam postquam adoleverit, modò puberes jam facti non confirmarint quod impuberes voverant. Quòd si pater sit defunctus, vel amens, vel longissimè absens, hæc potestas transit ad avum, deindè ad tutorem; denique ad matrem in defectum patris aut tutoris, & omnium ascendentium in sexu virili.

Dixi *impuberum* ; nam pater non potest irritare Vota personalia filiorum puberum ; v. g. Votum servandæ castitatis, ingrediendæ Religionis. Potest tamen suspendere executionem, si eorum opera indigeat.

Ergo maritus potest irritare, & suspendere uxoris vota, etiam ante matrimonium emissa, & uxor vicissim mariti, quando nocumentum afferunt societati conjugali ; ut longiores peregrinationes, abstinentiæ, quæ tædium alteri conjugii pariunt, ex C. *manifestum*, Causa 33. 4. 5. Plura tamen uxoris Vota irritare potest maritus, quàm uxor mariti, cùm ad ipsum pertineat familiæ administratio. Consule quæ diximus nostro Tomo 4. ubi de Voto.

Q. 8. *Quis potest commutare vota, aut in iis dispensare ?*

R. 1. Certum est licere privata autoritate Votum mutare in aliud evidenter melius, & salutis voventis utilius ; v. g. Votum nubendi in Votum ingrediendæ Religionis ; quia, ut habetur C. *Pervenit*, Tit. de Jurejurando, propositum aut promissum non infringit, qui in melius commutat.

R. 2. Jure ordinario soli habentes jurisdictionem externam, ut Summus Pontifex, Episcopi dispensare possunt in Votis subditorum, eaque commutare in aliud bonum minus, aut æquale ; quia illa dispensatio pertinet ad externam Ecclesiæ gubernationem, sicut indulgentiarum concessio, & excommunicatio.

Sunt tamen nonnulla Vota ex consuetudine Summo Pontifici reservata ; ut Votum ingrediendæ Religionis, & Votum absolutum perpetuæ casti-

castitatis, in quibus Episcopus dispensare non potest, nisi adsit dispensandi necessitas, nec recurri possit ad Summum Pontificem.

Dixi 1. *Castitatis*; nam votum non nubendi relaxare potest Episcopus, nisi vovens intendit vovere castitatem. 2. *Perpetuæ*; quia si sit ad tempus, Episcopus in ea dispensare potest. 3. *Absolutum*; in voto enim castitatis conditionato Episcopus dispensare potest, modò conditio non sit impleta secundum tutiorem opinionem.

Q. 9. *Requiriturne causa ad Voti irrotationem & dispensationem?*

R. 1. Ut valida sit irritatio, nulla requiritur causa; sed sola irritantis voluntas sufficit; quia Deus non acceptat, quæ ipsi cum alterius injuria offeruntur, ut patet ex cit. cap. 30. Num. Posset tamen peccare irritans, si Votum esset admodum utile salutis voventis, nullumque ipsi irritanti præjudicium afferret.

R. 2. Dispensatio sine causa est prorsus nulla, nec ea uti licet; quia obligatio voti ex dictis est juris naturalis & divini, quod nulla potestas humana solvere potest. Eatenus ergo Summus Pontifex & Episcopus dicuntur dispensare in Votis, quatenus ex gravibus causis judicant & declarant Deum non acceptare promissionem sibi factam, putà, quia videtur noxia salutis voventis. In dubio autem, utrùm causa dispensandi sit sufficiens, standum est judicio Superioris, modò sincerè ac dilucidè omnia fuerint exposita.

CAPUT V.

De Juramento.

Q. I. *Quid est Juramentum?*

R. Definitur, Contestatio seu invocatio divini nominis ad fidem faciendam, vel promissionem firmandam.

Ergo qui jurat per cœlum, per Evangelia, per templum, per Fidem Christianam, eorum authorem censetur in testem adducere; alioquin res hujusmodi utpotè inanimes, capaces non sunt ferendi testimonii. Sancti quidem in testes vocari possunt; sed nisi invocentur quatenus Veritas divina in illis specialiter relucet, non erit juramentum pertinens ad latriam, de quo solo hic loquimur; sed erit merus duliæ actus.

Utrum autem juramenta habenda sint sequentes modi loquendi, *Deus scit, in conscientia mea, coram Deo loquor, &c.* consulenda est intentio loquentis: nam ut habetur Leg. 2. Digestis, de rebus dubiis, *in ambiguo sermone non utrumque dicimus, sed duntaxat quod volumus.* Porro si ista invocativè pronuntientur, Juramenta sunt; ut Gal. 1. *Ecce coram Deo, quia non mentior.* Secus si enuntiativè tantum.

Ergo qui jurat *in verbo Sacerdotis, in fide mea; vel per fidem meam*, quæ vulgo accipiuntur pro fide humana, propriè non jurat; quia nomen Dei nec explicitè, nec implicitè invocatur, quam homines rudes plerumque se tanquam juramenti temerè facti accusant; unde anxius redditur Confessarius pro Sacramentis præceptis perseverante consuetudine confirmandi leviamenda

cia

cia hujusmodi verbis. Sed si rem diligentius excutiat, deprehendet omnem dicti confirmationem ab iis vocari Juramentum, ita ut jurare se putent, si sermoni addiderint, *profectò, certè, in veritate*. Sicque apud illos duplicis generis sunt Juramenta: Alia levia, quæ sub mortali obligare non credunt; alia gravia, in quibus interferitur nomen Dei; v. g. *in fide divina*; & hæc sollicitius cavent. Quapropter Confessarius peccati mortalis reos non pronuntiabit, qui levia mendacia his formulis confirmare solent, nisi Deum in testem invocare intendant; sed curabit ut in posterum ab iis abstineant.

Ergo qui ex quodam iræ aut impatientiæ impetu nomen Dei proferunt absque ulla affirmatione vel negatione, propriè non jurant, sed potius blasphemant; quia jurare est alicujus dicti veritatem testimonio confirmare.

Q. 2. *Quomodo dividitur Juramentum?*

R. Dividitur in assertorium, quo asseritur præsens vel præteritum; promissorium, quo firmatur promissio rei præstandæ; & execratorium, quo Deus in testem simul & vindicem advocatur, si falsa sit nostra assertio, si promissis non steterimus: *Puniat me Deus, si mentior*. Quando autem ejusmodi execrationes ex ira proferuntur, sæpius sunt blasphemiae, de quibus infra, quia nomen Dei, sive Sanctorum, & sacra nostra Mysteria contumeliosè nominantur.

Q. 3. *Juramentum estne licitum etiam Christianis?*

Negarunt olim Pelagiani ex S. Augustino, Epist. 57. aliàs 89. & etiamnum Anabaptistæ propter illud Matth. 5. v. 34. *Ego autem dico vobis non jurare omnino*. Sed in mente S. Augustini ejusmodi

prohibitio intelligenda est, quomodo prohibitio servilis operis die Dominica, nempe in casu necessitatis licitum esse jurare, sicut servilibus operibus vacare die Dominica. *Præceptum Domini in prohibitione Juramenti, ad hoc positum est, inquit S. Doctor Lib. 1. de Mendacio cap. 15. ut quantum in te est, non affectes, non quasi pro bono cum aliqua delectatione appetas Jusjurandum, & lib. 1. de Serm. Domini in monte, cap. 30. Non ea (juratione) utatur, nisi necessitas cogat.* Quare ad propositam questionem

R. Licitum est Juramentum etiam Christianis, ubi necessitas urget, & adsunt aliæ conditiones: tum quia Apostolus ipse non semel juravit; ut 2. Cor. 1. *Testem Deum invoco*: tum quia ex S. Thoma, Art. 4. *Hoc ipso quod homo per Deum jurat; proficitur Deum potiolem, cujus veritas est indefectibilis, & cognitio universalis; & sic reverentiam Deo exhibet. Unde & Apostolus dicit Hebr. 6. quod homines per majorem se jurant. Philosophus etiam dicit 1. Metaph. quod juramentum est honorabilissimum.* Est quippè solemniss. professio summæ excellentiæ ejus, per quem juratum; ac propterea talis honos sine crimine idololatriæ deferri nequit ei, qui non sit Deus.

Q. 4. *Quot conditiones requiruntur, ut juramentum sit licitum?*

R. Tres expressæ cap. 4. Jerem. v. 2. *Et jurabis, vivit Dominus in veritate, & in judicio, & in justitia.*

Ad veritatem requiritur, ut jurans non levi conjectura, sed prudenter judicet verum esse quod jurat: Ad justitiam, ut juramentum fiat de re licita: Ad judicium, ut sanctum Dei nomen non assumatur temerè, sed cum reverentia, & in solo
neces-

necessitatis casu. Sicut enim impiè sacra Scriptura ad vana & scurrilia converteretur, sic sanctum & terribile Dei nomen assumeretur ad ea confirmanda.

Q. 5. *Quotuplici modo juratur contra veritatem?*

R. Triplici 1. Quando jurans affirmat tamquam verum quod putat esse falsum, aut saltem de quo certus non est. 2. Quando promittit aut minatur quod implere, aut facere non intendit. 3. Quando promissis juramento firmatis non stat absque legitima causa.

Q. 6. *Quot sunt causæ, propter quas Juramentum promissorium absque perjurii periculo non impletur?*

R. Quinque numerantur.

Prima. Si juramentum ab initio fuit irritum & nullum; quia quod nec est, nec fuit unquam, nullum potest habere effectum, nullamque parit obligationem.

Juramentum autem potest esse irritum 1. Si factum sit per errorem & dolum, qui fuit jurandi causa; ut si juraveris te eleemosynam daturum Cajo, quem pauperem credebas; cum revera pauper non sit; quia ejusmodi juramentum non est voluntarium. 2. Si sit de re impossibili, quia ad impossibile nemo tenetur. 3. Si sit de re illicita; juramentum enim non est vinculum iniquitatis, ex capite *Quanto Titul. De jurejurando*. Nullus obligari potest ad peccandum, ex Reg. 58. Juris in 6. Hinc qui promisit cum juramento se latronem non denuntiaturum Judici, non obligatur, si Judex eum in testem vocet, aut si bonum publicum exigat, ut denuntiet. 4. Si juramentum sit de re prorsus indifferenti; quia Deus non accipit

ptat actiones, quæ in ejus cultum & gloriâ referri nequeunt.

Secunda causa, propter quam juramentum promissorium non ligat, est notabilis mutatio, quæ prævisa juratum non fuisset ex C. *Quemadmodum. Tit. de jurejurando*; ubi sponsus declaratur liber à sponsalibus juramento confirmatis, propter subsequentem sponsæ fornicationem, paralysim, visus amissionem, &c. quia, inquit Glossa, in juramento justæ conditiones intelliguntur, quamvis non apponantur.

Tertia causa excusans à perjurio, est condonatio seu remissio ejus, in cujus gratiam factum est juramentum; quia per illam remissionem res promissa non est amplius debita, sed habetur pro soluta; ac proinde jurans censetur satisfecisse suo juramento. Ita sanctus Thomas Art. 9.

Quarta est irritatio facta ab eo, qui potestatem dominativam habet in jurantem.

Quinta, est dispensatio, aut commutatio; obligatio enim juramenti promissorii eodem modo solvitur, & ab iisdem, quomodo diximus capite præcedenti obligationem Voti solvi. Consule quæ ibi dicta sunt.

Q. 7. *Qui cum juramento promisit usuras, teneantur eas solvere?*

R. Tenetur, nisi cum eo dispensatum fuerit à Superiore jurisdictionem externam habente; quia per se malum non est solvere usuras, quamvis injustè extortas. Ita Alexand. III. cap. *Debitorum*, de jurejurando, *cogendi sunt reddere Domino juramentum; & cum usuræ solutæ fuerint, creditores ad eas restituendas sunt Ecclesiastica severitate (si necesse fuerit) compellendi.*

Q. 8.

Q. 8. *Gravis metus, qualis potest esse infamiae, exilii, & mortis, excusatne pejerantem?*

R. Nonnulli ætate S. Augustini, affirmare aui sunt; atque utinam perniciosus ille error nostro sæculo non revixisset, contra quem S. Doctor tam acriter pugnavit, præsertim lib. 2. de Mendacio, cap. 18. ubi sic scribit: *Quid, quod vitæ hujus amatores, ne homo moriatur, non tantum mentiri, sed etiam pejerare nos volunt? Et sunt in eis docti, qui etiam regulas figant, quando debeat, & quando non debeat pejerari. Ob ubi estis fontes lacrymarum? Ubi nos occultabimus ab ira veritatis, si non solum negligimus cavere mendacia, sed audemus insuper docere perjuriam?*

Q. 9. *Nonne in hujusmodi angustiis licebit uti amphibologiis, equivocationibus, & restrictione mentali?*

R. Hæc est nova sapientia nostri sæculi, quam exploserunt celeberrimæ Academiæ, ut Lovaniensis anno 1653. & 1657. Innocentius VI. anno 1679. & Clerus Gallicanus anno 1700. Hæ positiones, inquiunt Gallicani Præsules, temerariæ sunt, scandalosæ, perniciosæ, erroneæ; mendaciis, fraudibus & perjuriis viam aperiunt, & sacris scripturis adversantur. Cum autem patroni nefandi hujus erroris in ejus patrocinium adducerent Prophetas, Angelos & ipsum Dominum, quasi æquivocationibus usi essent, sic pergit Clerus Gallicanus; *Hæ propositio (numero 66.) scandalosa est, temeraria, Patrum Acta ludibrio vertit, ipsis Angelis injuriosa; erga Christum contumeliosa & impia.* Præiverat S. Augustinus Epist. 125. aliàs 224. *Perjuri sunt, inquit, qui servatis verbis, expectationem eorum, quibus juratum est, deceperunt.*

Q. 10. *Perjurium estne semper peccatum mortale, etiam in materia levi?*

R. Af-

R. Affirmativè, quia ex S. Thoma q. 98. art. 2. & 3. quæ sunt ex se venialia, vel etiam bona ex genere, si in contemptum Dei fiant, sunt peccata mortalia: Atqui perjurium ex sua ratione importat contemptum Dei; est enim maxima irreverentia, quod homo, à fortiori Deus, in testem falsitatis adducatur. *Perjurium peccatum esse, & grande peccatum nemo dubitat*, inquit S. Augustinus Sermone 180. aliàs 28. de verbis Apostoli: *Tantum mali habet juratio, ut qui lapides colunt, timeant falsum jurare per lapides . . . Videtis quàm ista detestanda sit bellua, & de rebus humanis exterminanda.* Hinc perjurii convicti incurrunt infamiam, cap. *Infames*. Causa 6. q. 1.

Q. 11. *Numquid inadvertentia excusat à perjurio, ac proinde à lethali peccato?*

R. Si sit prorsus invincibilis, excusat: si sit crassa, qualis est in eis, qui jurandi consuetudinem non retractant, in qua advertunt se imprudentia miscere perjuriam, nullatenus excusat à peccato mortali. *Ne ergo mendacium jures; noli jurare*, inquit S. Augustinus citato Serm. 180. *Perjurium, præcipitium: qui jurat, juxta est: qui non jurat, longè est. Falsa juratio exitiosa est; vera juratio periculosa est: nulla juratio secura est.*

Q. 12. *Quale est peccatum jurare sine necessitate?*

R. Est veniale dumtaxat, modò absit contemptus, scandalum, & pejerandi periculum; quia non videtur magna irreverentia nomen Dei assumere absque necessitate ad confirmandum aliquid verum & honestum.

Dixi 1. *Modò absit contemptus & scandalum.* Certum quippe est eos graviter peccare, qui ex impietate & cum scandalo audientium, terribile
Dei

Dei nomen, & quæ in Religione sunt sacratissima, ut mors & Sanguis Christi, pronunciat, sive per jocum, sive per iram; hæc enim non vanè tantum, sed & contumeliosè ab iis dicuntur, & blasphemiam sonant, ut habetur in Synodo Trecenti, anno 1427.

Dixi 2. *Et pejerandi periculum*, quod vix deesse potest in jurandi consuetudine, ut advertit S. Augustinus cit. Serm. 180. in quo sic loquitur; *Quis est qui non fallatur, etsi noluit fallere? Et tamen juratio ab ore non discedit, frequentatur; plura sunt plerumque juramenta, quam verba.* Quomodo non essent in proximo periculo pejerandi, & ita lethaliter peccandi, qui cum à mendaciis jocosis & officiosis non abstineant, nihilominus omnia ferè dicta juramento confirmant? Qui temerè ex animo promittunt quod non sunt præstituri? Sic Mercatores, qui quàm sæpissimè jurant se merces viliori pretio non tradituros, cum postea judicent è re sua esse, si tradant. Sic illi omnes, quibus Dei nomen non videtur sacramentum esse, sed sermo, ut loquitur Salvianus.

Q. 13. *Quale est peccatum jurare sine justitia?*

R. 1. Qui sine animo jurat se facturum rem illicitam, perjurus est, & mortaliter peccat; qui verò cum animo, bis peccat; 1. quia vult rem illicitam, v. g. nocere proximo; 2. quia irreverenter erga Deum se gerit, dum adducit illum in testem rei illicitæ.

R. 2. Constat apud omnes Theologos juramentum, quo quis se astringit ad peccandum lethaliter, esse peccatum mortale; gravior siquidem irreverentia, & major Dei contemptus vix concipi potest, quàm vocare Deum in testem actio-

nis

nis, quam prohibet, & summè ei displicet. Sed non ita certum est in Scholis quale sit juramentum patrandi peccati venialis. Alii, ut Angelus à Clavasio, affirmant esse mortale: Alii communiter docent esse veniale dumtaxat, sed intra latitudinem peccati venialis valdè grave: Alii, ut posteriori sententiæ repugnare nolunt, utpotè communiore, sic asserere non audent eum qui cum juramento promittit actionem venialiter malam, à peccato mortali esse securum. Certè à gravi peccato excusari non potest, si utatur verbis quæ blasphemiam sonant; putà si jurat per Christi viscera, plagas, mortem, &c.

CAPUT VI.

De Peccatis Religioni oppositis.

Q. 1. *Quæ sunt peccata Religioni opposita?*

R. Sunt perjurium, de quo capite præcedenti, blasphemia, superstitio, Dei tentatio, sacrilegium, & simonia, de quibus separatim dicendum.

Q. 2. *Quid est blasphemia?*

R. Definitur, locutio contumeliosa in Deum.

Dicitur 1. *Locutio*, ut distinguatur à contumelia, quæ factis irrogatur, qualis fuit Christi consputatio: vel mente tantum concipitur, quæ dicitur cordis blasphemia. *Jam vulgò blasphemia non accipitur, nisi mala verba de Deo dicere*, inquit S. Augustinus lib. 2. de Moribus Manich. cap. 12.

Dicitur 2. *Contumeliosa*, ut distinguatur à detractiōe, quæ est maledictio personæ absentis.

Blasphe-

Blasphemia quippè est maledictio, seu convitium contra personam præsentem, quo non solum læditur ejus fama, sed maximè derogatur ejus honori; cum autem Deus sit ubique præsens, omnis maledictio in eum prolata est vera contumelia.

Convitium autem, seu blasphemia proferri potest in Deum vel immediatè, cum in maledicto Dei nomen, aut aliquod ejus attributum exprimitur; vel mediatè, quando maledicatur creaturis, quatenus Dei sunt, & in iis relucet divina potentia, sanctitas, &c. ut in rebus sacris, in beata Virgine & cæteris Sanctis, in quibus sicut laudatur Deus, sic & contumelia afficitur ex S. Thoma secunda secundæ quæst. 13. art. 1. ad secundum. Et utroque modo blasphemia accipitur, cap. *Statuimus*; Tit. *De Maledicis*.

Q. 3. *Quotuplex est blasphemia?*

R. Triplex, Enunciativa, imprecativa, dehoneſtativa.

Enunciativa, est blasphemia, qua de Deo aliquid contumeliosè affirmatur, aut negatur; ut si tribuatur Deo quod ei non competit; v. g. injustitia, crudelitas, &c. vel auferatur quod ipsi proprium est, ut omnipotentia, providentia, &c. Hæc blasphemia dicitur hæreticalis, quia adjunctam habet hæresim, & aliquando morte punitur secundum leges Civiles.

Imprecativa, est blasphemia, qua Deo malum quis imprecatur; ut faciunt damnati & desperabundi.

Dehoneſtativa, qua enuntiatur aliquid existens in Deo, sed indecenter, & per modum contumeliæ. Talis fuit hæc Juliani Apostatæ

blasphemia : *Vicisti, Galilæe.* Talis est etiam eorum, qui indignabundi nominant Christi caput, viscera, &c.

Q. 4. *Quale peccatum est blasphemia?*

R. Est mortale, & quidem gravissimum, *ideò pejus est blasphemare, quam pejerare*, inquit S. Augustinus lib. 2. de Mendac. cap. 19. *quoniam pejerando falsæ rei adhibetur testis Deus; blasphemando autem, falsa de ipso dicuntur.*

Q. 5. *Quid est superstitio?*

R. Est cultus Dei indebitus.

Q. 6. *Quotuplex est superstitio?*

R. Sunt quatuor præcipuæ ejus species, scilicet Idololatria, Divinatio, Magia & vana observantia.

Q. 7. *Quid est Divinatio?*

R. Est notitiæ divinæ usurpatio ope dæmonis.

Dicitur *Notitiæ divinæ usurpatio*; quia est quædam notitia ita Dei propria, ut ab ipso solo creaturæ communicari possit; qualis cognitio secretorum cordis est, & futurorum, quæ à libertate pendent.

Q. 8. *Quotuplici modo fieri potest Divinatio?*

R. Duplici. 1. Per pactum expressum cum Dæmone; & est semper peccatum mortale. 2. Cum pacto implicito, ut si quis notitiam alicujus rei quærat ex signo, quod illam naturaliter demonstrare non potest. Et hæc Divinatio potest esse venialis, nimirum si non omnimoda fides, sed vana tantum formido ejusmodi signis tribuatur.

Q. 9. *Quotuplici modo fieri potest Divinatio cum pacto tacito?*

Quintuplici.

1. Per

1. Per Astra; diciturque Astrologia judicaria; quamvis enim Astra possint prænuntiare quosdam effectus naturales, attamen nequeunt esse signa actuum liberorum, qui a voluntate pendent.

2. Per corporis vel manus lineamenta, & dicitur Physionomia & Chiromantia. Potest quidem aliqua conjectura colligi ex vultu, quæ sit indoles hominis; non verò absolutè judicium ferri de iis, quæ acturus est.

3. Per somnia, quæ naturaliter possunt esse signa eventuum quorundam naturalium; v. gr. pluviae futuræ; non verò actuum liberorum.

4. Per sortes; diciturque Cleromantia, Sortilegium, seu fors divinatoria; à qua Sortilegi, seu Sortiarii.

5. Per inspectionem avium, seu piscium; diciturque Aruspicium, seu Augurium. Volatus tamen avium & motus animalium possunt nonnulla naturalia, v. gr. pluviam prænuntiare; non autem quæ sunt merè contingentia & libera.

Q. 10. *Quid est vana observantia?*

R. Est superstitio, qua quis utitur vanis & inutilibus mediis ad aliquem fidem assequendum. In eo distinguitur à Divinatione, quod per divinationem intendatur solum notitia occultorum; per vanam verò observantiam vana assumantur ad alios effectus consequendos. Si ad sanitatem obtinendam, vulnera vitanda aut curanda, est observantia sanitatum: si ad præcavendos funestos effectus, v. gr. ex occurso alicujus animalis, ex observatione dierum qui putantur infortunati, ex certo numero accumbentium ad mensam, &c.

est observantia futurorum eventuum : si adhibeantur res sacræ ; verb. gr. verba Scripturæ sacræ proferantur, Schedæ verbis Evangelii inscriptæ gestentur, cum certa persuasione obtinendi extraordinarios effectus, puta subito extinguendi incendium, non moriendi sine Confessione sacramentali, &c. est observantia sacrorum.

Dixi, *cum certa persuasione* ; nam proferre vel gestare sacræ Scripturæ verba, quasdam Orationes recitare, in quibus nihil falsum aut vanum continetur, ad obtinendum aliquod à Deo beneficium, si salutis nostræ expedire judicaverit, pium est, nedum illicitum. Sed superstitio agnoscenda est, si hisce verbis aut rebus, talis tribuatur virtus, qualem ne quidem inesse credimus formis Sacramentorum ; namque Sacramenta non pro sunt ponentibus obicem : Superstitiosa verò illa, à quocumque etiam impiissimo observentur, infallibilem creduntur habere effectum ; incendium verbi gratia statim extingui, morbum subito abscedere.

Porro cum Deus tantam efficaciam non promiserit hujusmodi verbis & rebus, nec credibile sit eam de facto infallibiliter tribuere, nulla ratione habita nequitiae illorum, qui talia usurpent, aut in quorum gratiam usurpantur, fateri necesse est diabolica esse hujusmodi opera, & pertinere ad cultum dæmoniorum, ut docet S. Augustinus libro de vera Religione, cap. 55.

Q. II. *Quale est peccatum observantia ?*

R. Lethale, nisi ignorantia invincibilis excuset ; namque Deus Deut. 18. dicit se omnia hæc abo-

abominari. Concilium Laodicense cap. 36. phylacteria & ligaturas vocat animarum vincula: *Eos autem, inquit, qui talibus utuntur, ejici ex Ecclesia jussimus.* Sanctus Chrysostomus Hom. 39. adversus Judæos, Martyrem dicit qui eligit magis mori, quàm uti ejusmodi vanis observationibus.

Dixi, *nisi ignorantia invincibilis excuset.* Talis autem censetur in iis, qui nec pactum cum Dæmone suspicati sunt, nec aliud quidquam mali inesse in ejusmodi observantiis. Sed excusari non possunt, qui vel expressè cum Dæmonibus fœdus ineunt, vel monentibus ista esse illicita, non acquiescunt.

Q. 12. *Quid est Magia?*

R. Secundum vim nominis Perfici, Magia est sapientia, à qua Magi dicuntur, id est sapientes. Generatim autem definiri potest, ratio operandi mira. Ea verò dicuntur mira, quæ habent causam latentem, quamvis naturalem; distinguunturque à miraculis, quorum causa est supernaturalis, nec alia potest agnosci, quàm Deus, qui solus potest producere quemcumque voluerit effectum supra ordinem naturæ.

Q. 13. *Quotuplex est Magia?*

R. Duplex, Naturalis, & superstitiosa. Naturalis est ratio operandi mira per causas naturales, occultas imperitioribus; & hæc Magia est ipsa Philosophia. Magia superstitiosa, quæ & nigra dicitur, est ratio operandi mira ope Dæmonis. Si sit ad docendum, vocatur maleficiū.

Q. 14. *Licetne recurrere ad Magum, ut maleficiū tollat?*

R. Non licet, si tollere non possit nisi per novum maleficiū, & usum alicujus vanitatis;

licet verò si tollat per meram destructionem prioris maleficii ; quia honestum est destruere opera diaboli, signa diabolica delere. Imo Confessarius injungere debet malefico pœnitenti, ut noxia illa amoveat, si possit, absque invocatione dæmonis.

Q. 15. *Quid est tentatio Dei?*

R. Est temeraria confidentia obtinendi à Deo effectum extraordinarium, non servato ordine divinæ Providentiæ; ut si quis abstineret ab omni cibo, confidens se à Deo extraordinariè sustentandum, vel mitteret se deorsum; quia scriptum est: *Angelis suis Deus mandavit de te, & in manibus tollent te, &c.* Sic Eccl. 18. dicitur quasi tentans Deum, qui ante orationem non præparat animam suam, quia omittit medium necessarium ad rectè orandum.

Dixi, *temeraria confidentia*; quia si juberet Deus à se peti miraculum, ut præcepit Regi Achaz Isa. 7. vel si necessitas urgeret, nec aliud suppeteret medium, non censeretur tentatio Dei, modò id fieret cum humilitate, resque tota permitteretur divinæ voluntati, exemplo trium juvenum, Dan. 3. v. 17. & Discipulorum Christi, Act. 4. v. 30.

Q. 16. *Quale peccatum est tentatio Dei?*

R. Est ex natura sua mortale; quia magna censetur irreverentia, quòd vilis creatura præsumat Deum leges Providentiæ suæ ad nutum illius immutaturum.

Dixi, *ex natura sua*; nam potest esse veniale in eo, qui nec vult, nec advertit actionem suam pertinere ad Dei tentationem.

Q. 17. *Quid est sacrilegium?*

R. Est

R. Est violatio rei sacræ.

Q. 18. *Quotuplex est sacrilegium?*

R. Triplex; quia totuplex est sacrilegium, quotuplex est species rei sacræ: Atqui triplex est species rei sacræ, nempe persona, ut Clericus, Religiosus locus, ut Templum, Cœmeterium, cæteræ res Deo dicatæ, ut Sacramenta, Vasa sacra, Reliquiæ, Imagines, Scriptura sacra.

Q. 19. *Quotuplici modo violatur locus sacer?*

R. Triplici: 1. Si vis ei inferatur, v. g. fores Ecclesiæ frangantur, bonis suis spoliatur. 2. Si in loco sacro fiant actus, quibus pollui possit, ut homicidium, illicita effusio sanguinis aut seminis humani, sepultura excommunicati non tolerati. 3. Si exerceantur in loco sacro alii actus, qui licet eum non polluant, tamen sanctitati ejus repugnant, vel ex prohibitione Ecclesiæ, ut mercatus; vel ex natura sua, ut omnia opera per se mala, puta furtum etiam rei profanæ in loco sacro, de quibus fusè egimus Tom. 5. Tract. de Sacrificio, 2. part. cap. 13. hic consulendo.

Q. 20. *Quale peccatum est Sacrilegium?*

R. Est mortale ex natura sua, & eò gravius, quò sacratior est res quæ violatur; materiæ tamen levitas excusat à mortali.

C A P U T VII.

De Simonia.

§. I.

De ejus natura & definitione.

Q. 1. *Quid est simonia?*

R. Definitur, studiosa voluntas emen-

di vel vendendi aliquid spiritale vel spiritali annexum. Hanc definitionem à majoribus acceptam probat S. Thomas q. 100. art. 1. eamque Theologi & Canonistæ unanimi consensu recipiunt, sed accuratius exponenda est, cum ex illa pendeant pleræque quæstiones circa simoniam difficiles. Jtaque

Dicitur 1. *Voluntas*, quia omne peccatum debet esse voluntarium: Atqui simonia est grave peccatum: Ergo debet esse voluntaria. Sed voluntaria non erit, nisi adsit cognitio & advertentia sufficiens. Unde in definitione

Dicitur 2. *Studiofa*, id est deliberata voluntas, & ex electione profecta.

Ergo in quæstionibus difficilioribus potest dari simonia materialis tantum sicut & usura, quæ non sit formaliter peccatum, nec inducat excommunicationis pœnam.

At quemadmodum restituendum est lucrum proveniens ex Contractu usurario bona fide & ex ignorantia invincibili inito; quia cum pactio solvendi usuras non sit valida, non transfert pecuniæ usurariæ dominium; ita pretium per simoniam comparatum reddi debet, & beneficium dimittendum, quia collatio fuit nulla.

Dicitur 3. *Emendi vel vendendi*, quibus verbis significatur omnis pactio non gratuita, sive quælibet commutatio rei spiritualis cum temporali.

Ergo ad simoniam propriè dictam necessaria non est venditio strictè sumpta, in qua æquiparatur merces cum pretio, quod esset formalis hæresis; sed sufficit intentio commutandi temporale cum spiritali, seu obtinendi unum mediante alio.

Ergo

Ergo meritò summi Pontifices Alexander VII. Innocentius XI. Clerus Gallicanus anno 1700. Academia Parisiensis anno 1665. & Lovaniensis anno 1657. & 1659. pluresque Episcopi in suis Diœcesibus has propositiones damnarunt, alii ut temerarias & scandalosas, alii ut erroneas & hæresim simoniacam per fallacem intentionis directionem inducentes.

Prima. *Non est contra justitiam, Beneficia Ecclesiastica non conferre gratis.*

Secunda. *Dare temporale pro spirituali non est simonia, quando temporale non datur tanquam pretium, sed duntaxat tanquam motivum conferendi vel efficiendi spirituale: vel etiam quando temporale sit solum gratuita compensatio pro spirituali, etiamsi sit principale motivum, imo etiamsi sit finis.*

Enimverò admissis illis opinionibus nullus posset convinci simoniæ, ipse etiam Simón Magus ab ea posset excusari.

Dicitur 4. *Aliquid spiritale*, quo nomine intelligitur res vel actio Deo sacra, & ad Religionem pertinens, ut Sacramenta, Reliquiæ Sanctorum, actus ordinis, Jurisdictionis spiritualis, Conciones & Catecheses sacrae ad supernaturalem audientium salutem.

Ergo docere Philosophiam, Theologiam, vel etiam rudimenta fidei, sicut docentur in Scholis à Ludimagistris, quamvis actiones spirituales sint, nihilominus non censentur materia simoniæ, quia non sunt functiones sacrae.

Dicitur 5. *Vel spirituali annexum*; quædam enim temporalia sic connexa sunt cum spirituali, puta proventus temporales officio beneficiarii, redditus Monasterii professione Religiosa, ut sine iis

emi aut vendi non possint. Sed quia temporale diversimodè potest esse unitum spirituali,

Q. 2. *Quot modis temporale potest esse annexum spirituali?*

R. Tribus, scilicet anteceder, concomitanter & consequenter.

Anteceder illud censetur annexum, cui accedit spirituale, ut fundus, cui advenit Jus Patronatus, quod est spiritale, Calix, lapis altaris, balsamum, quæ postea consecrari contingit. Porro ejusmodi temporale, cum sit quid prius spirituali, & ab eo omninò independens, sine dubio emi & vendi potest & absque simonia, modò tamen pretium ejus non augeatur ratione spiritualis annexi, nec Ecclesia talem venditionem prohibeat; qui enim carius venderet, aut emeret sive agrum, propter Jus Patronatus ei annexum, sive lapidem altaris, propter ejus consecrationem, verè simoniacus esset, quia non venderet solum temporale, sed etiam spiritale.

Dixi, *Nec Ecclesia talem venditionem prohibeat*; quia Cap. *Ea quæ*, Tit. *de simonia*, prohibetur ne Episcopi vendant balsamum, quo conficitur sacrum Chrisma.

Concomitanter Annexa sunt duplicis generis: alia extrinseca functioni sacræ, ut celebrare certo in loco remoto hora incommoda, puta circa meridiem: alia intrinseca, ut labor & fatigatio in obeunda ipsa functione sacra: annexa prioris generis vendi possunt, utpote quæ nihil in se contineant spiritale, & pretio sint æstimabilia: Annexa verò posterioris generis vendi nequeunt, cum necessariò intelligantur in ipsamet functione.

Conse-

Consequenter Annexa sunt ea, quæ ex spiritali pendent, tanquam à sua causa morali, ut proventus Beneficii ab officio divino, propter quod dantur, jus fruendi bonis Monasterii à professione solemni, quæ in eo emittitur. Porro de hujusmodi temporali annexo spiritali intelligenda sunt posteriora definitionis verba.

Dices 1. adversus allatam propositionem: Simonia est hæresis maximè detestanda ex cap. *Cum liqueat*, Causa 1. quæst. 1. Atqui hæresis pertinet ad intellectum: Ergo, simonia malè definitur studiosa voluntas.

Distinguo majorem. Simonia est hæresis interpretativè, quatenus simoniacus videtur credere donum Spiritus Sancti esse pretio æstimabile, Concedo: est hæresis formaliter, quasi omnis simoniacus necessariò temporale cum spiritali exæquet, Nego majorem. Simonia igitur est vitium voluntatis, quæ abutitur rebus sacris propter commodum temporale, stante nihilominus judicio speculativo res sacras pluris esse faciendas, quàm temporales.

Dices 2. Christus Dominus, Luc. 10. v. 4. pro sacris Ministris ait, *dignus est operarius mercede sua*: Ergo licet spiritalia conferre pro temporali.

Distinguo anteced. Mercede improprie dicta & sumpta pro stipendio necessitatis, Concedo: *Accipiant sustentationem necessitatis à populo, & mercedem dispensationis à Domino*, inquit sanctus Augustinus lib. *de Pastoribus*, cap. 2. Mercede proprie dicta, quæ principaliter intendatur tanquam finis Ministerii sacri, quemadmodum mercenarius pro labore suo mercedem principaliter intendit,

intendit, Nego antecedit. *Clerus*, inquit S. Thomas quodlib. 5. art. 11. *qui vadit ad Ecclesiam principaliter propter distributiones, quas recipit tanquam finem sui operis, simoniam committit.* Unde S. Antoninus 2. parte tit. 3. concludit mortale esse quærere aut appetere curata Beneficia principaliter propter honorem & divitias, quæ ex iis percipiuntur.

Præsumitur autem principalis intentio. 1. Si exigatur temporale per spiritualium subtractionem, cum extr. *In tantum*, Tit. *de Simonia*, expressius exprimat venditionis speciem, qui prius recipit pretium, quam rem conferat pretiosam. Gratis tamen spiritualibus prius exhibitis licite possunt consuetæ oblationes exigi à nolentibus & valentibus solvere, ut docet S. Thomas art. 3. *de Simonia*. 2. Si quis pecuniæ vi inducatur ad conferendam rem sacram, cum eam negare deberet, v. g. ad nuptias filii familias benedicendas invitis parentibus, ministranda Sacramenta indignis, puta publicis usurariis, Comædiarum Actoribus, &c. Hæc est ipsa impietas Simonis, qui mediante pecunia donum Spiritus Sancti, quo erat indignus, obtinere voluit.

Dices 3. Ex Cap. *Nisi essent*, Tit. *de Præbendis*. Licet arbitris ad litem sopiendam concedere uni litigantium annuam pensionem, & alteri Beneficium; Ergo simoniacum non est dare temporale pro spiritali.

Nego Conseq. Laudato enim Capite litigantes simoniam incurrunt, si propria auctoritate ita inter se pacifcantur, ut unus eorum retineat Beneficium, & alteri solvat expensas sive litis, sive possessionis initæ, vel annuam pensionem, ut cedat aliud Beneficium, quod pacifice possidet.

Summus

Summus tamen Pontifex ibidem concedit arbitrariis, ad quorum iudicium litigantes rem totam detulerunt, ut pro bono pacis decernant quod ipsis, non verò litigantibus, æquum visum fuerit. Sed in illo iudicio ipsa pax, & tranquillitas emitur, non verò spiritale.

Instas: Cap. *Quæsitum*, Causa 1. quæst. 3. & Cap. *Dilectus* 1. tit. de *Simonia*, Simoniacus non est, qui sine iudicis aut arbitri sententia promittit vel solvit pecuniæ summam ad retinendum spirituale, v. g. Beneficium: Ergo.

Distinguo anteced. Qui promittit & solvit ad redimendam iniquam vexationem, quam patitur habens jus evidens, & acquisitum in Beneficium, Concedo: quia nihil spiritale emit aut acquirit, sed repellit dumtaxat injuriam sibi illatam, quæ est quid temporale; qui promittit & solvit ad acquirendum jus ad beneficium, v. g. ut ad illud eligatur aut præsentetur; vel ad confirmandum jus dubium in Beneficium, Nego anteced. is enim verè esset simoniacus.

Dices 4. S. Thomas hic art. 5. ad tertium, pronunciat simoniacum, qui precibus obtinet Beneficium: Atqui beneficium non emit, qui illud precibus obtinet: Ergo malè simonia definitur emptio.

Distinguo min. Non emit si preces secundum se spectentur & quatenus sunt merè petitiones, Concedo; dives enim qui annuo pauperi eleemosynam petenti, non vèniit, sed gratis tribuit: si in precibus spectetur favor humanus, Nego min. favor quippe humanus inter bona temporalia maximi æstimatur, & inter pretia simoniaca numeratur à S. Gregorio, Hom 4. in Evang. refertur-

ferturque Cap. *Salvator*, *Causa* 1. quæst. 3. ubi sic habetur : *Sunt nonnulli qui quidem nummorum præmia ex ordinatione non accipiunt, & tamen sacros Ordines pro humana gratia largiuntur hi nimirum quod gratis acceptum est, gratis non tribuunt; quia de inpenso officio sanctitatis, nummum expetunt favoris Aliud est munus ab obsequio; aliud munus à manu, aliud munus à lingua, munus quippe ab obsequio est subiectio indebitè impensa; munus à manu, pecunia est; munus à lingua, favor.*

Ergo simoniam committit ab obsequio, qui præsentat aliquem ad Beneficium cum pacto quodd filium doceat Litteras, aut Missas certo die, loco & determinata hora celebret, cum ex titulo Beneficii sit ei liberum celebrare ubi & quando voluerit : à lingua verò qui confert Beneficium Aulici filio principaliter, ut pater Regi de se bene loquatur, qui in Concionibus & in Pœnitentiæ tribunali divitibus adulatur ut eorum gratiam sibi conciliet, & eos habeat beneficos.

Cæterum etsi simoniacum non sit precibus inclinari ad conferenda sacra ministeria, cum favor humanus non intenditur, inhonestum tamen docet S. Bernardus, lib. 4. de *Consid. ad Eugenium*, cap. 4. his verbis : *Sanè huic negotio non se ingerat rogans. Consilio, non prece agendum est ubi non licet facere quod volo (utpote non dominus, sed dispensator) quis locus roganti? Nisi fortè qui me rogat, hoc rogat, ut quod vult, hoc mihi liceat, ut non magis velim etiamsi non liceat. Pro quo rogaris, sit suspectus. Qui ipse rogat pro se, jam judicatus est. Nec interest per se, an per alium roget. Et S. Thomas art. 5. ad tertium : Si aliquis, inquit,*

inquit, *pro se rogat, ut obtineat curam animarum, ex ipsa præsumptione redditur indignus: & sic preces sunt pro indigno.* Immediatè antè scripserat eum videri simoniam committere, *qui preces pro indigno porrectas exaudit; quia favorem humanum principaliter intendit.*

Q. 2. *Quale peccatum est simonia?*

R. Est lethale etiam in materia levi. Patet tum ex Scriptura Act. 8. *Pecunia tua tecum sit in perditionem;* (quod de peccato veniali non diceretur) *quoniam existimasti donum Dei pecunia possideri:* tum ex gravissimis simoniacorum pœnis, quæ supponunt grave peccatum.

§. II.

De divisione simoniæ.

Q. 1. *Quomodo dividitur simonia?*

R. Dividitur 1. in simoniam juris naturalis & divini; & in simoniam juris Ecclesiastici.

Simonia juris naturalis & divini est ea, qua venditur res verè spiritalis & sacra pro temporali, ut collatio Ordinum, administratio Sacramentorum, usus potestatis, five Ordinis, five Jurisdictionis spiritalis, jus Patronatus, electio, & collatio Beneficiorum, ingressus Religionis.

Simonia Juris Ecclesiastici est pactio aut venditio, seu commutatio ab Ecclesia prohibita ob reverentiam rei sacræ. Duæ autem sunt hujusce simoniæ species. Prima est eorum, qui vendunt res per se non sacras, sed vel conjunctas antecederet cum sacris, ut locum sepulchræ,

turæ, materiam chrismatis, vel ad Ministeria sacra ordinatas, ut officium Sacrificiæ. Secunda est eorum, qui inter se paciscuntur de rebus spiritualibus in materia beneficiali, v. gr. propria autoritate permutant Beneficia, vel resignant in favorem, *cum in hujusmodi omnis pactio omnisque conventio debeat omnino cessare*, Cap. *Pactiones*, tit. *de Pactis*.

Dixi, *In materia beneficiali*; quia, ut notat Glossa in Cap. *Super eo*, tit. *de transactionibus*, pactiones in alia materia non prohibentur; Clerici verbi gratia licitè inter se conveniunt, ut unus pro altero sacrum Ministerium expleat hac conditione, quòd alter spirituale quid simile rependat.

Ergo adversus simoniam juris Ecclesiastici præscribi potest; quia ex dictis contra Legem humanam valet præscriptio: Atqui simonia juris Ecclesiastici prohibita est solum per Legem humanam: Ergo. Hinc communiter in Galliis venditur locus sepulturæ, quæ est temporale quid antecederet annexum sepulturæ Ecclesiasticæ. Sed adversus simoniam juris naturalis & divini non præscribitur, quia est per se mala, & idèò divinitus prohibita. Unde Concilium Lateranense 4. Cap. *Cum in Ecclesia*, tit. *de Simonia*: *Horribile nimis est, inquit, quòd in quibusdam Ecclesiis locum venalitas prohibetur habere, ita ut pro quibuscunque personis Ecclesiasticis ponendi in sedem, necnon & pro sepulturis & exequiis mortuorum, & benedictionibus nubentium seu aliis Sacramentis aliquid requiratur. Putant autem plures ex hoc licere, quia legem mortis de longa invaluisse consuetudine arbitrantur; non attendentes quòd tantò graviora sunt*

sunt crimina, quanto diutius infelicem animam tenuerunt alligatam.

Ergo simonia juris naturalis & divini cadere potest in Summum Pontificem; & contrariam quorundam Canonistarum opinionem stultam asserit Cardinalis Turrecremata; Summus enim Pontifex subest Legi naturali & divinæ: *Dicendum*, inquit Sanct. Thomas, art. 1. ad septimum quod *Papa potest incurrere vitium simoniæ, sicut & quilibet alius homo; peccatum enim tanto in aliqua persona est gravius, quanto majorem obtinet locum.*

Dividitur 2. in mentalem, conventionalem & realem.

Simonia mentalis est traditio rei temporalis, pro spirituali, & vicissim spiritualis pro temporali, nullo interveniente pacto.

Ergo, qui, ut ad beneficium eligatur aut præsentetur, munera offert electori, vel patrono ejus pravæ intentionis minime conscio, simoniam mentalem committit.

Dixi, *Minime conscio*, si enim conscius esset patronus & nihilominus acciperet, pactum tacitum præsumeretur, ac proinde simonia conventionalis. Itaque

Simonia conventionalis est emptio vel venditio rei spiritualis traditione nondum perfecta.

Simonia realis est emptio vel venditio rei spiritualis traditione ex utraque parte completa, v. g. collato Beneficio ex parte resignantis, & soluto pretio saltem quoad ejus partem, à resignatario.

Q. 2. *Quotuplex est simonia conventionalis?*

D. Habert Theolog. Tom. VIII.

K k

R. Du.

R. Duplex, alia dicitur pura, in qua nihil est datum aut acceptum, sed solummodo promissum: alia dicitur mixta, quando præter conventionem datur ex una parte; puta Beneficium, & nihil ex altera.

Q. 3. *Quotuplex est simonia conventionalis mixta?*

R. Duplex, alia simpliciter dicitur conventionalis mixta, de qua in præcedenti responsione: alia dicitur confidentialis.

Q. 4. *Quid est simonia confidentialis?*

R. Est simonia conventionalis mixta, qua quis ex pacto tacito vel expresse confidit alterum cui beneficium confert, sibi postea aut alteri resignaturum, aut saltem fructus ejus; vel partem fructuum concessurum.

Dicitur. 1. *Conventionalis mixta*; quia ut incuratur pœna confidentiariorum, non sufficit pura conventio, sed actu tradatur Beneficium necesse est.

Dicitur 2. *Ex pacto tacito vel expresse*; quia absque simonia potest confidere Beneficii collator Beneficiarum à se institutum, idem Beneficium sibi redditurum, si ad aliud Beneficium promoveatur; aut in fructibus Beneficii necessaria sibi præstiturum, modo nulla pactio hac de re præcesserit.

Ergo simonia confidentialis non est, sed conventionalis tantum, quando quis resignat aut permutat beneficium ea conditione, quod resignatarius sive compermutatarius vel aliud Beneficium, quod pacifice possidet, dimissurus sit in favorem tertii, aut in remunerationem refundet aliquid temporale, ad simoniam enim confidentialem requiritur, ut idem Beneficium, vel fructus ejus redeant

redeant ex pacto ad ipsum collatorem, aut ad eum quem indicaverit. Et hoc maxime notandum est propter speciales pœnas in confidentiariorum latas per Bullam Pii V. anno 1569. in Galliis receptam, easque longe graviores, quam in cæteros simoniacos.

§. III.

De pœnis simoniacorum.

Q. 1. *Quæ sunt simoniacorum pœnæ?*

R. Duplicis sunt generis: aliæ minus sunt pœnæ quam naturales simoniæ effectus: aliæ sunt pœnæ proprie dictæ quæ necessario non sequuntur ex simonia, sed infliguntur ab Ecclesia in vindictam tanti sceleris.

Q. 2. *Quid necessario sequitur ex conventionione simoniaca?*

R. Obligatio dimittendi simoniace acceptum; puta Beneficium & Beneficii pretium; quia conventio est irrita & prorsus nulla, cum res spiritualis nec vendi nec emi possit: Ergo nullum parit effectum, id est nullum tribuit jus accipiendi, nec titulum retinendi.

Q. 3. *Cui facienda est restitutio rei simoniace acceptæ?*

R. Jure naturali restituenda est illi, à quo fuit accepta; quia venditor rei alienæ, pretium illius tenetur reddere emptori, & iste rem venditam restituere vero Domino: Atqui simoniacus non est Dominus rei spiritualis, v. gr. Beneficii: Ergo tenetur illius pretium reddere emptori, emptor vero Beneficium dimittere, cum nullum jus in illud acquisierit. Sed jure positivo

Ecclesiastico, Cap. *De hoc*, tit. *de Simonia*, simoniace accepta non debent reddi ei qui dedit. Ita Sanctus Thomas secunda secundæ, qu. 32. art. 7. ubi sic scribit de simoniaco: *Dans & accipiens, contra justitiam Legis divinæ agit. Unde non debet fieri restitutio ei qui dedit, sed debet in elemosynas erogari.* Et hæc est prima simoniacorum pœna proprie dicta: Cum autem pœna supponat culpam, si quis bona fide & ex ignorantia probabili pro Beneficio pecuniam dedisset, pecunia sua non esset privandus; sed beneficium dimittere teneretur, quia vero careret titulo, nec juvaret illum possessio triennalis aut decennalis, juxta veriorum & communiorum Theologorum sententiam.

Q. 4. *Pœna illa estne extendenda ad omnes simoniacos?*

R. Affirmat Estius in quartum, dist. 26. Sed alii Theologi communiter docent, nisi simonia sit realis in materia Beneficiali, pretium semper esse restituendum ei qui dedit; quia laudatum caput *De hoc* loquitur solum de simonia reali in materia Beneficiali.

Q. 5. *Suntne aliæ simoniacorum pœnæ proprie dictæ?*

R. Feriuntur excommunicatione simoniaci, 1. in ingressu Religionis, Conventus vero suspensione extravag. Sanè, tit. *de Simonia*. 2. In ordinatione extravag. *Cum detestabile*, tit. *de Simonia*, & cap. 1. sess. 21. Concilii Trident. *de Reformat.* ubi mediatores simoniacæ ordinationis eadem pœna percelluntur. 3. In materia Beneficiali, cit. extravag. *Cum detestabile*. Insuper simoniace ordinatus suspensus est ab executione ordinum, maxime illius quem simoniace suscepit, etiamsi simonia

monia non fuerit realis nec completa ac propterea necdum sit excommunicatus. Beneficiarius vero inhabilis est ad idem Beneficium quod simoniace contulit vel recepit, cap. *Nobis fuit*, tit. de *Simonia*, teneturque omnes fructus restituere extravag. *Cum detestabile*, nisi secum dispensetur.

Q. 6. *Quis dispensare potest ut simoniacus idem Beneficium possidere possit?*

R. Si conscius fuit simoniæ, vel monitus simoniacam fuisse ejus electionem, præsentationem, vel collationem, & ei consensit solus Papa, cap. *Nobis fuit*, tit. de *Simonia*. Si ignoravit simoniam, aut monitus non consensit, distinguendum est, si simonia est notoria, & ad forum contentiosum deducta, Episcopus dispensare potest circa simplex Beneficium, solus vero Papa circa dignitatem aut Beneficium, cui cura animarum annexa est cit. Cap. *Nobis fuit*, si simonia est occulta, Episcopus dispensare potest, Cap. *Quicumque*, causa 1. qu. 5. & Cap. *Præsentium* eadem causa.

Q. 7. *Præter tres simoniæ species recensitas suntne aliæ, quibus annexa sit excommunicatio aut aliqua censura?*


R. Minime; quia nulla in jure extat, & in hoc conveniunt Theologi.

Q. 8. *Excommunicatio, aut inhabilitas ad idem Beneficium incurriturne propter simoniam mentalem, aut conventionalem?*

R. Verior est sententia non incurri, nisi simonia conventionalis sit confidentialis, quia est regula apud Theologos communiter recepta

ta pœnas juris non incurri, nisi propter crimen consummatum, quando lex contrarium non exprimit.

Dixi, *Nisi simonia conventionalis sit confidentialis*; quia in Bulla Pii IV. & Pii V. propter ejusmodi simoniam confidentialem decernitur excommunicatio, & inhabilitas non solum ad Beneficium confidentialiter obtentum; sed & ad aliâ, privanturque confidentiarii Beneficiis, & pensionibus prius legitime obtentis. Attamen ante judicis sententiam non tenentur dimittere, quæ antea legitimè possidebant.





Tractatus DE SACRAMENTIS IN GENERE.

CAPUT PRIMUM.

De Notione & existentia Sacramenti

Q. 1. *Quotuplici modo accipitur Sacramentum?*

R. Triplici. 1. Pro re arcana & latente, sive sacra sit, sive non. Sic Tob. 12. *Sacramentum Regis* (id est, Secretum) *abscondere bonum est.* 2. Pro signo rei sacræ. Sic productio Evæ ex latere Adami dormientis dicitur Sacramentum; quia significat Ecclesiam è latere Christi in Cruce dormientis eductam. 3. Pro signo rei non solum sacræ, sed etiam sacrantis. *Sacramenta*, inquit Sanctus Thomas prima secundæ, qu. 102. art. 5. *proprie dicuntur illa, quæ adhibebantur in Lege veteri Dei cultoribus ad quandam consecrationem.* Et hoc posteriori modo tantum hic accipitur Sacramentum. Spectari autem potest, vel generice, vel specificè pro Sacramento novæ aut veteris Legis.

Q. 2. *Quid est Sacramentum generice spectatum?*

R. Est signum sacrum visibile & permanens, divinitus institutum ad nostram sanctificationem.

Dicitur 1. *Signum*; quia ducit nos incognitionem

nem rei alterius, nempe gratiæ & sanctificationis; absolutio v. g. in Baptismo est signum animæ emundationis: Ergo omne Sacramentum est in genere signi. *Sacramentum*, inquit Sanct. Chrysostomus Hom. 7. in 1. ad Cor. *aliud oculis, aliud menti exhibet.*

Dicitur 2. *Sacrum*, ut significetur usum illius signi debere esse actum Religionis, & ad cultum Dei pertinentem: Hinc Manna & transitus Maris rubri, licet signa rei sacræ, non fuerunt tamen Sacramenta; quia nec usus Mannæ, nec transitus Maris rubri, fuerunt actus religiosi, sed mere profani.

Dicitur 3. *Visibile*; quia ea est natura hominis ut per sensibilia assurgat ad spiritualia, nec colligari possunt homines in unam societatem Religionis, nisi per aliquod signum sensibile, ut docet Sanctus Augustinus lib. 19. contra Faustum, cap. 11. Visibile autem hic sumitur pro sensibili; cum enim omnis actio sensus sit aliqua cognitio, dicimur videre quidquid aliquo sensu percipimus: Ergo ad rationem Sacramenti, necesse non est, ut signum oculis percipiatur.

Dicitur 4. *Permanens*; quia cum Sacramenta sint fundamenta Religionis, tamdiu permanere debent, quamdiu ipsa Religio. Hinc illapsus Spiritus Sancti sub forma columbæ in Baptismo Christi, & sub forma linguarum ignearum die Pentecostes, non fuerunt Sacramenta; quia non fuerunt signa permanentia. Sic nec Baptismus Sancti Joannis Baptistæ, utpote qui non fuerit permanens, præterquam quod non dabatur ad sanctificationem, sed erat exterior professio pœnitentiæ; nec lotio pedum à Christo Domino celebrata

lebrata pridie quam pateretur, cum universalis Ecclesia illam non retinuerit. Petrus damnandus fuisset, si obstinatius Christo restitisset, non defectu lotionis, sed inobedientiæ merito. Latio dicitur à sancto Bernardo delere venialia, non quatenus est signum, sed quatenus est bonum opus, quo ex sincero affectu humilitatis & charitatis pedes fratrum abluimus.

Dicitur 5. *Divinitus institutum.* 1. Quia Sacramentum est signum arbitrarium; aqua enim Baptismi v. gr. naturaliter non significat purgationem animæ à peccatis, quemadmodum fumus ignem naturaliter significat. 2. Quia solus Deus potest instituere signa gratiæ infallibiliter conferendæ, cum ipse solus sit author gratiæ. Hinc tonsura Clericalis, aqua benedicta, & ceteræ cæremoniæ ab Ecclesia institutæ, non sunt vera sacramenta.

Dicitur 6. *Ad nostram sanctificationem*; quia ex dictis Sacramentum proprie dictum, est signum sacrans, seu productivum alicujus sanctitatis sive internæ, sive externæ & legalis.

Q. 3. *Quid est sanctitas exterior seu legalis?*

R. Est quædam mundities exterior, qua quis fit aptus ad certa Religionis officia obeunda. Mulier v. g. quæ post partum in veteri Lege arcebat à sacris tanquam immunda, per sacrificium mundabatur, similiter qui per lepram aut contactum cadaveris contaminatus fuerat, legali ritu sanctificabatur, sed sanctitate exteriori quæ ab Apostolo dicitur justitia carnis. Heb. 9. v. 10.

Q. 4. *Fueruntne Sacramenta in quolibet statu?*

Advertes quatuor recenseri hominum status. Primus est innocentiae, qui duravit solum usque

ad lapsum primorum parentum. Secundus est status naturæ, qui cœpit à lapsu primi hominis, duravitque usque ad Moysen, qui promulgavit Legem scriptam, seu veterem. Tertius est status Legis scriptæ, qui à tempore Moyfis usque ad Christum Dominum extenditur. Quartus status est Legis novæ, in quo degimus, permansurusque est usque ad consummationem seculi. His prænotatis

R. 1. Sacramenta proprie dicta non fuerunt in statu innocentiae; quia videtur esse pœna peccati, quod homo subjiciatur rebus inferioribus ad remissionem peccatorum, & sanctitatem obtinendam.

Dixi, *proprie dicta*; nam lignum vitæ, somnus Adami, & matrimonium ejus cum Eva, aliquando dicuntur Sacramenta; sed in alia acceptione, nempe quatenus erant signa rerum sacrarum.

R. 2. In statu Legis naturæ fuit aliquod Sacramentum, saltem in remedium peccati originalis. *Non est credendum*, inquit S. Augustinus lib. 5. contra Julianum cap. 11. *ante Circumcisionem famulos Dei (quandoquidem eis inerat Mediatoris Fides in carne venturi) nullo Sacramento ejus opitulatos fuisse parvulis suis, quamvis quid illud esset, aliqua necessaria causa Scriptura latere voluerit.* Et Sanct. Gregorius lib. 4. Moral. cap. 3. *Quod apud nos valet aqua Baptismatis, hoc egit apud veteres, vel pro parvulis sola fides, vel pro majoribus virtus sacrificii.* Fides autem illa primo debebat esse exterior, cum per illam homines profiterentur veram Religionem. Secundo non mundabat in adultis maculam peccati sive originalis, sive actualis, nisi esset formata à charitate; quia privilegium est Sacramentorum novæ Legis pro-

propria virtute, & ex opere operato, ut ajunt, sanctitatem interiorem conferre. Sed ad mundandam maculam peccati originalis in parvulis, sufficiebat parentum actus fidei informis; quia ex Sancto Thoma in quartum dist. 1. qu. 2. art. 6. ad secundum, *fides parentum non justificabat infantem, in quantum erat actus personæ, sed quatenus respiciebat suum objectum, nempe Christum Dominum justificabat ex objecto quasi ex opere operato; non autem ex opere operantis.*

R. 3. Dubium non est quin Sacramenta extiterint in Lege scripta, seu veteri, & extent in Lege nova. *Prima Sacramenta, inquit Sanct. Augustinus lib. 19. contra Faustum, cap. 13. quæ observabantur ex Lege, præmanciatiua erant venturi Christi, quæ cum suo adventu Christus implevisset, ablata sunt & alia instituta sunt virtute majora utilitate meliora, actu faciliora, numero pauciora.*

Q. 5. *Quotuplex est discrimen Sacramenta veteris Legis inter & Sacramenta novæ Legis?*

R. Triplex. Primum desumitur ab Auctore, nam solus Christus est Auctor Sacramentorum nostrorum, non vero Sacramentorum veteris Legis. Secundum ex diverso modo operandi; Sacramenta enim veteris Legis non producebant gratiam sanctificantem, nisi ex opere operantis; nostra vero eam conferunt ex opere operato. Tertium ex partibus, quibus constant Sacramenta utriusque Legis; Sacramenta enim novæ Legis constant rebus & verbis, rebus tanquam materia; verbis tanquam forma. Sacramenta vero Legis veteris non necessario constabant verbis, sed rebus duntaxat, ut patet ex Circumcisione, & Agno Paschali.

Ne-

Negandum tamen non est, quin in aliquibus verba adhiberentur.

Res dicuntur materia per analogiam ad compositum Physicum; in quo pars imperfectior & minus determinata dicitur materia; actus vero, quo materia determinatur ad tale esse dicitur forma; materia ligni v. g. ex se indifferens est, & indeterminata vel ad formam ignis, vel ad formam ligni, vel ad formam cineris; sed determinatur per formam ignis ad esse ignis, per formam ligni aut cineris ad esse ligni aut cineris. Similiter aqua est indifferens vel ad abluendum vel ad refrigerandum, vel ad emolliendum; sed in Baptismo determinatur ad abluionem interiorum per verba: *Ego te baptizo, &c.*

Dices: Matrimonium potest celebrari sine verbis; mutus enim valide contrahit. In Sacramento poenitentiae nullae res adhibentur; sed verba duntaxat. Ergo omnia Sacramenta novae Legis non constant rebus, & verbis.

Nego consequenter. Namque 1. Si Sacerdos est Minister matrimonii, ut graves Theologi contendunt, profert verba benedicendo sponsum & sponsam, quae habent rationem formae. Si ipsi contrahentes sibi mutuo Sacramentum conferunt, nutus, quibus muti exprimunt suum consensum, habent rationem verborum. 2. in Sacramento Poenitentiae actus Poenitentis sunt quasi materia hujus Sacramenti ex Concilio Tridentino sess. 14. cap. 3. quia absolutio Sacerdotis ejusmodi actus determinat ad significandam remissionem peccatorum.

Q. 6. *Quid significant haec votes, ex opere operantis; & ex opere operato?*

R. Vo-

R. Voces, *ex opere operato*, significant Sacramentum ipsum, seu applicationem signi exterioris per se habere efficaciam ad gratiam producendam: contra vero voces, *ex opere operantis*, significant Sacramentum ex se nullam habere efficaciam, sed ex usu & dispositionibus recipientis illud Sacramentum.

Q. 7. *Sacramenta veteris Legis nullamne habebant efficaciam?*

R. Producebant sanctitatem seu munditiam legalem, & significabant solummodo gratiam sanctificantem.

Q. 8. *Unde habemus Sacramenta veteris Legis contulisse gratiam sanctificantem ex opere operantis dumtaxat: Sacramenta vero novæ Legis eam producere ex opere operato?*

R. Habemus ex Scriptura sacra, & Ecclesiæ definitione; de Sacramentis enim veteris Legis habetur Gal. 4. v. 9. ea fuisse infirma & egena elementa, & Heb. 7. v. 18. *reprobatio fit præcedentis mandati propter infirmitatem*. De Sacramentis vero novæ Legis legitur Joan. 3. *Nisi quis renatus fuerit ex aqua & Spiritu Sancto, non potest introire in regnum Cælorum*. Hic per Baptismum datur Spiritus Sanctus & nova nativitas; Act. 8. quibus Apostoli manus imponebant, hi accipiebant Spiritum Sanctum. Joan. 6. Qui manducat carnem Christi in Sacramento, vivet in æternum. Et ita de cæteris Sacramentis. Denique Concilium Tridentinum sess. 7. Can. 2. definiit adversus Novatores Sacramenta novæ Legis differre à veteribus non solum ritu externo, & can. 8. gratiam conferre ex opere operato.

Dices; Circumcisio remittebat peccatum originale

ginale etiam in parvulis : Ergo conferebat gratiam etiam ex opere operato.

R. 1. Circumcisio fuit instituta in Lege naturæ & ante Legem scriptam : Ergo non est confundenda cum Sacramentis Legis veteris , quamvis in ea fuerit præcepta , sed revocanda ad Sacramenta Legis naturæ , quæ Concilium Trident. non comprehendit in Canonibus supralaudatis.

R. 2. Probabilius est Circumcisionem non fuisse primario institutam ad delendum peccatum originale , sed ad distinguendum populum Dei & genus Abrahæ ab aliis Nationibus ; tum quia Abraham , in quo primum fuit instituta , jam erat iustus , ut observat Apostolus Rom. 4. ac proinde immunis à peccato originali : tum quia quandiu Populus Dei mansit in Deserto ab aliis Nationibus separatus , circumciscus non est : tum quia Circumcisio non applicabatur mulieribus , nec maribus ante octavum diem , ad quem sane multi non perveniebant morte præventi : Ergo Circumcisio data est in signum , non in salutem ; ut loquuntur Sanctus Irenæus & Tertullianus , *ad justitiam ipsa circumcisio nihil contulit* , inquit Sanct. Chrysostomus homil. 7. in Gen. Siquidem Augustinus contrarium sensit deceptus Codicibus Græcis , quibus utebatur.

Negandum tamen non est in Circumcisione deletum fuisse peccatum originale , non virtute ipsiusmet circumcisionis , sed virtute fidei in Christum venturum ad quam profitendam assumebatur Circumcisio pro maribus , ut docet Sanctus Thomas 3. part. qu. 70. art. 4. ubi revocavit oppositam sententiam , quam amplexus fuerat scribens in quartum dist. 1. qu. 2. artic. 4.

Q. 9. *Quomodo definitur Sacramentum specificè spectatum?*

R. Sacramentum veteris Legis definiri potest, signum visibile, sacrum, à Deo permanenter institutum ad producendum per se sanctitatem exteriorè & legalem, interiorè vero solum significandam.

Sacramentum autem novæ Legis est signum visibile, sacrum, à Christo Domino permanenter institutum, ad producendam per se, & ex opere operato sanctitatem interiorè.

In duobus ergo potissimum differunt Sacramenta nova à veteribus. 1. Quia sunt instituta à Christo Domino, illa vero non. 2. Quia gratiam sanctificantem & justitiam conferunt ex opere operato: illa vero sanctitatem dumtaxat legalem.

Ergo Sacramenta novæ & veteris Legis univoce conveniunt in genere Sacramenti; utraque enim sunt signa sacra, visibilia, permanentia, & divinitus instituta.

CAPUT II.

De materia & forma Sacramentorum novæ Legis.

Q. 1. *Quotuplex est materia?*

R. Duplex, remota, circa quam versatur actio Ministri, ut aqua in Baptismo, peccata in Sacramento Pœnitentiæ; & proxima, estque usus materiæ remotæ, ut ablutio in Baptismo.

Q. 2. *Ad quid verba adhibentur in ritu Sacramentorum novæ Legis?*

Novatores ex suo principio erroneo, quo docent hominem justificari per solam fidem, duo circa

circa Sacramenta colligunt. Primum ea à Christo Domino solum fuisse instituta ad excitandam fidem permissionum divinarum, easque obsignandas tanquam per sigilla. Secundum verba adhiberi in administratione Sacramentorum ad docendos suscipientes, esseque concionalia, & nullatenus consecratoria.

Certum est adultos initiandos, priusquam ad Baptismum, & ad alia Sacramenta admittantur, debere edoceri quæ sit virtus Sacramenti, quod percepturi sunt; ait enim Christus Matth 28: *Docete omnes Gentes baptizantes eos, &c.* sed quæstio est utrum verba, ex quibus essentialiter constant nostra Sacramenta tanquam ex forma, sint dumtaxat concionalia?

R. Forma Sacramentorum, quæ in verbis consistit, est vere consecratoria, adeo ut conjuncta cum materia conferat gratiam, quam significat, vereque consecret ac sanctificet suscipiens; quia ex dictis Sacramenta novæ Legis gratiam interiorum producant ex opere operato. Præterea adhibentur verba in collatione Baptismi parvulorum: Atqui verba illa non sunt concionalia ad erudiendos illos parvulos, & fidem illorum excitandam.

Q. 3. *Christus determinavitne materiam & formam omnium Sacramentorum?*

R. I. Christus Dominus quorundam Sacramentorum, nempe Baptismi & Eucharistiæ, materiam & formam determinavit in specie, id est, instituit saltem mediata signa gratiæ sanctificantis productiva, alias non esset auctor omnium Sacramentorum.

R. 2. De fide quoque est Christum quorundam Sacramentorum materiam & formam in specie determinasse, ut constat ex Baptismo & Eucharistia; namque pro materia Baptismi assignavit aquam Joan. 38. *nisi quis renatus fuerit ex aqua*; & pro forma invocationem sanctissimæ Trinitatis Matth. 28. *Baptizantes eos in nomine Patris & Filii & Spiritus sancti*. Pro materia etiam Eucharistiæ accepit panem, & pro forma iussit ut diceretur, *hoc est corpus meum*, ut patet ex sequentibus verbis, *hoc facite in meam commemorationem*, Luc. 22.

R. 3. Certum est etiam formas aliorum quinque Sacramentorum non ita determinatas fuisse, sed Christum reliquisse Ecclesiæ determinandum, quæ oratio adhiberetur pro Confirmatione, Ordinatione & Extrema Unctione, quæve proferrentur verba pro Sacramentis Pœnitentiæ & matrimonii, modo per ea sufficienter exprimerentur effectus illorum Sacramentorum; Græci enim aliis verbis quam Latini valide confirmant & ordinant.

Sed controversia est in Scholis, num Christus determinaverit in specie materiam singulorum Sacramentorum?

R. 4. Materia omnium Sacramentorum à Christo Domino speciatim est determinata. De materia Baptismi & Eucharistiæ non est dubium, aliorum vero Sacramentorum expresse assignatur in Scriptura; pro Confirmatione habemus manuum impositionem Act. 8. pro Ordinatione Diaconorum etiam manus impositionem, Act. 6. & Presbyterorum ac Episcoporum 1. Timot. 4. v. 14. pro Pœnitentia peccatorum Confessionem, Joan. 20. pro Extrema Unctione oleum, Jacob. 5.

pro Matrimonio unionem viri & mulieris, seu mutuum utriusque consensum, Ephes. 5. sed hæc amplius patebunt, cum differetur separatim de unoquoque Sacramento.

Q. 4. *Mutatio materiæ vel formæ redditne Sacramentum irritum?*

R. Si mutatio sit substantialis, Sacramentum est irritum. Si sit accidentalis, validum est Sacramentum, sed illicite administratur.

Q. 5. *Quandonam fit mutatio substantialis & accidentalis?*

R. Quando materia non est amplius eadem substantialiter, quam Christus determinavit, ut si vinum factum sit acetum, acetum enim non est vinum, vel quando verba eundem sensum non retinent, ut si quis in forma Baptismi dicat, Ego te baptizo in nomine Patris majoris, quia hujusmodi additio tollit æqualitatem Personarum, destruitque Mysterium sanctissimæ Trinitatis.

Accidentaliter autem est mutatio in materia, quando manens in sua substantia alteratur in accidentibus, ut si vinum parumper ace scat, aut si cum granis tritici misceantur grana alterius speciei, sed in minori quantitate. In verbis etiam accidentaliter est mutatio, quando ea adduntur aut detrahuntur verba, quæ sensum non tollunt.

Dices: Ecclesia mutavit materiam Sacramenti matrimonii; nam ante Concilium Tridentinum contractus clandestinus, hoc est, sine testibus & præsentia Parochi perficiebat Matrimonium: Concilium autem Tridentinum ejusmodi contractum fecit irritum: Ergo Ecclesia potest mutare materiam Sacramentorum etiam quoad substantiam.

Distin-

Distinguo consequens, potest mutare indirectè & præsuppositivè, Concedo; potest mutare directè & formaliter, Nego consequentiam. Quemadmodum enim qui substantialiter corrumpet aquam, posset dici mutare indirectè & præsuppositive materiam Baptismi, quia corrumpet id quod poterat esse materia idonea ad baptizandum; sic Ecclesia effecit, ut qui erat olim contractus validus, jam non sit validus, apponendo scilicet novas solemnitates, sine quibus non erit verus contractus. Sed penes Ecclesiam non est, ut contractus validus non sit materia Sacramenti Matrimonii, & aqua vera non sit materia Baptismi; quia Christus utramque materiam instituit.

C A P U T III.

De causa efficiente Sacramentorum novæ Legis.

Q. 1. *Quotuplex est causa efficiens Sacramentorum novæ Legis?*

R. Triplex. Prima est Deus, qui omnipotenti sua voluntate Sacramentis tribuit sanctificandi virtutem, deditque Christo, ut homo est, potestatem ea instituendi. Secunda est Christus, qui potestate excellentiæ, ut ajunt, & tanquam instrumentum divinitati conjunctum Sacramenta novæ Legis instituit. Tertia est merè ministerialis, consistitque solum in potestate administrandi Sacramenta jam divinitus instituta.

Q. 2. *In quibus consistit potestas excellentiæ Christo concessa?*

R. In his quatuor consistit. I. Quòd Sacramenta

menta per illius meritum operentur. 2. Quodd ad invocationem nominis illius conferantur. 3. Quodd ipse habeat potestatem Sacramenta instituendi. 4. Quodd Sacramentorum effectum solo voluntatis nutu, & independenter à quocunque ritu externo conferre possit, sicut revera contulit Peccatrici, Luc. 7. & Paralytico Matth. 9.

Q. 3. *Quis est Minister Sacramentorum novæ Legis?*

R. Solus homo. Est contra Lutherum, qui lib. de Missa privata docet Angelos & dæmones posse legitimè administrare Sacramenta, cum Christus solos homines allocutus sit, *iis datum est*, inquit sanctus Chrysostomus libr. 3. de Sacerd. *ut potestatem habeant, quam Deus optimus maximus neque Angelis, neque Archangelis datam esse voluit, neque enim ad illos dictum est, quæcunque ligaveritis, &c.* Matth. 18. *Docete omnes Gentes baptizantes eos*, Matth. 28. *Hoc facite in meam commemorationem*, Luc. 22.

Q. 4. *Quivis homo estne Minister Sacramentorum novæ Legis?*

R. Minimè; solis enim Apostolis Christus dixit, *quorum remiseritis peccata, remittuntur eis*, Joan. 20. ex hominibus quosdam elegit Pastores & Doctores, Ephes. 4.

Q. 5. *Quot requiruntur in Ministro, ut Sacramentum legitimè perficiat?*

R. Tria, nempe intentio, fides & probitas.

Q. 6. *Quid intelligitur nomine intentionis?*

R. Intelligitur deliberata voluntas faciendi quod facit Ecclesia. Dico, *deliberata*, quæ enim fiunt sine cognitione & advertentia rationis, dicuntur fieri præter intentionem. Hinc mater, quæ

quæ abluendo fordes corporales infantis diceret, abluo te in nomine Patris & Filii & Spiritus Sancti, non haberet intentionem conferendi Sacramentum; quia de eo non cogitaret, nec cogitasset.

Q. 7. *Estne necessaria in Ministro illa intentio ad veritatem Sacramenti?*

Negavit Lutherus, adversus quem stat ista definitio Conc. Trid. sess. 7. can. 11. *Si quis dixerit in Ministris, dum Sacramenta conficiunt & conferunt, non requiri intentionem saltem faciendi quod facit Ecclesia, anathema sit. Quare*

R. De fide est Ministri intentionem esse necessariam ad perficiendum Sacramentum; sic nos existimet homo, inquit Apostolus 1. Cor. 4. *ut Ministros Christi & dispensatores Mysteriorum Dei*: Atqui dispensator debet agere humano modo & cum advertentia rationis, alioquin actus ejus sunt irriti.

Dices 1. Medicamentum prodest ægroto, etiamsi præter intentionem, aut etiam per jocum detur: Ergo

Distinguo antecedens: medicamentum, quod non consistit essentialiter in actione humana; ut omnia medicamenta corporea, Concedo, quod essentialiter consistit in actione humana, quæ non potest perfici sine intentione, Nego antecedens.

Dices 2. S. Alexander Episcopus Alexandrinus ratum habuit Baptismum jocosè collatum à sancto Athanasio adhuc puero. Item sanctus Genesius validè fuit baptizatus per Mimum, qui in Theatro Mysteria Christianorum derisorie repræsentabat: Ergo.

Nego conseq. namque 1. Rufinus & ex illo Socrates & Sozomenus incerta admodum fama &

diversimodè referunt illam sancti Athanasii historiam, & plura suadent eam esse falsam. Vide Tomum 5. cap. 10. 2. Vera sit illa historia: pueri in ludis suis nonnunquam seriò imitantur quæ à majoribus fieri conspiciunt, & hanc fuisse mentem in puero Athanasio deprehendit sanctus Alexander ex eo quòd non promiscuè ablueret infideles & jam baptizatos, sed solos Catechumenos, exploratis priùs per varias interrogationes eorum dispositionibus. 3. Sanctus Genesius sanctificatus est vel perfecta contritione, quæ dicitur Baptismus flaminis, vel proprio sanguine, non verò Baptismo aquæ mimicè collato.

Q. 8. *Quæ intentio est necessaria ad perficiendum Sacramentum?*

R. 1. Contra scrupulosos, directa sufficit, nec requiritur reflexa, qua quis reflectens supra intentionem, quam jam habet, & ex qua currit ad baptizandum parvulum, aut absolvendum moribundum novo & distinctiori modo vult conferre Sacramentum.

R. 2. Non requiritur intentio finis Sacramenti, hoc est conferendi sanctitatem; quia ex dicendis Infideles, vel etiam Athei possunt validè administrare Sacramenta, etiamsi existiment esse cæremonias superstitiosas.

R. 3. Intentio habitualis non sufficit, quia est sine advertentia rationis cùm possit reperiri in dormiente, amente, & ebrio; multò minùs interpretativa intentio sufficit, quàm habitualis; quia non tam est intentio, quàm dispositio ad intentionem concipiendam.

R. 4. Intentio actualis, quamvis optima, atque ideo optanda, non est necessaria, sed virtualis sufficit.

Q. 9.

Q. 9. *Quid est intentio virtualis?*

R. Est actio quæ fit virtute præcedentis voluntatis deliberatæ, quæ licet præterierit, censetur moraliter permanere, quatenus est causa actuum sequentium; Pastor v. gr. ex intentione baptizandi infantem ad Templum pergit, dumque parat necessaria ad Baptismum & ritum prosequitur, actu non cogitat de Sacramento quod perficit, mente aliò abstracta, idque vel ex infirmitate humana, vel ex negligentia. Omnes illæ actiones dicuntur intentio virtualis; quia fiunt ex deliberata voluntate, qua voluit baptizare, & ad Templum perrexit.

Q. 10. *Fides & probitas requiruntur in Sacramentorum Ministro?*

R. 1. Minister Sacramentorum conficiens aut administrans in statu peccati mortalis, peccat lethaliter. Ita Sanctus Thomas 3. par. qu. 64. & omnes Theologi, quia, inquit Angelicus Doctor, hoc peccatum pertinet ad irreverentiam Dei, & contaminationem Sacramentorum, quantum est ex parte ipsius peccatoris.

R. 2. De fide est ad veritatem Sacramenti nec probitatem nec fidem requiri, atque adeò Ministrum impium, vel etiam hæreticum validè conficere, aut conferre Sacramenta, modò materiam & formam adhibeat cum intentione faciendi quod facit Ecclesia; ita enim definiit Concilium Tridentinum sess. 7. can. 4. & can. 12.

Nostra responsio efficaciter non probatur ex Scriptura, ipsomet Sancto Augustino fatente lib. de unitate Ecclesiæ cap. 19. sed eam Sanctus Stephanus summus Pontifex III. sæculo ex traditione invictè asseruit adversus S. Cyprianum, S. Fir-

milianum, & plures alios Episcopos, ac deinceps Concilia & SS. Patres.

Dices; Nemo dat quod non habet; Atqui Peccator, aut Hæreticus non habet Spiritum Sanctum: Ergo illum dare non potest; nec proinde Sacramentum validè conferret. *Ab immundò quid mundabitur?* inquit Sapiens Eccli. 54. vers. 4.

Distinguo majorem; Nemo dat tanquam causa principalis, quod non habet, Concedo: Nemo dat tanquam causa instrumentalis, quod non habet, Nego majorem: Causa enim instrumentalis non agit virtute propria; sed virtute causæ principalis. Porro minister habet rationem instrumenti, quo Christus utitur ad conferendam sanctitatem, sive Petrus sive Judas baptizet in nomine Christi, ubique Christus per Ministrum baptizat, & virtute sua baptizatum sanctificat.

Plura alia obijciuntur tum ex Scriptura, tum ex Traditione, ut suadeatur Sacramenta Baptismi, Confirmationis, & Ordinis iterata fuisse in Ecclesia, quæ diluimus Tomo 5. Tract. de Sacramentis in genere cap. 14. Ubi etiam probavimus Sanctum Stephanum non excommunicasse Sanctum Cyprianum, nec ultra minas fuisse progressum.

Q. II. *Licetne petere Sacramenta ab improbo Ministro?*

Respondet S. Thomas in quartum dist. 24. qu. 1. art. 3. quæstiuncula 5. ad tertium, licere, modo adsit necessitas, secus non licere.

CAPUT IV.

De effectibus Sacramentorum novæ Legis.

Q. I. *Quinam sunt effectus Sacramentorum novæ Legis?*

R. A.

R. Alius est communis, alius proprius.

Communis est gratia sanctificans, vel prima, ut in Baptismo & Pœnitentiâ; duo enim illa Sacramenta instituta sunt ad remittendum peccatum mortale; & ideo dicuntur Sacramenta mortuorum, vel secunda, ut in aliis quinque Sacramentis, quæ supponunt suscipientem in statu gratiæ sanctificantis, suntque instituta ad illam augendam & perficiendam. Hinc dicuntur Sacramenta vivorum.

Q. 2. *Quisnam est effectus proprius?*

R. Duplex est, alius ita est proprius, ut alteri non conveniat, diciturque gratia Sacramentalis, & alius, qui non est ita proprius, quin conveniat alteri Sacramento, ut caracter qui convenit Baptismo, Confirmationi & Ordini.

Q. 3. *Quid est gratia sacramentalis?*

R. Est jus fundatum in gratia sanctificante per sacramentum collata ad accipienda opportuno tempore certa auxilia, id est, gratias actuales, quibus possit homo obtinere finem Sacramenti. Supponamus v. g. quempiam cum debitis dispositionibus Sacramentum Confirmationis suscepisse; ac proinde augmentum gratiæ sanctificantis fuisse consecutum: gratia sic accepta titulus est confirmato ad obtinendas à Deo gratias actuales, ut possit data occasione Evangelium intrepidè profiteri; ad hoc enim institutum est illud Sacramentum.

Ergo gratia sacramentalis non semper recipitur actu, nisi in radice, dum administratur Sacramentum. Hoc maximè patet in infantibus, & in iis, qui amisso usu rationis, absolvuntur vel unguntur: in illo enim statu non sunt capaces gratiæ.

tiarum actualium, utpote quæ sint actus intellectus & voluntatis divinitus excitati; jus tamen per Sacramentum acquisierunt ad illas suo tempore accipiendas.

Ergo qui post susceptum Sacramentum labitur in peccatum mortale, amittit jus ad illa auxilia supernaturalia, cum fundentur in gratia sanctificante, quæ per peccatum mortale amittitur. Imò ex Apostolo Hebr. 10. terribilis eum manet expectatio judicii, utpote qui filium Dei conculcaverit, & Sanguinem Christi pollutum duxerit, in quo sanctificatus est.

Q. 4. *Sacramenta conferuntne semper æqualem gratiam?*

R. In fuscipientibus æqualiter dispositis, ut in parvulis, æqualem gratiam conferunt: in melius verò dispositis majorem; quia Sacramenta sunt causæ necessariæ. Unde sicut ignis eodem modo applicatus duabus Candelis similiter præparatis, eas similiter accendit, secus si diversimodè sint præparatæ: ita & Sacramenta operantur secundum propriam cujusque dispositionem & cooperationem, ut docent Patres Tridentini sess. 6. cap. 7.

Q. 5. *Major gratia melius disposito collata, estne ex opere operato, an ex opere operantis?*

R. Est ex opere operato; quemadmodum enim inflammatio ligni siccioris & melius præparati ad ignem concipiendum, non est à ligno, sed ab igne solo; sic major gratia in fuscipiente melius disposito, est à Sacramento, non à dispositionibus.

Q. 6. *Quid est Character?*

R. Est signum in anima impressum indelebile; quo

quo distinguitur homo ab aliis, efficiturque idoneus ad nonnulla, quæ sunt cultus divini, ut in Baptismo ad recipienda alia Sacramenta; in Confirmatione ad profitendam Religionem Christianam, & in Ordine ad obeundas functiones Ecclesiasticas.

Ergo tres sunt effectus characteris. 1. Efficit ut Sacramenta quibus imprimitur, scilicet Baptismus, Confirmatio & Ordo iterari nequeant. 2. Distingui v. g. baptizatum à non baptizatis, Sacerdotem à Laicis. 3. Consecrat & deputat ad nonnulla Religionis officia.

Quid sit autem illud signum, an qualitas primæ, secundæ, tertiæ, aut quartæ speciei, an relatio sive realis, sive rationis, non conveniunt Theologi, nec hujusmodi controversiam attigerunt Patres Tridentini. Sanctus Thomas & Catechismus Romanus volunt esse qualitatem primæ speciei, id est, potentiam. Dominicus Soto post Concilium Tridentinum, cui interfuit, docet in quartum distinct. 1. q. 3. art. 1. & qu. 4. art. 2. characterem esse rem ab anima indistinctam, & nihilominus rectè dici imprimi, atque esse indelebilem, quemadmodum matrimonii vinculum ligat contrahentes, & est indissolubile, licet non sit quid physicum realiter à contrahentibus distinctum, sed morale dumtaxat.

CAPUT V.

De dispositionibus ad Sacramenta recipienda requisitis.

Q. I. *Quænam dispositiones requiruntur ad Sacramenta recipienda?*

R. I.

R. 1. In parvulis nulla requiritur dispositio; quia si iis nocuit voluntas aliena nempe primi parentis, iis quoque prodesse poterit fides aliena, nimirum matris Ecclesiæ, *qui peccavit in altero*, (in Adamo,) *credit in altero*, (Ecclesia) inquit Sanctus Augustinus serm. 294. aliàs 14. de verbis Apostoli. Idem dicendum de amentibus, qui usu rationis semper caruerunt.

R. 2. Ut Adulti Sacramenta validè recipiant, requiritur & sufficit (excepto tamen Sacramento pœnitentiæ) voluntas recipiendi Sacramentum. Requiritur quidem; quia susceptio Sacramenti est quædam Religionis professio, quæ fieri nequit sine aliquo voluntatis motu. Sufficit etiam; quia Sacramenta validè administrantur hæreticis, cum in iis non iterentur, quando redeunt ad Ecclesiam Catholicam: Atqui in hujusmodi hæreticis nulla fuit alia dispositio, quàm voluntas recipiendi alia Sacramenta.

Dixi, *excepto Pœnitentiæ Sacramento*, quia in illo Sacramento, actus pœnitentis, nempe Contritio & Confessio sunt ejus materia essentialis: Atqui non perficitur Sacramentum sine materia sua essentiali; Ergo nullum est Sacramentum pœnitentiæ in eo qui illud voluntariè, sed fictè, id est sine vera contritione recipit.

R. 3. Præter voluntatem recipiendi Sacramenti, requiruntur in adulto aliæ dispositiones ut licitè & cum fructu recipiatur. Variæ autem debent esse illæ dispositiones pro diversitate Sacramentorum; aliam enim dispositionem requirit Eucharistia; aliam pœnitentia, Ordo, &c.

Q. 2. *Quæ voluntas in suscipiente requiritur ad veritatem Sacramenti?*

R. 1.

R. 1. Ad Baptismum saltem requiritur intentio habitualis; Baptismus enim est Christianæ Religionis professio, per quam Baptizatus obligat se ad observandam Legem Evangelicam, & Ecclesiæ statuta, quod necessariò supponit intentionem saltem habitualement. Intentio autem habitualis hic dicitur voluntas, quæ aliquando præcessit, nec fuit retractata.

Hujusmodi voluntas habitualis à fortiori requiritur in Sacramentis Pœnitentiæ & Matrimonii, in quibus cum actus suscipientium habeant rationem materiæ & partis essentialis, necesse est, ut censeantur præsentis saltem moraliter, quando illa duo Sacramenta celebrantur.

Nec dicas intentionem habitualement non sufficere ad ministranda Sacramenta: Ergo nec ad recipienda; disparitas enim est, quod ad recipiendam formam, fatis est, ut subjectum sit dispositum nec repugnet, cum passivè se habeat: ut autem forma introducatur, requiritur actio agentis, quæ in ministro Sacramentorum debet esse humana, ac proinde à voluntate libera procedere.

R. 2. Intentio generalis & interpretativa sufficit ad recipienda cætera Sacramenta, excepto forte Sacramento Ordinis; quia intentio interpretativa ea dicitur, qua aliquis dum expresse vult rem unam, censetur velle ea omnia, quæ ad illam pertinent, tanquam appendices, etiamsi de illis nunquam cogitaverit. Explicatur exemplo illius qui capeffit dignitatem, ignorans quoddam ejus singulare privilegium; is enim censetur voluisse tale privilegium, & ita interpretamur. Atqui eò ipso quod quis voluit baptizari, hoc est, pro-

profiteri Religionem Christianam, Ecclesia semper est interpretata illum voluisse frui omnibus gratiis & bonis, quorum habet dispensationem; soletque administrare Sacramenta Confirmationis & Extremæ Unctionis Fidelibus repentino morbo corporis, etiamsi illa antea non expetierint, fatisque est piæ Matri quod Baptismi vota evidenter per peccatum mortale non retractaverint.

Dixi, *excepto forte Sacramento Ordinis*, quia controvertitur in Scholis, num Sacramentum illud infantibus valide conferri possit, quod expendimus Tomo 5. Tract. de Sacramentis in genere cap. 17. quæstiunc. 3.

C A P U T IV.

De numero Sacramentorum novæ Legis.

Q. I. *Quot sunt Sacramenta novæ Legis?*

Mira est Novatorum varietas circa numerum Sacramentorum. Lutherus lib. de captiv. Babil. scribit se non damnare septem Sacramenta, unum tamen esse proprie dictum, sed admittenda esse duo, scilicet Baptismum & Eucharistiam, & in alio loco ejusdem libri addit Pœnitentiam. Melancton ejus Collega in celebri Confessione Augustana tria confitetur Sacramenta, & in posterioribus scriptis nunc quatuor, nunc quinque agnoscit, propendetque in sententiam Zvvinglii, qui Matrimonium inter Sacramenta numerat lib. de vera & falsa Religione.

Calvinus lib. 4. Instit. cap. 18. Baptismum & Eucharistiam solum retinet. Dallæus ejus sectator hac nostra ætate scripsit quæstionem de numero
mero


mero Sacramentorum nullius aut parvi admodum esse momenti. Contra hujusmodi varietates,

R. De fide est septem esse Sacramenta novæ Legis; ita enim Concilium Tridentinum post Eugenium IV. definiit sess. 7. can. 1. his verbis: *Si quis dixerit Sacramenta novæ Legis non fuisse omnia à Jesu Christo Domino nostro instituta, aut esse plura, vel pauciora, quam septem Anathema sit.*

Definitio Concilii constat tum ex Scriptura ut patebit, cum agemus de singulis Sacramentis: tum ex universalis Ecclesiæ Traditione; Ecclesia enim Orientalis & Latina hætenus retinuerunt septem Sacramenta.

Q. 2. *Quare nec plura, nec pauciora sunt novæ Legis Sacramenta?*

R. Quia Christus Dominus ita voluit, in iis enim quæ sunt arbitraria, ratio facti nulla esse potest alia, quam voluntas facientis. Hanc tamen convenientiam S. Thomas repetit ex naturali rerum humanarum ordine; quemadmodum enim in ordine naturali homo primo nascitur: secundo crescit: tertio alimentis reficitur: quarto si ægrotet, remedia adhibet; quinto armatur adversus hostes: sexto regitur à superiore: septimo species humana per generationem conservatur; sic in ordine supernaturali Baptismus est ad regenerationem, Confirmatio ad accretionem, Eucharistia ad nutritionem, Pœnitentia ad medicinam, Extrema unctio ad armaturam, Ordo ad regimen, & Matrimonium ad multiplicationem Fidelium.



Tractatus DE BAPTISMO.

CAPUT PRIMUM.

De notione Baptismi.

Q. 1. *Unde nomen Baptismi?*

R. A nomine Græco βαπτισμός, quod Latine significat immersionem.

Q. 2. *Quotuplex est Baptismus apud Scriptores Ecclesiasticos?*

R. Triplex. Primus dicitur Baptismus sanguinis, quod est Martyrium: secundus Baptismus flaminis, quod est votum, seu desiderium recipiendi Sacramentum Baptismi: tertius est Baptismus aquæ, primum novæ Legis Sacramentum, de quo hic tractamus.

Q. 3. *Quomodo definitur Baptismus?*

R. De-

R. Definitur à sancto Thoma post Magistrum sententiarum, ablutio exterior facta sub præscripta forma verborum: à Theologis vulgo, Sacramentum novæ Legis ad spiritualem hominis regenerationem, à Christo institutum.

Q. 4. *Quandonam Christus instituit Sacramentum Baptismi?*

R. Oppositæ sunt Patrum ac Theologorum sententiæ; probabilior videtur sententia sancti Augustini Tract. 5. in Joan. Magistri sententiarum in 4. Distinct. 3. & Sancti Thomæ 3. par quæst. 66. art. 2. Baptismum fuisse institutum ante Passionem, & quidem priusquam Christus prædicationis officium inchoaret, nam Joan. 3. v. 22. Christus baptizabat, saltem per Discipulos, ut habetur Joan. 4. v. 2. Atqui Baptismus ille non erat Joannis, sed is ipse, de quo Christus Nicodemus locutus est eodem cap. 3. v. 5. *Nisi quis renatus fuerit ex aqua & Spiritu Sancto, &c.* tum quia Discipuli Christi non baptizabant nomine Joannis, alias nulla fuisset invidiæ & discordiæ causa in Discipulis Joannis, cit. cap. 3. v. 26. si Apostoli in nomine Joannis baptizassent; tum quia Joan. 15. Petrus dicitur lotus & à peccato mundatus: Atqui Baptismus Joannis à peccato non munda- bat: tum denique quia Apostoli ordinati sunt Sacerdotes ante Passionem Christi, scilicet in ultima cœna: Ergo erant baptizati baptismo Christi.

Q. 5. *Quanam est materia Baptismi?*

R. Remota est aqua naturalis & proprie dicta, Joan. 3. *Nisi quis renatus fuerit ex aqua, &c.* proxima est ablutio, quæ tribus modis fieri potest. 1. per immersionem, ut hætenus apud Græcos, apud Latinos vero usque ad decimum tertium

saeculum; 2. Per infusionem juxta receptum morem Latinorum, à quo non recedunt Pseudo-reformati, *necquam movere debet*, inquit sanctus Cyprianus Epist. 69. ad Magnum, *quod aspergi vel perfundi videntur aegri*. Ex quibus patet expressis Ecclesiae saeculis in casu necessitatis Baptismum per infusionem fuisse collatum. 3. Per asperisionem, qua usum fuisse sanctum Petrum plures Theologi contendunt, quando in una die tria millia hominum baptizavit, Act. 2.

Q. 6. *Quæ & qualis requiritur aquæ infusio aut aspersio?*

R. 1. Non sufficit aquam attingere vestes aut capillos baptizandi; sed necesse est ut corpus ejus perfundatur; alias non ipse, sed ejus vestes aut capilli abluerentur.

R. 2. Debet esse quædam successio & fluxus aquæ; non enim dicitur ablutus, super quem una aut altera pluviae gutta decedit.

R. 3. Curandum est ut perfundatur una ex præcipuis corporis partibus, maxime vero caput in quo omnes sensus videntur: & hæc ablutio affinis est immersioni; quia videtur homo obrui aquis, dum in quadam copia super caput ejus defluunt. Unde in Rituali Rhemensi anni 1505. hæc leguntur, *debet fieri trina mersio super caput pueri*. Inde sequitur dubium esse Baptismum, in quo abluuntur manus vel pes infantis; atque ideo libri Rituales docent communiter esse repetendum sub conditione.

Q. 7. *Quænam est forma Baptismi?*

R. Legitima est hæc forma; apud Latinos quidem, *Ego te baptizo in nomine Patris, & Filii, &c.* apud Græcos vero, *Baptizatur N. in nomine Pa-*

Patris, &c. vel baptizetur N. in nomine Patris, &c. ut refertur in Decreto Eugenii IV. colligiturque ex Scriptura Matth. 28. Docete omnes gentes, baptizantes eos in nomine Patris, &c.

Q. 8. *Singulæ voces suntne ita necessariae, ut vel una omiſſa nullum eſſet Sacramentum?*

R. 1. Si pronomen ego omitteretur, ſtaret veritas Sacramenti, quæ ſufficienter exprimitur in verbo baptizo.

R. 2. Graves Theologi XII. ſeculo docuerunt Baptiſmum valere, prætermiſſis his vocibus, baptizo te, ſed Alexander III. eodem labente ſeculo contrarium decrevit C. ſi quis. tit. de Bapt. & ejus effect. & Alexander VIII. anno 1690. damnavit hanc propoſitionem. *Valuit aliquando Baptiſmus ſub hac forma collatus, in nomine Patris, &c.*

R. 3. Dubium non eſt quin hæ voces, in nomine Patris, & Filii, &c. ſint de neceſſitate Sacramenti, cum Chriſtus illas designaverit, Matth. 28. & Eccleſia ſemper uſurpaverit tanquam neceſſarias. *Quis nesciat, inquit S. Auguſtinus lib. 6. de Baptiſmo, cap. 25. non eſſe Baptiſmum Chriſti, ſi Evangelica verba, quibus ſymbolum conſtat . . . defuerint? Sed facilius inveniuntur Hæretici, qui omnino non baptizent, quam qui non illis verbis baptizent.*

Dices 1. Apoſtoli baptizabant in nomine Jeſu, Act. 8. & 19. Ergo.

R. 1. Revera Sanct. Thomas, & ex illo author Catechiſmi Romani exiſtimarunt Apoſtolos ex diſpenſatione baptizaffe invocato ſolo nomine Jeſu: Sed S. Cyprianus Epiſt. ad Jubajanum opoſitum cenſuit, ſic enim ſcribit, *Jeſu Chriſti mentionem facit Petrus (Act. 2.) non quaſi Pater omittetur,*

teretur, sed ut Patri Filius quoque adjungeretur. Unde in forma

R. 2. Distinguendo antecedens : Baptizabant Baptismo Domini Jesu, Concedo : baptizabant invocato solo nomine Jesu, Nego antecedens; namque Act. 19. Apostolus miratus quod Ephesii dicerent se nescire, an sit Spiritus sanctus, interrogat; *in quo ergo baptizati estis?* Ex qua interrogatione evidenter deducitur baptismum tunc temporis fuisse collatum invocato Spiritu Sancto.

Dices 2. Expressa invocatio sanctissimæ Trinitatis non est necessaria in aliis Sacramentis : Ergo.

Nego consequentiam; in iis enim, quæ arbitraria sunt, argumentari non licet à pari; Christus unum voluit, non vero alterum. Ratio tamen convenientiæ solet afferri, nempe quod Baptismus sit sollemnis professio Religionis Christianæ, cujus primarium objectum est Mysterium sanctissimæ Trinitatis.

CAPUT II.

De Ministro & subiecto Baptismi.

Q. I. *Quis est Minister Sacramenti Baptismi?*

R. I. Ordinarius est Episcopus vel Presbyter; Baptismus enim est ingressus in Ecclesiam : Atqui admittere pulsantes, ad eos solos pertinet qui, in Ecclesia præsunt.

R. 2. In casu necessitatis omnis homo viator sive vir, sive mulier, fidelis aut infidelis, baptizatus vel non baptizatus, potest baptizare, ita Eugenius IV. in Decreto pro Armenis, in quo
sic

sic ait , *Minister hujus Sacramenti est Sacerdos , cui competit ex officio baptizare. In casu autem necessitatis, non solum Sacerdos , vel Diaconus , sed etiam Laicus vel mulier , ino etiam Paganus & Hæreticus baptizare potest , dummodo formam servet Ecclesiæ , & facere intendat quod facit Ecclesia.*

Dices : Atqui Hæreticus v. g. Calvinianus non intendit facere quod facit Ecclesia Romana, quæ sola vera est Ecclesia , cum eam detestetur uti adulteram : Ergo valide non baptizat.

Distinguo subsumptum ; non intendit facere quod facit hæc Ecclesia determinate sumpta , Concedo : quod facit Ecclesia universim spectata , hoc est , Ecclesia Christiana & à Christo instituta , Nego subsumptum ; Hæreticus enim credit aliquam esse Ecclesiam à Christo institutam , vultque facere quod illa observat. Paganus vero , vel etiam Atheus , qui nec Christum nec ejus Ecclesiam credit , saltem vult facere quod faciunt Christiani , quamvis illud superstitiosum & prorsus inane existimet. Et hæc intentio absolute sufficit.

R. 3. Minister Baptismi solemnis extraordinarius est Diaconus ; Hanc enim potestatem in sua ordinatione accepit : *Diaconum* , inquit Pontifex , *oportet ministrare ad Altare , baptizare & prædicare.* Et S. Hieronymus Dialogo contra Luciferianos , *non abnuo ; inquit , hanc esse Ecclesiarum consuetudinem ut ad eos qui in longe minoribus Urbibus per Presbyteros & Diaconos baptizati , Episcopus manum impositurus excurrat.*

Q. 2. *Quinam sunt capaces Baptismi ?*

R. Omnis homo in statu viæ , sive vir sit ille , sive mulier , infans , vel adultus : Christus

enim neminem excipit, *docete omnes gentes, baptizantes eos.* Matth. 28.

At, inquit hæretici; prius docendi sunt quam baptizentur: Atqui parvuli non possunt edoceri: Ergo nec baptizari. Ita Anabaptistæ, Petrobrussiani, Henriciani, & Valdenses XII. seculo; quem errorem Concilium Tridentinum Sess. 7. can. 13. anathemate percussit. Quare

R. 2. De Fide est parvulos esse Baptismi capaces, idque probat S. Augustinus lib. 1. de pecc. mer. cap. 26. ex constanti Ecclesiæ Traditione, quam ipsi Pelagiani non negabant: *Parvulos, inquit, baptizandos esse concedunt, qui contra auctoritatem universæ Ecclesiæ procul dubio per Dominum & Apostolos traditam venire non possunt.*

Q. 3. *Filii Infidelium possuntne baptizari invititis parentibus?*

R. 1. Contra Durandum, possunt valide; quia ut observat S. Augustinus Epist. 98. alias 23. num. 2. *Non scriptum est, nisi qui renatus fuerit ex parentum voluntate, sed, nisi qui renatus fuerit ex aqua & Spiritu Sancto:* Ergo ad veritatem Baptismi non requiritur voluntas parentum.

R. 2. Filii Mancipiorum licite baptizari possunt invititis parentibus; quia tam ipsi, quam parentes sunt sub dominio eorum, quibus serviunt, possuntque absque injuria parentibus subtrahi. Idem dicendum de captivis jure belli.

R. 3. Filii Hæreticorum possunt licite baptizari invititis parentibus; quia parentes utpote jam baptizati, Ecclesiæ subditi sunt, ac proinde cogi possunt ad servandas ejus leges.

R. 4. Filii Infidelium, qui ne quidem civiliter Christianis principibus subditi sunt, illicite
bap-

baptizarentur, reluctantante utroque parente, nisi jamjam essent morituri; quia vel illi infantes subtraherentur patriæ potestati, vel non primum fieri non potest sine injuria parentum quibus jus à natura concessum est educandi & instituendi filios nondum rationis compotes, *quandiu usum rationis non habet puer*, inquit S. Thomas 2. 2. qu. 10. art. 12. *non differt ab animali irrationali. Unde sicut bos vel equus est alicujus, ut utatur eo cum voluerit secundum Jus Civile, sicut proprio instrumento; ita de Jure Naturali est, quod filius, antequam habeat usum rationis, sit sub cura parentum. Unde contra justitiam naturalem esset, si à cura parentum subtrahatur, vel de eo aliquid ordinetur invitis parentibus. Secundum vero exponeret Sacramentum evidenti periculo profanationis, cum liberi curæ parentum infidelium dimissi, eorum superstitionem infallibiter sequantur. Et hæc ratio æque concludit pro filiis infidelium, qui civiliter Principibus Christianis subditi sunt; potestas enim civilis spectat solummodo temporalem Reipublicæ administrationem, nec extenditur ad ea quæ sunt superioris ordinis, nova atque inaudita est illa prædicatio, quæ verberibus exigit fidem*, inquit sanctus Gregorius lib. 2. Epist. 52.

Dixi 1. *reluctante utroque parente*; si enim vel sola mater sit Christiana, cum & ipsa habeat jus instituendæ prolis, infans invito patre infideli, licite baptizabitur. Ita sanxit Concilium Toletanum 11. cap. 62.

Dixi 2. *nisi illi infantes jamjam essent morituri*; quia tunc nec eriperentur paternæ potestati, nec Baptismus profanationi exponeretur.

CAPUT III.

De effectibus Baptismi.

Q. *Quinam sunt effectus Baptismi?*

R. 1. Mundat ab omni macula peccati, tum originalis, tum actualis juxta illud Rom. 8. *Nihil ergo nunc damnationis est iis, qui sunt in Christo Jesu.*

2. Delet omnem reatum pœnæ, ita ut ex Concilio Tridentino Sess. 5. de peccato originali, *nihil prorsus eos (baptizatos) ab ingressu cœli remoretur.* Præiverat Eugenius IV. & sanctus Hieronymus Epist. 183. *omnia, inquit, in Baptismate condonata sunt crimina, nec post indulgentiam, Judicis est metuenda severitas.*

3. Confert gratiam sanctificantem 1. Cor. 6. *sed abluti estis, sed sanctificati estis.* Cum autem operari sequatur esse simul cum gratia sanctificante, quæ baptizatum constituit in esse divino, infunduntur virtutes & Spiritus Sancti dona, quibus baptizatus fit expeditior ad omnia pietatis officia.

4. Baptismus filios Dei parit, *non amplius mater carnalis, inquit sanctus Chrysostomus hom. 25. in cap. 3. Joan. non concubitus & amplexus; novum jam naturæ nostræ intexitur opificium à Spiritu Sancto & aqua; quod enim matrix est embrioni, hoc aqua fideli.*

Fiunt autem filii Dei in Baptismo, non per deputationem externam & moralem, ut in adoptione humana, sed per communicationem ejusdem Spiritus cum Deo, juxta illud Gal. 4. *Quoniam autem estis filii, misit Deus Spiritum filii sui in corda vestra.* Hinc baptizati constituuntur hæredes Dei;

Dei; *si filii*, inquit Apostolus Rom. 8. & *heredes*. Atque ad fovendam hanc baptizati fiduciam in baptismo Christi, qui nostri fuit prænuncius; cœli aperti sunt, *Ut discas etiam tu, cum baptizaris hoc fieri, Deo te jam ad patriam Cœlestem vocante, nihilque commune cum terra suadente*, ait sanctus Chrysostomus hom. 12. in Matth. Quin fideles per baptismum jus habent ad alia Sacramenta & dona Ecclesiæ concessa tanquam ad bona paterna. Hanc Dei magnificentiam & ineffabilem doni amplitudinem miratus sanctus Joannes scribit Epist. 1. cap. 3. *Videte qualem charitatem dedit nobis pater, ut filii Dei nominemur & simus*. Parum videbatur dicere, quod *filii Dei nominemur*, nisi addidisset quod *revera simus*, scilicet ex participatione ejusdem cum eo Spiritus, quemadmodum filii carnales revera sunt filii per communicationem ejusdem sanguinis eorum, à quibus progeniti sunt.

5. Baptismus Christo nos conjungit, compingitque tanquam membra capiti, *Quicumque enim in Christo baptizati estis, Christum induistis*, Gal. 3. hoc est, secundum interpretationem sancti Chrysostomi in hunc locum, *eamdem formam, eandem figuram habetis omnes, in illum per similitudinem transformati*, adeo ut ipse Christus cernatur in vultu, gestu, & toto habitu baptizatorum, qui idcirco dicuntur ab Apostolo 1. Cor. cap. 6. *Templa & organa Spiritus Sancti*. *An nescitis*, inquit, *quoniam membra vestra templum sunt Spiritus Sancti, qui in vobis est, quem habetis à Deo & non estis vestri?* Nempe ut pro libito utamini mente vestra, oculis, lingua, &c. utpote quæ sint membra Christi & organa Spiritus Sancti.

6. Character est alter Baptismi effectus, quo

baptizatus non solum distinguitur à ceteris , sed etiam ornatur , tanquam Christi ferens insignia.

Superfluum videtur quidquam addere iis , quæ de dispositionibus ad justificationem tradidimus Tract. de grat. cum vix à pluribus seculis aliquando contingat adultos baptizari , nullaque dispositio ex dictis requiratur in parvulis. Nihilominus Tom. 5. cap. 12. de Baptismo , exponendum duximus , quomodo catechumeni ad Baptismum præpararentur , ut inde colligeret lector quæ sinceræ conversionis signa , quæ morum probatio , quæve pœnitentia & sanctioris vitæ propositum Baptismum adultorum præcedere debeant. Operæ pretium est ista consulere.

CAPUT IV.

De obligationibus baptizatorum.

Q. I. *Contrahiturne aliqua obligatio per Baptismum?*

R. Contrahitur , & quidem maxima ex duplici capite repetenda. 1. Ex magnitudine donorum , quæ in Baptismo collata sunt ; ait enim Dominus Luc. 12. *Omni autem cui multum datum est , multum quæretur ab eo , & cui commendaverunt multum , plus petent ab eo.* 2. Ex sponsonibus in Baptismo factis , quas S. Thomas 2. 2. quæst. 87. art. 2. ad 1. vocat votum , & S. Augustinus Epist. 149. alias 59. votum maximum. Hinc Concilium VI. Parisiense IX. seculo libr. 1. cap. 9. sic habet ; *Valde periculosum est , & à Religione Christiana alienum , quod post tanti doni perceptionem unusquisque fidelis , cum ad intelligibilem ætatem venit , mysterium baptismatis discere , & intelligere negligit , atque eo*
intel-

intelleſto, ſecundum illud vivere non ſatagit. Quod periculum ad negligentiam pertinere ſacerdotum, qui illud SOLERTER debent annuntiare, & ad auditorum incuriam, qui hoc & intelligere & adimplere parvipendunt, nulli dubium eſt.

Q. 2. *Quotuplex eſt votum Baptiſmi?*

R. Triplex; 1. vovemus nos Chriſto perpetuo adhæſuros, & ejus Evangelium ſecuturos, tanquam morum noſtrorum, & vitæ agendæ normam & regulam. 2. Proſitemur obedientiam Eccleſiæ & ejus Paſtoribus. 3. Abrenunciamus iis omnibus, quæ Chriſtianorum inſtituto ſunt diſſentanea.

Q. 3. *Quare vovent initiandi ſe Chriſto; & ejus Evangelio fore mancipatos?*

R. Quia Baptiſmus eſt ſolemnis profeſſio Religionis Chriſtianæ: ſicut ergo Apoſtolus Gal. 5. conſteſtatur omni homini circumcidenti ſe, quoniam debitor eſt univerſæ legis faciendæ, cum circumciſio ſit publica Judaïſmi profeſſio; ita per Baptiſmum Chriſto nos mancipamus, & ejus legem, Evangelicam ſcilicet, amplectimur.

Q. 4. *Quare in Baptiſmo proſitemur obedientiam Eccleſiæ & ejus Paſtoribus?*

R. Quia per Baptiſmum adgeneramur membra corporis, ſcilicet Eccleſiæ, cujus Chriſtus caput eſt; nec poſſumus inter ejus membra numerari: ſi ab illa nos regi non patimur. *Habere jam non poſteſt Deum patrem, qui Eccleſiam non habet matrem,* inquit S. Cyprianus lib. de unitate Eccleſiæ: *illius ſœtu naſcimur, illius lacte nutrimur, ſpiritu ejus animamur.*

Q. 5. *Quibus renunciare coguntur initiandi?*

R. Tri-

R. Tribus, nimirum satanæ omnibus operibus ejus, & omnibus pompis ejus.

Q. 6. *Mos ille fuitne semper & ubique observatus?*

R. Universalem esse testantur libri Rituales tam Græcorum quam Latinorum: antiquorum vero omnium veterum scripta, ut S. Clementis Alexandrini, qui floruit secundo seculo, lib. 1. pædag. cap. 6. Origenis olim Discipuli S. Clementis in Epist. ad Rom. Tertulliani, qui tertio seculo sic scribit. lib. de corona militis cap. 3. *Aquam adituri contestamur nos renunciare diabolo, & pompæ, & angelis ejus.*

Q. 7. *Quis est primæ abrenuntiationis sensus, abrenuntio satanæ?*

R. Una est sanctorum Patrum sententia, initiandum hac voce profiteri se renunciare mundo & secularibus actibus, *renunciasti diabolo, mundo, & luxuriis ejus*, inquit S. Ambrosius lib. de initiandis cap. 2. *Tenetur vox tua, non in tumultu mortuorum, sed in libro viventium.* Et S. Chrysostomus hom. 21. ad populum ait, *Vocis illius recorderis, quam dum sacris initiareris, emisisti*, abrenuntio tibi, satana, *nam satanæ adhaeres, si seculi moribus te conformes.*

Q. 8. *Quid intelligitur per illas voces, abrenuntio omnibus operibus ejus?*

Respondet S. Ephrem, *paucis his verbis cuncta, quæ nominantur mala; quæque odit Deus, valere jubemus.* Peccata quippe sunt opera diaboli, juxta illud 1. Joan. 3. v. 8. *Qui facit peccatum, ex diabolo est In hoc apparuit filius Deus, ut dissolvat opera diaboli.*

Q. 9. *Quid tertia abrenuntiatione profitetur initian-
dus, abrenuntio pompis?*


R. Pro-

R. Profitetur se abdicare mundanas superfluitates, seu rerum terrenarum immoderatos usus. Ita communiter SS. Patres, Cyprianus, Cyrillus Hierosol. Chrysostomus, Augustinus, Concilia, & ex iis Theologi. *Pompæ diaboli*, inquit Concilium Parisiense VI. *sunt spectacula, venationes, vestimentorum cultus, jactantia, fastus, ambitio, & superfluitas cujuslibet rei in humanis usibus, unde crescit elatio, quæ multoties honestati adscribitur.*

Q. 10. *Baptizatus magisne peccat eodem genere peccati, quam non baptizatus?*

R. Affirmat sanctus Thomas in 4. distinct. 38. quæst. 1. art. 11. constatque ex Scriptura Hebr. 10. v. 28. *irritam quis faciens legem Moysi, sine ulla miseratione duobus vel tribus testibus moritur. Quanto magis putatis deteriora mereri supplicia, qui filium Dei conculcaverit, & sanguinem testamenti pollutum duxerit, in quo sanctificatus est, & spiritui gratiæ contumeliam fecerit?* Hunc textum habes fusè expositum à SS. Patribus & Conciliis Tomo 5. cap. 13.

de Baptismo q. 11.





Tractatus DE SACRAMENTO CONFIRMATIONIS.

CAPUT PRIMUM.

De nomine, essentia, & existentia Sacramenti
Confirmationis.

Q. I. *Quæ sunt nomina Sacramenti Confirmationis?*

R. Vocatur 1. manus impositio, ut apud sanctum Augustinum lib. 3. de Baptismo cap. 16. *Per manus impositionem datur Spiritus Sanctus.*

2. Sacramentum Chrismatis ex eodem Sancto Doctore lib. 2. contra litteras Petiliani cap. 40. *Sacramentum Chrismatis Sacrosanctum est, sicut ipse Baptismus.*

3. Sacrum unguentum, ut apud Græcos communiter.

4. Signaculum, vel Dominicum, ut apud S. Cyprianum Epist. 73. vel spirituale, ut apud S. Ambro-

Ambrosium lib. de initiandis cap. 7. vel vitæ æternæ , ut apud sanctum Leonem Serm. 4. de Nativitate.

5. Chrisma, vel Supercæleste can. 48. Concilii Laodicensi, vel salutis cit. serm. 4. S. Leonis.

6. Perfectio , ut apud S. Ambrosium lib. 3. de Sacramentis cap. 11 *Post fontem superest, ut perfectio fiat; quia per illud Sacramentum perfecte efficiuntur Christiani*, inquit Guillelmus Antisiodorensis lib. 4. tract. 4. cap. 1. de Confirmatione.

7. Apud Latinos Confirmatio simpliciter dicitur, qui enim per Baptismum Christiani electi sunt, inquit Venerabilis Beda in Psalm. 26. *mollitiem quandam habent: à chrismatis Sacramento adversus omnes carnis mundi, & diaboli, impetus robustiores sunt & eorum animus in fide confirmatur.* Atqui vel ex his nominibus refelluntur Pseudoreformati, contententes Apostolos manus imposuisse non ad gratiam sanctificantem conferendam, sed ad donum miraculorum impertiendum, & Ecclesiam retinuisse manus impositionem, tamquam cæremoniam dumtaxat pertinentem ad solemnitatem Baptismi. Namque Patres laudati distinguunt Confirmationem à Baptismo, voluntque esse signum, quo datur Spiritus Sanctus, non quidem ad miracula patranda, cum eorum ætate, Ecclesia jam confirmata, gratia miraculorum non conferretur, ut observat S. Augustinus tract. 6. in Epist. S. Joannis. *Numquid modo, inquit, quibus imponitur manus, ut accipiant Spiritum Sanctum, hoc expectatur ut linguis loquantur? Si ergo per hæc miracula non fiat modo testimonium præsentiae Spiritus Sancti Unde cognoscit quisque accepisse se Spiritum Sanctum? interroget cor suum, &c.* Ergo manus impositio est signum

signum visibile & efficax gratiæ sanctificantis , ac proinde verum Sacramentum.

Q. 2. *Quomodo definitur Confirmatio?*

R. Definitur, Sacramentum novæ Legis, quo baptizatis confertur Spiritus Sancti robur , tum ad firmiter credendum , tum ad fidem ipsam intrepide confitendam.

Q. 3. *Unde probatur Confirmationem esse Sacramentum novæ Legis a Christo institutum?*

R. Ex Scriptura & traditione; ex Scriptura quidem, Actuum enim 8. sic legitur. *Cum autem audissent Apostoli, qui erant Hierosolymis, quod recepisset Samaria verbum Dei, miserunt ad eos Petrum & Joannem, qui cum venissent, oraverunt pro ipsis, ut acciperent Spiritum Sanctum tunc imponebant manus super illos, & accipiebant Spiritum Sanctum* : in quem locum sic scribit Sanct. Cyprianus Epist. 73. *Quod nunc quoque apud nos geritur, ut qui in Ecclesia baptizantur, per præpositos Ecclesiæ offerantur, & per nostram Orationem, ac manus impositionem Spiritum Sanctum consequantur.* Insignis est iste textus, sicut & aliorum Patrum supra laudatorum ad asserendam universalem Ecclesiæ Traditionem, quæ etiam nunc viget apud Græcos. Unde merito Concilium Tridentinum sess. 7. can. 1. de Confirm. Novatores negantes existentiam Confirmationis anathemate percussit.

Q. 4. *Quandonam Christus instituit Sacramentum Confirmationis?*

R. Post Resurrectionem, ut communiter docent Theologi.

Q. 5. *Quænam est materia Sacramenti Confirmationis?*

R. Manus impositio Act. 8. *Tunc imponebant (Apostoli) manus super illos, & accipiebant Spiritum San-*

Sanctum. Et hunc ritum Ecclesia haftenus retinuit, ut patet ex laudatis SS. Patrum textibus & ex omnibus libris ritualibus.

Dices: Ecclesia Orientalis à pluribus seculis absque ulla manus impositione Sacramentum Confirmationis administrat, non refragante Ecclesia Latina: Ergo manus impositio non est materia essentialis.

Nego antecedens: tum quia Græci præmittunt orationem manibus extensis ad confirmandos, per quam invocant Spiritum Sanctum: tum quia si in illa oratione nulla sit hodie manuum extensio, sicut nullam præscribunt recentiora eorum Eucologia, Chrismatio non fit sine manus impositione. Frequenter enim apud veteres ungere & manus imponere idem sunt: *Illa unctio*, inquit Beda in Psalm. 26. *quæ per manus impositionem fit, vulgò Confirmatio dicitur.* Amalarius lib. I. de Officiis Ecclesiasticis cap. 21. sic habet, *ut ab Episcopis solis inungantur per manus impositionem, ab Apostolis assumptum est.* Ita Yvo Carnotensis sermone de veteri & novo Testamento, Hugo à S. Victore, Innocentius III. C. *Quanto*, tit. de consuetudine.

Instas: Eugenius IV. in Decreto pro Armenis docet loco manus impositionis, per quam Apostoli dabant Spiritum Sanctum, in Ecclesia dari Confirmationem: Ergo.

Nego consequentiam; sensus enim illorum verborum hic est, idem Sacramentum, quod in Scriptura vocatur manus impositio, nunc vocari Confirmationem.

Q. 6. *Quæ manus impositio est essentialis materia hujus Sacramenti? an illa quæ fit in ipsa Chrismatio.* D. Habert Theolog. Tom. VIII. N n ne,

ne, an altera quæ præcessit, cum Episcopus invocat Spiritum Sanctum manibus extensis super confirmandos?

R. Discordant Theologi. Benè multi contendunt solam manuum extensionem esse materiam essentialem, & Chrismationem improprie dici manus impositionem. Contra verò alii volunt nullam aliam requiri manus impositionem præter eam, quæ fit in ipsa Chrismatione: alioquin nullum esset Sacramentum Confirmationis apud Græcos. Quidquid sit, stante illa controversia, caute observandum est, ne cuiquam administretur illud Sacramentum sine utraque manus impositione.

Q. 7. *Manus impositio estne materia adequata Confirmationis?*

R. Affirmant Sirmundus, Sambovius, & alii, qui volunt Unctionem seu Chrismationem esse dumtaxat cæremoniam accidentalem, ut in Baptismo. Negat verò S. Thomas 3. parte q. 72. art. 2. ubi docet Chrismationem esse ex institutione Christi, & partialem materiam Confirmationis, quam sententiam communiter amplectuntur Theologi; & quidem meritò, quia, ut argumentatur S. Augustinus lib. 4. de Baptismo cap. 24. *Quod universa tenet Ecclesia, nec Conciliis institutum, sed semper retentum est, nonnisi auctoritate Apostolica traditum rectissime creditur*: Atqui universalis Ecclesia à tempore Apostolorum hætenus adhibuit Chrismationem, non ut cæremoniam accidentalem, sed ut signum, quo datur Spiritus Sanctus: *Ungi necesse est*, inquit S. Cyprianus Epist. 70. *eum qui baptizatus sit, ut accepto Chrismate, id est, Unctione, esse unctus Dei, & habere in se . . . gratiam possit*. S. Cyrillus Jerosolymitanus Catech. 3. ait,
Frons

Frons & alii sensus corporis tui sympolicè inunguntur, anima verò sancto vivificoque Spiritu sanctificatur. Similiter loquuntur alii Patres, quorum testimonia attulimus Tom. 5. cap. 3. parag. 2. de Confirm. Ergo unctio, seu Chrismatio est institutionis divinæ, & de integritate Sacramenti.

Dices: Apostoli per solam manus impositionem confirmasse referuntur Act. 8. & 19. Ergo.

Respondet S. Thomas cit. quæst. 72. artic. 2. ad primum, Apostolos aliquando absque usu Sacramenti dedisse plenitudinem Spiritus Sancti, *utebantur tamen Apostoli communiter Chrismate in exhibitione Sacramenti, quando hujusmodi visibilia signa non exhibebantur.* Nec obstat quòd Scriptura nusquam meminerit unctionis; nam ex sancto Augustino lib. de fide & operibus cap. 9. Scriptura multa tacet brevitate gratia, quæ serie Traditionis constat ab Apostolis fuisse usurpata.

Q. 8. *Mixtio Olei & Balsami, ac utriusque Episcopalis benedictio suntne de necessitate Sacramenti?*

R. Cùm Ecclesia nihil definierit circa propositam quæstionem, Theologi in varias abeunt sententias. Qui asserunt unctionem esse ab Ecclesia institutam, uno ore concludunt nec mixtionem, nec benedictionem pertinere ad substantiam Sacramenti.

Ex iis verò qui docent unctionem esse institutionis divinæ, alii, ut S. Thomas quæst. 72. art. 2. & 3. contendunt mixtionem & benedictionem esse de necessitate Sacramenti, quia universalis Ecclesia Latina & Græca eas semper observavit. Alii contra sentiunt, nempe mixtionem illam & benedictionem esse ab Ecclesia institutas & semper ubique frequentatas, sicut mixtionem aquæ

cum vino in Calice, & benedictionem Fontis Baptismalis, quæ in omnium sententia sunt cæremoniæ accidentales; sic enim habet S. Basilius lib. de Spiritu Sancto cap. 27. *benedicimus Baptismatis aquam & unctionis oleum.* Deinde Ecclesiæ variant circa mixtionem olei; Latina enim miscet Balsamum, Græca verò triginta quinque species aromatum. Satis ergo non est, inquit, ad astringendum ritum tamquam divinitus institutum & pertinentem ad integritatem Sacramenti, quod semper & ubique fuerit observatus, sed insuper necesse est, ut ex Traditione constet ejusmodi ritum habere vim producendi gratiam ex opere operato: Atqui illud non constat de mixtione & benedictione, de quibus agitur, sicut de ipsa Chrismatione. Quid autem observandum sit in hac opinionum varietate, præscribit Innocentius III. cap. *Pastoralis*, tit. de non iterandis Sacramentis, ubi interrogatus de eo, qui per errorem oleo simplici in fronte fuerat consignatus, sic respondet, *in talibus nihil est iterandum, sed cautè supplendum, quod incautè fuerat prætermisum.*

Q. 9. *Quæ est forma Sacramenti Confirmationis?*

R. Sunt verba quæ proferuntur in applicatione materiæ. Unde, si duplex sit materia hujus Sacramenti; nempe manuum extensio & Chrismatio, erit quoque duplex forma partialis, nempe oratio, per quam Episcopus manibus extensis invocatur Spiritum Sanctum, & verba quæ profertur in ipsa Chrismatione.

CAPUT II.

De ministro & subiecto Confirmationis.

Q. 1. *Quis est minister Confirmationis?*

R. De

R. De fide est solum Episcopum esse Ministrum ordinarium hujus Sacramenti, ita enim definiit Concilium Tridentinum sess. 7. can. 3. Præverat Eugenius IV. in suo Decreto. Id autem constat tum ex Scriptura, tum ex Traditione Aët. 8. mittuntur Petrus & Joannes, ut manus imponant iis quos Philippus baptizaverat, *quod nunc quoque apud nos geritur*, inquit S. Cyprianus Epist. 73. *ut qui in Ecclesia baptizantur per præpositos Ecclesiæ offerantur, & per nostram Orationem, ac manus impositionem Spiritum Sanctum consequantur.* Et S. Chrysostomus, Hom. 18. in Aët. *Igitur hoc erat in Apostolis singulare, unde & præcipuos, & non alios videmus hoc facere.* Plura ex traditione retulimus Tomo 5. cap. 4. de Confirmatione, ubi solvimus quamplurima, quæ contra objiciunt Hæretici.

Q. 2. *Presbyter potestne esse Minister extraordinarius Confirmationis?*

R. Affirmat S. Thomas cit. quæst. 72. art. 11. ad 1. & ratio est, quia S. Gregorius lib. 3. Ep. 26. concedit Ministerium Confirmationis Presbyteris Calaritanis, juxta morem in illa Ecclesia receptum, & cum mos ille à 12. seculis vigeat apud Ecclesias Orientales, Ecclesia Romana nihilominus Græcos in suam communionem admisit in Concilio Florentino: non admisisset autem, si praxis illa esset contraria institutioni divinæ.

Q. 3. *Quodnam est subjectum Confirmationis?*

R. Omnes & soli baptizati. Soli quidem, quia character Baptismalis ex dictis est moralis quædam potentia recipiendi alia Sacramenta. Unde C. Si quis, tit. de Presbytero non baptizato, præcipitur ut Presbyter ille accepto Baptismo iterum ordinetur. Omnes etiam baptizati sunt ca-

paces hujus Sacramenti: si enim aliqui excluderentur, maxime parvuli; Atqui universalis Ecclesia illos non exclusit. Latina quippe per plura secula parvulis una cum Baptismo Confirmationem & Eucharistiam ministravit, atque etiam nunc Græca ministrat; Ergo. Cur autem jam apud nos Sacramentum Confirmationis non conferatur nisi adultis, *vide* Tomo 5. cap. 4. de Confirm. Censet tamen S. Thomas cit. quæst. 72. art. 8. hodiernum morem non obstare quo minus hoc Sacramentum ministretur parvulis jamjam morituris, & Concilium Mediolanense V. concedit, ut aliquando ex causa conferatur iis, qui nondum septennium expleverunt.

Q. 4. *Sacramentum Confirmationis estne ad salutem necessarium?*

R. 1. Non est necessarium necessitate medii: *alioquin*, inquit S. Hieronymus Dial. contra Lucif. *si ad Episcopi tantum imprecationem Spiritus Sanctus defluit; lugendi sunt, qui in longe minoribus urbibus ante dormierunt, quàm ab Episcopo visitarentur.* Et ratio est, quia per Baptismum prorsus deletur reatus culpæ & pœnæ, & initiatus regeneratur in Filium Dei, cui debetur hæreditas paterna.

R. 2. Est necessarium necessitate præcepti divini Luc. 24. *Sedete in civitate quoadusque induamini virtute ex alto*, quod non solum Apostoli, sed omnes fideles, viri & mulieres sibi dictum intellexerunt, *ungi quoque necesse est eum qui baptizatus sit*, inquit S. Cyprianus Ep. 70. & Concilium Laodicensem Can. 48. *Oportet eos, qui illuminantur post Baptismum inungi supercælesti Chrismate.* Canones pœnitentiales ad quintum Decalogi præceptum subjiciunt pœnitentiæ trium annorum parentes, quo.

quorum negligentia filius sine Sacramento Confirmationis decesserit. Unde Concilium IV. Mediolanense statuit, quod, *si quis neglexerit* (Confirmationem) *canonicis subjaceat disciplinis*. Et Angelus à Clavasio, verbo Confirmatio: *Contemnens* (id est, negligens) *ipsum suscipere peccat mortaliter; propterea credo quod notabilis negligentia Episcoporum in non conferendo illud, sit eis peccatum mortale*.

CAPUT III.

De effectibus Sacramenti Confirmationis.

Q. I. *Quotuplex est Confirmationis effectus?*

R, Duplex: Primus est character indelebilis, quo confirmatus distinguitur à baptizatis tamquam ætate provectus à parvulis in Christo, inquit S. Thomas cit. quæst. 72. art. 5. ad primum, & consecratur in militem Christi, *insignitur signo Crucis*, ait idem Angelicus Doctor art. 9. *sicut miles signo Ducis . . . & ideo in fronte . . . ut neque propter timorem, neque propter erubescenciam nomen Christi confiteri prætermittat*.

Secundus Confirmationis effectus est plenitudo Spiritus Sancti ad robur, *signatur baptizatus in fronte per Pontificem*, inquit Rabanus lib. Instit. Cleric. cap. 31. *ut Spiritus Sancti septiformis gratia cum omni plenitudine sanctitatis & scientiæ, & virtutis venire in hominem declaretur*. Et S. Thomas eadem q. 72. art. 11. ad secundum: *Sacramentum Baptismi est efficacius . . . quantum ad remotionem mali . . . hoc autem Sacramentum est efficacius ad proficiendum in bono; quia est quoddam spirituale augmentum de esse imperfecto ad esse perfectum; quod S. Do-*

Et or illustrat art. 2. apta comparatione, quemadmodum, inquit, natura primo in infante tota est, ut perficiatur in seipso, & quatenus est singulare speciei humanæ individuum, cum autem infantiae metas excessit, tum eum perficit quatenus membrum societatis, roburque ipsi confert, ut tamquam organum Reipublicæ inserviat ad bonum commune promovendum. Sic gratia in Baptismo vires tribuit resistendi propriis concupiscentiis, & suæ saluti consulendi; in Confirmatione vero roborat ad pugnam adversus hostes visibiles, mundum scilicet & seculi amatores; in mundo enim deridetur justī simplicitas, stultitia videtur spernere honores & dignitates, ignavia irrogatas injurias non ulcisci. Dura sane sunt hæc quotidiana certamina, sed nemo ex confirmatis dicat, quia infirmus sum; donum enim, quod in hoc Sacramento excepit, majus omnibus est, *Cruce signatur in fronte*, inquit sanctus Augustinus, *quia est sedes pudoris, ut compressa viriliter omni erubescencia, gloriatur pro Christo contumeliam pati.* Apostoli in figura linguæ igneæ repleti sunt Spiritu Sancto, ut fidei Doctores: alii vero fideles in olei Symbolo, quod fortitudinem designat, tamquam operatores eorum, inquit sanctus Thomas cit. art. 2. ad primum, quæ pertinent ad ædificationem fidelium.

Q. 2. *In quo consistit illa plenitudo, quæ per Confirmationem confertur ad robur spiritale?*

R. In duobus consistit. 1. In uberiore gratia sanctificante. 2. In auxiliis supernaturalibus in uberiore illa gratia fundatis, & tempore opportuno concedendis, nempe cum instabit pugna seu tentatio. Sunt autem illa auxilia sanctæ cogita-

gitationes & piæ motiones, quibus accenditur animus ad contemnenda erronea hominum iudicia, derisiones & impotentes iras. Ex dictis colliget lector, quæ sint confirmatorum obligationes.

CAPUT IV.

De dispositionibus ad Sacramentum Confirmationis requisitis.

Q. I. *Quæ dispositiones requiruntur ad dignam Sacramenti Confirmationis perceptionem?*

R. I. Requiritur status gratiæ sanctificantis; quia ex S. Thoma cit. quæst. 7. artic. 7. sicut hoc Sacramentum præsupponit Baptismum, ita & ejus effectum, ut liquet vel ex ejus nomine; Confirmatio enim dicitur, quia est ad confirmandum perficiendumque quod in Baptismo peractum est.

Sed cum ex præsentī Ecclesiæ disciplina confirmatio ad ætatem adultam differatur, manifeste sequitur Ecclesiam præter statum gratiæ sanctificantis alia exigere ab adultis consignandis. Quæ vero sunt illa?

R. 2. Tria imprimis in adultis consignandis requiruntur.

Primum est notitia satis explicata tum Mysteriorum fidei, tum Evangelicæ Regulæ, secundum quam Christianorum mores efformandi sunt, ac præsertim quæ pertinent ad Baptismum & Confirmationem. Cum enim fidelis per hoc Sacramentum perficiatur, ut implere possit quæ in Baptismo professus est, quomodo censebitur paratus ad illa præstanda, si ea ignoret?

Secundum est accurata vitæ post Baptismum exactæ discussio, ut si ad ea, quibus in Baptismo renuntiaverat, rediisseprehendatur, eluat lacrymis & pœnitentiæ exercitationibus; alias non serio, sed fîcte hic testaretur se confirmare quæ in Baptismo professus est si ipsum non pœnitet ea hætenus non servasse ut oportet; quid enim est Confirmatio, nisi solemnis professio servandi ea quæ in Baptismo peracta sunt?

Tertium est perseverantia per aliquot dies in oratione & meditatione præsertim hujus Mysteriorum. Hoc diligentia & pietatis exercitium ipsemet Dominus præscripsit Apostolis donum Spiritus Sancti recepturis Luc. 24. v. 49. fatis ei non fuit quod justii essent, quod per 40. dies à Resurrectione eos docuisset de regno Dei; sed ab Ascensione usque ad Pentecosten in cœnaculo inclusos detinuit orationi vacantes, ut dicitur Act. 1. *Hi omnes erant perseverantes unanimiter in oratione cum mulieribus, & Maria Matre JESU*: Hæc est forma, secundum quam fideles ad Sacramentum Confirmationis disponi oportet.

Ex his patet Catecheses Confirmationis non esse differendas ad tempus, quo Episcopus Parœciam lustraturus est; quia rudiores mentes multitudine eorum, quæ angusto temporis intervallo discenda sunt, obruuntur.

Quod autem objiciunt Pastores nonnulli, Parochianos oblivisci quæ diu ante Episcopi adventum didicere, contra eos retorqueri debet, nempe post Episcopi discessum eadem facilitate oblituros, siquæ futurum, ut nullam tanti Sacramenti notitiam conservent, magnusque sit obex eorum ignorantia gratiis actualibus seu auxiliis, qui-

quibus Sacramenta suscepta solent operari. Porro hujusmodi malis non occurret Pastor, nisi per frequentes de Baptismo & Confirmatione Catecheses seu Conciones.

Hæc Pastoralis sollicitudo non solum necessaria est Neophytis, sed etiam jam confirmatis, 1. ne obliviscantur quæ semel didicerunt: 2. ut ad vocem Pastoris recolentes quanta Deus beneficia per illa duo Sacramenta contulerit, in gratiarum actione permaneant. 3. Ut commoveantur & incitentur ad servandum pactum cum Deo initum, & ad vitanda ea, quibus solemni-ter abrenunciarunt.





Tractatus DE EUCCHARISTIA.

Præmittuntur, & elucidantur nonnullæ
quæstiones.

Q. 1. *Quotuplici modo spectanda est Eucharistia?*

R. Duplici, scilicet quatenus est Sacramentum, & quatenus est Sacrificium; Concilium enim Tridentinum definiit Eucharistiam esse unum è Sacramentis novæ Legis, sess. 7. can. 1. & esse verum & proprie dictum Sacrificium, sess. 22. Can. 1.

Q. 2. *Unde habemus Eucharistiam esse Sacramentum proprie dictum?*

R. Ex Scriptura. Namque ad Sacramentum proprie dictum tria ex dictis requiruntur: 1. Ut sit signum sensibile divinitus institutum. 2. Ut promissio gratiæ sit ejusmodi signo annexa. 3. Ut

Ut existat mandatum divinum ejusdem signi observandi. Atqui ex Scriptura hæc tria conveniunt Eucharistiæ. 1. Est signum sensibile divinitus institutum in pane & vino, Matth. 26. *Accipit JESU panem, &c.* 2. Promittitur gratia observantibus hoc signum, Joan. 6. *Qui manducat hunc panem, vivet in æternum.* 3. Extat mandatum divinum utendi hoc signo, Luc. 22. *Hoc facite in meam commemorationem.*

Q. 3. *Quomodo probatur Eucharistiam esse sacrificium proprie dictum?*

R. Probatur, quia ad sacrificium tria etiam requiruntur. 1. Minister legitimus. 2. Oblatio rei sensibilis. 3. Aliqua rei oblatae seu victimæ destructio ad recognoscendum supremum Dei dominium in omnes creaturas. Unde Sacrificium proprie dictum definitur, oblatio rei sensibilis facta à legitimo Ministro ad recognoscendum supremum ejus dominium in omnes creaturas. Atqui tria hæc Eucharistiæ perfecte conveniunt. Namque 1. Christus principalis offerens, est Sacerdos secundum Ordinem Melchisedech, Psalm. 109. *Qui cæna novissima, qua nocte tradebatur, inquit Concil. Trid. sess. 22. cap. 1. ut dilectæ sponsæ suæ Ecclesiæ visibile, sicut hominum natura exigit, relinqueret Sacrificium, quo cruentum illud semel in Cruce peragendum repræsentaretur Sacerdotem secundum Ordinem Melchisedech se in æternum constitutum declarans, Corpus & Sanguinem suum sub speciebus panis & vini Deo Patri obtulit, ac sub earundem rerum Symbolis, Apostolis, quos tunc novi testamenti Sacerdotes constituebat, ut sumerent, tradidit; & eisdem, eorumque in sacerdotio successoribus, ut offerrent, præcepit per hæc verba, Hoc facite in meam commemorationem.*

2. In Eucharistia fit oblatio rei sensibilis, nempe Corporis & Sanguinis Christi sub speciebus panis & vini, ut constat ex Traditione: *Quis magis Sacerdos Dei summi*, inquit S. Cyprianus Epist. 63. *quam Dominus noster JESUS CHRISTUS, qui Sacrificium Deo Patri obtulit? & obtulit hoc idem quod Melchisedech obtulerat, id est panem & vinum, suum scilicet Corpus & Sanguinem.* Idem tradit S. Augustinus lib. 1. contra adversarium Legis cap. 2. *Noverunt*, inquit, *qui legerunt, quid protulerit Melchisedech. Vident nunc tale sacrificium offerri Deo toto orbe terrarum.* Et ante S. Augustinum Eusebius Cæsariensis, qui sedit in Concilio Nicæno anno 325. lib. 5. demonstr. Evang. cap. 3. sic habet: *Quemadmodum ille (Melchisedech) qui Sacerdos gentium erat, nusquam videtur Sacrificiis Corporalibus functus, sed vino solum & pane, dum ipsi Abraham tene-dixit, ita primus Salvator, deinde qui ab eo profecti sunt Sacerdotes, in omnibus gentibus spirituale Sacerdotii munus obeunt, vino ac pane Corporis illius, ac salutaris Sanguinis Mysteria repræsentant.* Eadem docet S. Hieronymus Epist. 26. additque hanc fuisse sententiam Martyris Hyppoliti, S. Irenæi, qui erant temporibus Apostolorum vicini. Mitto posteriores Patres, qui constanter asserunt Christum in Eucharistia offerri per ministerium Sacerdotum sub speciebus panis & vini, quibus moraliter & in signo sit sensibilis.

3. In Eucharistia reperitur immolatio, seu victimæ destructio, quæ vel fit mystice, ut dicetur ubi de Sacrificio, vel jam in Cruce realiter facta supponitur. Ad rationem enim veri Sacrificii necesse non est, ut oblatio & mactatio fiant eodem temporis instanti, sed satis est ut moraliter sint

sint conjunctæ. Patet ex Sacrificiis Aaronicis, in quibus oblatio aliquando immolationem tempore præcedebat, ut videre est in Sacrificio hirci qui prius offerebatur vivens, tum mittebatur in desertum ibi periturus Levit. 16. aliquando vero sequebatur; victimæ enim sanguis extra sanctuarium fundebatur; quem colligens Pontifex deferbat in Sancta Sanctorum, illum ibidem oblaturus. Similiter Christus summus Sacerdos novi Testamenti secundum Ordinem Melchisedech, in novissima cœna seipsum prius Deo Patri obtulit sub speciebus panis & vini, quam in Cruce immolaretur, ut observavimus ex Concilio Tridentino. Cum autem maneat Sacerdos in æternum, Hebr. 7. post Passionem suam immolatum jam seipsum in æternum offert, tum in cœlo, quo ingressus est in proprio sanguine, quemadmodum Pontifex Hebræorum in figura; in sanctuarium ingrediebatur in sanguine alieno, Hebr. 9. tum in terris per ministerium Sacerdotum; & ita sacrificium Crucis & sacrificium altaris est unum & idem sacrificium, *Sola offerendi ratione diversa*, inquit Concilium Trident. sess. 22. c. 2. in Cruce enim Christus seipsum obtulit in propria specie & modo cruento, in altari vero quotidie se offert incruente, & in specie aliena; scilicet panis & vini: *Passio Domini, sacrificium quod offerimus*, inquit S. Cyprian. Epist. 63. similia habet S. Chrysostomus, Hom. 27. in Epist. ad Hebr.


Ergo illud discrimen est Sacramentum inter & Sacrificium, quod Sacramentum dicat ordinem ad nos, Sacrificium vero ad Deum, Sacramentum sit signum efficax ordinatum ad sanctificandos homines, Sacrificium vero sit oblatio Deo facta.

Dices:

Dices : Repugnat unum & idem esse Sacramentum & Sacrificium : quæ enim sunt diversæ naturæ & habent diversas definitiones , non possunt esse unum & idem , ut homo & arbor : Atqui Sacramentum & Sacrificium sunt diversæ naturæ , habentque diversas definitiones : Ergo.

Nego primam propositionem , cujus confirmationis majorem distinguo , quæ sunt diversæ naturæ totalis , & habent diversas definitiones totales , non possunt esse unum & idem , ut homo & arbor , Concedo : quæ sunt diversæ naturæ partialis , & habent diversas definitiones partiales , non possunt esse unum & idem , Nego majorem ; nam animal & rationale , quæ sunt naturæ partiales habentque diversas definitiones , sunt unum & idem in homine . Porro in Eucharistia Sacrificium & Sacramentum sunt duæ veluti partes metaphysicæ , ex quibus exurgit unum Mysterium.

Cum autem plura occurrant dicenda de Eucharistia separatim spectata vel ut Sacramentum , vel ut Sacrificium , ne Lectores permisceant quæ sunt separanda , operæ pretium est huncce Tractatum in duas partes dividere . In prima parte dicemus de Sacramento , in altera de Sacrificio.





PRIMA PARS DE EUCHARISTIA quatenùs est Sacramentum.

CAPUT PRIMUM.

De ejus notione.

Q. 1. *Quotuplici modo spectari potest Eucharistia quatenùs est Sacramentum?*

R. Duplici, nempè in fieri & in facto esse.

Q. 2. *Quid est Sacramentum Eucharistiæ in fieri?*

R. Est consecratio seu conversio panis & vini in Corpus & Sanguinem Christi Domini, remanentibus speciebus ad spiritualem fidelium refectiorem.

Q. 3. *Quid est Sacramentum Eucharistiæ in facto esse?*

D. Habert Theolog. Tom. VIII.

○○

R. Est

R. Est Corpus & Sanguis Christi Domini sub speciebus panis & vini ad spiritualementem fidelium refectionem, & hoc posteriori modo communiter accipitur Sacramentum Eucharistiæ. Quare

Definitur, Sacramentum novæ Legis, continens realiter Corpus, & Sanguinem Christi Domini sub speciebus panis, & vini ad spiritualementem fidelium refectionem.

Q. 4. *Estne admittenda duplex illa acceptio Sacramenti Eucharistiæ?*

Negant Pseudo-Reformati, contenduntque Eucharistiam non esse Sacramentum nisi in fieri, seu in usu, & in actuali manducatione, in qua per fidem Corpus Christi secundum Lutheranos realiter suscipitur; secundum Calvinianos verò virtus duntaxat Corporis Christi, ita ut, quemadmodum aqua baptismalis ante & post ablutionem actualem non est Sacramentum, sed nuda & profana aqua: sic ante & post peractam cœnam, panis nihil sanctitatis habeat, propter quam adorari possit. Hinc Calviniani, qui negant præsentiam realem, cum Lutheranis qui eam cum Catholicis admittunt, idè societatem inire se posse existimant, nullo autem modo cum Catholicis; quia Lutherani non credunt Christum post consecrationem permanentem existere sub speciebus panis & vini, quemadmodum Catholici, qui in hac fide Christum in Eucharistia adorant, proptereaque iidem Calviniani Catholicorum cœtus uti idololatrias abhorrent. Hunc autem errorem Concilium Tridentinum sess. 13. Can. 4. Anathemate percussit. Quare

R. De fide est Eucharistiam esse Sacramentum non solum in fieri, sed etiam in facto esse, hoc est, Christum peracta consecratione esse realiter præsentem

sentem ante & post actualement communionem ; namque Matth. 26. in ultima cœna dixit Corpus suum & Sanguinem esse, quod præ manibus habebat, & nondum sumpserant Apostoli. Unde Sanctus Augustinus Concione 1. in Psalm. 33. sic scribit : *Manibus suis nemo portatur . . . in Christo autem invenimus* (illud :) *ferebatur enim in manibus suis, quando commendans ipsum corpus suum, ait : Hoc est Corpus meum, ferebat enim manibus suis illud corpus.* Quæ verba manifestè denotant Eucharistiam non esse meram figuram aut aliquam virtutem Corporis Christi, cum quivis naturaliter possit ferre figuram aut virtutem, aut etiam aliquam partem Corporis sui, puta digitum abscissum. Et in Psal. 98. testatur omnium Catholicorum fuisse morem adorandi Christum in Eucharistia, & grande flagitium existimat eum in Sacramento non adorari : *Nemo, inquit, carnem illam manducat, nisi prius adoraverit.* Deinde primis seculis Eucharistia ad absentes deferrebatur ex sancto Justino, Irenæo, Innocentio I. & Fideles tempore persecutionis eam domum deferrebant ex Tertulliano, S. Cypr. & aliis ; Quod Calvinus ipse non diffitetur lib. 4. Instit. cap. 17. §. 29. Ergo Eucharistia est Sacramentum permanens.

CAPUT II.

De Eucharistia spectata ut est Sacramentum in fieri.

Q. 1. *Quenam est materia Eucharistiæ ?*

R. Panis triticeus, & vinum de vite ; quia in iis Christus in ultima cœna consecravit,

præcepitque ut Apostoli & eorum in Sacerdotio successores idem observarent, *Hoc facite*, inquit, *in meam commemorationem*.

Vino admiscetur modicissima aqua, ut significetur unio fidelium cum Christo in hoc Myfterio, in quo cum ipso offerunt & offeruntur ex S. Cypriano Epist. 63. Hanc autem mixtionem non esse ex necessitate Sacramenti, aut præcepti divini, sed ex Ecclesiæ præcepto docet Concilium Tridentinum, sess. 22. cap. 7.

Non refert, panis sitne fermentatus, aut Azymus; uterque enim est verus panis, unde Græci validè consecrant in fermentato, & Latini in azymo. Sed quisque Sacerdos debet sequi morem suæ Ecclesiæ ex Concilio Florentino. Azymus tamen panis est convenientior materiæ Eucharistiæ; quia Christus consecravat in Azymo, scilicet die prima Azymorum, quando Judæi Pascha immolabant, Marc. 14. v. 12. quo tempore eis non licebat uti pane fermentato, nec etiam in domibus suis servare.

Dices: Christus ante diem festum Paschæ ultimam cœnam instituit, Joan. 13. v. 1. Ergo non consecravat prima die Azymorum.

Distinguo antec. ante diem Paschæ naturalem, Conc. legalem, Nego antec. Dies naturalis numeratur à media nocte ad aliam mediam noctem: legalis verò incipit vespere diei præcedentis & definit vespere subsequæ, à *vespera usque ad vesperam celebrabitis Sabbata vestra*. Lev. 23. vers. 32.

Naturalis ergo dies prima Azymorum erat decima quinta Lunæ, & initium ducebat à media nocte, ut habetur Levit 23. v. 6. *Quinta decima die mensis bujus solemnitatis Azymorum Domini est*. Eadem verò

verò dies legalis incipiebat die decima quarta ad vesperam, qua Christus Dominus novum Pascha, vetere expleto, instituit, *primo mense quarta decima mensis ad vesperam comedetis Azyma usque ad diem vicesimam primam ejusdem mensis ad vesperam.* Exod. 12. vers. 18.

Instas: Judæi non introierunt in Prætorium, ut non contaminarentur, sed ut manducarent Pascha, Joan. 18. v. 28. Atqui Christus pridie comederat Pascha: Ergo ante diem Azymorum etiam legalem novissimam cœnam instituit.

Distinguo majorem, ut comederent Pascha, id est, victimas, quæ per septem dies Azymorum offerebantur, Concedo: ut comederent agnum Paschalem, qui prima die legali Azymorum mactabatur, Nego majorem; nam ex S. Chrysostomo, Hom. 84. in Matth. *Ipsa nocte in qua comederunt Pascha, tanta insania tantoque furore agitabantur, nempe ut manus in Christum injicerent.* Igitur victimæ, quæ per singulos dies Azymorum immolabantur, dici solebant Pascha, ut patet cap. 16. Deut. in quo sic legitur: *immolabis Phase Domino Deo tuo de ovibus & de bobus tuis.* Et 2. Paralip. 35. *Dederunt Sacerdotibus ad faciendum Phase pecora commixtim duo millia sexcenta, & boves trecentos.*

Q. 2. *Eucharistia sub duabus speciebus consecrata estne duplex Sacramentum?*

R. Minime; quia ambæ illæ species sunt unum signum totale unius & ejusdem refectionis spiritualis, ad quam ex institutione Christi ordinantur: Ergo sunt unum Sacramentum.

Q. 3. *Quænam est forma Eucharistiæ in fieri?*

R. Sunt verba Christi Domini, *Hoc est Corpus meum. Hic est Sanguis meus novi Testamenti, qui pro multis*

multis effundetur in remissionem peccatorum. Matth. 26. vel, *Hic est Calix novum Testamentum in sanguine meo,* qui pro vobis fundetur, Luc. 22. Ita Eugenius IV. in suo Decreto: *Forma*, inquit, *hujus Sacramenti sunt verba Salvatoris, quibus hoc conficit Sacramentum.* Non ait, *confecit*; sed, *conficit* etiam hodie; quia ipse est Sacerdos & hostia. Idem tradiderunt SS. Patres, ut S. Iræneus, lib. 5. cap. 2. ubi sic scribit: *Panis & vinum percipientia verbum Dei, sunt Eucharistia, &c.* & S. Ambrosius l. de initiandis, cap. 9. *Sacramentum istud, quod accipis, Christi sermone conficitur.*

Q. 4. *Singulæ voces suntne de essentia formæ?*

R. Certum est has esse necessarias necessitate Sacramenti. *Hoc est Corpus meum. Hic est Sanguis meus,* vel, *Hic est Calix Sanguinis mei*; quia vel una detracta, corrumpitur sensus propositionum, ut mox patebit. Particula autem *enim*, quæ in nostra Liturgia additur formæ panis, non est necessaria, nisi necessitate præcepti.

Difficultas est solum circa formam Calicis, utrum præter laudata verba, cætera, quæ vel in Scriptura leguntur; *Novi Testamenti qui pro multis effundetur in remissionem peccatorum*, vel ex traditione habentur, scilicet *æterni, Mystrium fidei*, sint de essentia formæ. Affirmant Thomistæ, & ex iis Catechismus Romanus; quia sicut in Baptismo, licet satis exprimantur effectus Sacramenti per hæc verba, *Ego te baptizo*, addendum tamen est ad veritatem Sacramenti, *In nomine Patris, &c.* quia baptismus est solemnis professio Religionis Christianæ, cujus primarium objectum est Mystrium sanctissimæ Trinitatis: ita Eucharistia, cum sit expressa commemoratio Passionis Christi Domini, laudata verba, quæ illam exprimunt, necessaria.

cessariò proferenda sunt. Communis tamen sententia est ejusmodi voces necessariò non pertinere ad essentiam formæ.

Q. 5. *Quid, si illæ voces mutarentur in alias, si v. g. pro corpore diceretur caro: loco pronominis hoc pronuntiaretur istud, illud, vel adverbialiter hic, seu ibi est corpus meum, & loco meum diceretur Christi?*

R. Integra esset forma, si loco pronominis *hoc* diceretur *istud*; quia *hoc* & *istud* idem & eodem modo significant, demonstrantque rem sensibilibiter præsentem. Sed irrita esset forma, si diceretur 1. *Caro*; quia *caro* minus significat, quàm corpus; corpus quippè est aliquod totum integrale ex carne, ossibus, nervis, &c. 2. Si diceretur *illud*; quia hoc pronomen æquè significat rem absentem ac præsentem. 3. Si diceretur *ibi*, vel *hic*; quia adverbia illa non significant conversionem panis in Corpus Christi, aut vini in Sanguinem; remanente enim substantia panis & vini, ut contendunt Lutherani, vera esset propositio, *ibi est Corpus meum*, falsa verò esset in eadem hypothese hæc propositio; *Hoc est Corpus meum*, panis quippè non est Corpus Christi. 4. Si loco *meum* diceretur Christi; quia in ista propositione, *Hoc est Corpus Christi*, non exhibetur Christus sacrificium offerens, sed ejus Minister.

Q. 6. *Quid significat pronomen hoc?*

R. Significat Corpus Christi, non quidem determinatè & distinctè, aliàs propositio esset nugatoria; sed indeterminatè & confusè tantum, adeò ut sensus sit, hoc contentum substantiale est Corpus meum; quemadmodum in hac propositione, hoc quod movetur est lepus; pronomen enim hoc nihil aliud significat, quàm leporem, sed

confusè & indeterminate: determinatur autem per ultimum verbum propositionis.

Dices: Si pronomen *hoc* significaret confusè Corpus Christi, falsa esset propositio, dum enim pronuntiatur, nondum Corpus Christi existit præsens, sed sola panis substantia: Ergo pronomen *hoc* nec distinctè, nec confusè demonstrat Corpus Christi.

Disting. antec. Propositio esset falsa, si speculative enuntiaretur, C. si practice, ut revera enuntiatur, N. antec. Propositio speculativa enuntiat objectum quod esse supponit, ut videre est in ista propositione, *Hoc quod movetur, est lepus*, in qua supponitur aliquod animal moveri, & affirmatur illud animal esse leporem. Propositio verò practica non supponit objectum, sed facit, ideòque suspensus est ejus sensus usque ad ultimæ syllabæ pronuntiationem, in qua solummodo potest esse vera aut falsa, v. g. vera est isthæc propositio practica, *Ego fileo*, non quidem dum loquor, sed cum desino loqui. Similiter quamvis sit adhuc sensibiliter præsens panis initio hujus propositionis, *Hoc est Corpus meum*, pronomen tamen *hoc* non demonstrat panem; quia propositio est practica, & qui eam profert; intendit significare & significando efficere, ut hoc sit corpus Christi, quod verum est; sed non ante absolutam propositionem.

Q. 7. Quo sensu accipi debet verbum substantivum est in hac propositione, *Hoc est Corpus meum*?

Zuinglius & Calviniani communiter contendunt accipiendum in sensu Metaphorico pro verbo *significat*, adeo ut sensus propositionis sit, hoc est signum sive figura corporis mei. Quod si ab
eis

eis quæras, quo nitantur testimonio Scripturæ, cui unice adhærendum docent: respondent hancce interpretationem colligi ex Exod. c. 12. ubi de Agno Paschali dicitur, *Phase est, id est transitus Domini*; Agnus enim Paschalis non est transitus Domini, sed illum significat. Item Joan. 15. *Ego sum vitis vera*, non in proprietate, sed in signo & figura. Et Matth. 11. de Joanne Baptista ait Christus, *Ipse est Elias*, non in sensu proprio, sed metaphorico: Ergo similiter, inquit, ista propositio, *Hoc est Corpus meum*, metaphoricè enunciat, significatque solum panem esse signum & figuram Corporis Christi. Sed ut recta sit ista conclusio, statuere oportet verbum substantivum, *est*, in Scripturis semper accipi metaphoricè pro *significat*; nam ex propositionibus singularibus nihil concludi potest: Atqui falsissimum est verbum substantivum in Scripturis semper accipi pro verbo *significat*. Quis enim asserat metaphoricè dici, Deus est omnipotens, Christus est filius Dei, est filius David, est filius hominis, passus est, mortuus est? Ergo Novatores hac sua argumentandi ratione, dubium, si quod esset circa propositionem, de qua agitur, non solvunt, sed augent & confirmant.

At Catholici perspicuè demonstrant verbum substantivum *est* in hac propositione, *Hoc est Corpus meum*, non sumi in sensu metaphorico pro *significat*; namque metaphora non potest esse continua non solum apud eundem Scriptorem sacrum, sed apud omnes, quamvis scripserint diversis temporibus, & variis occasionibus: quæ sæpius exigunt, ut mutetur modus loquendi. Quis possit cogitare vel audeat dicere quatuor Evangelistas, & Apo-

stolum Paulum nunquam Eucharistiam proprio nomine appellasse, scilicet figuram Corporis Christi in sententia adversariorum : licet de ea sermonem sæpius habuerint ; sed constanter usos verbis metaphoricis ? Non ausus est ipse Lutherus, quamvis in Epistola ad Argentinenses testatus sit se id ardentem exoptasse ; *verum, inquit, me captum vidi, nulla elabendi via relicta, Textus Evangelii nimis apertus est.* Quare ad propositam quæstionem

R. De fide est verbum substantivum sumi hic in sensu proprio & naturali ; ita definiit Concilium Trid. sess. 13. can. 1. & constanter intellexerunt SS. Patres, *De veritate Carnis & Sanguinis non est relicta ambigendi locus*, inquit S. Hilarius lib. 8. de Trin. post medium, additque per Sacramentum Eucharistiæ Christum nobis carnaliter, corporaliter & inseparabiliter uniri. Idem habet S. Cyrillus Hieros. Catech. 4. his verbis, *Cum ipse de pane pronuntiaverit, hoc est Corpus meum, quis audebit deinceps ambigere? Cum omni certitudine ea tanquam Corpus & Sanguinem sumamus, etiamsi gustus panem esse sentiat . . . Tametsi sensui gustus vinum esse videatur.* S. Gregorius Nyssenus Orat. Catec. cap. 37. ait Corpus Christi in nostrum ingredi, & panem per verbum Christi in Corpus ejus converti, quemadmodum panis, quem Christus in cibum sumebat, transmutabatur in substantiam ejus, efficiebaturque Corpus Verbi. S. Chrysost. Hom. 46. in Joan. *non modo secundum charitatem, inquit, sed etiam ipsa re unum corpus cum Christo efficimur . . . id quippe fit per cibum, quem largitus est.* Et infra, *id quod est in Calice, est id quod fluxit ex latere, & illius sumus participes.* S. Cyrillus Alexandrinus lib. 10. in Joan. sic scribit, *considerandum est non habitudine tantum, quæ per chari-*
tatem

tatem intelligitur, Christum in nobis esse, sed & per participationem naturæ; suprà dixerat secundum carnem, S. August. assererat suprà, neminem posse se portare in manibus eo modo, quo Christus in novissima Cœna se portavit: nec quenquam accipere panem Eucharisticum, quin illum prius adoraverit, & quidem ea adoratione, quæ soli Deo debetur: atqui nemo est, qui propriis manibus, corporis sui figuram aut virtutem ferre non possit: nulla figura nullaque virtus creata sine grandi flagitio adorari potest cultu supremo; Ergo.

Dices: Credere Christum carnem propriam dedisse manducandam est error Capharnaitarum, quem ipse correxit Joan. 6. v. 64. his verbis, *Spiritus est qui vivificat, caro non prodest quidquam. Verba quæ ego locutus sum vobis; spiritus & vita sunt: quod expendens Sanctus Augustinus in Psal. 98. sic habet, non hoc corpus, quod videtis, manducaturi estis; & bibituri illum Sanguinem quem fufuri sunt qui me crucifigent, Sacramentum aliquod vobis commendavi: Ergo.*

Nego ant. In eo quippe errarunt Capharnaitæ, quòd existimarent carnem Christi dentibus esse comminuendam, & in substantiam corporis nostri convertendam, quam carnalem cogitationem Dominus amputat laudatis verbis, *caro, (scilicet mortua) non prodest quidquam: verba quæ locutus sum vobis, spiritus & vita sunt, id est, intelligenda de manducatione Sacramentali & spiritali, sed ne videamur nostra proferre, audiamus S. Augustinum Tract. 27. in Joan. ubi sic habet, Caro non prodest quidquam, quomodo illi (Capharnaitæ) intellexerunt carnem; quippe sic intellexerunt, quomodo in cadavere dilaniatur, aut in macello venditur, non quomodo spiritu*
vege-

vegetatur. Proinde sic dictum est, Caro non prodest quidquam, quomodo dictum est, scientia inflat . . . Et quid est, scientia inflat? sola sine charitate . . . adde ergo scientiæ charitatem, & utilis erit scientia non per se, sed per charitatem. Sic etiam nunc caro non prodest quidquam, sed sola caro: accedat spiritus ad carnem, & prodest plurimum. Nam si caro nihil prodesset, verbum caro non fieret. Quid clarius? quid expressius?

At, inquires, ex Sancto Augustino Apostoli non hoc corpus, quod videbant, manducaturi erant, nec bibituri illum sanguinem, quem fufuri erant Judæi.

Distinguo, non hoc corpus in eadem forma & specie visibili; Concedo: non hoc corpus in eadem substantia & natura, quamvis in forma spiritali & per se invisibili, sub signis tamen visibilibus; Nego. Hoc sensu dixit Apostolus 1. Cor. 16. Corpus, quod sepelitur, idem & non idem resurrecturum, idem in substantia, non idem in accidentibus, *feminatur corpus animale, surget corpus spirituale.*

Q. 8. *Necessumne est ad veritatem formæ, ut tota substantia panis & vini convertatur in corpus & sanguinem Christi?*

R. Affirmant Patres Tridentini sess. 13. c. 4. idque semper persuasum fuisse in Ecclesia Dei, quod demonstravimus tom. 5. cap. 14. tract. de Eucharistia. Quin ipse Calvinus in refutatione consensus Orthodoxorum scribit, quod retento proprio & naturali sensu verborum Christi, quemadmodum Lutherani retinent, tolerabilior sit doctrina Papistarum, ut loquitur, malletque eam amplecti, quàm Lutheranorum opinionem. Et ratio

ratio est; quia pronomen *hoc* vel *hic* adjectivè, est demonstrativum substantiæ sensibiliter præsentis: Atqui in hypothese quòd panis & vinum remaneant, ut contendunt Lutherani, substantia sensibiliter præsens est substantia panis & vini: Ergo ea sola demonstratur. Porro falsum est panem esse corpus Christi, & vinum esse ejus Sanguinem. Ergo necessum est ad veritatem verborum Christi, *hoc est Corpus meum, hic est Sanguis meus*, ut tota substantia panis & vini convertatur in Corpus & Sanguinem Christi, quod fide divina credendum definiit Concilium Tridentinum sess. 13. can. 2. in quo inseruit *mirabilem illam & singularem conversionem aptissimè transubstantiationem* ab Ecclesia appellatam. Præiverat Concilium Lateranense quartum, anno 1215. cap. firmiter.

Dices 1 vera est ista propositio de dolio vini; *hoc est vinum*, etiamsi substantia dolii remaneat sensibiliter præsens: Ergo & ista, *hoc est Corpus meum*, modò corpus Christi in substantia panis delitecat, sicut vinum in dolio.

Nego consequentiam & paritatem. Ratio disparitatis est quòd dolium se habeat per modum vasis vinum continentis: ex communi autem hominum usu non attenditur continens, sed contentum; unde si quis ferens lagenam vino plenam quærenti à se, quid præ manibus habeat? responderet lagenam, ejus responsio non esset seria nec ad mentem interrogantis. At panis aut vinum non est vas institutum ad continendum aliud, ideoque falsa esset ista enunciatio de pane, in quo nummus occultaretur, *hoc est nummus*.

Instas; sancti Patres, ut Ambrosius, Gregorius Nyssenus, Joannes Damascenus, docent panem

nem in corpus Christi converti, quomodo aqua in nuptiis Canæ conversa est in vinum & alimenta transmutantur in carnem comedentis: Atqui in ejusmodi conversionibus materia remanet, solaque forma convertitur; nihilominus tamen verum fuit dicere post aquæ conversionem in nuptiis Canæ factam *hoc est vinum*, & rectè de alimentis in carnem conversis diceretur, *hoc est caro*: Ergo à pari vera erit ista propositio, *hoc est corpus meum*, etiam si remaneat tota panis materia, solaque ejus forma convertatur in formam corporis Christi. Ita docuit Durandus 14. sæculo, sed dubitanter, *salvo tamen*, inquit, *meliori judicio*.

Distinguo majorem, laudati Patres in exemplum attulerunt conversionem aquæ in vinum, & alimentorum in carnem, ut simpliciter probarent Eucharistiam non esse meram figuram, sed panem per meram conversionem fieri substantialiter corpus Christi, Concedo: ut probarent conversionem illam fieri eo omni modo, quo aqua olim conversa est in vinum, & alimenta quotidie transmutantur in carnem comedentis, Nego majorem. Namque ex iisdem Patribus corpus Christi in Eucharistia est ipsum quod natum ex Maria Virgine, quod affixum est Cruci, in Sacramento extitit modo spirituali & invisibili, non palpatur, non frangitur, nec dentibus comminuitur: Atqui si forma corporis Christi, scilicet anima rationalis, uniretur materiæ panis, tanquam proprio corpori, corpus Christi in Eucharistia non esset natum ex Maria Virgine, nec cruci affixum, videretur, palparetur, frangeretur, dentibus comminueretur, species quæ post consecrationem remanent, essent accidentia corporis Christi, ipsique tanquam

quam subiecto extenso inhærent, quæ omnia longè sunt absurdissima, aliena à mente SS. Patrum & contraria definitioni Concilii Tridentini. Unde Bellarminus sententiam Durandi hæreticam pronuntiat.

Dices 2. ex speciebus Eucharisticis generantur vermes: Atqui generatio illa fieri nequit nisi ex præjacente materia, alioquin esset creatio, materia autem illa non est materia corporis Christi, cum illud sit incorruptibile; Ergo est materia panis.

Concessa majore, ad minorem alii aliter respondent. S. Thom. 3. part. q. 77. art. 5. respondet quantitatem supplere vicem materiæ, & vi miraculi vermes, pulverem, cinerem ex ea generari. Alii dicunt novam creari materiam, quam opinionem sustineri posse admittit Angelicus Doctor. Alii opinantur ex aere circumstante fieri novam illam generationem, quod absolutè improbat idem sanctus Doctor.

Q. 9. *Totus Christus poniturne sub qualibet specie per verba Consecrationis?*

R. De fide quidem est totum Christum contineri sub qualibet specie, ita enim definiit Concilium Tridentinum sess. 13. can. 3. quia Christus Joan. 6. ait, *qui manducat me, & ipse vivet propter me.* Non dixit *Corpus meum*, sed *me*: Christus autem est totum constans ex duabus naturis & personalitate divina & integer accipitur ex sancto Hieronymo contra Jovinianum, omnium manibus tractatur ex sancto Chrysostomo lib. 3. de sacerdotio, ab omnibus adoratur, priusquam accipiatur ex sancto Augustino in Psalm. 68. Atqui nec Caro, nec Sanguis ejus sine divinitate adoraretur, sed

sed ista non colliguntur ex verbis consecrationis. Verba enim seu formæ Sacramentorum in tantum operantur, in quantum significant: Atqui ista verba, *Hoc est Corpus meum, Hic est Sanguis meus*, significant tantum, priora quidem Corpus posteriora verò Sanguinem: Ergo per se ponunt solummodo Corpus sub specie panis, posteriora verò sub specie vini, sed vi naturalis connexionis & concomitantia, qua partes Christi Domini, qui jam ex mortuis resurrexit, non amplius moriturus, inter se copulantur, corpus sub specie vini, & sanguis sub specie panis, & anima sub utraque sicut & divinitas propter hypostaticam unionem ponuntur. Ita Concilium Tridentinum cit. sess. 13. cap. 3. unde colligunt Theologi, quòd si in triduo mortis consecrassent Apostoli, corpus fuisset sub specie panis sine anima & sanguine, & sanguis sub specie vini sine corpore & anima, cum tunc temporis ista non essent connexa, sed separata. Secus dicendum de divinitate, quæ corpori etiam mortuo, sicut sanguini effuso fuit semper conjuncta.

CAPUT III.

De Eucharistia spectata in facto esse.

Q. 1. *Eucharistia in facto estne Sacramentum propriè dictum?*

R. Affirmative; quia est signum sacrum visibile & permanens divinitus institutum ad nostram sanctificationem.

Dices; Sacramenta novæ legis constant ex rebus tanquam materia, & verbis tanquam forma:

Atqui

Atqui Eucharistia in facto esse non constat verbis: Ergo.

Distinguo majorem. Sacramenta in fieri, Concedo: in facto esse, Nego majorem; Eugenius enim IV. in suo Decreto non dixit omnia Sacramenta tribus constant, sed tribus perficiuntur. Pro materia autem Eucharistiæ in facto esse Theologi communiter assignant species, pro forma verò corpus & sanguinem Christi; quia species sunt pars minùs nobilis, determinanturque ad significandam nutritionem spiritualem per corpus & animam Christi, quemadmodum aqua in baptismo determinatur per formam ad significandam gratiam regenerativam.

Q. 2. *Quot sunt distinguenda circa Eucharistiam in facto esse spectatam?*

- R. Tria: 1. id quod est Sacramentum tantum.
2. Quod est res Sacramenti, & Sacramentum simul.
3. Quod est res Sacramenti tantum.

Sacramentum tantum est quod significat nec significatur, ut species panis & vini, quæ sunt merum signum Corporis & Sanguinis Christi.

Res Sacramenti & Sacramentum simul est quod significatur & significat, ut Corpus & Sanguis Christi, quæ significantur per species, & significant gratiam sanctificantem.

Res Sacramenti tantum, quod significatur nec significat, ut gratia Sacramenti, quæ significatur per species & per Corpus ad Sanguinem Christi, & ipsa nihil significat præterea.

Triplex ille Eucharistiæ respectus imprimis est observandus propter varias tùm veterum tùm recentiorum loquendi rationes de Eucharistia. Quandoque enim scribunt esse signum

Q. 3. *Estne de Fide Christum totum contineri in qualibet parte Hostiæ seu Calicis?*

R. De fide est totum contineri facta divisione, ita enim definiit Concilium Tridentinum sess. 13. can. 3. habeturque tum ex Scriptura Luc. 22. *dividite inter vos*: tum ex Ecclesiæ traditione, quæ peracta consecratione eundem panem frangere consuevit pluribus distribuendum, sicut & eundem calicem astantibus porrigere.

Dixi, *facta divisione*; nam Concilium non attigit quæstionem, utrum Christus totus contineretur in qualibet parte Hostiæ integræ & Calicis, quamvis Theologi communiter ita affirmant; cum per fractionem aut divisionem non fiat nova consecratio, quæ Christum sistat præsentem, ubi non erat.

CAPUT IV.

De Ministro & subiecto Eucharistiæ.

Q. 1. *Quis est Minister Eucharistiæ?*

R. 1. De Fide est solum Sacerdotem esse Ministrum Eucharistiæ conficiendæ. Sic definiit Concilium Lateranense IV. C. *Firmiter*, & Tridentinum sess. 22. can. 2. Constat enim ex universalis Ecclesiæ traditione Christum Sacerdotes novi Testamenti instituisse per hæc verba Luc. 22. *hoc facite in meam commemorationem*, eaque dirigi ad solos Apostolos eorumque in Sacerdotio successores, *Hilarius Sardus*, inquit sanctus Hieronymus Dial. contra Lucif. *cum Diaconus de Ecclesia recesserit . . . neque Eucharistiam conficere potest.*

R. 2. Eucharistiæ dispensandæ Minister ordinarius solus est Sacerdós, illius enim est Sacramenta ministrare, cuius est ea conficere: Extraordinarius verò Diaconus, *Diaconus*, inquit Concilium IV. Carthaginense can. 38. *præsente Presbytero Eucharistiam corporis Christi populo, si necessitas cogat, iussus erogat*: Ergo non erogat propria autoritate, sed ex iussione Presbyteri in casu necessitatis solummodo, ac proinde non est Minister ordinarius, sed extraordinarius tantum, ut diximus de Baptismo.

Q. 2. *Quodnam est subjectum capax Eucharistiæ recipiendæ?*

R. Omnis & solus homo baptizatus & viator est capax hujus Sacramenti; fructus verò illius, non nisi qui accedit dispositus.

Dixi 1. *omnis baptizatus*, sive vir sive mulier; quia character baptismalis se habet per modum potentiae passivæ ad recipienda alia Sacramenta. Ergo infantes sunt capaces hujus Sacramenti, illisque Ecclesia ministravit per 12. secula; sed propter gravia incommoda mutavit disciplinam, ut diximus tom. 5. Tract. de Eucharistia cap. 18. idem de amentibus à nativitate dicendum quod de infantibus. Quid verò de semifatis & de mutis ac furdis exposuimus cit. capite 18.

Dixi 2. *Solus*; quia non baptizatus, etiamsi sit catechumenus, caret potentia ex institutione Dei necessario prærequisita ad suscipienda alia Sacramenta. Reciperet quidem Corpus Christi, sed materialiter tantum; quemadmodum in pyxide recipitur.

Dixi 3. *Viator*; quia Sacramenta non nisi pro viatoribus instituta sunt. Unde Eucharistia vocatur viaticum, id est viatorum cibus.

Dixi

Dixi 4. *Sacramenti*, non verò fructus *Sacramenti*; quia ex dicendis soli iusti sunt illius capaces.

Dices: Eucharistia datur per modum cibi spiritualis: Atqui peccatores non sunt capaces cibi spiritualis; sunt enim mortui: cadavera autem cibum nec accipere possunt, nec edere, ut dicitur in Concilio Carthaginensi III. cap. 6. Ergo.

Distinguo minorem, non sunt capaces cibi spiritualis cum fructu recipiendi, Concedo: sine fructu recipiendi, Nego minorem; peccatum enim lethale non ita dicitur mors animæ, ut nihil in ea vitale relinquat, quemadmodum mors naturalis prorsus extinguit vitam animalem: fides quippè, spes & character baptismalis remanent in peccatore.

CAPUT V.

De effectibus Sacramenti Eucharistiæ & de dispositionibus ad illud requisitis.

Q. I. *Quot sunt effectus Sacramenti Eucharistiæ?*

R. Quatuor. Primus est augmentum gratiæ sanctificantis. Secundus remissio peccatorum venialium. Tertius perseverantia in bono. Quartus gaudium spirituale; quia Sacramenta novæ legis efficiunt quod significant: Ergo Sacramentum Eucharistiæ, cum detur per modum cibi, & potus spiritualis, eadem operatur in anima, quæ cibus materialis in corpore. *Consequens est*, inquit Eugenius IV. in suo decreto, *quod per hoc Sacramentum in fumentibus dignè, gratia augeatur, omnemque effectum, quem materialis cibus & potus quoad*

quoad vitam agunt corporalem, sustentando, augendo, reparando, & delectando: Sacramentum hoc quoddam vitam operetur spiritualement. Itaque cibus materialis 1. auget corporis vires, eique incrementum tribuit, quamdiu comedens virilem & perfectam ætatem non attingit. 2. Vires per laborem & calorem naturalem deperditas reparat. 3. Vitam conservat. 4. Delectat, & cum voluptate à benè valentibus percipitur. Similiter Sacramentum Eucharistiæ.

1. Tribuit augmentum gratiæ sanctificantis, qua homo fit sanctior, & ad implenda quæ Dei sunt promptior, ac vegetior, *sicut misit me vivens pater, & ego vivo propter patrem*, ait Christus Joan. 6. v. 58. & qui manducat me, ET IPSE VIVET PROPTER ME.

2. Delet peccata venialia, quibus remittitur charitatis fervor, in quo consistit robur animæ. *Iste panis quotidie sumitur in remedium quotidianæ infirmitatis*, inquit S. Ambrosius, sive quivis auctor operis de Sacramentis lib. 5. c. 4. & Patres Tridentini sess. 13. cap. 2. *Sumi autem voluit* (Christus) *Sacramentum hoc . . . tanquam antidotum, quo liberemur à culpis quotidianis.*

3. Eucharistia conservat vitam spiritualement juvatque ad perseverandum in bono, *Qui manducat hunc panem, vivet in æternum*, Joan. 6. & sanctus Bernardus Serm. in cœna: *Duo, inquit, operatur in nobis Sacramentum Dominici Corporis, ut scilicet minuat sensum in minimis, & in gravioribus peccatis consensum omnino tollat.* Illud experiuntur, qui frequenter cum debitis dispositionibus ad sacram Mensam accedunt, nempe vitam ducunt absque conscientia gravioris culpæ, quam vulgo
non

non vitant, qui rarò ad Divinum illud antidotum recurrunt.

4. In hoc Sacramento gustatur, quàm suavis sit Dominus, *in hoc Sacramento*, inquit Clemens V. in Concilio Viennensi, *habetur omne delectamentum, & omnis saporis suavitas, ipsaque dulcedo Domini degustatur.*

Q. 2. *Quæ dispositiones in adultis requiruntur ad Eucharistiam dignè & cum fructu recipiendam?*

R. Aliæ spectant animam, aliæ corpus.

Q. 3. *Quæ dispositiones requiruntur ex parte animæ?*

R. Eædem quæ in corpore requiruntur ad capiendum cibum materiale; dispositiones enim respondere debent fini Sacramenti, & signo sub quo operatur. Cum autem Sacramentum Eucharistiæ sit institutum ad spiritualem animarum nutritionem, & accipiatur per modum cibi spiritualis, sequitur in anima communicantis easdem requiri dispositiones, quas in corpore exigit cibus materialis. Atqui tria sunt necessaria, ut quis cibo materiali reficiatur. 1. Debet esse vivens. 3. Sanus, alimenta enim sunt noxia febre laborantibus. 3. Quietus, quia labor distrahit spiritus vitales ad nutritionem necessarios. Similiter ad dignam Eucharistiæ perceptionem triplex dispositio in communicante exigitur.

Prima est gratia sanctificans, in qua consistit vita spiritualis. Ita Concil. Trident. sess. 13. c. 2. *sumi voluit* (Christus) *Sacramentum hoc tanquam spiritualem animarum cibum, quo alantur & confortentur VIVENTES VITA ILLIUS.* Et c. 7. *Quare communicare volenti revocandum est in memoriam ejus præceptum, probet se ipsum homo. Ecclesiastica autem consuetudo declarat eam probationem necessariam*

sariam esse, ut nullus sibi conscius mortalis peccati, quantumvis sibi contritus videatur, absque præmissa sacramentali confessione ad sacram Eucharistiam accedere debeat. Quin communis est Theologorum sententia eum, qui recordatur se in confessione sacramentali inculpatè omisisse aliquod peccatum lethale, teneri adire Confessarium, priusquam ad Eucharistiam accedat. Quoddsi quis invincibiliter ignorans se reum peccati lethalis bona fide & devotè communicet, de eo sic pronuntiat S. Thomas 3. part. quæst. 79. art. 3. *forte primò non fuit sufficienter contritus, sed devotè ac reverenter accedens consequitur gratiam charitatis, quæ contritionem perficiet & remissionem peccati.* Sed quæstio est an effectus ille sit ex opere operato, an ex opere operantis? Affirmant sanctus Antoninus, Durandus, Soto, Sylvius: Negant verò S. Bonaventura, Gabriel, Major, & alii quamplurimi: quia Sacramenta non efficiunt id quod non significant: Atqui Eucharistia non significat remissionem peccati mortalis, cum detur per modum cibi & potus, qui sanè non significant resurrectionem à morte peccati, sed solum nutritionem, quæ supponit hominem vivum. Ergo nisi is, de quo est sermo, ad præsentiam corporis Christi eliciat actum contritionis perfectæ, à peccato lethali non mundabitur per Eucharistiæ perceptionem.

Secunda dispositio est immunitas ab affectu ad peccata venialia; cibus enim solidus, nedum reficit febrientes, quin illis noxius est: febris autem animæ, inquit sanctus Ambrosius in cap. 4. Luc. avaritia est, libido est, ambitio est, iracundia est. Præterea quamvis peccata venialia non sint obex gratiæ sanctifi-

stificanti, communicans tamen, nisi eorum affectum deponat per veram pœnitentiam, eorum remissionem non consequetur, nec alios Sacramenti effectus, nimirum vires animæ deperditas per concupiscentiæ ardorem non reparabit, non fiet expeditior & promptior ad currendam viam mandatorum Dei: peccata enim venialia directè pugnant contra fervorem charitatis, teporem immittunt, rerumque spiritualium fastidium pariunt.

Tertia dispositio est singularis reverentia, quæ ex attentione & ex actuali devotione exurgit, *nemo*, inquit S. Chrysostomus hom. de non contemnendis Ecclesiæ mysteriis, *animo resolutò sacras illas & mysticas laudes ineat; nemo rerum, ac humanæ vitæ consilia illo tempore volutet: sed omni terrena sorde animo pulsa, in cælum quisque se transferat, utpotè qui propinquius folio Dei cum Seraphinis volitet.*

Q. 4. Quæ dispositio ex parte corporis requiritur?

R. Præcepto Ecclesiastico requiritur jejunium naturale, quibusdam casibus exceptis, *placuit Spiritui Sancto*, inquit S. Augustinus Epist. 54. aliàs 118. *ut in honorem tanti Sacramenti in os Christiani prius Dominicum corpus intraret, quam exteri cibi. Nam idèd per universum orbem mos iste servatur.*

Dixi 1. Præcepto Ecclesiastico; quia ex S. August. cit. Epist. Dominus idèd non præcepit quo deinceps ordine sumeretur, ut Apostolis per quos Ecclesias dispositurus erat, servaret hunc locum. Nam si hoc ille monuisset, ut post cibos alios semper acciperetur, credo quòd eum morem nemo variaisset.

Dixi 2. jejunium naturale, quo excluditur quidquid per modum cibi, aut potus in stomachum trajicitur à media nocte per primum horologii pulsum designata, sive illud nutriat, sive non

nutriat, ut medicina, nummus, charta, &c. quæ solvunt jejunium naturale, non Ecclesiasticum. Quæ verò per modum salivæ, aut respirationis in stomachum decidunt, ut sanguis, pituita è cerebro, reliquiæ vini & aquæ, quibus os abluatur, vel cibi in ore fortuito remanentes, floccus nivis vel culex, jejuni naturali non adversantur. Secus dicendum de saccharo, & aliis ejusmodi, quæ, si post mediam noctem liquefacta in stomachum defluant, communionem debent impedire, cum non sumantur per modum salivæ, aut respirationis.

Dixi 3. *quibusdam casibus exceptis*; Namque 1. Eucharistia periculose decumbentibus ministranda est, potestque sæpius ministrari, si infirmitas sit diuturnior, quando jejuni sine gravi incommodo eam recipere non possunt. 2. Quando celebrans loco vini incaute aquam hausit, aut ipsi deficienti post consecrationem, non potest substitui alius Sacerdos nisi pransus, aut reliquiæ consecratæ post ablutionem sumendæ sunt, quod ad formulas integras extendendum est, ubi servari non possunt, in ejusmodi casibus jejunium ad communionem non requiritur.

Concilia, Patres, & ex iis S. Thomas 3. part. quæst. 70. art. 7. ad communionem requirunt sensus quietos & liberos ab illa perturbatione, quæ sequitur ex quibusdam actibus sive licitis, sive illicitis, *ex quadam congruentia impedit evagatio mentis, quæ sequitur pollutionem nocturnam, præcipue quando cum turpi imaginatione contingit*, inquit Angelicus Doctor. Et in 4. distinct. 9. art. 4. *non esset consulendum alicui, quod statim post peccatum mortale etiam contritus & confessus ad Eucharistiam accederet*; quo-

quoniam ista mentem deprimunt, distrahunt, tolluntque attentionem & devotionem. Idem dicendum de crapula ex hesterno cibo venialiter immoderato, inde enim prægravatur animus & difficilior ad supernaturalia assurgit.

CAPUT VI.

De necessitate Sacramenti Eucharistiæ.

Q. I. *Estne necessaria Eucharistiæ perceptio?*

R. Adversus Græcos Schismaticos non est necessaria necessitate medii; quia illud Sacramentum absolutè non est necessarium necessitate medii, sine quo fideles à peccatis abluuntur, sanctificantur, efficiunturque membra Ecclesiæ; Atqui fideles per Baptismum, & sine Sacramento Eucharistiæ hæc Beneficia consequuntur, ut patet vel ex parvulis post Baptismum decedentibus, de quibus sic scribit sanctus Augustinus lib. de dono perseverantiæ cap. 12. *absit ut causam parvulorum sic relinquamus, ut esse nobis dicamus incertum, utrum in Christo regenerati, si moriantur parvuli, transeant in æternam salutem: Ergo.*

Dices: Christus de Eucharistia eodem modo loquitur, quo de Baptismo & Pœnitentia; de Baptismo quidem sic ait Joan. 3. *Nisi quis renatus fuerit ex aqua & Spiritu Sancto, non potest introire in regnum Dei:* de pœnitentia item Luc. 13. *nisi pœnitentiam habueritis, omnes simul peribitis.* Similiter de Eucharistia Joan. 6. *nisi manducaveritis carnem Filii hominis & biberitis ejus sanguinem, non habebitis vitam in vobis.* Atqui priora verba innuunt Baptismum & pœnitentiam esse necessaria
necef-

necessitate medii : Ergo & posteriora eandem necessitatem Eucharistiæ exprimunt.

Distinguo majorem ; iisdem verbis diverso sensu intelligendis, Concedo : eodem sensu intelligendis, Nego majorem. Namque eadem verba pro varietate materiæ variam intelligentiam exigunt. Quis enim, v. gr. ex his Christi verbis Joan. 13. *si non laverō te, non habebis partem mecum*, colliget lotionem pedum esse necessariam necessitate medii, sicut Baptismum & Pœnitentiam ? Cur autem non colligitur illa necessitas, nisi quia lotio pedum non remittit peccata lethalia, non confert primam gratiam ? Ergo cum Eucharistia non sit instituta ad delendum peccatum mortale, nec ad conferendam primam gratiam, sed solum ad eam augendam & perficiendam, necessario concluditur eam non esse absolutè necessariam necessitate medii.

Dixi *absolutè* ; nam ex dictis Adulti sine frequentiori usu tanti Sacramenti difficilius in gratia accepta perseverant.

Instas : sanctus Augustinus lib. 1. de pecc. mort. cap. 20. Innocentius I. Epist. ad Patres Concilii Milevitani inter Augustinianas 182. aliàs 93. Gelasius summus Pontifex Epist. 7. scribunt parvulos, nisi manducaverint carnem filii hominis, vitam æternam consequi non posse, *neminem videmus exceptum*, inquit Gelasius, *nec aliquis ausus est dicere parvulum sine hoc Sacramento salutari ad vitam æternam posse perducī* : Ergo.

Distinguo anteced. parvuli nondum baptizati vitam æternam consequi non possunt sine Eucharistiæ perceptione spirituali, & in voto implicito, seu interpretativo, quod intelligitur in ipsa

ipsa susceptione Baptismi, concedo: parvuli jam baptizati vitam æternam consequi non possunt sine actuali Eucharistiæ perceptione, Nègo ant. Ita sanctus Fulgentius in Epist. ad Ferrandum interpretatus est sanctum Augustinum, ac consequenter laudatos summos Pontifices; suadeturque ejusmodi interpretatio, tum ex verbis citatis lib. de dono perseverantiæ, tum ex scopo laudatorum Patrum, nimirum pugnant adversus Pelagianos, qui negabant peccatum originale, atque ut eluderent Textum sancti Joannis, *nisi quis renatus fuerit ex aqua & Spiritu Sancto, non potest introire in regnum Dei*, respondebant excludi à regno Dei non esse pœnam inflictam propter aliquod peccatum, sed meram privationem alicujus eximii doni in gratiam solius Baptismi conferendi; neque propterea parvulos non baptizatos fore miseros, utpotè qui habituri essent vitam æternam, quam Hæretici illi distinguebant à regno Dei. Hinc laudati Patres evincunt ex cap. 6. Joan. parvulos sine Baptismo decedentes ne quidem habituros vitam æternam; verba enim Christi Domini, *nisi manducaveritis*, &c. neminem excipiunt, ac proinde parvulos, qui decedunt sine Baptismo, fore miseros, quod supponit in eis peccatum. Per Baptismum autem spiritualiter manducant carnem Christi & corporis ejus fiunt participes, quatenus fiunt membra Ecclesiæ, quæ est corpus ejus.

R. 2. Eucharistia est necessaria necessitate præcepti tum divini Joan. 6. *nisi manducaveritis*, &c. tum Ecclesiastici, ex can. *omnis utriusque sexus*, qui est Concilii Lateranensis IV. & confirmatus à Concilio Tridentino sess. 13. can. 9.

Q. 2.

Q. 2. *Satisfitne præcepto communionis annuæ per communionem sacrilegam?*

Communiter affirmarunt moderni Casistæ; sed eorum doctrinam proscripsit Innocentius XI. ut scandalosam anno 1679. & Clerus Gallicanus anno 1700. tamquam erroneam, impietati & sacrilegio faventem, & præcepto Ecclesiæ illudentem.

Q. 3. *Eucharistia estne ab omnibus adultis recipienda sub utraque specie ex præcepto divino?*


R. Minimè; *si quis dixerit*, ait Concilium Tridentinum sess. 21. can. 1. *ex Dei præcepto, vel necessitate salutis omnes & singulos Christi fideles utramque speciem sanctissimi Eucharistiæ Sacramenti sumere debere, anathema sit.* Constat autem Concilii definitio tum ex scriptura, quæ vitam promittit unam speciem panis fumentibus, *qui manducat hunc panem, vivet in æternum.* Joan. 6. tum ex traditione Ecclesiæ, quæ semper ad meram disciplinam retulit Eucharistiæ dispensationem sub una, vel duabus speciebus. Primis enim sæculis Eucharistia in specie panis domum deferebatur, ut observavimus cap. 1. Infirmis ministrabatur aliquando sub sola specie panis ex Eusebio lib. 6. histor. cap. 44. aliquando sub sola specie vini ex Concilio Toletano XI. can. 11. *quia, inquit, solent tanto siccitatis pondere deprimi, ut nullis ciborum illationibus possint refici.* Apud Latinos ex more perantiquo Sacerdos die Veneris Sancta communicat ex præsanctificatis in sola panis specie; apud Græcos vero singulis diebus Quadragesimæ, solis exceptis Sabbatis & Dominicis diebus. Nunc quidem intingunt panem consecratum in speciebus vini, sed supponunt ignem sacro disco, ut nihil humo-

humoris remaneat. S. Hieronymus Epist. 22. meminit quarundam Virginum, quæ ita erant abstemiæ, ut in ipsis mysteriis speciem vini non sumerent. Quin ipsimet Novatores à Calice eximunt abstemios, & alios, qui ægrè ferunt labia admove ad calicem halitibus & fordibus vilium hominum infectum.

Objiciunt tamen Novatores illud Joan. 6. *Nisi manducaveritis carnem filii hominis, & biberitis ejus sanguinem, &c.* sed mala fide, cum adversus Catholicos contendant eo loci sermonem non esse de Sacramento Eucharistiæ, sed de sola fide in Christum. Deinde cum sub qualibet specie totus Christus contineatur, fideles sumendo speciem panis, manducant Christi carnem, & bibunt ejus sanguinem; in spiritualibus enim idem est manducare & bibere, juxta illud Matth. 5. *Beati qui esuriunt & sitiunt justitiam.*

Instant: Christus Matth. 26. porrigens Calicem Apostolis ait, *Bibite ex hoc omnes.* Unde Calvinus. *En, inquit, edictum æterni regis.* Ergo.

Nego conseq. quia etsi verba non sint invitantis solum, sed etiam præcipientis, constat ex Traditione ea dirigi ad solos Apostolos & ad eorum in Sacerdotio Successores, qui utramque speciem in Sacrificio adhibere debent & sumere.





SECUNDA PARS DE MISSÆ SACRIFICIO.

CAPUT PRIMUM.

De Missæ notione.

Q. 1. *Unde Missæ nomen?*

R. A Verbo, *mitto*; sive quia Christus nobis est hostia missa à Deo, sive quia Celebrans preces per Angelum mittit ad Deum sicut astantes per Sacerdotem. Ita S. Thomas quæst. 83. art. 4. ad 9. sive quia, peracto sacrificio populus dimittitur per hæc verba, *Ite Missa est.*

Frustrà Novatores à nobis quærunt, in quo scripturæ loco nomen illud, *Missæ*, reperiatur, cum nec ipsi nomen, *consubstantiale*, in scripturis reperiant, satisque sit rem nomine significatam haberi in scripturis.

Q. 2. *Quid significatur nomine Missæ?*

R. Oblatio Deo facta Corporis & Sanguinis Christi sub speciebus panis & vini.

Q. 3.

Q. 2. In quo scripturæ loco reperitur illa Missæ significatio?

R. Reperitur Matth. 26. & Luc. 22. ubi Christus postquam benedixit panem, & gratias egit, sic alloquitur Apostolos, *Hoc est Corpus meum, quod pro vobis datur* Non ait; *vobis datur*, sed, *pro vobis datur*, id est, Deo Patri offertur. Similiter & de Calice dixit, *hic est calix, novum Testamentum in sanguine meo, qui pro vobis fundetur, vel funditur*, ut in textu Græco, & apud Matthæum, *pro multis effundetur*. Pro vobis nunc funditur, pro multis vero in Cruce effundetur. Sic Apostolus 1. Cor. 10. citatos Textus intellexit *Calix benedictionis*, inquit, *cui benedicimus, nonne communicatio sanguinis Christi est?* Ibi opponit Apostolus altare & sacrificium Christianorum, altari & sacrificio Gentilium, *quæ immolant gentes*, inquit, *Dæmoniis immolant & non Deo non potestis mensæ Domini participes esse & mensæ dæmoniorum*. Mensa dæmoniorum hic est altare proprie dictum, sicut immolatio dæmoniis Sacrificium, Ergo & mensa Domini est verum altare, & calix in ea oblatus verum Sacrificium. Illud autem Sacrificium Christus Dominus in ultima cœna obtulit *pro ineffabili arcanoque Sacrificii modo præoccupat impetum violentum, ac se se oblationem & victimam offert pro nobis Sacerdos simul & Agnus Dei cum Corpus suum ad comedendum, & sanguinem ad bibendum familiaribus præbuit*, inquit Sanct. Gregorius Nyssenus Orat. 1. de Resurrect. & S. Chrysostomus Hom. 24. in 1. ad Cor. pro brutorum cæde seipsum offerendum præcipit. Plura vide Tom. 5. cap. 4. de Sacrificio Missæ.

Confirmatur; Christus est Sacerdos in æter.
D. Habert Theolog. Tom. VIII. Q q num

num secundum ordinem Melchisedech : Ergo debuit offerre Sacrificium ritu Melchisedech : Sacerdotium enim essentialiter ordinatur ad Sacrificium : *Omnis Pontifex ex hominibus assumptus , pro hominibus constituitur in iis quæ sunt ad Deum , ut offerat dona & sacrificia pro peccatis ,* Hebr. 5. Atqui Sacrificium Melchisedech est in pane & vino , Gen. 14. Ergo Christus verum Sacrificium obtulit in pane & vino , *Rex Salem Sacerdos Dei altissimi ,* inquit sanctus Clemens Alexandrinus Auctor secundi seculi lib. 4. Strom. circa finem , *vinum & panem sanctificatum dedit nutrimentum in typum Eucharistiæ.*

Quid sit Sacrificium proprie dictum , quomodo differat à Sacramento , & quatenus ejus definitio conveniat Eucharistiæ , exposuimus initio hujus Tractatus.

Q. 4. *Neceßumne est ut in vera Religione existat Sacrificium proprie dictum?*

R. Affirmative , efficaciterque probat sanctus Thomas secunda secundæ quæst. 85. art. 1. quia ratio naturalis dictat , ut homo exterius testetur suam subjectionem & reverentiam erga suum dominum ; unde in omni Republica specialis honos exterior supremo Principi ita determinatus est , ut nulli alteri absque crimine læsæ Majestatis exhiberi possit. Ergo cum Religio ad hoc sit instituta , ut cultus Deo debitus reddatur , necesse est ut in omni Religione reperiatur Sacrificium proprie dictum , utpote unicus exterioris latriæ cultus. *In qualibet ætate ,* inquit Angelicus Doctor , *& apud quaslibet hominum nationes semper fuit aliqua Sacrificiorum oblatio.* Nec dubitat idem sanctus Doctor quin Adamus in statu innocentiae , licet
bre-

brevissimo, Sacrificium Deo obtulerit; atque exemplo præverit filiis suis, de quibus S. Augustinus lib. 10. de Civit. cap. 4. sic scribit: *Quàm antiquus sit in sacrificando Dei cultus, duo illi fratres Cain & Abel satis indicant.* Et cap. 19. *sed nec ob aliud fallaces illi Spiritus (Dæmones) sibi hoc exigunt, nisi quia vero Deo deberi sciunt.* Porro Christus, qui non venit legem naturalem solvere, sed adimplere, à Religione, quam instituit præstantissimus, non expunxit quæ sunt juris naturalis, aut Sacrificium: Ergo Pseudoreformati, qui omne Sacrificium exterius rejiciunt, non solum contra fidem, sed etiam contra legem naturalem delinquant.

Q. 5. *Quare Sacrificium proprie dictum soli Deo offerri potest?*

R. Quia per victimæ mastrationem testamur Deum esse rerum omnium auctorem & Dominum, profitemurque nos totos divinæ ejus majestati devovere cum victima, cujus sanguinem in hujusce nostræ charitatis signum offerimus. Qui sanè honos creaturæ sine sacrilegio deferri non potest ex S. August. lib. 20. contra Faustum c. 21. *illo cultu, qui Græce latriæ dicitur, cum sit quædam proprie divinitati debita servitus, nec colimus, nec colendum docemus, nisi unum Deum.* Cum autem ad hunc cultum pertineat oblatio Sacrificii . . . nulli tale aliquid offerimus, aut offerendum præcepimus, vel cuiquam Martyri, vel cuiquam sanctæ animæ, vel cuiquam sancto Angelo.

Ergo sacrificium proprie dictum est in genere signi, sicut & Sacramentum, sed diverso modo, nam Sacramentum est signum, quo Deus significat se dare gratiam digne susipientibus: Sacrificium vero est signum, quo testamur exterius nos totos Deos per charitatem devovere, *sacrificium,*

inquit S. Aug. 1. 10. de Civ. cap. 5. *est visibile invisibilis sacrificii Sacramentum, id est, sacrum signum. Quodnam yero sit illud invisibile Sacrificium exponit cap. 6. his verbis, Anima ipsa, cum se refert ad Deum, ut igne amoris ejus accensa, formam concupiscentiæ sæcularis amittat, eique tanquam incommutabili formæ subdita reformetur, fit sacrificium.* Atque in hujusce rei testificationem Sacerdotes veteris testamenti imponebant manus super caput victimæ, & Sacerdotes novi Testamenti eas extendunt super oblatas ut significant se & adstantes spiritualiter immolare cum victima, quam exterius offerunt, *hic est Dei cultus, hæc vera Religio, hæc vera pietas, hæc tantum Deo debita servitus*, inquit Sanct. Augustinus cit. lib. 10. cap. 4.

Ergo sacrificium exterius sine interiori est signum falsum, significat enim quod non est; nempe cor contritum, humiliatum, Deo totaliter debitum, & ex amore serviens. Unde S. Augustinus cit. lib. 10. cap. 5. expendens illud Psalm. 50. *holocaustis non delectaberis, sacrificium Deo spiritus contribulatus*, sic scribit, *intueamur, quemadmodum ubi Deum dixit nolle sacrificium, ibi Deum ostendit velle sacrificium. Non vult ergo sacrificium trucidati pecoris, sed vult sacrificium contriti cordis.*

Q. 6. *Quotuplicis generis est sacrificium proprie dictum?*

R. Quadruplicis. Primum dicitur latreuticum seu holocaustum, in quo juxta ritum Aaronicum igne prorsus consumebatur victima ad recognoscendam infinitam Dei majestatem & absolutum ejus dominium in omnes creaturas, ita ut possit absque injuria, & auferre concessa, vitam & omne quod sumus, & negare expetita, quantumcum-

tumcumque nobis necessaria. Secundum dicitur Eucharisticum, seu gratiarum actionis in grati animi testimonium erga bonitatem & misericordiam Dei, qui nos immeritos suis cumulat beneficiis. Tertium est propitiatorium ad satisfaciendum ex sincero pœnitentiæ affectu divinæ justitiæ, & placandam ejus iram, quam provocarunt peccata nostra. Quartum est impetratorium & pacificum pro novis beneficiis à Deo obtinendis.

Q. 7. *Quatuor illæ sacrificii species existuntne in Religione Christiana?*

R. Existunt eminentiori modo in Missa unico Christianorum sacrificio, quod offerunt ob quatuor illos recensitos fines, est enim latreuticum seu Holocaustum, & Eucharisticum, propitiatorium, & impetratorium. Quod sit propitiatorium Concil. Trident. sess. 22. can. 3. definiit. Et S. Augustinus lib. 10. de Civit. cap. 20. docet quatuor recensitas sacrificii species in illo contineri. *Hujus sacrificii, inquit, multiplicia variaque signa erant sacrificia prisca Sanctorum, cum hoc unum per multa figuraretur tanquam verbis multis res una diceretur.* Et in Psalm. 39. num. 12. *Cum datum est, quod promissum est, ablata sunt verba promissiva, data sunt completiva. . . Quid est quod datum est completivum? Corpus quod nostis, quod non omnes nostis, scilicet propter Cathecumenos, quibus hoc mysterium celabatur.*

Ex his discunt fideles, qua mente, & quo fine ad sacrificium Missæ convenire debeant.

Dices: Christus per sacrificium Crucis omnia nobis meruit, Una enim oblatione consummavit in æternum sanctificatos, Heb. 10. Ergo non sine injuria Passionis ejus asseritur Missæ sacrificium.

Nego conseq. 1. Quia sacrificium Missæ ex dictis est idem cum sacrificio Crucis, differtque sola offerendi ratione. 2. Quia sacrificium Missæ nihil addit meritis passionis Christi; sed solum applicat quæ Christus pro nobis in Cruce meritus est. An non ipsimet adversarii credunt sine injuria Passionis, sibi applicari per Sacramenta Baptismi & Cænæ merita Passionis Christi? 3. Quia Christus jussit ut Eucharistiam celebraremus in ejus commemorationem & gratiarum actionem. 4. Quia in Cruce caput sine membris, hoc est, Christus sine Ecclesia, quæ est corpus & plenitudo ejus, Ephes. 1. se solum obtulit; in societate vero Christianorum totus ipse, caput simul & corpus offertur conjunctim tum per ipsum Sacerdotum magnum, tum per Fideles, qui tanquam ejus membra participes sunt regalis & spiritualis ejus Sacerdotii, 1. Petr. 2. ut sic holocaustum sit ex omni parte integrum, nihilque totalis victimæ remaneat, quod non igne ardentissimi amoris incendatur.

Hujusce admirabilis Mysterii Symbolum S. Cyprianus, Epist. 63. agnoscit in mixtione aquæ cum vino sacrificii; namque aqua ex Apoc. 17. populus est, & vinum Sanguinem Domini significat. Aqua sola est plebs sine Christo, neutra separatim debet esse materia sacrificii; sed mixtio utriusque fit universale Religionis Christianæ sacrificium Deo acceptissimum: *Sacerdos* (Christus) *est ipse offerens, ipse & oblatio*, inquit S. Aug. lib. 10. de Civit. cap. 20. *cujus rei Sacramentum quotidianum esse voluit Ecclesiæ sacrificium; cum ipsius corporis ipse sit caput, & ipsius capitis ipsa sit corpus, tam ipsa per ipsum, quam ipse per ipsam suetus offerri.*

Instas:

Instas : Per sacramenta fructus Passionis Christi nobis sufficienter applicantur : Ergo frustra sacrificium.

Nego antec. tum quia Sacramenta aliis non profunt, quam suscipientibus : tum quia adultos non disponunt, sed supponunt dispositos; alias non illos sanctificant, sed inquinant. At sacrificium pro omnibus offertur, omnibus prodesse potest etiam infidelibus & peccatoribus obstinatis, iisque impetrat auxilia actualia, quibus per veram conversionem & pœnitentiam ad Sacramentum Baptismi vel Pœnitentiæ præparentur : *Hujus quippe oblatione placatus Dominus, inquit Patres Trident. sess. 22. c. 2. gratiam & donum pœnitentiæ concedens, crimina & peccata etiam ingentia dimittit.*

Q. 8. *In qua Missæ parte sita est sacrificii essentia?*

R. 1. Certum est non consistere in oblatione panis & vini: tum quia ejusmodi oblatio præparatoria est, ex humana institutione ad invocandum Spiritum Sanctum: tum quia ex dictis una est hostia sacrificii cruenti & incruenti: Atqui panis & vinum in cruce non sunt oblata: Ergo.

R. 2. Communio Sacerdotis offerentis non est sacrificii pars essentialis, sed solum integrans: tum quia de fide est Christum in novissima cœna verum obtulisse sacrificium: At non ita certum est ipsum Sacramentaliter communicasse, quamvis communis sit Theologorum sententia ipsum fuisse cibum & convivam: tum quia actio sacrificativa est propria Sacerdotis: Atqui communio talis non est; nam & Laici communicant, & Diaconi tanquam Ministri extraordinarii Eucharistiam distribuunt: tum denique quia in sacrificiis

veterum participatio victimæ non constituebat sacrificium, sed illud perfectum supponebat, Communionem tamen Sacerdotis offerentis non solum esse præcepti divini, sed etiam pertinere ad integritatem sacrificii suadet Ecclesiæ disciplina, juxta quam, si contingat celebrantem repentino morbo corripì ante sumptionem utriusque speciei, alius substituitur Sacerdos, etiam non jejunus; si alter desit, qui utramque speciemumat, ut perficiatur Sacramentum, inquit S. Thom. qu. 83. art. 3. ad sextum, cum ad ministrandum viaticum, quod est præcepti divini in periculo mortis, Ecclesia non permittat Sacerdotem non jejunum conficere. Hinc cap. *Comperimus*, de consecr. dist. 2. dicitur immane esse sacrilegium, si celebrans utramque nonumat speciem. Et cap. *Relatum*, habetur, *Quale erit sacrificium, cujus neque sacrificans particeps esse dignoscitur?*

Dixi, *Sacerdotis offerentis*; quamvis enim illud sit Ecclesiæ votum; ut fideles Missæ sacrificio astantes sacramentaliter communicent, ut colligitur ex Concil. Trident. sess. 22. cap. 6. cujus verba sunt ponderanda: *Optaret quidem sacrosancta Synodus, ut in singulis Missis fideles adstantes, non solum spirituali affectu, sed Sacramentali etiam Eucharistiæ perceptione communicarent, quo ad eos sanctissimi hujus sacrificii fructus uberius proveniret*; can. 8. anathemate percussit Lutheranos debacchantes adversus Missas privatas: in quibus solus Sacerdos communicat, tanquam præcepto divino contrarias, ideoque abrogandas; ejusmodi enim divinum præceptum neque ex Scriptura, neque ex Traditione colligi potest: non ex Scriptura; verba enim ista, *Hoc facite in meam commemorationem*, diri-

diriguntur ad Apostolos & eorum in Sacerdotio successores, ut jam diximus. Neque etiam ex Traditione Ecclesiæ, cujus est Scripturam interpretari; imo ex ea contrarium evincitur; nam can. 9. Apostolorum excusantur Clerici, qui ex rationabili causa non communicant. Concilium Agathense anno 511. præcipit ut fideles adsint Missæ sacrificio singulis diebus Dominicis, communicent autem ter in anno, scilicet in Natali Domini, Paschate & Pentecoste. Denique semper licuit interesse pluribus sacris uno die, ut in Natali Domini, in quo Sacerdos ter celebrabat ex sancto Gregorio Hom. 8. in Evang. prohibitum vero fuit semper Laicis pluries uno die communicare. Ergo Ecclesia nunquam credidit astantes Missæ sacrificio teneri communicare ex præcepto divino. Sed cum illud sit convenientissimum, Pastores, ut sanctus Chrysostomus, gravissimis verbis fideles increpabant, atque etiamnum increpant, qui negligunt altaris fieri participes.

R. 3. Tota missæ Sacrificii essentia consistit in consecratione, tria enim, quæ ad veri sacrificii essentiam pertinent, scilicet Minister legitimus, oblatio rei sensibilis, & ejus immolatio in hac actione reperiuntur. Christus summus Sacerdos per Ministrum suum specialiter deputatum loquitur & consecrationem perficit, *Hoc est Corpus meum. Hic est Sanguis meus, &c.* Ista enim profert Sacerdos in persona Christi, non in sua; cum non suum, sed Christi Corpus & Sanguinem demonstret. Christus quoque est victima per species sensibiles, quæ hoc ipso offertur, quod in alteri ponitur. Denique Christus victima in hac

actione Mystice immolatur : *Christus semel immolatus est in seipso*, inquit S. August. Epist. 23. *in Sacramento omni die populis immolatur*, quatenus vi verborum tanquam gladio spirituali Sanguis ejus à Corpore separatur ad recognoscendum supremum Dei dominium.

Nec dicas actu & de facto non separari; quod enim per concomitantiam, ut ajunt, corpus reperiatur sub vini speciebus, illud est per accidens actioni sacrificativæ; quæ per se est separativa, ut diximus.

Alii & quidem graves Theologi aliter explicant, nempe ad sacrificium commemorativum, inquiunt, non requiritur actualis immolatio; sed satis est, ut oblatio fiat victimæ jam immolatæ, ut patet ex ritu Aaronico, secundum quem summus Pontifex semel in anno sanguinem hirci, qui prius immolatus fuerat, in sacrificium offerebat absque nova immolatione, Lev. 16. Similiter Sacerdos, vel potius Christus per Sacerdotem in altari jugiter offert se in Cruce jam mactatum, ut fusius & dilucidius exposui Tom. V. *part. 2. cap. 5*

Dices: Actio productiva non est destructio: Atqui consecratio est actio sacramentaliter Christi productiva: Ergo non potest dici sacramentaliter seu mystice destructiva.

Distinguo majorem: Actio absolute & simpliciter productiva, Concedo: productiva mortuo quodam modo, quemadmodum producitur abortus, Nego majorem: Nam abortus simul producitur & destruitur. Porro Christus per consecrationem vi verborum sistitur in altari mortuo quodam modo.

Q. 9. *Utriusque speciei consecratio pertinetne ad essentiam sacrificii?*

R. Non conveniunt Theologi, communior tamen est, & ut videtur longe verior sententia utriusque speciei consecrationem requiri ad veritatem sacrificii; quia sicut in Baptismo debet fieri expressa Trinitatis professio, sic in sacrificio Missæ requiritur clarissima Passionis repræsentatio, qualis non est, si repræsentetur solum Christi Corpus, quod revera existit sub specie panis priusquam consecretur Calix.

CAPUT II.

De efficacia Sacrificii Missæ.

Q. 1. *Sacrificium Missæ habetne vim producendi aliquem effectum ex se, & ex opere operato?*

R. Affirmative; quia illud dicitur opus operatum, quod non repetitur ex dispositionibus offerentis aut ministrantis: Atqui beneficia, quæ obtinentur per sacrificium Missæ, non repetuntur ex dispositionibus offerentis, nec eorum pro quibus offertur; cum offeratur pro infidelibus & peccatoribus à Sacerdote aliquando indignissimo: *Illa munda oblatio est*, inquit Concil. Trident. sess. 22. cap. 1. *quæ nulla indignitate aut malitia offerentium inquinari potest.* Et cap. 2. *Hujus oblatione placatus Dominus, gratiam & donum Pœnitentiæ concedens, crimina & peccata etiam ingentia dimittit.*

Q. 2. *Quomodo sacrificium Missæ operatur?*

R. Non operatur per modum signi, quemadmodum Sacramenta novæ Legis; quæ per se efficiunt gratiam, quam significant; sacrificium quippe

pe exterius non est signum gratiæ, sed nostræ dependentiæ, reverentiæ & amoris erga Deum. Operatur itaque sacrificium Missæ per modum impetrationis; est enim excellentissima orationis species, quæ dirigitur ad Deum cum munere oblatione.

Q. 3. *Missæ estne valoris infiniti?*

R. Dissentiunt Theologi, sed verior videtur sententia affirmans; quia sacrificium Missæ ex dictis idem est cum Crucis sacrificio: Ergo sicut sacrificium Crucis vim habet infinitam ad promerenda nobis divina beneficia; sic sacrificium Missæ ad ea nobis impetranda & applicanda; institutum enim est ad applicanda, quæ Christus per passionem suam nobis promeruit. Favet praxis universalis Ecclesiæ, secundum quam Sacerdos tenetur offerre sacrificium pro omnibus orthodoxis vivis & defunctis, etiamsi stipendium ab aliquo acceperit, ut pro eo specialiter offeratur. Fieret autem ei injuria, si sacrificium pro pluribus oblatum, minus ipsi prodesset. Ergo Ecclesia existimat valorem sacrificii non minui, dum in plures dividitur, ac proinde censet eum esse infinitum. Adde preces publicas, propter quas simul fundendas multi confluunt ad Ecclesiam Parochialem esse magis impetratorias pro singulis, quam si privatim funderentur: *Convenimus in Cætum & Congregationem*, inquit Tertullianus, Apol. 39. *ut Deum, quasi manu facta; precationibus ambiamus orantes. Hæc vis Deo grata est.*

Ergo, inquires, Sacerdos uno sacrificio satisfaciet omnibus Missis, quas quotidie celebrare tenetur, frustra que plura offeruntur sacrificia pro uno & eodem beneficio obtinendo.

Nego

Nego consequentiam : Namque 1. Summi Pontifices prohibuere , ne plura stipendia pro uno sacrificio acciperentur : tum quia opposita sententia probabilitate non caret, tum quia minueretur cultus divinus : tum quia hæc sordida Sacerdotum avaritia in grave fidelium verteretur scandalum. Cum ergo Lex Ecclesiastica , aut usus communiter receptus fixerit , quam eleemosynam Sacerdos pro quolibet ministerio debeat accipere , peccat contra justitiam , & ad restitutionem tenetur , si plus accipiat , quam lege præfixum est , nisi ultro offeratur ab iis qui legem noverunt.

2. Argumentum petatum ex eo quod plura offerantur sacrificia pro uno & eodem beneficio obtinendo nimis probat ; inde enim concludere liceret Missæ sacrificium nullam habere efficaciam ex opere operato , cum aliquando repetatur ad unum & eundem effectum obtinendum ; quia hi , pro quibus offertur , obicem ponunt : *Dicendum*, inquit S. Thomas quæst. 79. art. 7. ad 2. *quod sicut Passio Christi prodest quidem omnibus , quantum ad sufficientiam ; sed effectum non habet , nisi in illis , qui Passione Christi conjunguntur per fidem & charitatem ; ita & hoc sacrificium quod est memoriale Passionis Dominicæ. Idem repetit art. 5.*

Q. 4. *Quinam sunt effectus sacrificii Missæ ?*

R. 1. Est propitiatorium , valetque ad peccatorum veniam & satisfactionem. Propositio est de fide expresse definita à Concilio Tridentino sess. 22. can. 3. Namque Heb. 5. *Omnis Pontifex . . . pro hominibus constituitur . . . ut offerat dona & sacrificia pro peccatis* : Atqui Christus est Pontifex secundum ordinem Melchisedech ; Ergo sacrificium , quod

quod obtulit ritu Melchisedech, hoc est, in pane & vino, est in remissionem peccatorum: *In multis sacrificiis, inquit S. Aug. qu. 57. in Levit. quæ pro peccatis offerebantur, unum hoc nostrum sacrificium signatur, in quo fit vera remissio peccatorum.*

Dices: Si per sacrificium Missæ habeatur remissio peccatorum, frustranea Sacramenta Baptismi sunt & Pœnitentiæ.

Distinguo: si sacrificium Missæ peccata immediate remittat, C. si remote tantum, & mediantibus Sacramentis Baptismi & Pœnitentiæ. Nego, itaque valet sacrificium vel pro muliere prægnante, ut feliciter pariat & proles Baptismi consequatur, vel pro peccatore, ut Pœnitentia moveatur, & Sacramentum Pœnitentiæ rite dispositus suscipiat; sed peccatum sive originale, sive actuale per se immediate non remittit.

R. 2. Reatus pœnæ temporalis per sacrificium Missæ immediate solvitur saltem ex parte. Nam ex dicendis Missæ sacrificium offertur pro defunctis, in quibus sola pœna temporalis relaxanda est, ad quem effectum nihil conferunt, cum non sint in statu merendi.

R. 3. Prodest justis viris ad gratiæ sanctificantis augmentum, non quidem immediate, sicut Sacramenta; sed mediate, quatenus per illud impetrantur Gratiæ actuales, per quas justii eliciunt bona opera de condigno meritoria augmenti Gratiæ sanctificantis.

R. 4. Per sacrificium Missæ impetrantur bona temporalia, quæ ex Dei ordinatione conferunt ad salutem æternam, ut expresse definiit Concilium Tridentinum sess. 22. can. 3. *Si quis dixerit Missæ Sacrificium . . . neque pro vivis & defunctis, pro*

pro peccatis, pœnis, satisfactionibus ET ALIIS NECESSITATIBUS offerri debere, *anathema sit.* Constat enim ex universalis Ecclesiæ praxi sacrificium pro hujusmodi necessitatibus temporalibus semper fuisse oblatum. *Pro infirmis*, inquit S. Chrysostomus Hom. 71. in Joan. & *terræ & maris, & universi orbis fructibus sacrificamus.* Et S. Aug. lib. 22. de Civ. c. 8. refert Missæ sacrificio vexationem spirituum malignorum cessasse in quibusdam ædibus.

CAPUT III.

De iis pro quibus licet offerre Missæ Sacrificium.

Q. 1. *Pro quibusnam offerri potest Missæ Sacrificium?*

R. 1. De fide est posse offerri pro vivis & defunctis, ut patet ex supra laudato can. 3. sess. 22. Conc. Trident. Sed difficultas est, an pro omnibus vivis & defunctis possit offerri? Quare

R. 2. Pro omnibus viris justis & peccatoribus, nisi sint excommunicati, non tolerati, offerre licet, diverso tamen modo. *Sacrificamus pro salute Imperatoris*, inquit Tertullianus, lib. ad Scapulam, c. 2.

Dixi 1. *Nisi sint excommunicati non tolerati*: quia Ecclesia eos excludit à suis orationibus & suffragiis, prohibetque ne ad altare nominentur, cap. *Anobis*, de Sententia excommunic. Non tolerati autem dicuntur, qui per Sententiam Judicis nominatim ut tales fuerunt declarati. Possunt tamen Fideles, & ipse celebrans pro iisdem privatim orare.

Dixi 2. *Diverso tamen modo*; quia Ecclesia in ora-

orationibus publicis non solet nomine Infidelium, Hæreticorum & Schismaticorum appellare; sed pro eis orat indirecte, quatenus sacrificium offert pro dilatatione nominis Christiani, Hæresum extirpatione & Schismatum extinctione, quod fieri nequit sine conversione Infidelium, Hæreticorum & Schismaticorum.

R. 5. Sacrificium Missæ pie & laudabiliter offertur pro Fidelibus etiam Catechumenis, qui in Christo mortui sunt nondum plene purgati. Ita definiit Concilium Tridentinum tum cit. can. 3. sess. 22. tum sess. 25. in Decreto de Purgatorio, ubi declarat animas in Purgatorio detentas *Fidelium suffragiis, potissimum vero acceptabili Altaris Sacrificio juvari*, illudque habetur tum ex Scriptura, tum ex Traditione. 2. Machab. 12. *Fortissimus Judas duodecim millia drachmas argenti misit Jerusalem offerri pro peccatis mortuorum sacrificium.* Quamvis autem liber ille non sit in Canone Judæorum, ejus tamen Scriptor apud eos auctoritatem habet gravissimi Historici, ex quo constat Judæos obtulisse Sacrificia pro Mortuis. Quin ex Sancto Hieronymi Prologo in libros Machab. *Licet non habeantur in Canone (Judæorum,) tamen ab Ecclesia inter divinorum voluminum annotantur historias, & revera annotavit Concil. Trident. sess. 4. De peccato in Spiritum Sanctum, ait Christus Dominus Matth. 12. non remittetur neque in hoc seculo, neque in futuro; quod non veraciter diceretur secundum sanctum Augustinum lib. 21. de Civit. cap. 24. Nisi essent quibus etsi non in isto, tamen remittetur in futuro.* Similia habent sanctus Gregorius lib. 4. Dial. cap. 39. & Sanct. Bernardus Serm. 66. in Cant.

Ex Traditione autem habemus ex sancto Augustino lib. de Hæresibus cap. 13. & ex S. Epiphano lib. Anacephaleosis Aerium inter Hæreticos damnatum, quod negaret pro Mortuis offerendum Sacrificium; idque contra consuetudinem Universalis Ecclesiæ ab Apostolis derivatam, ut idem S. Augustinus testatur lib. de Cura pro Mortuis, & ante eum Tertullianus lib. de Corona militis, cap. 3. ubi sic habet, *Oblationes pro Defunctis annua die facimus.* Et S. Cyprianus Ep. 66. de quodam Victore, qui moriens ad tutelam Presbyterum nominarat: *Episcopi antecessores nostri, inquit, censuerunt quod si quis hoc fecisset, non offerretur pro eo Et ideo non est, quod pro dormitione ejus apud vos fiat oblatio.*

Dices Eccles. 11. legitur: *Si ceciderit lignum ad Austrum, aut ad Aquilonem . . . ibi erit;* Ergo fictitius est tertius locus, quod Purgatorium dicitur, quasi in eo purgandæ animæ detineantur ad tempus.

Nego conseq. Sensus enim laudati textus est, quod in quo statu, sive justitiæ & gratiæ sanctificantis, sive peccati lethalis, moriatur homo, in eo manebit in æternum, alioquin Abraham, Isaac, Jacob, & cæteri SS. Patriarchæ & Prophetæ, qui ceciderant in Inferorum locum, qui Lymbus vocari solet, ibi manerent in æternum, nec Christus inde eos post Passionem suam eduxisset, quod Novatores asserere non auderent.

Instas: Atqui Ecclesia Romana non vult homines in morte esse de sua sorte securos; in Officio enim defunctorum precatur, ne absorbeat eos Tartarus, & ut eruantur de ore Leonis: Er-
D. Habert Theolog. Tom. VIII. Rr go

go disciplina ejus manifeste adversatur Scripturæ textui mox laudato.

Nego subsumptum; ita enim precatur Ecclesia, quia fideles repræsentat tamquam animam exhalantes, & contra mortem conflictantes, non sine magno periculo suæ salutis, idque ad excitandam astantium commiserationem & devotionem. Sic in omnibus fere solemnitatibus, quæ præterita sunt, exhibet tamquam præsentia in Natalitiis Domini, v. gr. repræsentat Christum nascentem, & in Passionis ejus commemoratione ipsum quasi actu patientem, &c.

Q. 2. *Licetne offerre Sacrificium in honorem Sanctorum?*

R. Licet. Est de fide: Si quis dixerit, inquit Concilium Tridentinum sess. 22. can. 5. *imposturam esse Missas celebrare in honorem Sanctorum, & pro illorum intercessione apud Deum obtinenda sicut Ecclesia intendit, anathema sit*; omnes enim Liturgiæ Græcæ, & Latinæ, memoriam faciunt Sanctorum: *Non sic Martyres commemoramus*, inquit S. Augustinus Tract. 84. in Joan. *quemadmodum alios, qui in pace requiescunt, ut etiam pro iis oremus, sed magis ut ipsi orent pro nobis.*





Tractatus

DE

SACRAMENTO POENITENTIÆ.

CAPUT PRIMUM.

De ejus notione & existentia.

Q. 1. *Quotuplici modo accipitur Pœnitentia?*

R. Duplici. 1. Pro virtute Morali.
2. Pro Sacramento novæ Legis; sicut enim Christus civilem Matrimonii contractum evexit ad dignitatem Sacramenti, ita & virtutem Pœnitentiæ supernaturaliter infusam: Ergo sicut Sacramentum Matrimonii est prorsus irritum, si contractus per legem fit invalidus; ita Sacramentum Pœnitentiæ est nullum: si desit vera Pœnitentia supernaturalis. Dico, *supernaturalis*; quia Pœnitentia, seu attritio naturalis non potest esse materia hujus Sacramenti; Innocentius quippe XI. damnavit hanc quorundam Modernorum propositionem: *Probabile est sufficere attritionem naturalem modo honestam*. Quam propositionem Clerus Gallicanus postmodum, hoc est, anno 1700. declaravit hæ-

Rr 2

reti-

reticam. Quare operæ pretium est statuere quid sit supernaturalis virtus Pœnitentæ. Igitur

Q. 2. *Quid est virtus supernaturalis Pœnitentiæ?*

R. Est virtus moralis infusa inclinans peccatorem ad detestationem & dolorem proprii peccati, quatenus est offensa Dei, cum efficaci emendationis, ac satisfactionis proposito.

Dicitur 1. *Infusa*; juxta illud Act. 11. v. 18. *Gentibus Pœnitentiam dedit Deus ad vitam.* Et ratio est, quia vera Pœnitentia est dispositio ad justificationem: Atqui de fide est virtutem naturalem non posse disponere ad justificationem; id enim definiit Concil. Trident. sess. 6. can. 3. Et Clerus Gallicanus an. 1700. hæreticam declaravit hanc propositionem: *Probabile est sufficere (in Sacramento) attritionem naturalem, modo honestam.*

Dicitur 2. *Inclinans peccatorem ad detestationem & dolorem proprii peccati*; quia licet ex charitate doleamus ob peccatum alterius, de eo tamen non possumus pœnitere; pœnitere quippe est resipiscere, consilium mutare, ad sanam mentem redire, quæ profecto dici nequeunt de peccato alterius, sed de proprio.

Dicitur 3. *Quatenus est offensa Dei*; quia Pœnitentia, utpote quædam species justitiæ, est ad alterum, tenditque ad abolendam offensam illi illatam.

Ergo dolere præcise vel quia turpe est nos peccasse, & inde confundimur; vel quia animadversione sumus digni, nulla ratione habitæ offensæ Dei, non est actus virtutis Pœnitentiæ, sed amoris privati, quod operæ pretium est advertere.

Dicitur 4. *Cum emendationis proposito*; de Pœniten-

nitente enim secundum Deum ait Apostolus 2. Cor. 7. *Ecce hoc ipsum secundum Deum contristari vos, quantam in vobis operatur sollicitudinem . . . sed desiderium, sed æmulationem, sed vindictam?* Quibus verbis carpitur falsa eorum pœnitentia, qui ubi se lapsos advertunt, primo franguntur, gemunt de se, & que ulla exurgendi sollicitudine; parando lacrymas, qui cum ceciderint, jacentes indulgent lacrymis, donec quis eos erigat.

Dicitur 5. *efficaci*, juxta illud Psalmi 37. *Cogitabo pro peccato meo*, sicut ut legit sanctus Augustinus, *Curam geram pro peccato meo*, quod expendens sanctus Doctor sic scribit: *Quid est curam gerere pro peccato tuo; si diceres curam geram pro vulnere meo, quid intelligeretur, nisi dabo operam ut sanetur?* Hoc est enim curam agere pro delicto, semper intendere, semper studiose & sedulo agere ut sanes peccatum.

Dicitur 6. *Et satisfactionis proposito*; justitia enim, quam Pœnitentia imitatur, in eo consistit, ut personæ læsæ satisfiat. *Impunitum non potest esse peccatum, impunitum esse non decet, non oportet, non est justum.* Ergo quia impunitum non debet esse peccatum, puniatur à te, non puniaris pro illo. Ita S. Augustinus Serm. 20. alias 3. ex editis à Sirimundo.

Q. 3. *Virtus Pœnitentiæ fuitne quovis tempore necessaria homini lapsò?*

R. Affirmant Patres Tridentini sess. 14. cap. 4. imo ipsemet Christus Dominus Luc. 13. v. 3. *Nisi Pœnitentiam habueritis, omnes similiter peribitis.* Quo autem tempore & quoties præceptum illud obliget, certo definiri non potest. Sed sicut sæpissime eliciendus est actus amoris Dei super omnia, ita & Pœnitentiæ, cum conscius peccati

mortalis unum sine altero elicere nequeat. Et certe videretur peccato addere Dei contemptum, si averſus à Deo negligeret redire in ejus gratiam.

Q. 4. *Quomodo differt virtus Pœnitentiæ à Sacramento Pœnitentiæ?*

R. Differt ſicut pars à toto, v. gr. brachium à corpore, Sacramentum enim Pœnitentiæ eſt totum; virtus vero Pœnitentiæ, quam vulgo contritionem vocamus, eſt pars materialis Sacramenti.

Ergo ſicut Baptiſmus non poteſt conſiſtere ſine aqua; & Sacramentum Matrimonii ſine vero contractu conjugali; ita nec Sacramentum Pœnitentiæ ſine vera Pœnitentia.

Q. 5. *Quid Sacramentum Pœnitentiæ complectitur præter virtutem Pœnitentiæ?*

R. Ritum exteriorem, ac imprimis ſententiam Sacerdotis, qui in hoc Sacramento officium judicis exercet, quemadmodum docet Concilium Tridentinum ſeſſ. 14. cap. 2. ubi de lapſis poſt Baptiſmum ſic habet, *Ante hoc Tribunal tamquam reos ſiſti voluit, ut per Sacerdotum ſententiam . . . poſſent liberari.* Et cap. 6. de abſol. *Non eſt nudum Miniſterium . . . ſed ad inſtar actus judicialis, quo ab ipſo (Sacerdote) velut à judice Sententia pronuntiatur.*

Ergo conſtat apud Catholicos Sacramentum Pœnitentiæ à Chriſto Domino fuiſſe inſtitutum in forma judicii reconciliativi, ex quo facile intelligi poteſt, quæ debeant eſſe hujus Sacramenti partes, quæve requirantur, ut rite peragatur.

Enim vero omne judicium reconciliativum qua-

quatuor partibus constat, & duo necessario supponit.

Præsupponit 1. Offensam; sicut enim restitutio necessario supponit debitum, ita reconciliatio offensam. 2. Præsupponit judicem, qui habeat potestatem iudicii exercendi & sententiæ ferendæ.

Ergo materia remota, non consecranda, sed abolenda Sacramenti Pœnitentiæ, sunt peccata post Baptismum commissa, circa quæ versatur Sacramentum, quemadmodum morbi expellendi sunt materia circa quam occupatur Medicina. Peccata autem lethalia sunt materia necessaria, quia sine Sacramento saltem in voto remitti nequeunt: venialia vero sunt materia sufficiens; cum per Sacramentum deleri possint. Ergo duplex est materia remota, nempe necessaria & sufficiens.

Partes vero ex quibus constat iudicium reconciliativum, seu Sacramentum Pœnitentiæ sunt 1. Accusatio, qua reus culpam suam agnoscit, eamque confitetur. 2. Dolor & detestatio, quod in ejusmodi culpam lapsus fuerit, cum proposito non peccandi de cætero. 3. Satisfactio pro irrogata offensa. 4. Sententia qua iudex ex potestate sibi concessa, reum sic pœnitentem & sic affectum absolvit, reconciliatque cum persona læsa.

In eo itaque differt iudicium reconciliativum à iudicio vindicativo, quod in iudicio vindicativo non requiratur, ut reus crimen confiteatur, illud cum dolore detestetur, & pro eo satisfactionem offerat; sed satis est si ab alio accusetur; & idoneis testibus reus convincatur; ju-

deoque sententia sua pœnam in illum etiam renitentem decernat.

Contra vero reconciliatio, nec esse nec intelligi potest, nisi reus se inique egisse fateatur, inde dolere se testetur, paratusque sit ad eam satisfactionem adhibendam, quam exegerit persona læsa.

Ergo materia proxima Sacramenti Pœnitentiæ sunt Contritio, Confessio, & Satisfactio. Ita Concilium Tridentinum sess. 14. cap. 3.

Q. 6. *Tres illæ partes suntne essentielles Sacramento?*

R. Contritio, in qua continetur propositum satisfaciendi, & Confessio sunt partes essentielles; quia ex mox dictis sine iis non potest esse nec concipi reconciliatio; actualis vero satisfactio est pars integralis & minime essentialis; quia persona læsa in gratiam suam ita recipere potest pœnitentem, ut nullam satisfactionem exigit. Hinc pœnitentibus moribundis, & usu rationis destitutis absolutio impertitur nulla imposita satisfactione.

Dices 1. Ejusmodi moribundi absolvuntur etiam sine confessione: Ergo confessio non est Sacramento essentialis.

Distinguo antec. Sine confessione explicita, Conc. sine Confessione implicita. Nego antec. Eo enim ipso quo quis Confessarium petit, confitetur se peccasse. Porro in casu necessitatis Confessio implicita sufficit ad Sacramentum.

Dices 2. Dispositio ad Sacramentum non est pars Sacramenti: Atqui actus pœnitentis sunt dispositiones ad Sacramentum pœnitentiæ: Ergo non sunt ejus partes.

Nego

Nego min. Sunt quidem dispositiones ad effectum Sacramenti, non vero ad Sacramentum, sed illud componunt.

Q. 7. *Quomodo definitur Sacramentum Pœnitentiæ?*

R. Ex dictis recte describitur, Sacramentum à Christo Domino institutum, quo per juridicam Sacerdotis absolutionem homini contrito & confesso remittuntur peccata post Baptismum commissa, competenti satisfactione injuncta.

Dixi; *Peccata post Baptismum commissa*, quæ enim præcesserunt, huic judicio subjici nequeunt, cum Ecclesia ex Patribus Tridentinis sess. 14. cap. 2. in neminem judicium exerceat, qui non prius in ipsam per Baptismi januam fuerit ingressus; *quid enim mihi*, inquit Apostolus 1. Cor. 5. *de iis qui foris sunt, judicare?*

Q. 9. *Unde habemus Pœnitentiam à Christo Domino fuisse evectam ad dignitatem Sacramenti, & quidem à Baptismo distincti?*

R. Habemus 1. ex Scriptura Matth. 16. Christus promittit Petro se illi daturum claves regni Cœlorum, ut quodcumque ligaverit, aut solverit super terram, maneat in Cœlis ligatum aut solutum. Idem promissum ad alios Apostolos extendit Matth. 18. ac tandem illud actu & de facto confert post resurrectionem Joan. 20. his verbis, *Accipite Spiritum Sanctum, quorum remiseritis peccata, remittuntur eis, & quorum retinueritis, retenta sunt.*

2. Idem habemus ex constanti Ecclesiæ traditione. S. Hilarius in cap. 16. Matth. sic exclamat, *O beatus cœli janitor . . . cujus terrestre judicium præjudicata auctoritas fit in cœlo.* Et S. Hieronymus Epist. ad Heliodorum, *Non solum Sacerdotes, inquit, cum regenerant, sed etiam postea condonandorum.*

peccatorum obtinent potestatem. Similia habent S. Chrysostomus lib. 3. de Sacerdotio, & S. Ambrosius lib. 10 de Pœnitentia cap. 2. Unde merito Concilium Tridentinum sess. 14. can. 2. dicit anathema asserentibus pœnitentiam non esse Sacramentum à Baptismo distinctum.

Q. 9. *Quænam peccata per Sacramentum Pœnitentiæ remitti possunt?*

R. Omnia sive lethalia, sive venialia post Baptismum commissa; quia Christus nullum excipit, *Quæcumque solveritis super terram, inquit Matth. 18. erunt soluta & in cælo.* Joan. 20. *Quorum remisseritis peccata, remittuntur eis: & quorum retinueritis, retenta sunt.* Ergo quidquid habet rationem veri peccati, per Sacramentum remitti postet: Atqui peccata non solum lethalia, sed etiam venialia habent rationem veri peccati: Ergo per Sacramentum remitti possunt. Cum autem addit, *& quorum retinueritis, retenta sunt,* significat peccata lethalia esse necessariam Sacramenti materiam, venialia vero solum sufficientem, quia sola peccata lethalia simpliciter & absolute retineri possunt, cum venialia multis modis deleri possint sine Sacramento. Unde quando Confessarius absolutionem denegat confitenti venialia absque ullo signo doloris, & emendationis proposito, illa simpliciter & absolute non retinet, sed secundum quid; fictus enim hujusmodi pœnitens non tenetur illa postmodum clavibus subicere, cum aliis modis elui possint. Imo, quamvis in terra non fuerint dimissa, nihilominus non retinebuntur in cælo, si eorum conscius moriatur immunis à peccato lethali.

Dices Matth. 12. habetur de peccato in Spiritum

tum S. non remittetur neque in hoc seculo, neque in futuro. Ergo sunt quædam peccata; quæ per Sacramentum Pœnitentiæ remitti non possunt.

R. 1. Argumentum illud æque militat adversus Sacramentum Baptismi, ac Pœnitentiæ; verba quippe Christi diriguntur ad Pharisæos nondum baptizatos, qui per insignem blasphemiam in Spiritum Sanctum dicebant Christum ejicere dæmonia in nomine Beelzebub.

R. 2. Distinguendo consequens cum S. Thoma; non remittentur impœnitentibus & male dispositis, Concedo: non remittentur vere pœnitentibus, Nego consequ. Itaque qui peccant in Spiritum Sanctum, cum ex malitia directe impugnent ejus gratiam, sine qua peccata remitti nequeunt, difficile moventur ad pœnitentiam: *illius peccati tanta labes est*, inquit S. August. lib. 2. de Serm. Domini in monte, c. 22. *ut deprecandi humilitatem subire non possit*. Unde peccatum illud non est irremissibile defectu potestatis in Ecclesia, sed defectu peccatoris non pœnitentis.

Instas. Sunt quædam peccata ex natura sua irremissibilia, ait enim S. Joannes Ep. 1. cap. 5. *Est peccatum ad mortem, non pro illo dico, ut roget quis*. Ergo.

Nego antec. Apostolus enim absolute non prohibet quo minus fideles orent pro eo, qui peccat peccato ad mortem, sed innuit dumtaxat non ita esse certum orationis effectum, ac si oratio funderetur pro alio peccatore.

Instas iterum: Hebr. 6. dicitur: *Impossibile est enim eos, qui semel sunt illuminati & prolapsi sunt, rursus renovari ad pœnitentiam*. Ergo.

Distin-

Distinguo ant. Impossibile est renovari per Baptismum, Concedo : Per Sacramentum Pœnitentiæ, subdistinguo : impossibile est renovari ea facilitate, perfectione & plenitudine quæ confertur in Baptismo, Concedo : impossibile est absolute, & quocumque modo renovari, Nego ant. Nam ipse Apostolus 2. Cor. cap. 2. incestum absolvit.

C A P U T II.

De Contritione.

Q. 1. *Quid est Contritio?*

R. Est ipsamet virtus Pœnitentiæ, quam descripsimus c. præcedenti. Brevius definitur à Concilio Tridentino sess. 14. c. 4. *Animi dolor & detestatio de peccato commisso, cum proposito non peccandi de cætero.*

Q. 2. *Quot sunt in ista definitione observanda?*

R. Tria. Primum est detestatio, seu odium peccati. Secundum est dolor, seu animi tristitia de peccato. Unde Beati licet detestentur peccata, actum tamen Contritionis non eliciunt; quia summum gaudium, quo perfruuntur; excludit omnem sensum doloris; sine quo vera non existit Contritio. Tertium est propositum non peccandi, quod ex Concilii Tridentini cit. cap. est novæ vitæ propositum & inchoatio.

Q. 3. *Qualis debet esse ejusmodi dolor, sive detestatio?*

R. Debet esse 1. Interior. 2. Supernaturalis. 3. Universalis. 4. Super omnia. 5. Ex natura sua, &, ut ajunt, in actu primo efficax.

Ac

Ac primo quidem debet esse interior, vocatur enim à Patribus Tridentinis dolor animi, non vero dolor sensus, utpote qui nec sit necessarius, nec sufficiens, nec semper à voluntate pendeat, cum sensus plerumque spiritui reluctentur, & in gaudium propendeant, cum voluntas luctum imperat.

2. Debet esse supernaturalis & à Spiritu Sancto, ut supra observavimus cap. 1. quæst. 2. hic consulenda. Errant ergo qui cum à Deo ad Pœnitentiam vocantur, eam differunt, quasi vel omnino positum sit in libero eorum arbitrio pœnitere ad salutem, vel Deus necesse habeat gratiam præstare indignis, & ejus liberalitatem faciant servitutem, ut loquitur Tertullianus lib. de Pœnit. cap. 8.

3. Debet esse universalis, hoc est extendi ad omnia peccata saltem mortalia; quia quodlibet peccatum mortale est mors animæ, quatenus eam separat à Deo, qui est vita ipsius.

Ergo Pœnitens, qui de omnibus peccatis mortalibus doleret, uno dumtaxat excepto, nihilominus maneret in morte, utpote separatus à Deo per illud unicum peccatum lethale; ac proinde unum peccatum lethale non potest remitti sine alio, necessumque est ut dolor seu detestatio se extendat ad omnia & singula peccata lethalia.

Aliter sentiendum est de peccatis venialibus, quæcum non separent à Deo, sed solum animam inordinate convertant ad creaturam, ut supra diximus, unum remitti potest sine alio; quia non repugnat voluntatem manere conversam
ad

ad unum objectum creatum, & simul ab alio esse averſam.

4. Dolor ſeu deteſtatio debet eſſe ſupra omnia hoc eſt, vere contritus plus debet deteſtari peccata ſua, quam malum aliud quodlibet quantumcumque grave, ac horrendum, & de iis magis dolere, ſaltem appretiative, quam de quocumque alio malo, in quod incurreret.

5. Dolor ſeu deteſtatio debet eſſe ex natura ſua & in actu primo efficax; non enim ſufficit ad veram contritionem velleitas, ſeu deſiderium inefficax melioris vitæ; ſed ea requiritur intentio, quæ voluntatem determinet ad removenda impedimenta, v. g. occaſiones proximas, vitioſos habitus eradicandos, & ad conquirenda & eligenda media, ſine quibus nova vita, quam ſibi proponit contritus, conſervari nequit. Conſule quæ dicta ſunt de intentione finis, Tract. de Actibus humanis.

Q. 4. Quotuplex eſt Contritio?

R. Duplex, perfectæ quæ charitate perficitur, id eſt, ex perfectæ charitatis motivo concipitur; & imperfectæ, quæ vulgo Attritio dicitur. Quoniam, inquiunt Patres Tridentini capit. 4. *vel ex turpitudinis peccati conſideratione, vel ex gehennæ & pœnarum metu communiter concipitur.*

Q. 5. In quo conveniunt & differunt Contritio perfectæ & imperfectæ?

R. 1. Conveniunt in iis omnibus, quæ mox diximus de Contritione generatim ſpectata; effectum quippe eſt Philoſophorum, ea quæ differunt ſpecie, conveniunt neceſſario in genere:

Ho.

Homo v. g. & brutum necessario convenire debent in genere animalis, adeo ut qui non habet quæ sunt de essentia animalis, is non sit verus homo. Ergo attritio sicut & perfecta Contritio debet esse interior, supernaturalis, universalis, super omnia, & in actu primo efficax, alioquin non esset vera attritio.

R. 2. Contritio perfecta & imperfecta differunt, 1. in effectu; Contritio enim perfecta cum solo voto Sacramenti postmodum recipiendi justificat, attritio vero minime; ut docet Concilium Tridentinum cit. cap. 4. Differunt. 2. in motivo; namque contritio perfecta concipitur ex perfecto Dei amore, attritio vero vel ex turpitudinis peccati consideratione, vel ex gehennæ & pœnarum metu, vel ex initiali & inchoato charitatis affectu.

Q. 6. *Attritio, quæ concipitur ex gehennæ metu absque initiali seu inchoato charitatis affectu, sufficitne cum Sacramento ad justificationem?*

R. 1. Nonnulli Theologi fidenter asseruerunt contra fidem Historiæ Concilium Tridentinum sess. 14. cap. 4. definiisse ejusmodi Contritionem sufficere cum Sacramento; namque Cardinalis Palavicinus lib. 12. cap. 10. Historiæ ejusdem Concilii refert Patribus exhibitum fuisse delineatum decretum, in quo insertum erat sufficere ejusmodi Attritionem ad Sacramenti constitutionem, quam propositionem iidem Patres delendam censuerunt; *Quamobrem* (pergit Historicus) *decretum, sicut nunc extat, reformatum est.*

Ergo certo certius est Concilium noluisse definire ejusmodi attritionem cum Sacramento sufficere:

Cum

Cum autem hac de re nihilominus ferveret controversia, fidelesque perturbaret, Alexander VII. die quinta Maji anno 1667. prohibuit sub pœna excommunicationis latæ sententiæ sibi & successoribus reservatæ, ne quis sententiam asserentem aut negantem notaret aliqua Censura. *Donec*, inquit, *ab hac sancta Sede fuerit aliquid hac in re definitum*, quod hætenus non præstitit. Unde

R. 2. Sententia asserens attritionem non sufficere cum Sacramento, nisi includat saltem initialem charitatis affectum, sola secura est & in praxi sequenda. Ita Clerus Gallicanus anno 1700. sic enim habet ubi de dilectione Dei in Sacramento Pœnitentiæ requisita, *Ne quis putet in utroque Sacramento, (Baptismi & Pœnitentiæ) securum se esse, si præter fidei & spei actus non incipiat diligere Deum tanquam omnis justitiæ fontem.* Et nonnullis interjectis, sic pergunt Antistites, *placet etiam caveri à Sacramenti Pœnitentiæ ministris ne in hoc Pœnitentiæ Sacramento, aliisque Sacramentis conferendis sequantur opinionem probabilem, relicta tutiore, neve pœnitentes ipsorum fidei animam suam committentes admonere cessent, ut in pœnitendo inchoatæ saltem dilectionis Dei ineant viam, quæ sola secura sit, graviter peccaturi in hoc salutis discrimine, vel eo solo, quod certis incerta præponant.* Quæro jam ab iis qui detorquent verba tam clara, contenduntque Gallicanos Antistites intelligendos esse de amore spei & concupiscentiæ beatitudinis, quæro, inquam, quæ ab ipsis statuatur sententia, quæ sola secura sit: An sententia asserens attritionem ex amore concupiscentiæ beatitudinis

con-

conceptam cum Sacramento sufficere ? Negant ergo securam esse sententiam , quæ præter amorem concupiscentiæ requirit inchoatum charitatis affectum ; affirmantque graviter peccare in hoc salutis discrimine , qui posteriorem hanc sententiam priori præponit. Quod , quam absurdum fit , nemo est qui non videat.

C A P U T III.

De Confessione.

Q. 1. *Quid est Confessio?*

R. Est Accusatio coram Sacerdote facta à Pœnitente peccatorum , quæ post Baptismum commisit , ad illorum absolutionem obtinendam.

Q. 2. *Confessio estne necessaria necessitate præcepti, non solum Ecclesiastici, sed etiam Divini?*

R. De fide est esse necessariam necessitate præcepti divini iis qui post Baptismum prolapsi sunt ; ita enim definiit Concilium Tridentinum adversus pseudoreformatos sess. 14. can. 5. & 7. Probaturque ex scriptura Joan. 20. ubi Christus Apostolis confert potestatem remittendi & retinendi peccata. *Quorum remiseritis peccata, inquit, remittuntur eis, & quorum retinueritis, retenta sunt.* Quibus verbis universalis Ecclesia semper intellexit & observavit peccata in Tribunali Pœnitentiæ esse sigillatim exponenda. *Constat enim, inquit, Patres Tridentini sess. 14. cap. 5. Sacerdotes iudicium incognita causa exercere non potuisse, neque æquitatem quidem illos in pœnis injungendis servare potuisse,*

D. Habert Theolog. Tom. VIII.

Ss

si in

si in genere duntaxat & non potius in specie ac sigillatim sua peccata (Pœnitentes) declarassent.

Dices : ex Socrate lib. 5. cap. 19. & ex Sozomeno lib. 7. cap. 16. Nectarius Patriarcha Constantinopolitanus IV. seculo Confessionem abrogavit, & ejus exemplum secuti sunt Episcopi fere omnes ac inprimis Sanct. Chrysostomus ejus successor, Hinc Calvinus lib. 3. Instit. cap. 4. adversus Theologos non confidenter modo, sed etiam contumeliose insurgens ait, *Hic, hic aures asini isti arrigant* : Ergo Confessio est duntaxat disciplinæ Ecclesiasticæ : quæ enim sunt juris divini, abrogari nequeunt.

Nego antec. Nectarius enim non abrogavit Confessionem secretam, sed publicam dumtaxat, occasione, quam referunt laudati Historici, nimirum mulier incaute confessa est publice non sine magna astantium offensione se stupratam à Diacono Ecclesiæ Constantinopolitanæ, unde permotus Nectarius, ne deinceps simile scandalum contingeret, consilio Eudomenis Presbyteri ejusdem Ecclesiæ exauthoravit Pœnitentiarum, qui Pœnitentiæ publicæ præerat, & Confessionem publicam sustulit, permisitque ut unusquisque sicut prius pro arbitrio, & pro animi sui conscientia, ut loquitur Socrates, ad Sacramentorum communionem accederet, hoc est, seipsum probaret, & si conscius se alicujus criminis agnosceret, quem mallet, Sacerdotem adiret, quemadmodum primis seculis ante Novatiani schisma factitatum fuerat, & nunc quoque observatur. Vide in Theologia nostra dogmatica, historiam integram & responsiones ad objecta Novatorum.

In-

Instas : Sanct. Chrysoſt. Hom. 5. de incomprehensibili Dei natura ait, *nam hominibus peccata tua confiteri cogo.* Et n. 9. de Pœnitentia. *Deo ſoli dic peccatum tuum, & dimittitur.* Ergo in mente Sanct. Doct̃oris Confessio ſecreta non eſt neceſſaria.

Nego conſeq. quia confessio ſecreta ſolet dici à Patribus fieri Deo, licet coram Sacerdote ejus Miniſtro; hinc in quibuſdam libris Ritualibus præſcribitur hæc formula à Pœnitentibus dicenda priuſquam peccata ſua exponant Sacerdoti, *Confiteor tibi Pater, Domine cœli & terræ.* Quod autem hæc ſit mens S. Chryſoſtomi patet ex lib. 2. de Sacerdotio cap. 3. in quo ſic habet, *nihil eorum relinquendum eſt, quod probe non excutiat atque examinet Episcopuſ.*

Q. 3. *Quot ſunt conditiones Confessionis Sacramentalis?*

R. Quinque 1. Debet eſſe diligens, id eſt, poſt ſufficiens examen. 2. Fidelis & vera, ita ut pœnitens nec augeat, nec minuat, quantum fieri poteſt gravitatem aut numerum peccatorum. 3. Secreta; non enim ſine ſcandalo infirmorum peccata quædam in eorum notitiam venirent. 4. Obedire parata, ſcilicet monitiſ & præceptiſ Confessar̃ii. 5. Integra.

Q. 4. *Quid requiritur ad integritatem Confessionis?*

R. Pœnitens tenetur explicare ſigillatim, 1. Species peccatorum. 2. Circumſtantiaſ, quæ ſpeciem mutant, de quibuſ ſupra Tract. de Actibꝫ Human. cap. 7. 3. Numerum peccatorum. Ita definiit Concil. Trident. adverſus Novatores ſeſſ. 1. 4. can. 7.

Dixi : *Circumstantias* , quæ *speciem mutant* : De aliis quippe quæ notabiliter augment peccati gravitatem intra eandem speciem , ut major furti quantitas , sacrilegium contra castitatem in subdiacono , aut presbytero , Concilium nihil statuit ; communis tamen est Theologorum sententia ejusmodi circumstantias esse exponendas , idque præscribunt nonnulli libri Rituales.

Q. 5. *Secretum Confessionis Sacramentalis ligatne strictius Confessarios , quam secretum mere naturale ?*

R. Affirmative ; quia ex S. Thoma secunda secundæ qu. 70. art. 1. secundum secretum naturale non obligat in præjudicium boni communis : at secretum Confessionis nunquam violare licet , etiamsi ex silentio Confessarii gravia imminerent Reipublicæ incommoda , aut ipse Confessarius mortem aliter declinare non posset.

Q. 6. *Quænam sigilli secreto clauduntur ?*

R. Ea omnia quæ per Confessionem Sacramentalem deteguntur , scilicet peccata sive gravia , sive levia , focii criminis , tentationes , rustici mores & alii defectus naturales , denique quidquid revelatum Pœnitenti molestiam faceret , & Confessionem redderet odiosam.

Q. 7. *Duo Sacerdotes , qui identidem excipiunt alicujus confessionem , possuntne consilii captandi causa inter se colloqui de peccatis illius ?*

Non possunt , absque libero illius consensu.

Q. 8. *Licetne Sacerdoti sermonem habere cum ipso met pœnitente , de iis quæ in Confessione aperuit ?*

R. Quamvis non violet secreti sigillum , extra Confessionem tamen non licet , nisi prius ab ipso

ipſo obtenta venia ; quia hæc agendi ratio pœnitentibus moleſta eſt.

Dixi *Extra Confessionem* ; quia in confeſſione Confefſarius poteſt , quandoque etiam debet , ob-
jicere pœniten- ti in eadem peccata lapſo , quod ſatis ſibi non caveat.

C A P U T IV.

De Satisfactione.

Q. 1. *Quid eſt Satisfactio?*

R. Eſt Pœnæ à Confefſario injunctæ acceptatio & voluntaria perpeſſio ad compenſandam injuriam Deo illatam.

Q. 2. *Remanetne pœna luenda poſt dimiſſam culpam?*

R. Conſtat remanere tum ex lib. 2. Reg. cap. 12. ubi David perfectè contritus audivit à Pro-
pheta , *Dominus tranſtulit peccatum tuum , non morieris , veruntamen quoniam blaſphemare feciſti inimicos Domini propter verbum hoc , filius , qui natus eſt tibi , morte morietur* : tum ex doctrina de Purgatorio , quod eſt ad eluenda peccata jam dimiſſa quoad culpam.

Q. 3. *Sacerdotes acceperuntne à Chriſto poteſtatem imponendi in Tribunali Pœnitentiæ opera ſatisfactoria ?*

R. Affirmative , à Chriſto enim habent poteſtatem ligandi & retinendi peccata : ligant autem & retinent , cum non abſolvunt Pœnitentes ; niſi acceptent Pœnitentiam , quam ipſis imponunt : & ita univerſalis Eccleſia ſemper & ubique intellexit ; & hætenus obſervavit Chriſti verba,

ba, quæcunque solveritis, &c. quorum retinueritis peccata, &c.

Ergo Confessarii tenentur ex præcepto divino injungere satisfactiones convenientes, utpote partes integrantes Sacramenti, alioquin Sacramentum mutilarent; ac consequenter pœnitentes ex eodem præcepto debent acceptare & implere ejusmodi satisfactiones.

Ergo audiendi non sunt, qui satisfactionem peccatis suis debitam volunt remittere ad Purgatorium; cum enim Christus instituerit satisfactionem ut partem Sacramenti, certo certius est Deum velle, ut in hac vita sibi satisfiat.

Q. 4. *Satisfactio ab uno Confessario imposita potestne mutari ab alio Sacerdote?*

R. Si sit salutaris & conveniens, non potest; peccatque pœnitens, si nolit eam acceptare; quia præceptum est Divinum ut quæcunque Sacerdos præcipit, clave non errante, ea à Pœnitente observentur: *Quæcunque ligaveritis super terram, erunt ligata & in Cælo.*

Sed si Pœnitentia non sit conveniens sive ab initio, sive ex superveniente circumstantia, mutari potest ab alio Sacerdote in Sacramentali tantum Confessione, & quidem auditis peccatis, propter quæ fuit imposita.

Q. 5. *Quotuplex est genus bonorum operum, quibus satisficit Deo?*

R. Triplex, nempe eleemosyna, & jejunium, quo intelliguntur omnes carnis afflictationes. Ita Concil. Trident. sess. 14. can. 13.

Q. 6. *Quandonam Pœnitentia est imponenda & implenda?*

R. Est

R. Est imponenda ante absolutionem, implenda vero juxta Ecclesiæ disciplinam, & eo tempore, quo præcepit Confessarius. Prioribus seculis absolutio impertiebatur post expletam Pœnitentiam: Sed cum nullum hac de re in Scriptura extet præceptum, nec ratio Sacramenti postulet, ut satisfactio ante absolutionem impleatur, Sixtus IV. anno 1478. & Alexander VIII. anno 1690. merito proscripserunt doctrinam, qua nonnulli asseriebant consuetudinem, quæ à pluribus seculis obtinuit, ut conferatur absolutio priusquam impleta sit pœnitentia, non esse legitimam, sed merum abusum.

Q. 7. *Quid attendere debet Confessarius ut convenientem pœnitentiam imponat?*

R. Duo attendat necesse est. Primum, ut illa sit in novæ vitæ custodiam & infirmitatis medicamentum. Secundum, ut sit pœna & castigatio ob præterita delicta. Ita Concilium Tridentinum sess. 14. cap. 8. his gravissimis verbis, *Debent ergo Sacerdotes Domini, quantum Spiritus & prudentia suggererit, pro qualitate criminum & pœnitentium facultate salutare & convenientes satisfactiones injungere, ne si forte peccatis conniveant & indulgentius cum pœnitentibus agant, levissima quædam opera pro gravissimis delictis injungendo, alienorum peccatorum participes efficiantur. Habeant autem præ oculis, ut satisfactio, quam imponunt, non sit tantum ad novæ vitæ custodiam, & infirmitatis medicamentum; sed etiam ad præteritorum criminum vindictam & castigationem; nam claves Sacerdotum non ad solvendum duntaxat, sed & ad ligandum concessas etiam antiqui Patres credunt & docent; nec propterea existimarunt Sacramentum Pœnitentiæ esse forum iræ & pœnarum.*

Ergo duplex distinguenda est pœnitentia, alia est pœnalis ad puniendum peccatorem : alia medicinalis ad adjuvandum & roborandum infirmum : ne rursus prolabatur. Prior est præcepti dumtaxat, divini quidem : Posterior est insuper necessaria necessitate medii : illa tolli potest per indulgentias ; ista minime. Unde Summi Pontifices in suis Bullis pro Jubilæis expresse monent Sacerdotes ut imponant salutare Pœnitentias, dum potestatem ipsis faciunt absolvendi à pœnis injunctis.

Q. 8. *Quid observandum circa hanc Concilii Doctrinam?*

R. Quatuor.

Primum, juxta Concilii doctrinam conveniens & proportionata satisfactio est Juris Divini, adversus quod nullâ consuetudo præscribit.

Secundum, quantitas satisfactionis ita arbitrio Sacerdotis relinquitur, ut eam decernat, non pro libitu & ad nutum, sed secundum prudentiæ regulas, *quantum Spiritus & prudentia suggererit*, inquiunt Patres ; & Sanct. Thomas in supplemento quæst. art. 4. ad 1. *Dicendum*, inquit, *quod arbitrium illud debet esse divino instinctu regulatum.*

Tertium, Sacerdos non debet solummodo spectare peccatorum gravitatem & multitudinem, sed etiam pœnitentium facultatem ; *Pœnæ satisfactoriæ*, inquit S. Thomas cit. art. 4. *medicinæ sunt.* Sicut ergo Medicus aliquando prudenter non dat medicinam ita efficacem, quæ ad morbi curationem sufficiat, ne propter debilitatem naturæ, majus periculum oriatur ; ita Sacerdos divino instinctu motus non semper totam pœnam, quæ uni peccato debetur, injungit, ne infirmus aliquis ex magnitudine pœnæ desperet, & à Pœnitentia totaliter recedat.

recedat. Et ideo Sacerdos tanquam prudens Medicus, *negligit minus damnum, ut majus evitet*, verba sunt ejusdem Angelici Doctoris in quartum distinct. 20. qu. 1. art. 2.

Cum autem relapsus sit maximum damnum, & præ cæteris timendum, inprimis curabit Confessarius, ut Pœnitentia sit efficax ad vitæ novæ custodiam, & infirmitatis medicamentum, valeatque ad eradicandos vitiosos habitus, cautio-rem & vigilantio-rem Pœnitentem efficiat, piis-que exercitationibus saltem facillimis, (si graves non ferat Pœnitentis) infirmitas animum ejus intentum teneat virtutibus comparandis. Ita fere Concil. Trid. sess. 14. cap. 8.

Ergo pro infirmitate Pœnitentis, minuenda est peccati vindicta, sed præsentiora adhibenda sunt remedia, quod major est ejus infirmitas.

Quartum in laudato Concilii textu ponderanda sunt illa verba, *Ne, si forte peccatis conniveant, & indulgentius cum Pœnitentibus agant alienorum peccatorum participes efficiantur.* Quibus verbis significatur Sacerdotem reum se gravis peccati constituere, si ab expositis per Concilium regulis, timore, favore, aut negligentia notabiliter recedat.

Dices; quæ sunt juris divini, non possunt solvi ab Ecclesia: Atqui Ecclesia per Indulgentiarum concessionem absolvit à satisfactionibus in Sacramento Pœnitentiæ impositis: Ergo ejusmodi satisfactiones non sunt juris divini, sed disciplinæ duntaxat Ecclesiasticæ.

Distinguo majorem; non possunt solvi ab Ecclesia sine causa, Concedo: cum causa, ne-

go maj. Namque Ecclesia causis exigentibus, absolvit à vinculo voti & juramenti, quod tamen est juris divini. Quod autem non concedat Indulgentias sine causa, perspicuum fiet ex capite sequenti.

CAPUT V.

De Indulgentiis.

Q. I. *Quid est Indulgentia?*

R. Est Remissio pœnæ temporalis, quæ post dimissam culpam luenda superest, extra Sacramentum, facta ab eo qui potestatem habet dispensandi spiritualem thesaurum Ecclesiæ.

Dicitur 1. *Remissio pœnæ*, non culpæ, *temporalis*, non æternæ, quæ remittitur cum culpa per Sacramentum.

Dicitur 2. *Extra Sacramentum*, ut distinguatur illa pœnæ remissio ab ea quæ fit virtute Sacramenti Pœnitentiæ, in quo pro majori vel minori Pœnitentium præparatione, plus vel minus minuitur reatus pœnæ temporalis.

Dicitur 3. *Ab eo qui habet potestatem dispensandi*, &c. quia bona Communitatis propria, & Reipublicæ thesaurus dispensari nequeunt, nisi ab eo, vel auctoritate illius, qui præest Communitati seu Reipublicæ.

Ergo soli Episcopi jure ordinario & divino sunt dispensatores Indulgentiarum, quia ad Apostolos solum & eorum successores dictum est, *Quæcumque solveritis super terram, erunt soluta & in cælo*: Summus quidem Pontifex potest dispensare in tota Ecclesia; Episcopi vero in sua Diœcesi
tan-

tantum. Concilium tamen Lateranense IV. Cap. Cum ex eo tit. de Pœnitent. & Remiss. detraxit de Episcoporum potestate, ex eo quod plures Episcopi abuterentur in detrimentum Ecclesiasticæ disciplinæ per indiscretas & superfluas indulgentias, permittitque solum; ut Indulgentias quadraginta dierum concedant, aut ad summum unius anni, cum dedicatur Basilica.

Q. 2. *Quis est ille thesaurus Ecclesiæ?*

R. Sunt bona spiritualia, quorum dispensatio credita est Ecclesiæ. Bona autem illa sunt merita tum Christi, qui ex Apostolo 2. Cor. 8. *propter vos egenus factus est, cum esset dives; ut illius inopia vos divites essetis*, tum omnium Sanctorum etiam in terris degentium, ut docet Clemens VI. in Extravag. *Unigenitus*. tit. de Pœnit. & remiss. anno 1350.

Q. 3. *Quare in hoc Thesauro reponuntur merita Sanctorum?*

R. Non reponuntur, ut aliquid addant meritis Christi, tum quia merita Christi sunt infinita: tum quia in Christo & per Christum vivimus, meremur & satisfacimus, inquit Concilium Tridentinum cit. sess. 14. cap. 8. Quemadmodum igitur in ordine naturali causæ secundæ cum omnipotentia Dei conjunctæ, non sunt quid intensive majus & efficacius, quam ipsa omnipotentia solitarie spectata, cum ex ea omnem vim & actum recipiant, similiter omnia Sanctorum merita meritis Christi conjuncta non sunt quid majoris pretii & æstimationis, quam merita Christi ab iis separata; illa quippe sunt emanationes à Christo, quia tanquam caput fidelibus mem-

membris suis tribuit Spiritum , motum & meritum.

Reponuntur ergo , ut denotetur Communio Sanctorum in Ecclesia , quæ est corpus Christi , & plenitudo ejus , ut loquitur Apostolus Eph. i. v. 23. Cum autem membra pro se invicem sint sollicita , fideles mutuo juvant orationibus , bonis operibus , & satisfactionibus , ex quibus partim conflatur thesaurus Ecclesiæ.

Q. 4. *Extatne in Ecclesia potestas dispensandi illum thesaurum , & ex illo concedendi Indulgentias?*

R. De fide est extare. Sic enim definiit Concilium Constantiense sess. 15. adversus Wiclefum; & Concilium Tridentinum sess. 25. adversus Pseudoreformatos.

Probatur tum ex Scriptura , tum ex Traditione Matth. 18. *Quæcumque solveritis super terram, erunt soluta & in cælo* , hac potestate usus est Apostolus 2. Cor. 2. in gratiam Incesti Pœnitentis , cui pœnam remisit *in persona* , id est , auctoritate Christi , *ne* , inquit , *abundantiori tristitia absorberetur*. Sanct. quoque Cyprianus cum Collegis suis in Concilio Africano colligit ex citato cap. 18. Matth. Apostolos & eorum successores accepisse potestatem relaxandi ex legitima causa pœnas Pœnitentibus impositas aut imponendas , *cum permiserit ipse qui legem dedit* , inquit cap. 1. lib. 4. ad Sanct. Cornelium Summum Pontificem , *ut ligata in terris, etiam in cælis ligata essent ; solvi autem possent illic , quæ hic prius in Ecclesia solverentur , &c.* Et Ep. 13. ad eundem Sanct. Cornelium refert Indulgentias solere concedi precibus Martyrum seu Confessorum , qui in carceribus pro fide detinebantur,

tinebantur, libellosque supplices Episcopis offerebant pro Pœnitentibus.

Q. 5. *Remittuntur ne per Indulgentias pœnæ temporales justitiæ divinæ debitæ, & in futuro sæculo luendæ?*

R. Remittuntur. *Quæcunque solveritis super terram, erunt soluta & in Cælo.* Matth. 18. Leo X. in sua Bulla contra articulos Lutheri, hunc inter cæteros perstrinxit, *Indulgentiæ his, qui eas veraciter consequuntur, non valent ad remissionem pœnæ pro peccatis actualibus debitæ apud divinam justitiâ; & hanc rationem affert Sanct. Thomas in Supplem. quæst. 25. art. 1. nimirum, Ecclesia ejusmodi Indulgentias faciens magis damnificaret, quam adjuvaret, quia remitteret ad graviores pœnas, scilicet Purgatorii, absolvendo à Pœnitentiis injunctis (quibus expungitur reatus pœnæ longe acerbioris in altera vita luendæ.) Et ideo aliter dicendum quod valent, & quantum ad forum Ecclesiæ, & quantum ad judicium Dei ad remissionem pœnæ residuæ post Contritionem, Confessionem, & Absolutionem, sive sit injuncta, sive non, hoc est, sive injungenda per Canones.*

Q. 6. *Valentne Indulgentiæ sine causa legitima concessæ?*

R. Conveniunt omnes Theologi Indulgentias sine legitima causa concessas, non esse ratas coram Deo, nec expungere reatum pœnæ in Purgatorio luendæ; quia dispensatio sine causa, in iis quæ sunt juris divini, ut in votis, est prorsus irrita; Atqui pœna temporalis, quæ dimissa culpa superest, jure divino est expianda; Ergo.

Q. 7. *Quæ requiruntur dispositiones, ut quis Indulgentiæ fructum consequatur?*

R. Re-

R. Requiritur 1. immunitas ab omni peccata lethali, unde in Bullis pro Jubilæo, Indulgentiæ conceduntur *Contritis & Confessis*. Imo ut quis totum plenariæ Indulgentiæ fructum obtineat, necesse est ut purgatus sit ab omni culpa veniali; quia cuilibet peccato etiam levissimo debetur pœna, quæ remitti non potest, remanente culpa & affectu ad illam. 2. Requiritur observatio eorum omnium quæ præscribuntur in Bulla, seu in concessione Indulgentiæ: & quidem intra tempus præscriptum, v. g. intra unam hebdomadam, nisi Confessarius differendam censerit absolutionem.

Q. 8. *Status gratiæ requiritur ne tanquam conditio necessaria ad rite perficienda opera in Bullis injuncta?*

R. Sufficit ut impleantur animo vere pœniti & ab affectu peccati lethalis libero, dummodo ultimum opus sit ab homine contrito & confesso.

Q. 9. *Estne certum plenariam Indulgentiam eum fuisse consecutum, qui contritus & confessus accurate præstitit, quæ præscribuntur in Bulla?*

R. Minimè; graves enim Theologi, ut Sanctus Antoninus, Adrianus VI. & Cajetanus ante Concilium Tridentinum, Dominicus Soto & Joannes Hesselius, qui interfuerunt eidem Concilio, & post Concilium Navarrus, Estius, Sylvius, & alii recentiores non pauci, quin & plures Episcopi, ut Catalaunensis, Agennensis & Montis Pessulani in suis Catechismis de Indulgentiis docent Indulgentias esse supplementum infirmitatis humanæ; non fomentum inertiae, nec prodesse nisi iis qui curant facere fructus dignos Pœni-

Pœnitentiæ, alioquin enervaretur Ecclesiastica disciplina, & Fideles procliviores ad peccandum redderentur, ut ait Sixtus IV. in Extrav. *Quemadmodum*, illudque illustrat Cajetanus exemplo accommodato in suo opere de Indulg. *In qualibet bene ordinata Republica*, inquit, *quantumcunque rationabilis adesset quandoque causa dispensandi communem thesaurum in cives gravatos ære alieno, negligentes tamen solvere, indigni censerentur adiutorio thesauri; ex eo enim quod possunt de suo solvere & non curant, indignos se reddunt tali sublevamine.* Sanctus Cyprianus Epist. 13. non vult ut Martyres pro hujusmodi dent libellos supplices, sed pro iis duntaxat, quos nostis, quorum pœnitentiam satisfactioni proximam conspiciatis. Clemens VI. in citata Extravag. Unigenitus docet Indulgentias concedi, ut cunctorum Fidelium augeatur devotio, fides splendeat, spes vigeat, charitas vehementius incalcescat. Et Joannes Hesselius 2. part. Catechismi, cap. 46. Si plenariam, inquit, Indulgentiam acciperet omnis, qui utcumque contritus est & confessus, qui est in statu gratiæ, male diceret Bonifacius VIII. Extravag. Antiquorum, quod unusquisque plus mereretur & efficacius consequeretur Indulgentias, qui Basilicas ipsas amplius & devotius frequentaret. Quare non est putandum, ut quidam docent, quod quicumque Indulgentiarum particeps fuerit, si statim moreretur, absque ulla pœna continuo ad cœli gaudia transiturus sit. Nec propterea aliquid adimitur efficacæ Indulgentiarum, inquit Cajetanus, sicut nihil adimitur efficacæ Sacramentorum, ex hoc quod oportet accedentes ad illa esse dispositos.

Q. 10. Quotuplicis generis sunt Indulgentiæ?

R. Aliæ conceduntur pro vivis, aliæ pro defunctis.

functis : aliæ partiales ad relaxandam dumtaxat partem pœnæ debitæ : aliæ plenariæ pro tota pœna remittenda. Et hæ sunt duplicis generis : aliæ vocantur simpliciter plenariæ ; aliæ Jubilatus, vel ad Jubilæi instar , ut quæ conceduntur in Summi Pontificis inauguratione & magnis Ecclesiæ calamitatibus. Jubilæus autem secundum vim nominis Hebraici idem est ac remissio , sive libertas.

Q. 11. *Differuntne Indulgentiæ pro mortuis concessæ, ab aliis Indulgentiis?*

R. Affirmative ; Indulgentiæ enim pro vivis dantur per modum absolutionis & solutionis ; pro defunctis vero per modum suffragii, quia Ecclesia in eos Jurisdictionem non habet. Responso illustratur exemplo Regis, qui ex ærario suo sumit ad solvendos captivos, quorum alii in ejus carceribus detinentur, alii in carceribus alterius Principis. In priores Jurisdictionem exercet, eosque solvit propria auctoritate : posteriores vero suis solum suffragiis juvat apud Principem, si forte oblatam pro iis pecuniam velit accipere, ac liberos eos dimittere.

Q. 12. *In quo differunt Indulgentiæ ad instar Jubilæi concessæ, ab aliis Indulgentiis plenariis?*

R. Differunt solum in quibusdam privilegiis ; namque in præcipuo effectû, qui est integra pœnæ debitæ remissio prorsus conveniunt.

Q. 13. *Quenam sunt illa privilegia?*

R. In Indulgentiis, quæ sunt ad instar Jubilæi, 1. Liberum est cuique eligere quem maverit ex approbatis ab Episcopo Confessarium.
2. Quivis Confessarius ab Episcopo approbatus potest

potest absolvere ab omnibus peccatis, & Censuris etiam reservatis sive Episcopo, sive Summo Pontifici: (Dico à *Censuris*, non vero ab irregularitatibus) & commutare vota, vel in iis dispensare (exceptis votis Religionis & castitatis perpetuæ) modo tamen sit causa sufficiens.

Dixi: *In Indulgentiis, quæ sunt ad instar Jubilæi*; nam in Jubilæo Anni sacri Sacerdotes non possunt absolvere à casibus Episcopo reservatis, nisi ab ipso facultatem acceperint, sed tantum à reservatis Summo Pontifici. Deinde ad effectum illius Jubilæi, non sufficit generalis Episcopi approbatio; sed requiritur specialis deputatio.

CAPUT VI.

De forma Sacramenti Pœnitentiæ.

Q. 1. *Quænam est forma Sacramenti Pœnitentiæ?*

R. Sunt verba Sacerdotis: *Ego te absolvo in nomine Patris, &c.*

Ergo nec scriptis dari potest absolutio, quia scripta non sunt proprie verba, nec absenti, quia pronomen, *te*, supponit personam præsentem loquenti.

Q. 2. *Singula verba suntne de essentia Sacramenti?*

R. Isthæc duo verba, *te absolvo*, sufficiunt; quia satis exprimunt effectum Sacramenti: reliqua tamen ex præcepto sunt proferenda.

Dices: Forma Baptismi esset irrita & prorsus nulla, omisiss his particulis, *in nomine Patris, &c.* Ergo & forma Sacramenti Pœnitentiæ.

Nego conseq. & paritatem. Disparitas est,
D. Habert Theolog. Tom. VIII. Tt quod

quod Christus ipse jusserit baptizandum, *in nomine Patris, &c.* At neque ex Scriptura, neque ex Traditione Ecclesiæ habemus in forma absolutio-
nis necessario exprimendum esse Mysterium Tri-
nitatis. Addi potest ratio convenientiæ, ut
ajunt, nempe quod Baptismus non vero Pœniten-
tia, sit solemnis professio Religionis Christianæ,
cujus sanctissima Trinitas est primarium Myste-
rium.

Q. 3. *Essetne valida forma enunciata modo depre-
catorio?*

R. 1. Græci ea etiamnum utuntur, nec ea de
re Latini unquam adversus eos quæstionem mo-
verunt; quin Clemens VIII. anno 1595. Græcis
Romæ degentibus permisit usum formæ depreca-
toriæ.

R. 2. Apud Latinos à pluribus sæculis non
valet, ut Sanctus Thomas Opusculo 22. multis
probat, ac præsertim autoritate Theologorum
Parisiensium; qui ipsius ætate ita sentiebant. Sed
& Patres Tridentini sess. 14. cap. 3. differte do-
cent formam hujus Sacramenti positam esse in il-
lis verbis, *Ego te absolvo*, precesque iis adjunctas
nequaquam pertinere ad ejus essentiam. Et ratio
est, quia ex dictis de Sacramentis in genere, Chri-
stus non determinavit in specie omnium Sacra-
mentorum formas, sicut materias.

Q. 4. *Quis est illorum verborum sensus?*

R. Tres sunt sententiæ.

Prima, eaque Hæretica in Concilio Triden-
tino damnata, sess. 14. can. 9. est Pseudorefor-
matorum, qui potestatem absolvendi à peccatis
reponunt in nuda Evangelii prædicatione, quod
credentibus promittit peccatorum remissionem.

Secun-

Secunda est Magistri Sententiarum lib. 4. distinct. 18. & aliorum veterum, qui, ut supponunt ad Sacramentum Pœnitentiæ perfectam contritionem prærequiri, ideoque peccata jam esse remissa priusquam subjiciantur clavibus Ecclesiæ, concludunt eum esse sensum horum verborum, *Ego te absolvo*, nempe, *Ego tanquam Juxta à Christo constitutus, juridice declaro peccata tua esse remissa*. Verum, quamvis hæc sententia non sit damnata à Concilio Tridentino, quemadmodum asserunt Vega, Soto, Salmeron, qui Concilio interfuerunt, & Cardinalis Palavicinus in Historia ejusdem Concilii, lib. 10. cap. 12. est nihilominus notata à Facultate Parisiensi anno 1638. ut temeraria & erronea. Et merito quidem; namque ejusmodi sententia detorquet Christi verba: *Quorum remisistis peccata, remittuntur eis*, in sensum alienum, aliud quippe est remittere peccata, aliud declarare peccata esse remissa. Quare

Tertia sententia, cui adhærendum est, asserit eum esse horum verborum sensum, *Ego Sacramentum absolutionis tibi impendo*, ita sanctus Thomas, vel *Ego do tibi, quantum in me est, gratiam reconciliativam, seu peccatorum remissionem*, sicque vera est forma, etiam respectu illius, qui prius Deo reconciliatus, peccata clavibus subjicit, tum quia ille recipit gratiam peccati ex natura sua remissionem; tum quia amplius cum Deo reconciliatur & crescit in ejus amicitia; tum quia ipsi remittitur aliquid pœnæ temporalis.

Dices: Ex S. Augustino Serm. 67. alias 8. de verbis Domini; Sacerdotes non solvunt pœnitentem à peccatis, nisi prius vitam spiritalem à Christo exceperit, quemadmodum Apostoli non

soluerunt Lazarum nisi jam suscitatum & vivum : *Qui Confiteor, inquit, foras prodit. Foras prodire non posset, nisi viveret: vivere non posset, nisi resuscitatus esset.* Et Concio. 2. in Psal. 101. *Merito per Ecclesiam peccatorum solutio dari potest: suscitari autem ipse mortuus, non nisi intus clamante Domino potest.* Similia habet Sanctus Gregorius, Homil. 26. in Evangelia. Et Sanctus Hieronymus in cap. 16. Matth. scribit Sacerdotes non purgare à peccatis, sed purgatos pœnites pronuntiare, sicut in veteri Lege leprosum non mundabat Sacerdos, sed mundatum declarabat: Ergo.

Distinguo anteced. Nisi prius vitam spiritalem acceperit, vitam, inquam, inchoatam, seu vitales motus pœnitentiæ, Concedo: nisi acceperit vitam perfectam, quæ consistit in gratia sanctificante & charitate, per quam anima unitur Deo, qui est vita ipsius, Nego anteced. Itaque resurrectio Lazari & resurrectio Pœnitentis in altero conveniunt, & in altero discrepant. In eo ambæ conveniunt, quod nec Lazarus, nec Pœnitens suscitari potuerint, nisi vivificam vocem Domini audivissent. Discrepant vero, quatenus Lazarus vocem Domini percipere non potuit, nisi postquam ejus anima iterum unita est corpori, à quo recesserat; nam ante illam unionem, in qua essentialiter & indivisibiliter consistit vita corporalis, corpus est plane mortuum, caretque omni sensu & motu vitali. Contra vero peccator priusquam infundatur gratia sanctificans, & per charitatem uniatur Deo, interiorius audit vocem Domini per gratias actuales, quæ sunt actus vitales, utpote illustrationes mentis, & piæ voluntatis affectiones, quibus movetur ad Contritio-

tionem, & prodit foras per Confessionem quodammodo vivus propter ejusmodi actus vitales, ac tandem à peccatis solvitur manu Apostolica. Nec aliud docet Sanctus Hieronymus citato loco; ibi enim carpit supercilium quorundam Sacerdotum, qui arbitrabantur se pro nutu posse damnare innocentes, & solvere noxios, cum Sacerdos pro officio suo, *postquam audierit peccatorum varietates*, exploraritque confitentium affectus & dispositiones, judicare debeat quis sit solvendus, quisve ligandus, quemadmodum Sacerdotes in veteri Lege discernebant inter Lepram & Lepram, mundum & immundum, & per sacrificia in Lege præscripta Leprosum sanatum solvebant ab immunditia legali, & societati, ex qua ejectus fuerat, restituebant.

Q. 5. *Quibus impertienda est, aut neganda absolutio?*

R. 1. Generatim loquendo, iis statim impertienda est, quos Confessarius prudenter judicat vere esse contritos; quia illi habent jus ad absolutionem; Confessio quippe fit ad eam obtinendam, si nihil obstat ex parte confitentis; & Confessarius eam excipit hac tacita conditione.

Dixi: *Generatim loquendo*; quia si Pœnitens versetur in morali ac veluti proximo labendi periculo, quantuncumque contritus appareat, differenda tamen est absolutio, donec removerit peccandi occasionem, v. g. fornicariam, omiserit controversiam, inimicitiarum causam diremerit.

R. 2. Iis neganda est absolutio, quos moraliter certus est confessarius, aut esse potest & debet per diligens examen, carere sufficienti con-

trititione: quia nunquam licet, sub quolibet necessitatis prætextu, celebrare Sacramenta aliò ritu, & in alia materia, quam Christus instituit, v. gr. Eucharistiam conficere alio pane, quam triticeo, baptizare alio liquore, quam aqua, nam præterquam quod irritum esset Sacramentum & plane nullum, Minister reum se gravissimi sacrilegii constitueret: Atqui vera contritio est à Christo instituta essentialis materia Sacramenti Pœnitentiæ; Ergo nefas est illud administrare, si evidenter desit vera contritio. Unde merito Innocentius XI. anno 1670. & Clerus Gallicanus anno 1700. proscripserunt hanc propositionem. *Pœnitenti habenti consuetudinem peccandi contra Legem Dei, naturæ, aut Ecclesiæ, & si emendationis spes nulla appareat, nec est deneganda, nec differenda est absolutio, dummodo ore proferat se dolore & proponere emendationem.*

Atque hæc ratio probat etiam denegandam absolutionem iis, qui etiamsi non sint conscii nisi peccatorum venialium, ea confitentur absque ullo sensu doloris & emendationis proposito, quia deest materia essentialis, sine qua non potest stare Sacramentum.

Ergo iis deneganda est absolutio, 1. Qui cum proximo inimicitias exercent, nec cum eo reconciliari volunt, nec odium deponere, nec sincera dilectione eos prosequi.

2. Qui cum æs alienum detineant, aut proximi famam læserint, restituere vel satisfacere detrectant.

3. Qui sumptibus superfluis debita contrahunt, quibus solvendis pares non sunt, aut si pares, debita solvere negligunt, unde Creditores,
Arti-

Artifices, Mercatores grave patiuntur detrimentum.

4. Qui artes illicitas & prohibitas profitentur, ut Usurarii, & quicumque Artibus quidem per se licitis utuntur ad illicita, ut Pictores qui pingunt Tabellas, & Bibliopolæ, qui divendunt libellos ad libidinem provocantes.

5. Qui versantur in proxima peccandi occasione, sive ex natura sua inducat ad peccatum, sive ex pœnitentis infirmitate. *Falsa fit pœnitentia*; inquit Concilium generale Lateranense II. can. 22. *cum pœnitens ab officio vel Curiali, vel negotiali non recedit*, (adde pastorali) *quod sine peccato agi nulla ratione prævalet*.

6. Qui ex negligentia culpabili ignorant prima fidei documenta, ut Mysteria sanctissimæ Trinitatis & Incarnationis. Ita Innocentius XI. an. 1679. & Clerus Gallicanus anno 1700.

R. 3. Iis differenda est absolutio, (excepto casu necessitatis) de quorum contritione & sincera conversione merito dubitare debet Confessarius; quia in Sacramentis conficiendis non licet uti materia dubia, præsertim ubi haberi potest certa: Atqui Contritio, de cujus veritate merito dubitatur vel dubitari oportet, est materia necessaria Sacramenti Pœnitentiæ. Ergo absolutio tunc est differenda. Unde sanctus Augustinus Enchir. cap. 65. *Quia, inquit, plerumque dolor alterius cordis occultus est alteri, neque in aliorum notitiam PER VERBA, aut quæcumque signa procedit... recte constituuntur ab iis qui Ecclesiis præsunt, tempora pœnitentiæ, ut fiat satis etiam Ecclesiæ. Et Yvo Carnotensis epist. 228. Rationis ordo hoc exigit, ut intermus Iudex (nempe Deus) tanto remittat celerius,*

quanto solus magis viget interius; Judex vero, qui tantum videt in facie usque adeo delinquentes sub peccati pœna detineat, donec per MANIFESTUM pœnitentiæ fructum, quis sit pœnitentis affectum intelligat.

Dixi: *Excepto casu necessitatis*: quia in extremis periculis Medicus, cui desunt remedia indubitata, utitur dubiis, quibus spes salutis utcunque affulgere potest; melius enim est periclitantem ægrotum aliqua spe recreari, quam omnino desperare.

Porro contritio debet esse dubia Confessario, quando Pœnitens peccandi occasione implicatus profert in testificationem suæ conversionis, non preces suas cum lacrymis, non opera, non mores emendatiores, sed verba dumtaxat, quibus pollicetur, sicut forte in aliis Confessionibus frustra pollicitus est, se amplius non peccaturum.

CAPUT VII.

De effectibus Sacramenti Pœnitentiæ.

Q. I. *Quinam sunt effectus Sacramenti Pœnitentiæ?*

R. Quinque numerantur. 1. Remissio peccati & pœnæ æternæ. 2. Imminutio pœnæ temporalis pro majori vel minori dispositione pœnitentis. 3. Redintegratio amicitiae cum Deo per peccatum violatæ. 4. Restitutio & reviviscentia (ut loquuntur) virtutum ac meritorum, quæ per peccatum fuerant deperdita. 5. Auxilia actualia, seu jus ad illa accipienda tempore opportuno, quibus peccator justificatus possit deinceps vitare peccata, & in bono proficere ac perseverare. Hic consulenda quæ dicta sunt de justis.

justificatione Tom. 2. Tract. de Gratia, c. 4. §. 1. ut intelligat Confessarius quam mira mutatio fieri debeat in corde peccatoris ad obtinendam remissionem peccatorum, colligatque ex effectibus quæ vera, quæve falsa sit pœnitentia?

Q. 2. *Merita reviviscuntne in eodem perfectionis gradu?*

R. Gratia sanctificans, virtutum dona, & bonorum operum merita subsequente peccato mortificata, per absolutionem reviviscunt pro majori vel minori peccatoris pœnitentia, ita ut si pœnitentia ejus fuerit vehemens & intensa, per absolutionem recuperet quidquid meriti per peccatum amiserat: si vero fuerit admodum remissa, parum, vel etiam nihil reparet. Ita Sanctus Thomas, 3. part. qu. 84. art. 2. & art. 5. ad 3. colligiturque ex Conc. Trid. sess. 14. cap. 2. ubi expresse docet lapsos post Baptismum non nisi magnis fletibus & laboribus resurgere ad integram sanitatem.

Q. 3. *Si quis post absolutionem iterum labatur, reviviscuntne similiter peccata per Sacramentum remissa?*

R. Non reviviscunt formaliter; quia Deus non potest restituere peccatum deletum, sicut restituit virtutes per peccatum subsequens extinctas, alioquin esset author peccati, sed reviviscunt virtualiter seu æquivalenter, quatenus lapsus recidivus ex peccatis per absolutionem remissis contrahit specialem malitiam graviori pœna plectendam, quemadmodum in judiciis humanis fur jam mulctatus, si furtum iteret, pejor judicatur, nec virgis dumtaxat cæditur, sicut prius, sed laqueo suffocatur. *Dicendum*, inquit Sanctus

Thomas 3. part. quæst. 88. art. 2. *quod peccata dimissa per pœnitentiam redire dicuntur, in quantum reatus eorum, ratione INGRATITUDINIS, virtualiter continetur in peccato sequenti.*

CAPUT VIII.

De Ministro Sacramenti Pœnitentiæ.

Q. I. *Quis est Minister Sacramenti Pœnitentiæ?*

R. Solus Sacerdos; dictum est enim solis Sacerdotibus, Joan. 20. *Quorum remiseritis peccata, remittuntur ei.*

Dices: Habetur Jac. 5. *Confitemini alterutrum peccata, & orate pro invicem, ut salvemini; Ergo.*

Nego conseq. quia in laudato textu vel non agitur de Sacramentali confessione, vel de ea agitur. Si primum, textus non est ad propositum. Si secundum, ut verisimilius videtur, sensus est, confitemini omnes hominibus, non quibuslibet, sed Presbyteris, de quibus Apostolus immediate præmiserat: *Infirmatur quis in vobis? inducat Presbyteros Ecclesiæ, ut orent super eum . . . & si in peccatis sit, remittentur ei.* Ex quibus verbis statim infert Apostolus: *Confitemini alterutrum, &c.*

Instas: Constat ex Magistro Sententiarum, lib. 4. distinct. 17. & ex S. Thoma in hanc distinctionem, Laicos excepisse confessiones in casu necessitatis.

R. Ex fisdem authoribus Confessio illa non erat Sacramentalis: *Et ideo, inquit S. Thomas Supplem. qu. 8. art. 2. ad 3. oportet quod iterum confiteatur Sacerdoti, cum copiam habere potuerit.*

Instas iterum: S. Cyprianus Epist. 11. permit-
tit

tit Diaconis, absente Presbytero, Pœnitentes infirmos etiam absolvere, excepta eorum Confessione.

Distinguo: absolvere à pœnis canonicis, eosque Ecclesiæ communioni restituere, ut sic ad Dominum proficiscantur, Concedo: absolvere Sacramentaliter à peccatis, Nego.

Q. 2. *Quilibet Sacerdos potestne esse Minister Sacramenti Pœnitentiæ?*

R. Non potest, nisi habeat jurisdictionem vel ordinariam, vel delegatam. Ordinaria est propria Sacerdotum, qui curam habent animarum, ut Episcopi & Parochi: delegata, quæ à Prælatiis conceditur, quibus ex officio non incumbit cura animarum. Ita Concilium Lateranense IV. can. 21. & Concilium Tridentinum, sess. 14. cap. 7. his verbis: *Quoniam igitur natura & ratio iudicii illud exposcit, ut sententia in subditos dumtaxat feratur, persuasum in Ecclesia Dei semper fuit, & verissimum esse Synodus hæc confirmat, nullius momenti absolutionem eam esse debere, quam Sacerdos in eum profert, in quem ordinariam aut subdelegatam non habet jurisdictionem.*

Dices 1. In sacra ordinatione Episcopus manus imponens cuilibet Presbytero ordinato, ait: *Accipe Spiritum Sanctum, quorum remisistis peccata, remittuntur eis.* Ergo quilibet Sacerdos habet potestatem absolvendi à peccatis.

Distinguo consequ. Habet potestatem incompletam, Concedo: Completam, Nego consequentiam. Sic qui donatur laurea doctorali, accipit potestatem docendi, regendi & iudicandi, quam tamen exercere non potest, nisi Beneficium

cium aut Officium obtineat, vel mandatum accipiat.

Dices 2. Sacerdos sine jurisdictione valide baptizat & infirmos ungit, quamvis illicite. Ergo & Pœnitentes absolvit.

Nego consequ. & paritatem. Disparitas est quod forma aliorum Sacramentorum non sit actus judicialis sicut absolutio: actus autem judicialis jurisdictionem necessario supponit in Ministro.

Instas: Quilibet Sacerdos absolvere potest à peccatis venialibus absque jurisdictione, Ergo.

Nego anteced. Contrarium enim declaravit Congregatio Cardinalium sub Innocentio XI. an. 1679. his verbis: *Ne venialium Confessio fiat simplici Sacerdoti non approbato ab Episcopo aut Ordinario. Si Confessarii etiam Regulares, aut quicumque alii Sacerdotes secus egerint, sciant Deo Optimo Maximo se rationem reddituros esse, neque defuturam Episcoporum Ordinariorum justam & rigorosam animadversionem in contra facientes.*

Q. 3. *Quis delegare potest ad audiendas Confessiones?*

R. Juxta vulgare effatum, quivis habens jurisdictionem ordinariam delegare potest. Sed cum ex inordinata delegatione multi orirentur defectus & magna confusio non sine animarum pernicie; nempe Parochi nonnunquam delegabant vagos Sacerdotes, flagitiosos & incapaces: quin Regulares, etiam aliquando apostatæ sub prætextu privilegiorum Sedis Apostolicæ, renitentibus aut insciis Pastoribus, indiscriminatim peccatores absolvebant: Concilium Tridentinum occurrit tantis malis saluberrimo hocce Decreto Sess. 23. cap. 13. de Reform. *Quamvis Pres-*
byte.

byteri, inquit, in sua Ordinatione à peccatis absolventi potestatem accipiant, decernit tamen sancta Synodus nullum etiam REGULAREM posse confessiones SECULARIUM, etiam SACERDOTUM, audire, nec ad id idoneum deputari, nisi aut PAROCHIALE BENEFICIUM, aut ab Episcopis per examen, si illis videbitur esse necessarium, aut alias idoneus judicetur, & approbationem, quæ gratis detur, obtineat: PRIVILEGIIS & consuetudine quacumque etiam immemoriali, non obstantibus.

Ex hoc itaque Decreto,

1. Nullus Parochus potest ullum Sacerdotem delegare ad audiendas Confessiones suorum Parochianorum, nisi ille fuerit ab Episcopo approbatus.

2. Ne quidem Sacerdotes sæculares possunt absolvi à Sacerdote, qui nec habet Beneficium cum cura animarum, nec ab Episcopo est approbatus, contrariam doctrinam proscripserunt Alexander VII. anno 1665. & Clerus Gallicanus anno 1700. Parochi tamen possunt sibi eligere quem voluerint Confessarium, modo ille sit approbatus ab Episcopo. Ita enim habetur, cap. *Ne pro dilutione*, tit. *de Pœnit. & Remiss.*

3. Revocata sunt hocce Decreto privilegia Regularium, si quæ antea habebant, absolvendi sine licentia Episcopi: sic enim habet: *Privilegiis & consuetudine quacumque non obstantibus.* Ita declararunt Summi Pontifices Pius IV. Constitutione, *In Principis Apostolorum*: Sanctus Pius V. in Bulla, *Romani Pontificis*, Gregorius XIII. in Bulla, *In tanta Negotiorum mole*; Clemens X. Constitutione, *Superna*. Ac tandem Rex Christianissimus Ludovicus XIV. uti *Canonicarum Sanctionum*

vindex anno 1668. solemniori Edicto in toto Regno suscepto fanxit: ut circa approbationem fervarentur, quæ Concilium Tridentinum, Pius IV. Sanctus Pius V. Gregorius XIII. Clemens VIII. Paulus V. Gregorius XV. Urbanus VIII. & Alexander VII. mandarunt, scilicet nullum Regularem idoneum esse ad audiendas sæcularium confessiones, nisi obtenta Episcopi approbatione, quam limitare & revocare possit, absque eo quod revocationis causam aperire teneatur.

4. In illo Decreto non comprehenduntur confessiones Regularium, quas proinde Sacerdos non approbatus ab Episcopo excipere potest cum consensu legitimo Superiorum Regularium.

Nomine autem Regularium hic non intelligunt Moniales; nam ex Constitutione, *Inscrutabili* Gregorii XV. ne quidem Regulares possunt absolvere Moniales sibi subditas, etiam exemptas absque approbatione Episcopi, & Clerus Gallicanus anno 1700. hancce propositionem damnavit ut falsam, & à Concilii Tridentini mente alienam: *Religiosæ exemptæ possunt absolvi à Sacerdote non approbato ab Episcopo, sive Sacerdos ille sit Sæcularis, sive Regularis.*

5. Decretum Concilii non spectat habentes Beneficium, cui cura animarum annexa est; Parochus enim eo ipso censetur approbatus ad excipiendas confessiones suorum Parochianorum, quo Episcopus Beneficium Pastorale ipsi contulit. Sed si dimiserit Beneficium, indiget approbatione.

Dixi: *Suorum Parochianorum*; quia ad excipiendas exterorum confessiones, satis non est, ut habeat proprii Parochi consensum, sed requiritur

ritur approbatio Episcopi saltem tacita. Est autem tacita, cum Episcopus non contradicit consuetudini quodammodo necessariæ, secundum quam vicini Parochi etiam diversæ Diœceseos sese mutuo juvant ad sustinenda Pastoralia onera.

Q. 4. *Quid si Parochus stante illa consuetudine prohibeat ne Parochiani apud alium Parochum peccata deponant?*

R. Si prohibitio illa sit potius in destructionem, quam in ædificationem, recurrendum est ad Episcopum; neque enim Episcopi in Concilio Lateranensi IV. quidquam à sua auctoritate detraxerunt, cum canone, *Omnis utriusque sexus*, sanxerunt sine licentia proprii Sacerdotis, qui est Parochus, alienum Sacerdotem non posse solvere nec ligare. Unde merito Joannes XXII. damnavit propositionem Joannis de Poliaci Theologi Parisiensis, qua assererat statuto canone, *Omnis utriusque sexus*, nec Episcopum, nec Papam efficere posse, ut confessio facta alieno Sacerdoti sine consensu proprii valeret. Similem propositionem perstrinxit Clerus Gallicanus anno 1655. Enimvero quis crederet Regem, stante Edicto, quo sanxit omnes cives jus suum prosecuturos coram Judice, quem in Provincia eis constituit, non posse ex speciali gratia, nec debere ex causa alium Judicem nonnullis constituere?

Q. 5. *Qui Religionis causa ex diversis Diœcesibus peregrinantur ad sacras quasdam Aedes, possuntne ibi à peccatis absolvi?*

R. Si mala fide & primario illuc profisciantur, ut disciplinam suæ Diœceseos declinent, absolvi nequeunt: si vero bona fide & Religionis causa primario illuc peregrinentur, absolvi possunt:

sunt : Sacerdotes enim illius loci tacite sunt approbati. Idem dicendum de Parochiano, qui cujusdam negotii causa diversaretur ad tempus in aliena Parochia ; secus si sine consensu expresso vel tacito ad eam profisceretur , ut ibi peccata deponeret. Ita declarat Concilium Senonense anno 1524. *Interroget Sacerdos, inquit, pœnitentes ad confessionem accedentes, an sint Parochiani, quia non debent absolvere nec audire in confessione nisi suos Parochianos.*

Q. 6. *Quot modis limitari potest approbatio?*

R. Quatuor. 1. Quoad locum, quomodo solent approbari Vicarii Parochorum , scilicet ut audiant confessiones in Parochia duntaxat ipsis designat. Consulto tamen Episcopi addere solent, & *in vicinia* , propter frequentes quæ occurrunt occasiones ferendi opem vicinis Parochis & Parochianis. 2. Quoad personas, puta Sæculares ; Moniales enim non comprehenduntur in approbatione generatim concessa, sed specialis requiritur ad earum confessiones excipiendas , ut constat tum ex laudata Bulla Clementis X. *Superna*, tum ex universalī praxi Ecclesiæ Gallicanæ. 3. Quoad tempus, v. gr. ad annum, in quo non censetur comprehendi tempus Paschale ; in generali enim Confessione Prælati non censetur derogare juri communi nisi exprimat. 4. Quoad casus , quos sibi reservant Summus Pontifex , & Episcopi.

Q. 7. *Quot requiruntur, ut casus in individuo censetur reservatus?*

R. Quatuor. 1. Ut actus sit lethaliter malus ; cum enim peccata venialia non sint materia Sacramenti Pœnitentiæ necessaria , retineri aut reservari

reservari nequeunt. Unde si Confessarius advertat peccatum pœnitentis non pertingere ad malitiam moralem defectu sufficientis consensus aut propter levitatem materiæ, poterit illum absolvere. Idem dicendum in dubio probabili peccaveritne lethaliter, vel non. Actus debet esse exterior. 3. Satis non est, ut ex corde exierit, sed insuper requiritur, ut peccatum sit consummatum, nisi aliter in lege, seu statuto expressum fuerit, quemadmodum provocatio ad duellum & ejus acceptatio, etiamsi non sequatur conflictus, lege communi reservantur, & in quibusdam Diœcesibus tactus impudici, & alia obscœna Confessarium inter & Pœnitentem etiam seclusa copula carnali. 4. Requiritur ut peccatum sit à pubere commissum; pubertas autem incipit in masculis ab anno decimo quarto completo, & in fœminis à duodecimo completo.

Q. 8. *Quis potest absolvere à casibus reservatis?*

R. 1. Generatim qui eos sibi reservavit, & quos ipse specialiter delegavit.

R. 2. In articulo mortis quilibet Sacerdos etiam excommunicatus potest absolvere ab omnibus peccatis, & censuris, si desit alter Sacerdos approbatus; ita Concilium Trident. sess. 14. cap. 7.

R. 3. Episcopi juxta declarationem Concilii Trident. sess. 24. cap. 26. de reformatione, absolvere possunt ab omnibus peccatis & censuris Summo Pontifici reservatis, ac irregularitatibus, non quidem ex defectu, sed ex delicto, (homicidio voluntario excepto) modo illa deducta non sint ad forum contentiosum.

D. Habert Theolog. Tom. VIII.

Uu

R. 4.

R. 4. Regulares nullum habent privilegium à Sede Apostolica absolvendi à casibus Episcopo reservatis ; ita Clemens X. in sua Bulla *Superna*, anno 1670. Præiverant Clemens VIII. anno 1601. Urbanus VIII. anno 1628. Alexander VII. anno 1659. in suo Brevi ad Episcopum Andegavensem, in quo damnat propositionem quorundam Regularium asserentium id sibi competere ex privilegio, tanquam falsam, Episcoporum auctoritati & Apostolicæ Sedi injuriosam.

Q. 9. *Sic absolutus in articulo mortis à peccatis & censuris reservatis, si convalescit, teneturne se sistere coram superiore sub pœna reincidentiae, ut ajunt in similes censuras?*

R. 1. Non tenetur, si absolutus est in articulo mortis, nec peccata habeant annexam censuram. Dico, *In articulo mortis* ; quia si ex alia necessitate fuerit absolutus à non habente potestatem absolvendi à casibus reservatis, puta quia absque infamia & scandalo non potuit remitti ad superiorem, tenetur ad eum postea recurrere : & ratio discriminis est, quod in articulo mortis omnis Sacerdos, deficiente altero, specialiter approbato, directe absolvit à peccatis & censuris, utpote qui in illo extremo casu jurisdictionem habeat ab Ecclesia : in casu autem alterius necessitatis indirecte solum absolvat à peccatis reservatis, cum non sit ad id specialiter approbatus.

R. 2. Si in articulo mortis absolutus est à censuris reservatis, ex Bonifacio VIII. in sexto tit. de sententia Excommunicationis ipso jure reincidit in similem censuram, si ad superiorem recurrere negligat : verum canon ille non est ubique
in

in Gallia receptus. Quare quisque consulere debet Librum Ritualement suæ Ecclesiæ.

Q. 10. *Sacerdos qui non habet potestatem absolvendi à reservatis, audita pœnitentis confessione, potestne eum absolvere à non reservatis & remittere ad superiorem pro reservatis?*

R. Affirmarunt Sanct. Antoninus, Dominicus Soto, Cajetanus, & alii quamplurimi ex veteribus, atque ex iis Sanct. Carolus Borromæus quarta parte Actuum Mediolanensium. Sed hodierna praxis est omnino contraria & sequenda. Quin laudati Pontifices S. Clemens VIII. & Urbanus VIII. declararunt ejusmodi absolutiones esse irritas & prorsus nullas, nisi concessæ fuerint in casu necessitatis ad vitandam infamiam pœnitentium, ut jam dictum est.

Q. 11. *Qui confessus est habenti potestatem absolvendi à reservatis, sed vel oblitus est aliquod peccatum reservatum, vel confessio ejus fuit nulla defectu sufficientis contritionis, teneturne iterum adire superiorem?*

R. 1. Qui in Jubilæo omnia præstitit ad lucrandas Indulgentias, & vere pœnitens confessus est, potest absolvi à quolibet Sacerdote approbato, si postea recordetur se ex oblivione inculpabili non declarasse aliquod peccatum reservatum, quia Summus Pontifex Jubilæi gratia expresse tollit omnem peccatorum & censurarum reservationem. 2. Si confessio fuit nulla defectu sufficientis contritionis, peccata ejus manent reservata, tam ea quæ confessus est, quàm ea quæ fuit oblitus; quia gratia Jubilæi non conceditur nisi vere pœnitentibus. Idem à fortiori dicendum de eo qui sine debita contritione con-

fessus est superiori ; quia superior non tollit reservationem nisi sacramentaliter absolvendo, vel ad inferiorem remittendo. 3. Si confessio facta superiori fuit rata ac valida, plures ex modernis asseruerunt sublatam esse reservationem peccati omissi ex oblivione inculpabili, sed absque fundamento. Afferunt nonnullas rationes, quas *convenientias* vocant ; sed quis nesciat ex iis solis nihil certo concludi ?

CAPUT IX.

De necessitate Sacramenti Pœnitentiæ.

Q. I. *Sacramentum Pœnitentiæ estne necessarium?*

R. I. Constat ex dictis esse necessarium necessitate tum medii, tum præcepti divini ; quia illud est necessarium necessitate medii, sine quo non potest obtineri remissio peccatorum, nec proinde salus æterna ; scriptum est enim, Apocal. 21. *Non intrabit in eam aliquid coinquinatum* : Atqui sine Sacramento Pœnitentiæ saltem in voto non potest obtineri remissio peccatorum, quæ post Baptismum commissæ sunt. *Quorum retinueritis* (peccata) *retenta sunt*, ait Dominus Joan. 20. Ergo. Porro quæ ex Dei instituto necessaria sunt necessitate medii, ea quoque sunt necessaria necessitate præcepti divini. Cum autem Deus non determinaverit, sed Ecclesiæ determinandum reliquerit, quando lapsi post Baptismum ad Sacramentum Pœnitentiæ recurrere debeant.

R. I. Præcepto Ecclesiastico fideles adulti tenentur peccata sua confiteri saltem semel in
anno

anno; sic enim habetur can. Concilii Lateranensis IV. ubique recepto, & confirmato à Synodo Tridentina sess. 14. cap. 5. & can. 8. verba Concilii Lateranensis sunt: *Omnis utriusque sexus fidelis, postquam ad annos discretionis pervenerit, omnia sua solus peccata confiteatur fideliter, saltem semel in anno, proprio Sacerdoti, & injunctam sibi pœnitentiam studeat pro viribus adimplere alioquin & vivens ab Ecclesie ingressu arceatur, & moriens Christiana careat sepultura.*

Plura circa hunc Canonem diligenter sunt notanda.

1. Hac lege tenentur omnes fideles, sive masculi; sive fœminæ, cum ad annos discretionis pervenerint, etiamsi nondum judicentur satis idonei, quibus Eucharistia conferatur. Prudens autem illa ætas accedit aliis citius puta 6. & 7. anno, aliis tardius, v. g. anno 8. Quapropter à 6. anno offerendi sunt Sacerdoti, & ab ipso probandi, an sint capaces absolutionis. Ita Sanctus Carolus Borromæus in Institut. ad Confessarios.

2. Proprius Sacerdos, cui, aut ex cujus consensu fideles confiteri debent, intelligitur in hoc Canone is, à quo Eucharistiam tempore Paschali teneatur recipere, qui in omnium sententia est Parochus: ita tamen ut non excludantur Summus Pontifex & Episcopi, ut jam observavimus.

3. Canon non determinat quo anni tempore fideles confiteri debeant; sed ex usu assignatur tempus Quadragesimæ, *Quem morem, inquit Patres Tridentini citato cap. 5. hæc sancta Synodus maxime probat, & amplectitur tanquam pium & . . . retinendum.* In Ecclesia vero Gallicana determina-

tur tempus Paschale, scilicet à Dominica Palmarum ad Dominicam in albis inclusive. Ita Clerus Gallicanus anno 1625. 1635. & 1640.

4. Cum Lateranense Concilium novam Legem non statuerit, quemadmodum observant Patres Tridentini cit. cap. 5. sed prohibuerit, ne fideles præceptum divinum ultra annum implere differrent, qui non est confessus tempore Paschali; tenetur quamprimum confiteri, peccatque quamdiu sine causa procrastinat, sicut debitor, qui non solvit termino præscripto, liber non est à debito, sed tenetur quanto citius solvere.

5. Pœna interdicti non est latæ sententiæ, sed ferendæ dumtaxat. Quare Parochus non potest arcere ab ingressu Ecclesiæ, nec privare Ecclesiastica sepultura Parochianum, qui in Paschate non est confessus, nisi prius intervenerit sententia Superioris.

Q. 2. *Qui conscii non sunt nisi peccatorum venialium, tenenturne hoc præcepto?*

R. Dissentiunt Theologi. Plures negant: alii affirmant, ut S. Bonaventura in 4. dist. 17. part. 2. art. 1. qu. 2. & S. Thomas eadem distinct. qu. 3. art. 1. quæstiuncula 3. ad 3. ubi sic habet: *Ex vi Sacramenti non tenetur aliquis venialia confiteri, sed ex institutione Ecclesiæ, quando non habet alia, quæ confiteatur;*

Q. 3. *Satisfitne præcepto per confessionem irritam & nullam?*

R. Minime; tum quia contraria opinio proscripta est ab Alexandro VII. anno 1665. & à Clero Gallicano anno 1700. tum quia debitor non satisfacit per nummum adulterinum, & nullius valoris.

Q. 4.

Q. 4. *Qui tempore Paschali confitetur Sacerdoti approbato, sed sine licentia proprii Parochi, satisfacitne præcepto?*

R. Si adsit consensus tacitus Episcopi, ut in Diœcesibus, in quibus non urgetur executio Canonis *Omnis utriusque sexus*, satisfacit. Secus si eam Episcopus urgeat, ut in Rhemenſi Catalaunenſi & Virdunenſi, in quibus ejusmodi Confessio declaratur irrita & iteranda, ut habetur cit. Canone.

Q 5. *Licetne Parochi copiam facere potentibus Parochianis adeundi quos voluerint ex Sacerdotibus ab Episcopo approbatis?*


R. Licet, si bene sint morati; secus si male, videantque petere in fraudem disciplinæ.

Dices: In tuto est illius conscientia, qui prudenter agit: Atqui prudenter agit Pastor, qui oves sibi creditas iis committit, quos Prælati, peritos & idoneos judicavit: Ergo.


Distinguo min. Si aliunde non constet obreptive obtentam approbationem, Concedo: si constet, Nego min. Prælati enim ipse suam sententiam rescindit, ubi sibi obreptum comperit. Nempe aut imperitos judicavit peritos falso aliorum testimonio deceptus: aut cum essent periti, ad nutum ejus in examine responderunt, & in praxi laxiores & perniciosas sequuntur opiniones; aut sanæ sunt doctrinæ, sed mollioris indolis, & ad omnem auram versatilis. Ejusmodi autem vitia, non in examine, sed sola experientia & usu deprehendi queunt. Porro Parochus, qui in propria causa non staret judicio sui Prælati per obreptionem contra se lato, stabit in causa Christi,

sti, in qua agitur de æterna salute ovium, quas proprio sanguine redemit? Absit.

Sed esto, extranei Confessarii omnes sint peritissimi; sanæ doctrinæ, & strenui vindices Legis Divinæ & Ecclesiasticæ, adhuc timendum est ex parte ficti Pœnitentis, nisi mittatur ad probatos Confessarios, qui ex publica fama illum noverint, is quippe cum nulla sit illis Religio in multis offendere, v. g. usuras exercere, contractus injustos inire, suo officio in gravioribus deesse, certo certius Confessario etiam prudentissimo obrepet ignotus.



Tra-



Tractatus DE SACRAMENTO EXTREMÆ UN- CTIONIS.

Q. 1. *Extrema Unctio estne Sacramentum proprie dictum, à Christo Domino institutum?*

R. Affirmative, idque fide divina credendum definiit Concil. Trident. sess. 14. can. 1. de Extrema Unctione. Probaturque ex Scriptura: Jac. 5. sic habet Apostolus: *Infirmatur quis in vobis? inducat Presbyteros Ecclesiæ, & orent super eum ungentes eum oleo in nomine Domini: oratio fidei salvabit infirmum, & alleviabit eum Dominus, & si in peccatis sit, remittentur ei.* Ex quibus verbis sic conficitur argumentum. Tria sunt necessaria & sufficiunt ad Sacramentum novæ Legis proprie dictum. 1. Signum sensibile divinitus institutum. 2. Promissio gratiæ huic signo annexa. 3. Mandatum observandi ejusmodi signum: Atque hæc tria habentur in laudatis verbis Apostoli: Ergo.

Minor probatur quoad singulas partes.

1. Unctio & oratio sunt signum sensibile & quidem à Christo institutum, à sancto autem Ja-

cobo dumtaxat promulgatum, virtus enim humana efficaciam tribuere non potest ejusmodi unctioni, quam Apostolus illi asserit.

2. Promissio gratiæ huic signo annexa est: *Oratio fidei salvabit infirmum, & alleviabit eum Dominus, & si in peccatis sit, remittentur ei.* Ergo tres sunt effectus hujus Sacramenti. Primus est sanitas corporis, *Oratio fidei salvabit infirmum*, si tamen salutis animæ expediat, ad quam Sacramenta sunt primario instituta. Unde S. Thomas in 4. distinct. 23. qu. 1. art. 2. *Quæ, inquit, operans nunquam inducit secundarium effectum, nisi secundum quod expedit ad principalem; ideo ex hoc Sacramento non sequitur corporalis sanatio semper, sed quando expedit ad spiritualem sanationem, tum semper eam inducit dummodo non sit impedimentum ex parte recipientis.* Secundus effectus isque primarius, est allevatio animæ abstergendo peccati reliquias. Tertius est peccati etiam mortalis remissio; quia ex S. Thoma lib. 4. contra gentes, c. 73. *Contingit quod homo omnium peccatorum, quæ commisit notitiam vel memoriam non habet, ut possit per pœnitentiam singula expurgare, sicut etiam quotidiana peccata, sine quibus præsens vita non agitur, à quibus oportet hominem in suo exitu per hoc Sacramentum emundari.* Unde merito Sacramentum Extremæ Unctionis dicitur à Patribus Tridentinis pœnitentiæ consummativum.

Q. 2. *Quid per reliquias peccatorum intelligitur?*

R. Humani defectus & infirmitates ex peccato contractæ, ut torpor animi, mœror & anxietas, quæ morti vicinum magis vexare solet, & diffidentiam provocat: *Allevatur, inquit Catechismus Romanus, & erigitur ægri animus divinæ bonitatis spe, eaque corroboratus morbi incommoda omnia fert levius*

levius, ac ipsius demonis calcaneo insidiantis artificium & calliditatem facilius eludit.

Ergo materia remota hujus Sacramenti est oleum, *Ungentes eum oleo*, & quidem olivarum, quod est oleum simpliciter dictum, sicut aqua naturalis dicitur simpliciter aqua, & panis triticeus, simpliciter panis.

Ergo materia proxima est ipsa unctio, sicut ablutio in Baptismo, *Ungentes eum*, ait Apostolus. Ad Sacramenti autem veritatem una sufficit unctio: ex præcepto vero Ecclesiæ multiplex adhibetur pro cujusque Diœceseos disciplina consulenda & observanda, si per tempus liceat.

Ergo forma hujus Sacramenti est oratio quæ unctionem comitatur. *Orent super eum ungentes.*

Ergo minister est solus Sacerdos, *Inducat Presbyteros Ecclesiæ.*

Ergo subjectum est infirmus baptizatus & adultus, *Infirmatur quis in vobis?* Græci tamen unguunt sanos & infirmos; quia, inquit, etsi S. Jacobus dicat ungendos infirmos, sanos tamen non excludit.

Dixi: *Adultus*; pueri enim non sunt ungendi ante usum rationis, cum in iis nulla peccata sint abstergenda, nullæve peccatorum reliquiæ.

Q. 3. *Estne de necessitate Sacramenti, ut oleum sit ab Episcopo benedictum?*

R. Dissentiunt Theologi. In Ecclesia Orientali Presbyteri benedicunt oleum, quo inungunt infirmos. Quare si Sacerdos advertat incaute se adhibuisse oleum Catechumenorum, aut Chrisma pro oleo infirmorum, observabit Decretum Innocentii III. Cap. *Pastoralis*, tit. *de Sacramentis non iterandis*; *In talibus nihil est iterandum, sed caute sup-
plendum*

plendum quod incaute fuerat prætermiffum; quia in Sacramentis conferendis non licet fequi opinionem probabilem de valore Sacramenti, relicta tutiore ex Decreto Innocentii XI. anno 1679. & ex Clero Gallicano anno 1700.

Q. 4. *Quidaget Parochus, quando oleum benedictum deficit?*

R. Priusquam totaliter deficiat, admiscebit non consecratum ex cap. *Quod in dubiis*, tit. de *Consecratione Ecclesiae*.

Q. 5. *Potest irritari illud Sacramentum?*

R. Potest, si status morbi sit diversus, & infirmus per aliquod tempus ex morbo revera convalescit; quia illud Sacramentum non imponit characterem. Iterari autem non debet eodem morbo permanente, quia datur per modum medicinae per se efficacis ad expellendum illum morbum.

Q. 6. *Quenam requiritur dispositio in fufcipiente illud Sacramentum?*

R. Per se requiritur status gratiae, quia est Sacramentum vivorum; per accidens autem fufficit attritio, nempe si ægrotus non confessus amisit usum rationis.

Q. 7. *Quid observabit Sacerdos, cui constat infirmum ante delirium peccasse moraliter, nec ulla Pœnitentiæ signa dedisse?*

R. Observabit, num per tempus potuerit dolere de peccato, in qua hypothefi Sacramentum ministrabit; in extremo enim periculo fatius est Sacramentum exponere, quam hominis salutem, propter quam institutum est. Sed si constat impœnitentem amisisse usum rationis, ut si præ nimia crapula eadem lethali rationis factus impos animam exhalaturus sit, Sacramentum ministrare non debet.

Q. 8.

Q. 8. *Intentio estne necessaria in suscipiente Sacramentum Extremæ Unctionis?*

R. Interpretative sufficit. Habetur autem hujusmodi intentio, quando quis, etsi Sacramentum prius non expetierit, nec de eo forte cogitaverit, præsumitur illud fore expetiturum, si rationis esset compos.

Q. 9. *Extatne præceptum divinum recipiendi illud Sacramentum?*

R. Non conveniunt Theologi; de eo tamen idem videndum videtur quod de Sacramento Confirmationis supra diximus, nempe jure divino & Ecclesiastico esse præceptum: sicut enim confirmatio est perfectio Baptismi; sic Extrema Unctio in omnium mente est perfectio & consummatio poenitentiae: illa quidem, ut sanum adversus Religionis Christianæ hostes corroboret; hæc ut infirmum confirmet adversus Dæmonis tentationes, quæ in vitæ exitu solent esse acriores.

Q. 10. *Estne præceptum administrandi Sacramentum Extremæ Unctionis?*

R. Pastores saltem ad id tenentur jure divino & Ecclesiastico; sunt enim dispensatores Mysteriorum Dei: infidelis autem est dispensator, qui bona Domini in commodum aliorum recepta non erogat. Adde Sacramentum Extremæ Unctionis posse per accidens esse necessarium necessitate mediæ, ut contingit quando infirmus lethali peccato gravatus, nec perfecte contritus, non est capax alterius Sacramenti.

Quæ strictim hic percurrimus, fusius exposita habentur Tom. 6. omnino consulenda, ut pateat quanti faciendum sit illud Sacramentum.

Tracta-



Tractatus DE SACRAMENTO ORDINIS.

CAPUT PRIMUM.

De nomine, definitione, & existentia
Sacramenti Ordinis.

Q. I. *Quare Sacerdotium vocatur Ordo?*

R. Quia Ordo generatim est dispositio superiorum & inferiorum rerum, quæ inter se ita aptatæ sunt, ut una ad alteram referatur; sic Congregationes Monachorum & Monialium Ordines vocitari solent, sunt quippe conflatae ex personis apte inter se dispositis ad serviendum Deo speciali & distincta quadam vivendi ratione: Atqui Sacerdotium consecrat homines, & in distinctis honorum gradibus aptat ad celebrandum Eucharistiæ Sacrificium, & ad obeunda spiritualia ministeria erga plebem: Ergo merito dicitur Sacramentum Ordinis

Ritus autem, quo consecrantur hujusmodi personæ, est Sacramentum, ut statim dicetur, non
vero

vero earum status : Sacramentum quippe Ordinis non est quid permanens, sed est actio transiens, quæ in ipsa consecratione consistit, & ex qua efflorescit status Sacerdotalis, seu Clericalis.

Q. 2. *Ordo estne Sacramentum novæ Legis propriè dictum?*

R. Affirmative, est de fide; sic enim definiit Conc. Trident. sess. 23. can. 3. *Si quis dixerit Ordinem sive sacram Ordinationem non esse vere & propriè Sacramentum à Christo Domino institutum . . . anathema sit.* Probatur ex Scriptura 2. Tim. I. v. 9. *Adhono te, ut resuscites gratiam Dei, quæ est in te per impositionem manuum mearum.* In his verbis tria notantur ad verum Sacramentum requisita. 1. Signum externum, nempe impositio manuum. 2. Gratia huic signo annexa. 3. Divinum mandatum; Apostoli enim & eorum successores non sine divino mandato illum ritum gratiæ productivum observarunt.

Q. 3. *Quomodo definitur Sacramentum Ordinis?*

R. Definitur, Sacramentum novæ Legis, quo spiritualis potestas tribuitur homini baptizato ad Eucharistiam conficiendam, & ad omnia Ecclesiastica ministeria rite & ex ordine obeunda.

Dicitur 1. *Sacramentum novæ Legis*, ut denotetur genus, in quo Ordinatio convenit cum aliis Sacramentis.

Dicitur 2. *Quo spiritualis potestas tribuitur ad Eucharistiam, &c.* quæ verba locum obtinent differentiæ. Ordo quippe à cæteris Sacramentis essentialiter distinguitur, quatenus totus est primario ad sacrificium Corporis, & Sanguinis Domini rite offerendum : *Cum autem divina res sit tam sancti Sacerdotii ministerium*, inquit Patres Tridentini

tini fess. 23. cap. 2. *consentaneum fuit*, quo dignius & majori cum veneratione exerceri posset, ut in Ecclesiæ ordinatissima dispositione plures & diversi essent Ministrorum Ordines, &c.

Ergo gradus honoris, qui cernuntur in statu Ecclesiastico non sortiuntur nomen, & rationem Ordinis ac Sacramenti, nisi quatenus referuntur ad Eucharistiæ sacrificium.

Ergo Archiepiscopatus, & Primatus Summi Pontificis non sunt Ordines, nec Sacramenta; quia præcise sumpti non expectant sacrificium, sed regimen Ecclesiæ. Nec Episcopatus esset Ordo distinctus à presbyteratu, nisi speciali modo referretur ad sacrificium, ut suo loco explicabitur.

Dicitur 3. *Homini baptizato*; tum quia sine baptismali charactere nullus est capax aliorum Sacramentorum: tum quia mulieres jure divino arcantur à sacris Ministeriis 1. Cor. 14. *Turpe est mulierem loqui in Ecclesia*: Hinc Diaconissæ, de quibus frequens fit mentio apud Scriptores Ecclesiasticos, non ordinabantur ad Sacerdotium, nec ad ullum Ministerium circa Altare, sed imperitas mulieres docebant, Neophytas ad sacrum Baptismatis fontem immergendas exuebant, & eductas suscipiebant, viduis ministrabant.

Dicitur 4. *Et ad omnia Ecclesiastica ministeria, &c.* ut distinguatur regimen Ecclesiasticum à Politico; Sacerdotes enim administrant solum spiritualia, Reges vero & Principes temporalia, juxta illud Osii Episcopi Cordubensis ad Constantium Imperatorem: *Ne te misceas Ecclesiasticis, neque nobis in hoc genere præcipe, sed potius eas à nobis disce. Tibi Deus imperium commisit; nobis quæ sunt Ecclesiæ concredidit.*

Ergo

Ergo si Summus Pontifex & nonnulli Episcopi res etiam temporales administrant, (quod Christus non vetuit) illud habent ex dono & munificentia Principum, non ex institutione divina, nec vi sui Sacerdotii.

Ergo in Ordine duplex est potestas. Prima spectat Corpus Christi reale, seu sacrificium, diciturque potestas Ordinis. Secunda ordinatur ad regendum Corpus Christi mysticum, seu fideles, vocaturque potestas jurisdictionis, quia per eam confertur jus docendi & regendi fideles ad vitam æternam.

Potestas autem jurisdictionis, sicut & potestas Ordinis, habet distinctos honoris gradus, ex quibus exurgit Hierarchia Ecclesiastica, seu sacer principatus.

Definitur autem Hierarchia, personarum sacrarum Ordinata potestas debitum in subditos retinens Principatum & quidem jure divino, ut definiit Concilium Tridentinum sess. 23. can. 6. his verbis: *Si quis dixerit in Ecclesia Catholica non esse Hierarchiam divina Ordinatione institutam, quæ constat ex Episcopis, Presbyteris & Ministris, anathema sit*; Christus enim ad consummationem Sanctorum, & in ædificationem Corporis sui mystici, ut loquitur Apostolus Ephes. 4. instituit Episcopos, Presbyteros & Diaconos in diversis gradibus ad regendam suam Ecclesiam.

Ergo jurisdictionis potestas magis circumscripta est in minoribus Prælatiis, hoc est Parochiis, quam in Episcopis; sed amplissima est in summo Pontifice, ut omnes Ecclesiæ Ministri inter se divinitus aptati & connexi per omnem juncturam subministrationis, (verba sunt Apostoli cit. cap.

4.) Ecclesiam exhibeant velut terribilem castrorum aciem ordinatam, adversus quam portæ inferi non prævalebunt.

Dices: Diaconi, ut fert eorum nomen, sunt ad ministrandum Episcopo & Presbytero: Ergo nullam habent principatum, nec proinde sunt Hierarchici.

Nego conseq. Mandata enim ita accipiunt ab Episcopo & Presbytero, ut ea cum potestate exequantur circa plebem sibi subditam; quemadmodum Præfecti Provinciarum & Urbium in iis principatum exercent, dum mandata à Rege accepta observari curant.

Q. 4. *Potestas Ordinis & potestas jurisdictionis simulne semper conferuntur?*

R. Minime; Christus enim in ultima Cœna, in qua Apostolos constituit Sacerdotes, contulitque potestatem Ordinis, non dedit eis potestatem jurisdictionis, nisi post Resurrectionem, Joan. 20. *Sicut misit me Pater, & ego mitto vos;* nunc quoque plures inaugurantur Presbyteri, quibus non confertur potestas jurisdictionis, utpote qui non ordinentur ad Beneficium Pastorale, ac proinde accipiunt potestatem Ordinis absque potestate jurisdictionis. Contra vero Clericus institutus ad Beneficium Pastorale necdum Presbyter habet potestatem jurisdictionis sine potestate Ordinis.

Q. 5. *Utra potestas est nobilior?*

R. Potestas Ordinis; quia nobilior habet objectum & præstantiores effectus; tota enim est, ut Deo debitus cultus exhibeatur, & sacrificium, ad quod imprimis Religio instituta est, rite offeratur, transmutat panem in Corpus Christi reale, pec-

peccata remittit: Atqui isthæc omnia longe præstantiora sunt actibus potestatis jurisdictionis, quæ spectat solum regimen fidelium.

CAPUT II.

De Ordinis divisione.

Q. 1. *Suntne plures Ordines?*

R. Fide divina credendum statuit Tridentinum Concilium sess. 23. canone 2. his verbis: *Si quis dixerit præter Sacerdotium non esse in Ecclesia Catholica alios Ordines & majores & minores, per quos velut per gradus quosdam in Sacerdotium tendatur, anathema sit.*

Q. 2. *Quomodo dividuntur Ordines?*

R. Generatim dividuntur in majores, qui dicuntur sacri, & minores. Patet ex laudatis Concilii verbis. Capite autem 2. Subdiaconatum majoribus & sacris Ordinibus, scilicet Presbyteratui & Diaconatui accenset. Ergo tres sunt majores Ordines.

Q. 3. *Cur tres illi Ordines dicuntur majores & Sacri?*

R. Ratio in promptu est pro Presbyteratu & Diaconatu, quia cum propius inserviant sacrificio, à quo singuli Ordines accipiunt honoris & dignitatis gradum, illos duos Ordines cæteris majores & sacratiores Ecclesia semper habuit.

Sed difficultas est de Subdiaconatu, qui inter sacros & majores Ordines nondum numerabatur ætate Magistri Sententiarum, hoc est 12. seculo, licet votum continentiae ipsi esset annexum sal-

tem à seculo 6. & Subdiaconi à primis seculis ordinati fuerint per contactum Calicis vacui, ut constat ex Concilio 4. Carthaginensi, quod celebratum est quarto labente seculo; ac proinde Subdiaconatus non recensetur inter majores Ordines propter votum continentiae, nec propter concessam Subdiaconis facultatem contingendi vasa sacra: *Canones*, inquit Magister Sententiarum lib. 4. distinct. 24. *Duos tantum sacros Ordines appellari censent, Diaconatus & Presbyteratus; quia hos solos primitiva Ecclesia legitur habuisse, & de his solis præceptum Apostoli habemus Subdiaconos vero & Acolythos procedente tempore Ecclesia sibi constituit.* Idem fere habet Hugo à sancto Victore Lib. 2. part 2. cap. 13.

Vera itaque ratio cur Subdiaconatus recensetur inter majores Ordines, repetenda est ex dispositione Ecclesiae, quæ 13. seculo sub Innocentio III. Subdiaconatus Ordinem inter majores reposuit Cap. *A multis*, de ætate, qualitate, & Ordine præficiendorum, & Cap. *Miramur*, de servis non ordinandis. Occasionem dedisse videtur Urbanus II. qui 11. seculo indulxit, ut Subdiaconi in Episcopos eligi possent, cum antea nullus nisi Diaconus ad illud honoris culmem eveheretur. Hujus Pontificis Decretum refertur cap. *Nullus*, distinct. 60.

Q. 4. *Quot sunt Ordines?*

R. Ex antiqua & constanti Ecclesiae Latina Traditione septem recensentur, tum ab Eugenio IV. in Decreto pro Armenis, tum à Concilio Tridentino sess. 23. cap. 2. scilicet Presbyteratus, Diaconatus, Subdiaconatus, Acolythatus, Exorcistatus, Lectoratus, & Ostiariatus.

Dixi:

Dixi: *Ecclesiæ Latinæ*; nam apud Græcos à mille annis & amplius quatuor tantum Ordines numerantur, scilicet Presbyteratus, Diaconatus, Subdiaconatus, & Lectoratus.

Q. 5. *Nonne Episcopatus & Tonsura Clericalis sunt Ordines distincti?*

R. 1. Sanctus Thomas, cum junior scriberet in quartum Sententiarum, censuit Episcopatum non esse Ordinem distinctum, sed extensionem dumtaxat characteris Sacerdotalis ad novum officium, & ampliorem potestatem ac dignitatem, ita ut Episcopatus aliud non sit quam Sacerdotium perfectum.

R. 2. Communior tamen sententia est ordinationem Episcopalem esse Ordinem distinctum, novumque imprimere characterem; quia Episcopus habet supra Presbyterum potestatem non solum jurisdictionis, sicut Summus Pontifex supra Episcopos, sed etiam Ordinis; confirmat enim Neophytos, consecrat Diaconos, Presbyteros & Episcopos, quod nullatenus potest Presbyter: Atqui specialis illa potestas est character & Ordo distinctus: Ergo.

Dices 1. Si Episcopatus esset Ordo distinctus, agnoscendi essent octo Ordines: Atqui illud repugnat Decreto Eugenii IV. & Concilio Tridentino: Ergo.

Distinguo maj. Essent octo Ordines specie infima, Concedo: specie subalterna, Nego major. Itaque Ordo generatim sumptus immediate dividitur in septem species; quarum prima nempe Sacerdotium subdividitur in Episcopatum & Presbyteratum; quemadmodum animal immediate dividitur in rationale & irrationale; sed irrationa-

le, utpote species subalterna, subdividitur in plures species infimas. Et ea ratione explicatur Concilium Tridentinum, ubi decernit esse septem novæ Legis Sacramenta; nam Sacramentum Ordinis subdividitur in plures Ordines, qui ut placet non paucis Theologis, singuli sunt Sacramenta: sicque in eorum sententia sunt tredecim Sacramenta specie infima.

Dices 2. Ordo ex dictis essentialiter refertur ad sacrificium: Atqui Episcopatus nullum habet specialem ordinem ad sacrificium, sed solum ad plebem regendam: Ergo non est Ordo.

Nego minorem: Episcopatus enim constituit Eucharistiæ ministros, iisque Leges præscribit ut cum dignitate ac majestate augustissimum illud Mysterium peragant.

R. 3. Tonsura Clericalis non est Ordo, quidquid contra sentiant Canonistæ; nulla enim competit functio, nullumve ministerium simplici Clerico.

Q. 6. *Quid est igitur Tonsura Clericalis?*

R. Est cæremonia ab Ecclesia instituta, per quam Laicus baptizatus, & Sacramento Confirmationis consignatus sacro ritu in Clerum ascribitur.

Dicitur 1. *Ab Ecclesia instituta*; quia Tonsura Clericalis non est institutionis divinæ, cum Ecclesia Græca eam non observet, & in Latina nullum ejus inveniatur vestigium tribus primis sæculis.

Dicitur 2. *Per quam Laicus baptizatus, &c.* 1. Quia soli Ecclesiæ filii gaudere debent ejus honoribus: Atqui per Baptismum nascuntur Ecclesiæ filii: Ergo: 2. Quia Neophytus nondum Confirmatio-

mationis signaculo munitus dicitur à SS. Patribus semi-Christianus, parvulus in Christo, qui ut adversus hostes Ecclesiæ decertare valeat tanquam gregarius miles, sacro Chrismate roborandus est ac perficiendus: Ergo à fortiori ut inter duces hujus spiritalis militiæ adscribatur: *Prima Tonsura non initientur, qui Sacramentum Confirmationis non susceperint*, inquiunt Patres Tridentini sess. 23. cap. 4. *de reform.*

Dicitur 3. *Sacro ritu*; Ecclesia enim pro Clerico ordinando præscripsit solemnes ritus à solo Episcopo peragendos, ut vel hinc fideles intelligant quanti facienda sit Tonsura Clericalis.

Dicitur 4. *In Clerum ascribitur*; per illam quippe cæremoniam evehitur quis è statu Laicorum ad Ordinem Ecclesiasticum, atque eo titulo gaudet honoribus & privilegiis Ecclesiasticorum.

Q. 7. *Quæ ratio movit Ecclesiam, ut sacram hanc cæremoniam institueret?*

R. Sacramenti Ordinis dignitas ac eximia sanctitas, ad quod Tonsura Clericalis est quædam præparatio, sicut Catechumenatus ad Baptismum ex Catechismo Romano, & Novitiatus ad Professionem Monasticam, ex Halliero & aliis passim Theologis. Cum enim Sacerdotium sit res plane divina, nec ad ejus munia, ut par est, obeunda satis sit studium acquirendæ perfectionis, quemadmodum sufficit ad Professionem Monasticam, sed requiratur ipsa perfectionis adeptio: æquum fuit ut Ecclesia suos Candidatos, qui signa divinæ vocationis & bonæ spei præ se ferunt, prius rudimentis disciplinæ Sacerdotalis imbuendos curaret, quam ad ullum Ordinem admitteret.

Quemadmodum igitur, ut quis censeatur idoneus

neus ad Professionem Monasticam emittendam, deposito prius sæculari habitu, coma & quidquid redolet pompam mundanam disciplinæ regularis Tyrocinium ponit, sic Ecclesia à suis Novitiis exigit, 1. ut habitum sæcularem abjiciant. 2. Caput attendant. 3. Vestem Clericorum propriam assumant, deferantque cum ea, quæ decet, modestia. 4. Profiteantur sanctioris vitæ disciplinam, & ex Concilio Tridentino sess. 23. cap. 6. *de Reform.* in Seminario instituantur juxta Ecclesiasticas leges, nisi studiorum causa *in aliqua schola de licentia Episcopi, quasi in via ad majores Ordines suscipiendos versentur*, sub cura tamen alicujus probatæ personæ, ut mores eorum instituto conveniant.

Quæ cum ita sint, quisquis Ecclesiam diligit; miseratione commoveatur necesse est ob fædum & sacrilegum Tonsuræ clericalis in plerisque abusum, in quibus non est sanctioris vitæ Professio, sed simulatio, adeo ut Tonsura hodie usurpetur eo fere modo, quo Novitiatus in iis Ordinibus Religiosis, in quibus collapsa est Regularis observantia. Enimvero sicut in ejusmodi Ordinibus fatis est ad Novitiatum, ut quis inscribatur tanquam cupiens profiteri, gestetque exteriorem habitus Religiosi notam, quam caute accommodat ad morem sæculi, tegitque ubi erubescit videri Monachus, interim arbitrio suo vivit, tritam sæculi viam ambulat, donec elapso tempore à sacris Canonibus pro Novitiatus præscripto, vovet, quod implere idoneus non est, scilicet studium acquirendæ perfectionis, ex quo vitiato fonte fluunt in hujusmodi Ordines Regulares probra ac dedecora, quæ ipsos Laicos offendunt. Simili-

militer plerique Tonsuram seu Novitiatum Sacerdotii suscipiunt, nomen dant Clero, & sæcularium mores sectari non desistunt, impetum juvenilis ætatis sequuntur sibi met relinqui, vitiosos habitus contrahunt, in obscænis voluptatibus sæpe voluntantur. En selecta Dei portio, & præclarum munus, quod ipsi offertur à filiis Israel; tale Tyrocinium ponitur ad Magisterium virtutis. Non miremur, quicunque præsentem Ecclesiæ statum miseratur quod adeo in pluribus jaceat Clericalis disciplina; sed mirandum potius quod in tanta rerum perturbatione stet in paucis, quos Deus sibi servavit. Plura vide Tom. 7. Appendice de Tonsura Clericali.

CAPUT III.

De definitione, officio, materia & forma cujusque Ordinis seorsim spectati.

DE OSTIARIATU.

Ostiarius definitur, Ordo, quo præficitur Clericus ad Ecclesiæ & sacræ ejus suppellectilis custodiam, vindicandamque reverentiam domui Dei debitam.

Quinque sunt ejus Officia. Primum, Ecclesiæ januas dignis aperire & indignis claudere. Secundum, curare ne quis Laicorum propius ad altare accedat. Tertium, pulsare campanam, & populum fidelem statis horis convocare ad divinum Officium. Quartum, servare Vasa sacra, & omnem Ecclesiæ suppellectilem. Quintum, invigilare ut omnes in Ecclesia reverenter se gerant. Ita Concilium Mediolanense 11. Tit. de Ostiario.

Forma Ostiariatus sunt verba , quæ profert Pontifex tradendo claves , ipsa autem clavium traditio est materia essentialis , pulsus vero campanæ, obferatio & apertio januæ censentur materia accidentalis, utpote quæ non administretur à Pontifice sed ab Archidiacono.

DE LECTORATU.

Lectoratus est Ordo , quo traditur potestas legendi in Ecclesia Scripturam sacram utriusque Testamenti, & scripta sanctorum Patrum.

Quinque sunt ejus officia. Primum, legere Scripturam sacram. Hugo Victorinus excipit lectionem Librorum Evangelicorum, sed Concilium Laodicense can. 59. & Carthaginense IV. can. 47. nullum Librum excipiunt. 2. Doctorum orthodoxorum Scripta ex citato can. 47. Concilii Carthaginensis. Secundum, tradere fidei rudimenta eaque explanare sive Catechumenis, sive baptizatis rudioribus. Tertium, Episcopo prædicanti legere eam Scripturæ partem, quam ille expositurus est. Quartum, divinas laudes decantare & præesse Psalmistis seu Cantoribus. Quintum, Lector antiquitus novos fructus benedicere consueverat, ut colligitur ex Pontificali Romano in degradatione Lectoris.

Forma Lectoratus sunt verba à Pontifice prolata cum tradit Librum, de quo initiandus lecturus est, materia vero unica est ipsa Libri traditio.

DE EXORCISTATU.

Definitur Ordo, quo datur potestas expellendi Dæmones à corporibus, sive baptizatorum, sive Cathechumenorum.

Unum Exorcistæ Officium tribuunt Veteres, ut Concilium Laodicense, Carthaginense iv. & Pontificale Romanum, nempe adjurare Dæmones: *Hodie etiam*, inquit S. Cyprianus Epist. 45. *geritur, ut per Exorcistas voce humana & potestate divina flagelletur & iratur, ut torqueatur Diabolus.* Propter frequentes abusus, qui in Exorcismis aliquando irrepserunt, ex hodierna Ecclesiæ disciplina nequidem Presbyteri adjurare debent Dæmones inconsulto Episcopo.

Materia Exorcistatus eaque unica est traditio Libri Exorcismorum: forma sunt verba Pontificis.

DE ACOLYTHATU.

Acolythatus est Ordo, quo datur potestas ministrandi Subdiacono & Diacono in Missæ Sacrificio; Acolythus enim secundum vim nominis Græci, est famulus ac veluti pedisequus.

Tria sunt Acolythatus officia, Primum, ac præcipuum est parare vinum & aquam in urceolis, quos deinde exhibet Subdiacono. Unde Acolythatus est Ordo nobilior præcedentibus, cum propius inserviat Missæ sacrificio. Secundum, deferre lumina, dum Evangelium solemner canatur à Diacono. Tertium, luminaria Ecclesiæ accendere & asservare, propter quod Acolythi dicuntur Ecclesiæ mancipati, quia illud officium majorem in Ecclesia assiduitatem requirit.

Duplex est materia Acolythatus: nempe traditio

positione Diaconos ordinant, nec aliam materiam usurpavit Ecclesia Latina per decem prima sæcula, ut constat ex Concilio Carthaginensi iv. Nicæno i i. Meldensi, & ex omnibus Sacramentariis & Scriptoribus rerum Liturgicarum, ut Alcuino, Amalario.

DE PRESBYTERATU.

Presbyter Græce id significat quod Latine senior. Presbyter ergo secundum etymologiam est nomen ætatis, secundum vero acceptiorem est nomen officii ac Præfecturæ; Magistratus enim & in Republica Præfecti seniores vocari solent, ut denotetur morum gravitas, quæ eis competit, & in senibus magis elucet. Hinc Diaconi & alii Clerici inferiores nunquam Presbyteri appellantur, quia ipsorum est ministrare; præesse autem cum sit Episcopi & simplicis Sacerdotis, Episcopus in Scripturis nonnunquam Presbyter appellatur, ut Epist. 2. & 3. sancti Joannis, & 1. Tim. 4. v. 14. Quin nomen Episcopi quod Latine est superintendens, in Scripturis indiscriminatim tribuitur minoribus & majoribus Prælati, ut in Epist. ad Tim. & ad Tit. & Act. 20. vers. 17. Sed usus obtinuit ut minores Prælati simpliciter dicantur Presbyteri, & majores, Episcopi.

Definitur Presbyteratus Ordo sacer, quo datur potestas consecrandi Corpus Christi & remittendi peccata.

Quinque sunt ejus officia ex Pontificali Romano, in quo sic habetur, *Sacerdotem oportet offerre, benedicere, præesse, prædicare, baptizare.*

Materia Presbyteratus apud Latinos duplex est, scilicet impositio manuum & porrectio calicis

cis cum vino & aqua, & patenæ cum pane: forma sunt verba, quæ tum profert Pontifex.

Communior nunc obtinet opinio solam manuum impositionem esse materiam essentialem; tum quia Græci hætenus aliam nec adhibuerunt nec adhibent, & tamen rata est eorum Ordinatio; tum quia Ecclesia Latina per decem sæcula sola manuum impositione Presbyteros consecravit Apostolorum exemplo 1. Tim. cap. 4. & 5. Ergo porrectio calicis est materia dumtaxat accidentalis; nam ex Concilio Tridentino sess. 21. cap. 2. Ecclesia nihil mutare potest circa substantiam Sacramentorum.

Dices: Eugenius IV. in Decreto pro Armenis sic habet, Presbyteratus traditur per calicis cum vino, & patenæ cum pane traditionem, Diaconatus vero per Libri Evangelii dationem: Ergo.

Nego consequ. Nam præterquam quod Decretum illud editum sit soluto Concilio Florentino postquam recesserunt Græci, non spectat universalem Ecclesiam, sed Armenos dumtaxat, quibus Summus Pontifex exponit ritus Romanæ Ecclesiæ, non quidem omnes, sed eos maxime in quibus discrepabant Armeni; nullam enim facit mentionem ritus quo consecrantur Episcopi, Libri Epistolarum in Ordinatione Subdiaconi, & impositionis manus in Ordinatione Diaconi, quæ tamen semper & ubique adhibita est. Denique Concilium Tridentinum nedum adhæsit huicce Decreto, tanquam necessariæ Ordinationum regulæ, quin diserte docet sess. 14. cap. 3. de Extrema Unctione Presbyteros rite ordinari per impositionem

positionem manuum Presbyteri, nulla facta mentione instrumentorum.

Sed difficultas est quænam manuum impositio sit materia essentialis; duplex enim vel etiam triplex adhibetur manus impositio in Ordinatione Presbyteri. 1. Pontifex, & post illum Presbyteri manus imponunt initiando absque ulla verborum prolatione. 2. Nulla interjecta mora tam Pontifex quam alii Presbyteri tenent manus extensas super initiandum, adeoque isthæc manuum impositio videtur esse eadem cum præcedente continuata: interim vero Pontifex fundit preces pro initiando, quæ habent rationem formæ. 3. & ultima manuum impositio fit post Communionem cum ista verborum formula, *Accipe Spiritum Sanctum, quorum remisieris peccata, &c.*

Alii Theologi statuunt secundam impositionem, quæ una est cum prima, esse integram materiam Presbyteratus, utpote quæ in utraque Ecclesia, Latina scilicet & Græca, semper fuerit usurpata, cum ultima non sit in usu apud Græcos; nec apud Latinos adhibita nisi à quadragesimis annis.

Alii existimant ultimam manus impositionem pertinere ad substantiam Sacramenti, contenduntque Presbyterum ante ejusmodi impositionem non habere potestatem remittendi peccata.

Nec refert quod non sit admodum antiqua apud Latinos, nec usurpetur apud Græcos, quia Ecclesia potuit uno vel diverso ritu utramque potestatem conferre, scilicet offerendi, & peccata dimittendi. Quod autem separatim nunc conferatur, magis congruit exemplo Christi, qui in ultima Cæna Apostolis primo contulit potestatem

tem offerendi, deinde post resurrectionem potestatem remittendi peccata, Joan. 20.

Cæterum propter diversas opiniones circa materias Ordinum, caute observandum est quidquid præscribitur in Pontificali Romano, & si quid fuerit incaute omissum, illud supplendum est, ut docent Innocentius III. & Gregorius IX. supra laudati, quia ritus integer necessarius est saltem necessitate præcepti.

DE EPISCOPATU.

Definitur Ordo supremus, quo datur Presbytero potestas conferendi Sacramenta Confirmationis & Ordinis, regendique Ecclesiam sibi commissam, hoc est Clerum & Plebem.

Dicitur 1. *Ordo supremus*; quia Episcopatus est Apex & fastigium Sacerdotii. *Quid est Episcopus*, inquit sanctus Augustinus lib. quæst. in vetus & novum Testam. quæst. 101. *nisi primus Presbyter, hoc est summus Sacerdos*; Et sanctus Ignatius Epist. ad Smyrnenes, *Honora Episcopum ut Principem Sacerdotum*.

Dicitur 2. *Quo datur Presbytero*; quia nequit esse Episcopus, qui Presbyter non fuerit.

Dicitur 3. *Potestas conferendi, &c.* quibus verbis designatur potestas Episcopi propria, quia confirmare Neophytos & ordinare Ecclesiæ Ministros sunt actus Ordinis, nec ad eos exercendos sufficit potestas jurisdictionis, quam habet Capitulum sede vacante, & Episcopus nondum consecratus.

Dicitur 4. *Et regendi Ecclesiam sibi commissam*, ut denotetur potestas jurisdictionis; jurisdictio

quippe est potestas gubernandi subditos jus dicendo, ferendo leges, coercendo refractarios & puniendo transgressores.

Ergo Episcopus jure divino est superior Presbytero : tum potestate Ordinis, tum potestate jurisdictionis. Primum expresse definiit Concilium Tridentinum sess. 23. can. 7. secundum necessario, & evidenter colligitur ex can. 6. ejusdem sessionis, ubi Concilium decernit in Ecclesia Catholica esse hierarchiam divina ordinatione institutam, eamque constare ex Episcopis, Presbyteris & Ministris.

Dices : S. Hieronymus in Caput 1. Epistolæ ad Tit. & Epist. 85. ad Evagrium multis probat Episcopos humano tantum jure esse Presbyteris superiores ; ait enim post schisma ortum Corinthi, ubi alter dicebat, ego sum Pauli, alter, ego Apollo, *In toto orbe decretum est, ut unus de Presbyteris electus superponeretur ceteris, ad quem omnis Ecclesiæ cura pertineret, & Schismaticum semina tollerentur* : Ergo.

Nego antec. Quomodo enim sanctus Doctor assereret Presbyterum sine nova inauguratione constitutum fuisse Episcopum, quemadmodum Diaconus constituitur Archidiaconus, qui tam diserte docet Presbyterum non posse Neophytos confirmare, nec Ecclesiæ Ministros ordinare : *Quid facit, inquit, excepta ordinatione Episcopus quod non faciat Presbyter ?* Agnoscit ergo sanctus Doctor potestatem ordinandi in Episcopo, quæ non competit Presbytero. De Confirmatione etiam idem agnoscit Dialogo contra Luciferianos, in quo sic habet : *Quodsi hoc loco quæris, quare in Ecclesia baptizatus nisi per manus Episcopi accipiat*

piat Spiritum Sanctum , . . . Disce hanc observationem ex auctoritate (Scripturæ) descendere . . . si Scripturæ auctoritas non subesset , totius orbis in hanc partem consensus instar præcepti obtineret. Quoad vero præminentiam jurisdictionis Episcopalis , multa evincunt Sanct. Hieronymum eam divinæ institutioni ascribere ; laudata enim Epist. 85. scribit Episcopos id esse in Ecclesia , quod Aaron in Synagoga , & Presbyteros filiis Aaron , qui erant simplices Sacerdotes , respondere : Atqui Aaron jure divino erat superior simplicibus Sacerdotibus : Ergo. Deinde in Epist. ad Tit. *Episcopi* , inquit , *noverint se magis consuetudine quam dispositionis dominicæ veritate Presbyteris esse majores.* Ergo in mente Sanct. Hieronymi Episcopi majores sunt Presbyteris , partim institutione divina , partim consuetudine Ecclesiæ , quæ ut dissensionum plantaria evellerentur , ut loquitur Sanct. Doctor , mutavit disciplinam , decrevitque ut deinceps ad Episcopum omnis Ecclesiæ cura pertineret , cum ante Corinthianum schisma esset communis Episcopo & Presbyteris , sed in diverso gradu.

Episcopi officia numerantur septem in Pontificali Romano , his verbis : *Episcopum oportet judicare , interpretari , (scilicet Verbum Dei & ejus legem) consecrare , ordinare , offerre , baptizare , & confirmare.*

Materia est manuum impositio , hoc enim ritu Apostolus Timotheum consecravit Ephesium Episcopum , præcepitque ut Episcopos ita consecraret. Hanc materiam assignat Concilium Carthaginense IV. meminitque impositionis Libri Evangeliorum super caput & scapulas consecrandi ; sed eam materiam non adhibent Græci ,

nec erat universaliter receptus ille ritus nono seculo in Ecclesia Latina, ut constat ex Amalario. Forma autem sunt verba quæ proferunt Pontifex consecrans & duo Episcopi assistentes, dum manus capiti consecrandi imponunt.

DE ROMANO PONTIFICE.

Q. I. *Estne amplior & superior Jurisdictionis potestas in Romano Pontifice, quam in ceteris Episcopis, idque jure divino?*

Negant Græci schismatici, contenduntque Primatum, quo gaudet Romanus Pontifex, ipsi ab Ecclesia fuisse concessum, cum Urbs Roma esset Caput Imperii. In hoc errore versantur Lutherani, Calviniani & omnes Hæretici, adversus quem

R. De fide est Romanum Pontificem jure divino esse Episcopis superiorem, & caput totius Ecclesiæ; ita enim definiit Concilium Lateranense 4. anno 1215. *Romana Ecclesia, inquit, DISPOSNENTE DOMINO super omnes alias ordinatæ potestatis obtinet Primatum, utpote mater omnium Fidelium & Magistra.* Et Conc. Florentinum, in quo convenerunt Græci cum suo Imperatore, & Latini, Præsidente Eugenio IV. an. 1439. *Definimus sanctam Apostolicam Sedem & Romanum Pontificem in universum orbem tenere principatum, & ipsum Pontificem Romanum successorem esse Beati Petri Principis Apostolorum, & verum Christi esse Vicarium, totiusque Ecclesiæ caput, & omnium Christianorum Patrem & Doctorem existere, & ipsi in Beato Petro pascendi & regendi & gubernandi universalem Ecclesiam, A DOMINO NOSTRO JESU CHRISTO PLENAM POTESTATEM TRADITAM ESSE.*

Tria in hac definitione inprimis sunt notanda & probanda.

Primum, quod S. Petrus fuerit Princeps Apostolorum habetur è Scriptura Matth. 16. v. 18. *Tu es Petrus, & super hanc Petram ædificabo Ecclesiam meam, & portæ inferi non prævalebunt adversus eam, & tibi dabo claves regni Cælorum.* Per claves autem designatur suprema potestas, atque in ejus rei signum Regi urbem ingredienti offeruntur claves civitatis. Quod hîc Petro promiserat Christus, illud contulit post Resurrectionem Joan. 21. his verbis: *Pasce agnos meos, & iterum, pasce oves meas,* id est interprete sancto Epiphanio Hæresi 75. pasce matres & filios; Pastores & plebem. Hac potestate statim usus est post Ascensionem Christi Beatus Apostolus Act. 1. v. 15. ubi unum à Discipulis eligendum in locum Judæ proditoris decrevit tanquam *chori Princeps, & is cui à Christo Grex commissus est,* inquit S. Chrysostomus Hom. 3. in Act. Apost.

Secundum, quod Romanus Pontifex sit successor S. Petri, constans est Ecclesiæ tum Græcæ, tum Latinæ traditio.

Origenes apud Eusebium lib. 7. Histor. cap. 12. sic habet: *Petrus ad ultimum in Urbe Roma commemoratus, ibi & crucifixus est deorsum capite demerso, quod ipse ita fieri precatus est, ne exæquari Domino videretur.* Similia habent S. Athanasius Apolog. pro sua fuga, S. Chrysostomus Hom. 32. in Epist. ad Romanos.

Ex Latinis vero Tertullianus libr. de præscript. cap. 36. *Felix ista Ecclesia, inquit, cui totam doctrinam Apostoli cum sanguine suo profuderunt, ubi Petrus Passioni Dominicæ adæquatur.* Et S. Hieronymus

Epist. ad Damasum Summum Pontificem : *Cum successore Piscatoris*, inquit, & *discipulo Crucis loquor*.

Tertium, quod in Romanum Pontificem tanquam sancti Petri successorem transmissus sit Primatus & Principatus ejusdem Apostoli, necessario & evidenter sequitur ex præcedentibus; quemadmodum enim alii Apostoli transmiserunt ad suos successores, (nempe Episcopos) eam quam acceperant à Christo potestatem gubernandi Ecclesiam, ita & Beatus Petrus.

Dices 1. Definiri non potest tempus, quo Petrus Romam profectus sit, nec quomodo ibi per 20. annos sederit. Nam certum est ipsum adfuisse Concilio Jerosolymitano Act. 15. quod celebratum est anno 18. à Passione Domini, & per septem annos Ecclesiam Antiochenam rexisse: Ergo.

Nego antecedit. Et dico Petrum mansisse quidem quinque circiter annis in Judæa, quo tempore Paulus potuit eum invisere, Galat. 1. anno quinto perrexisse Antiochiam per illos autem septem annos, quibus dicitur illam Ecclesiam rexisse, Pontum, Asiam, Cappadociam & Bythiniam peragrarè potuisse: tum rediisse Hierosolymam circa annum undecimum à Passione Domini, quo tempore fuit ab Herode in carcerem conjectus, sed miraculo solutus Romam petiit; ibique mansit usque ad anum nonnum Imperij Claudii Cæsaris, quo Judæos Roma expulit, atque ea occasione Petrus rediit Hierosolymam, ubi præfuit Concilio. Mortuo autem Claudio, Petrus rursus Romam profectus est, Nerone imperante, à quo tandem crucifixus est anno decimo quarto, & ultimo ejus imperii.

Dices

Dices 2. Episcopus Antiochenus est potius successor sancti Petri, cum Beatus Apostolus hanc Ecclesiam primo fundaverit & rexerit, Ergo.

Nego anteced. Namque sanctus Petrus Antiochia commigrans non abdicavit Primatum & Apostolatum suum, quemadmodum Episcopus hoc ipso quod sedi Episcopali renunciat auctoritate & jurisdictione Episcopali spoliatur. Quis enim crederet sanctum Petrum creato Episcopo Antiocheno, omni potestate regendi Ecclesias fuisse destitutum? Apostolatum ergo & Primatum non deposuit nisi in morte, ac proinde si Episcopus Romæ non fuisset usque ad mortem, ut contendit Calvinus contra omnium veterum fidem, Romanus Pontifex non esset Petri Successor, nec Primatu ejus gauderet.

Dices 3. Primatus fuit privilegium specialiter sancto Petro concessum: Atqui falsum est sanct. Petrum transmisisse ad successores privilegia sibi concessa; quis enim nisi perabsurde contenderet Romanum Pontificem confirmatum esse in gratia, habere potestatem suscitandi mortuos, sanandi infirmos sua umbra, quemadmodum refertur de sancto Petro? Ergo.

Distinguo min. Falsum est sanctum Petrum transmisisse ad successores privilegia personalia, quemadmodum sanctus Carolus v. g. non transmisit in successorem eximias virtutes & sanctitatem, quibus ornatus erat, Concedo: falsum est transmisisse privilegia regimini Ecclesiæ necessaria, & in ejus gratiam primario concessa, Nego min. Itaque duplicis generis privilegia Beato Petro fuere concessa: alia personalia ad propriam ejus sanctificationem & perfectionem, ut gratia

sanctificans, & confirmatio in eadem gratia: alia in gratiam aliorum & totius Ecclesiæ, & hæc rursus fuerunt duplicis generis: alia ad tempus necessaria ut miraculorum dona, alia quovis tempore necessaria, ut potestas clavium. Privilegia primi & secundi generis non transferunt ad Beati Petri successores, sed ea duntaxat, quæ sunt tertii generis.

Ergo sicut ceteri Apostoli in suos successores nempe Episcopos ex Christi ordinatione transferunt potestatem solvendi & ligandi; ita Princeps Apostolorum in Pontificem Romanum legitimum successorem suum transtulit Primatum, quo supra cæteros Apostolos præeminebat, cum sine eo stare nequeat Ecclesiæ unitas & integritas ut patet ex Ecclesiis Schismaticis, quæ velut membra à capite separata, statim contabuerunt vel computruerunt. Quid referam absurda & propudiosa in quæ veteres Schismatici, ut Donatistæ, Eutichiani, &c. prolapsi sunt, ubi à Sede Apostolica abscefferunt, cum Pseudoreformati quotidie funesta exempla suppeditent, salutem Christianæ Reipublicæ absque communiōe cum Sede Apostolica non posse consistere?

Instas: Satis est ad unitatem Ecclesiæ, quod sit fundata in Christo, eumque habeat pro capite: namque ex ipso Apostolo Ephes. 1. *Ipsam dedit caput super omnem Ecclesiam quæ est corpus ipsius & plenitudo ejus, qui omnia in omnibus adimpletur.*

Nego anteced. Namque omnes Hæretici & Schismatici Christum agnoscunt ut caput Ecclesiæ, neque propterea Sectæ eorum in unum corpus coalescunt; alia est enim Secta Nestorianorum,

rum, alia Socinianorum, alia Lutheranorum & Calvinistarum.

Itaque præter caput invisibile, quod est Christus, necessarium est caput visibile & ministeriale, in quo omne regimen Hierarchicum seu Ecclesiasticum conveniat: *Primatus datur Petro*, inquit Sanct. Cyprianus lib. de Unit. Eccles. *ut Ecclesia una monstretur.*

Q. 2. *Regimen Ecclesiæ estne Monarchicum?*

R. Cum Cardinali Bellarmino lib. I. de Rom. Pontif. est Monarchicum Aristocratico temperatum.

Duplex itaque est regimen Monarchicum, aliud purum, in quo omnia administrantur unius nomine & autoritate, ut in Francorum Regno, in quo Provinciarum Perfecti, & Civitatum Magistratus Rempublicam administrant non suo, sed Regis nomine tanquam ab ipso delegati. Aliud Aristocratia admixtum, ut Romanum Imperium, in quo Imperator ita est supremus Monarcha, ut sub se habeat plures Principes qui suo nomine dominantur singuli in sua ditione ac Principatu, & quamvis subdantur Imperatori, teneanturque communibus Imperii Legibus, regunt tamen sibi subditos propria autoritate & propriis Legibus, quas Imperator non potest solvere, nisi communi Imperii bono adversentur.

Sic in Hierarchia Ecclesiastica Pontifex Romanus præest singulis Episcopis tanquam caput & supremus Monarcha, jus ipsis dicit, & in singulos cujusunque gradus & dignitatis vim habet coactivam, ubi agitur de communi Reipublicæ Christianæ bono, ac de receptis Ecclesiæ universalis Legibus. Sed sacra ejusmodi Monarchia

temperatur Aristocratia, nam Christus Dominus alios à Beato Petro instituit Apostolos, quibus succedunt Episcopi, & septuaginta duos Discipulos, quibus etiam succedunt ii Presbyteri, quibus ex officio cura animarum incumbit, ut Parochis. Episcopi igitur à Christo sunt instituti tanquam Principes, suas Diœceses non Vicaria, sed propria authoritate gubernant, novas Leges condunt pro subditorum necessitate & utilitate. Parochi vero non tanta authoritate præfunt suis Parœciis, utpote quæ non sint communitates perfectæ, sed partes & veluti membra Diœceseos; ideoque non habent forum externum, nec possunt condere Leges, ut late prosecuti sumus Tomo 8. Tract. de Legibus, & Tomo 7. 2. par. cap. 6. quo fit ut Episcopus immediatam habeat jurisdictionem non solum in ipsos, sed etiam in plebem subditam, ut declaravit Facultas Theologica Parisiensis anno 1164. in censure quarundam propositionum Jacobi de Vernant.

CAPUT IV.

Utrum singuli Ordines sint Sacramenta proprie dicta.

Nullus Catholicorum negare potest Presbyteratum esse Sacramentum proprie dictum; de Fide enim est Ordinationem in genere esse unum è Sacramentis novæ Legis. Illud ita definiit Concilium Tridentinum session. 23. ut solius Presbyteratus expresse meminerit can. 1. quæstio itaque solummodo potest esse de aliis ordinibus, ad quam

R. 1.

R. 1. Probabilius est Minores Ordines & Subdiaconatum non esse Sacramenta, tum quia non sunt à Christo instituti, tum quia solus Episcopus ex dicendis est Minister Sacramenti Ordinis: Atqui nonnulli Abbates ex privilegio conferunt minores Ordines ex C. *Requisivit*, Tit. *de Ordinatis ab Episcopo*, & ex Concilio Tridentino sess. 23. cap. 1. *de reform.* Subdiaconorum vero Ordinationem Concilium Antiochenum, Nicænum II. permittunt Chorepiscopis, id est Vicariis Generalibus Episcoporum, qui ex sua institutione non erant Episcopi.

R. 2. Diaconatus & Episcopatus sunt Sacramenta proprie dicta; sunt enim signa sensibilia à Christo instituta & in Ecclesia perpetuo observata; quibus annexa est promissio gratiæ, Concilium namque Tridentinum sess. 23. can. 4. dicit anathema asserentibus per sacram Ordinationem non dari Spiritum Sanctum, ac proinde frustra Episcopos dicere, *Accipe Spiritum sanctum*: Atqui illud proferunt in Ordinatione tum Diaconi, tum Episcopi.

Dices: Diaconi electi sunt ad ministrandum mensis profanis. Unde Sanct. Hieronymus vocat eos mensarum Ministros Epist. 85. & Synodus Quinisexta anno 692. definiit septem prioribus Diaconis Aët. 6. concreditum non fuisse ministerium sacrum, sed profanum duntaxat: Ergo

Nego anteced. Quamvis enim murmur Græcorum adversus Hebræos, cujus fit mentio cap. cit. fuerit occasio eligendi Diaconos, qui curam gererent Viduarum, & mensis præficerentur, constat tamen tum ex Scriptura, tum ex Traditione Diaconos ad augustiora ministeria fuisse ab

Apo.

Apostolis ordinator; ait enim Apostolus de Diaconis 1. Tim. 4. *Habentes mysterium fidei in conscientia pura . . . ministrant nullum crimen habentes.* Stephanus & Philippus ambo ex septem Diaconis sacra munia post ordinationem suam obierunt. Stephanus quidem Hierosolymis verbum Dei prædicabat Act. 6. & Philippus baptizabat Act. 8. Sanct. Hieronymus Epist. ad Heliodorum Diaconos collocat in tertio Sacerdotii gradu, & lib. contra Luciferianos scribit Diaconos ex Episcopi jussione habere jus baptizandi. Ita igitur eos vocat Ministros mensarum ad comprimendum fastum, quo nonnulli in Romana Ecclesia supra Presbyteros se erigebant, ut non neget sublimiora eorum munia. Sic herus animi cæcitatem in domestico increpans, animal simpliciter eum nominat, ex parte scilicet quæ in ipso est vilior, sed nobiliorem, puta rationem, non excludit. Synodus vero Quinisexta præterquam quod ab Apostolica Sede fuerit rejecta, duplicis generis vult esse Diaconos, alios Eleemosynarios, qui curam pauperum gerant, & res temporales administrent, alios Sacros, qui divinis Mysteriis serviunt, statuitque priores non esse assumendos ex ordine sacrorum Ministrorum.

CAPUT V.

De Ministro Sacramenti Ordinis.

Non agitur hic de Ministro Ordinis in genere; jam enim diximus Presbyterum posse esse Ministrum extraordinarium quatuor Ordinum minorum, & Subdiaconatus, idque supponit Eugenius

genius IV. in suo Decreto : atque inde collegimus ejusmodi Ordines non esse Sacramenta. Quare

Q. 1. *Quis est Minister Sacramenti Ordinis ?*

R. De Fide est solum Episcopum hujus Sacramenti esse Ministrum ; ita enim definiit Concil. Trident. sess. 23. can. 7.

Probatur definitio tum è Scriptura, quæ jus ordinandi aliis non tribuit quam Apostolis, quorum successores sunt Episcopi ; Apostolus 1. Tim. 3. & 5. Tit. cap. 1. hisce Discipulis, quos Episcopos ordinaverat, præscribit, quibus debeant manus imponere : tum ex universalis Ecclesiæ Traditione adeo constanti, ut Arius 4. seculo habitus fuerit Hæreticus, quod Presbyteros Episcopis æquaret, iisque jus ordinandi tribueret ex sancto Epiphanio Hæresi 55.

Q. 2. *Sacramentum Ordinis potestne conferri à quovis Episcopo ?*

Potest valide ; quia ex dictis in Tractatu de Sacramentis in genere, Sacramenta ab Hæretico & excommunicato collata, rata sunt nec iteranda ; non potest autem licite nisi à proprio Episcopo, aut sine ejus consensu ex cap. *Eos*, Titul. *de tempore Ordinationis*, & ex Conc. Trid. sess. 23. capite 8. *de reformatione*.

Q. 3. *Quis est proprius Episcopus ?*

R. Proprius Episcopus triplex est, nempe originis, beneficii & domicilii. Ita Bonifacius VIII. cap. *Cum nullus*, Tit. *de tempore ordinat.* in sexto. Unde Synodus Senonensis annó 1528. declarat à quolibet ex tribus illis Episcopis licere Ordines suscipere. Cavendum tamen est ne per fraudem

Bene-

Beneficium obtineatur, puta ut Clericus examini proprii Episcopi se subiciat. Præsumitur autem fraus, quando Beneficium est tenuissimi redditus; verisimileque est Beneficiarium nolle se tenere mancipatum obsequio Diœcesis, in qua ordinatur, tuncque incurrit pœnas in eos latas qui ab alieno Episcopo ordinantur, nimirum est suspensus ab Officio Ordinis sic suscepti, & si in eo ministraverit, irregularitatem contrahit ex declaratione Cardinalium anno 1662. Hinc Clerus Gallicanus in Comitibus Generalibus anno 1657. ad vitandas frequentes fraudes censuit neminem ordinandum sine consensu Episcopi originis, quod religiose observant exceptis casibus necessitatis, puta si difficilior sit recursus ad Episcopum originis, vel sedes ejus vacet; & Beneficium, ratione cujus ordinant, residentiam postulet.

Q. 4. *Possuntne plures Ordines eadem die conferri?*

R. 1. Duo majores Ordines una die licite conferri nequeunt ex Concilio Tridentino sess. 23. cap. 13. de reform. & Innocentius III. cap. *Litteras*. Tit. *de temp. Ordinatus*. suspendit Episcopum, qui uno die contulerat Diaconatum & Presbyteratum; & Ordinatam ab executione officii Sacerdotalis vult manere suspensum. Unde colligunt Canonistæ, & Theologi sic Ordinatam non esse suspensum ab Officio Ordinis, quem primo loco suscepit, puta Diaconatus, quia ad illum legitime est promotus.

R. 2. Proprius Episcopus in Regionibus, in quibus consuetudo obtinuit, ut minores Ordines uno die cum Subdiaconatu conferantur, potest eos omnes simul conferre. Colligitur ex Cap.

De

De eo, Tit. de temp. Ordin. & ex Cap. Cum Lator, Tit. de eo, qui furtive Ordines suscepit. Sed plures Canonistæ, ut Ostiensis Panormitanus, Tonsuram cum quatuor Minoribus una die conferri posse negant, forte hac ratione ducti, quod tonsura dispositio sit ad Ordines, ac proinde necesse sit assignare temporis intervallum, quo Clericus ad eos præparari possit. Nostri tamen Prælati oppositæ sententiæ adhærent.

CAPUT VI.

De subjecto Ordinis.

Jam diximus solum masculinum baptizatum esse subjectum Ordinis. Tria autem requiruntur, ut sit idoneus ad Ordines suscipiendos. 1. Ut sit maturæ ætatis; infantes enim ordinari nequeunt. 2. Sit munitus sufficienti titulo, sive Clericali, sive patrimoniali ad majores Ordines suscipiendos. 3. non ordinetur per saltum, hoc est non ascendat ad superiorem, inferiore prætermisso.

Q. 1. Quæ ætas requiritur ad suscipiendos Ordines?

R. Jure novo nulla determinata est ætas pro minoribus Ordinibus, de quibus Patres Tridentini hæc solummodo statuunt sess. 23. c. 11. de Reform. *Minores Ordines iis, qui saltem Latinam linguam intelligant conferantur.* De Majoribus vero sic pronunciant, cap. 12. *Nullus in posterum ad Subdiaconatus Ordinem ante 21. ad Diaconatus ante 23. ad Presbyteratus ante 25. ætatis suæ annum promoveatur.* Sufficit autem ex usu recepto, ut anni, hocce Decreto præfixi, sint incæpti.

Q. 2.

Q. 2. *Qui ante præscriptum tempus ordinati sunt, superveniente ætate, possuntne legitime exercere functiones Ordinum præmature susceptorum?*

R. Non possunt si mala fide fuerint ordinati; quia ex Bulla Pii II. *Cum ex sacrorum*, ipso facto sunt suspensi; & si durante suspensione aliquod ministerium suorum Ordinum obeant, fiunt irregulares.

Dixi: *Mala fide*: qui enim bona fide existimat se habere legitimam ætatem, absque peccato Ordinem suscipit, nec proinde suspensionis pœnam incurrit, inquit Sylvius ad quæst. 26. Supplem. art. 2. ubi pro hac sententia laudat Barbosam, Navarrum, Sanchez, &c.

Q. 3. *Incurruntne aliquam censuram, qui ordinantur absque titulo?*

R. 1. Nullam incurrunt; nec peccant, si ordinantur ex consensu proprii Episcopi.

R. 2. In quibusdam Diœcesibus decernitur pœna suspensionis, aut etiam excommunicationis ipso facto incurrendæ ab iis, qui fictum titulum proferunt.

Fictus autem est titulus, si initiandus celet litigiosum esse Beneficium, aut exigui & nullius fere redditus: si taceat oppignoratam esse patrimonium: si pensio sit ab eo concessa, qui secundum leges dare non potuit: denique si initiandus cum donatore pactum inierit, quod nunquam utetur bonis in titulum concessis. Sed controversa est utrum jure communi ejusmodi fraudulentis sint suspensi? Quare

R. 3. Tutior est, &, ut videtur, communior sententia, cui adhærent Navarrus, Suarez, & Fagnanus, ejusmodi fraudulentos esse jure communi
suspensi.

suspenſos, idque probat idem Fagnanus in Cap. *Cum ſecundum*. Tit. *de Præbend.* confirmatque ſuam ſententiam declaratione ſacræ Congregationis.

Q. 4. *Quid ſentiendum de iis, qui ordinantur per ſaltum?*

R. Graviter peccant, & ſuſpenſi ſunt ab officio Ordinis per ſaltum ſuſcepti: non vero ab officio Ordinum antea ſuſceptorum, valida tamen eſt eorum ordinatio. Ita Innocentius III. Cap. *Tuæ litteræ*, Tit. *de Clerico per ſaltum promotō*; & Concilium Tridentinum cap. 14. ſeſſ. 13. *de reform.* ſic habet: *Cum promotis per ſaltum ſi non miniſtraverit, Episcopus ex legitima cauſa poſſit diſpenſare.*

Excipiendus tamen eſt Episcopatus, qui non poteſt conferri ei, qui non ſit Presbyter.

C A P U T VII.

De effectibus Sacramenti Ordinis.

Q. 1. *Quotuplex eſt effectus Sacramenti Ordinis?*

R. Triplex, ſcilicet character. Gratia ſanctificans, & gratia ſacramentalis.

Q. 2. *Quid eſt character Sacerdotalis?*

R. Eſt character Sacerdotii Chriſti, definiri que poteſt, ſignum in anima indelebiliter impreſſum, quo initiatus diſtinguitur à Laicis, efficiturque idoneus ad functiones Eccleſiaſticas obeundas. Singulas definitionis partes, & cætera, quæ ad characterem pertinent, expoſuimus Tract. de Sacramentis in genere.

Q. 3. *Quæ gratia sanctificans confertur per Sacramentum Ordinis?*

R. Non prima, qua deletur peccatum mortale, cum Sacramentum istud sit vivorum; sed secunda, hoc est, augmentum primæ & ejus plenitudo; quia *ad idoneam executionem Ordinum*, inquit S. Thomas 3. p. q. 64. art. 6. *ad 3. non sufficit bonitas qualiscunque, sed bonitas EXCELLENS, ut sicut illi qui Ordinem suscipiunt, super plebem constituuntur gradu Ordinis, ita & superiores sint gradu sanctitatis.* Alioquin, ait S. Bernardus Ep. 17. *Si altiore, quam meliorem esse delectat, non præmium, sed præcipitium expectamus.*

Q. 4. *Isthæc gratiæ plenitudo confertur ne semper in Ordinatione?*

R. Confertur dumtaxat iis, qui à Deo vocantur ad Sacerdotale munus, & ad illud rite sunt præparati; quia Sacramenta novæ Legis, etsi per se efficacia; pro dispositione tamen suscipientium plus vel minus Gratiæ conferunt: *Deus thesauro suo providet, nec sinit obrepere indignos*, inquit Tertullianus lib. *de Pænitentia* cap. 6. Rem egregie illustrat sanctus Gregorius lib. 4. in caput 10. Lib. I. Regum, exemplo Davidis & Saulis, qui ambo vocati à Deo fuerant ad Regnum: *Quid est, inquit, quod lenticulæ olei (parvo vase) Saul ungitur, nisi quia in fine reprobatur? Velut enim lenticula olei parum habuit, qui spiritalem gratiam projiciendus accepit. Quod in Rectore quoque sanctæ Ecclesiæ convenienter accipitur, plerumque enim culmen Prælationis accipiunt, qui in charitate Dei & proximi perfecti non sunt; quemdam namque effectum charitatis habent, (nota) sed plenitudinem non habent. Illa ergo rudis & imperfecta affectio quid est nisi lenticula olei? Nam*
dum

dum ungit caput & non replet, tota quidem effunditur, sed parum exhibet. Pro unctione vero Davidis, quem Deus invenerat secundum cor suum, præcipitur Prophetæ cap. 16. ut impleat oleo non lenticulam, sed cornu suum. Quod expendens idem sanctus Doctor sic habet: *Quando ergo electi promoventur, pleno cornu ungentur, quia ad altitudinem Ordinis proficiunt virtute perfectionis.*

Q. 5. *Quid est gratia sacramentalis?*

R. Est jus fundatum in gratia sanctificante per Sacramentum Ordinis collata ad accipienda à Deo auxilia supernaturalia, seu gratias actuales, quibus initiatus illustratur & accenditur ad ea, quæ sunt muneris Sacerdotalis sancte ac utiliter peragenda; quia ex S. Thoma in Supplem. quæst. 35. ant. 1. *Dei perfecta sunt opera, ut dicitur Deut. 32. & ideo cuicumque datur potentia aliqua divinitus, dantur etiam ea, per quæ executio illius potentiae possit congrue fieri . . . sicut autem gratia gratum faciens est necessaria ad hoc, quod homo digne Sacramenta recipiat, ita etiam ad hoc, quod homo digne Sacramenta dispenset.* Et S. Leo serm. 1. in die suæ Assumptionis, *Qui mihi honoris est Author, inquit, ipse mihi fiet administrationis adjutor; & ne sub magnitudine gratiæ succumbam infirmus, dabit virtutem qui contulit dignitatem.*

CAPUT VIII.

De dispositionibus ad Ordines.

Q. 1. *Quot requiruntur dispositiones ad Ordines rite suscipiendos?*

R. Septem. 1. Dei vocatio. 2. Canonica

electio. 3. Sanctitas. 4. Donum perpetuæ continentiae. 5. Scientia competens. 6. Genius Sacerdotalis, gallice *L'esprit Clerical ou Sacerdotal*, quod dicitur à sancto Ambrosio cor Sacerdotale. 7. Immunitas ab omni censura & irregularitate.

Q. 2. *Quid est vocatio?*

R. Est actus Providentiæ supernaturalis, quo Deus aliquos præ aliis eligit præparatque dotibus congruis ad sacra ministeria digne & laudabiliter obeunda.

Ergo cum nullus nisi Epicureus negaverit divinam Providentiam, necessario agnoscenda est isthæc Dei vocatio, utpote quæ sit præcipuus divinæ Providentiæ actus & maxime necessarius ad promovendos homines ad ultimum finem.

Q. 3. *Dei vocatio estne necessaria?*

R. Est omnino. Probatur 1. Ex Scriptura Joannis 10. *Qui non intrat per ostium in ovile ovium, sed ascendit aliunde, ille fur est & latro.* Et v. 7. *Ego sum ostium ovium*, ait Christus. Caveant ergo Ostiarii, Pastores intelligo, ne iis aperiant, quos Princeps mundi ambitione & cupiditate ad pulsandum incitat: quia gregem Christi non ita devastare potest, ac per Pastores non vocatos & mercenarios. Hebr. 5. *nec quisquam sumit sibi honorem, sed qui vocatur à Deo tamquam Aaron.*

Probatur 2. quia ex Dei vocatione tamquam ex radice, seu fundamento pendet gratiarum series cujusque status propria. *Qui mihi honoris est author, ipse mihi fiet administrationis adjutor*, inquit sanctus Leo Serm. 1. in die assumptionis suæ. Et S. Thom. 1. part. quæst. 22. artic. 3. *Quasunque*
cau-

causas aliquibus effectibus præfecit, dedit illis virtutem ad illos effectus producendos.

Tolle ergo Dei vocationem, idem est ac si convellas fundamentum, quo nititur ædificium; obtures fontem, ex quo rivus emanat; & excindas radicem per quam arbor trahit succum & alimentum, *numquid ex spinis colligunt uvas*, ait Christus Matth. 7. cum enim spinæ ad huiusmodi fructum producendum non sint creatæ, virtutem illius producendi non acceperunt à suo conditore; sic aptitudinem non accepit ad munia Ecclesiastica laudabiliter obeunda, qui non est ad ea formatus à Deo. Plura eaque gravissima, vide Tomo 7. parte 3. Paragr. 1. 2. & 3. ubi exponuntur signa divinæ vocationis, quorum alia sunt falsa, alia æquivoca & dubia, alia moraliter certa.

Q. 4. *Præter Dei vocationem requiritur ne canonica electio?*

R. Affirmative; constat enim ex Epistolis S. Pauli ad Timoth. & Tit. neminem habitum fuisse Diaconum, Presbyterum aut Episcopum, nisi qui fuisset probatus & ordinatus ab Apostolis, aut ab iis quos ipsi Ecclesiis regendis præfecerant. *Eis qui sunt in Ecclesia Presbyteris obedire oportet iis, qui successionem habent ab Apostolis*, inquit S. Irenæus lib. 4. cap. 43.

Sed cum in electione tria sint spectanda. 1. Postulatio, ut quis præ aliis assumatur ad munus sacerdotale. 2. Suffragia & consensus in illum qui postulatur. 3. Consecratio, qua quis actu & de facto constituitur Minister Ecclesiæ: certum est ex dictis solum Episcopum esse Ministrum Consecrationis, seu Ordinationis. Circa postulatio-

nem vero & suffragium varia fuit Ecclesiæ disciplina, nam ad 12. seculum in electionibus præsertim Episcoporum, ut plurimum expectabantur vota, ac suffragia Cleri & Plebis: Sacerdos, inquit sanctus Cyprianus Epist. 68. *Plebe præsentē, sub omnium oculis deligatur, & dignus atque idoneus publico iudicio, ac testimonio comprobetur.* Et Hincmarus Episcopus Rhemensis 9. seculo in Epistola ad Carolum Calvum scribit, *ab omnibus debet eligi, qui debet ab omnibus obediri.*

Dixi: *ut plurimum*; nam tumultus, qui identidem electiones turbabant, mutationis occasionem præbuerunt. Hinc Concilium Laodicænum 4. seculo sic statuit can. 13. *Non est permittendum turbis electionem eorum facere, qui sunt ad Sacerdotium promovendi.* S. Gregorius solus elegit sanctum Augustinum Anglorum Episcopum. Apostoli quoque & eorum Discipuli præfecerunt Diaconos, Presbyteros & Episcopos absque postulatione & electione Plebis. Unde merito Concilium Tridentinum sess. 23. can. 7. anathemate percussit Pseudoreformatos asserentes irritas esse ordinationes eorum, qui sine populi vel potestatis secularis consensu, aut vocatione consecrantur.

Q. 5. *Quid si Episcopi ordinent, quem Deus æterna sua vocatione non elegit?*

R. Sic promotus est quidem coram Deo intrusus; nihilominus valida est ejus ordinatio; ita declaravit Concilium Constantiense sess. 8. contra Wicleffum, & Joannem Hus; cum enim interna Dei vocatio non sit omnibus manifesta, magna foret perturbatio in Ecclesia, si exterior & mi-

& ministerialis Pastorum vocatio non sufficeret ad constituendos Ecclesiæ Ministros.

Q. 6. *Quæ sanctitas in initiandis requiritur?*

R. Requiritur, ut sacris Ordinibus initiandus vel à Baptismo innocenter vixerit, vel peccati maculas deinceps contractas longa pœnitentia eluerit, qua solutus ab omnibus vitiosis habitibus, & in castitate cæterisque virtutibus radica- tus extra morale relabendi periculum censeatur. De Diaconis ait Apostolus i. Tim. 3. *Habentes mysterium Fidei in conscientia pura; & hi autem probentur primum, & sic ministrent, nullum crimen habentes.* Quod autem ad ejusmodi probationem satis non sit candidatum in secessu per aliquot dies piis operibus vacasse, addit Apostolus, *non Neophytum, ne in superbiam elatus, in judicium incidat Diaboli;* id est non recens conversum; non in virtute rudem ac novitium, ne pereat instar Luciferi, qui Neophytus in Cœlo superbiit, ideoque damnatus est, inquit Sanctus Chrysostomus. Unde Concilium Sardicense anno 347. sic statuit can. 20. *Conveniens non est, nec ratio, vel disciplina patitur, ut temere vel leviter ordinetur aut Episcopus, aut Presbyter, aut Diaconus, qui Neophytus est sed hi, quorum per longum tempus examinata sit vita, & merita fuerint comprobata.*

Dixi, *extra morale relabendi periculum censeatur;* quia etsi militia sit vita hominis super terram, & quilibet Sanctus in aliquo semper versetur peccandi periculo, dicente Apostolo, i. Cor. 10. *Qui se existimat stare, videat ne cadat.* Attamen qui piis & diuturnis exercitationibus virtutis habitum comparavit, & appetitum sub imperio rationis per longum tempus continuit, qui dudum

expertus est munitum se continentiae dono, & charitate flagrat, lævissima quæque peccata pro virili evacuans, multam perseverandi fiduciam concipit, & aliis injicit. Quomodo vero se gerere debeat Confessarius erga pœnitentem, qui ad Ordinationem admissus est, cum tamen habitus vitiosos contraxerit, necdum eradicaverit per contrarios, nullumque signum præ se ferat accepisse se à Deo continentiae donum, diximus Tomo 7. Parte 3. de Ordine, cap. 4.

Q. 7. *Scientia estne necessaria initiandis?*

R. Affirmative; *Labia enim Sacerdotis custodient scientiam & Legem requirent ex ore ejus*, ait Dominus Malach. 2. *Quia tu scientiam repulisti, repellam te, ne Sacerdotio fungaris mihi*, Osee 4. & Christus Matth. 23. *Væ vobis duces cæci*. Concordat Jus Canonicum cap. *Illiteratos*, dist. 16. *Litteris carens Sacris non potest esse aptus officiis*. Et cap. ultimo de temp. Ordin. in sexto suspenditur ad annum Episcopus à collatione Tonsuræ, qui illiterato eam contulerit. Qua autem scientia instructi esse debeant, accurate exposuimus Tomo 7. part. 2. cap. 8. Cum vero Canonici Ecclesiarum Cathedralium ex suo instituto adjutores sint Episcopi, & loco præemineant toti Clero Diœcesano, ita scientia & moribus præluceant necesse est; de iis quippe sic statuit Concilium Lateranense IV. cap. 10. & 11. *Præcipimus tam in Cathedralibus, quam in Conventualibus Ecclesiis viros idoneos ordinari, quos Episcopi possint Coadjutores & Cooperatores habere*. Et Concilium Tridentinum sess. 24. cap. 12. de reform. hortatur, *ut dignitates omnes & saltem dimidia pars Canonicatum in Cathedralibus Ecclesiis & Collegiatis insignibus, conferantur tantum Magistris,*
vel

vel Doctoribus, aut etiam Licentiatís in Theologia vel saltem in Jure Canonico.

Q. 8. Quid intelligitur nomine genii Sacerdotalis, seu Clericalis?

R. Intelligitur vis divinitus insita, qua quis incitatur ad functiones Ecclesiasticas, utpote sibi gratas & jucundas.

Dico: *Functiones*, non vero dignitates; ad has quippe ambitio & cupiditas plerumque movent, non autem ad earum functiones, nisi forte honos & emolumentum temporale inde spectetur.

Q. 9. Genius Sacerdotalis estne necessarius promovendis?

R. Affirmative; probaturque ex Scriptura Num. 11. offeruntur Deo viri ab omni plebe testimonium habentes, quod ornati sint scientia, sapientia ac pietate, & nihilominus nondum idonei sunt etiam judicio Dei, qui præficientur populo. Quid igitur amplius in eis requiritur? Spiritus principalis, *Descendam & loquar tibi*, ait Dominus ad Moysen, *& auferam de spiritu tuo, tradamque eis, ut sustentent tecum onus populi*. Similiter Christus Joan. 20. Apostolis spiritum suum communicat, cum eos constituit novæ Legis Ministros: *Sicut misit me Pater*, inquit, *& ego mitto vos*. *Hæc cum dixisset, insufflavit, & dixit eis, accipite Spiritum Sanctum*. Et ratio est, quia res vere non sunt quod videntur, si desit proprius spiritus; cur enim statua aut imago picta non est homo, quem effigit, nisi quia non informatur spiritu hominis?

Q. 10. In quo consistit præcise genius Sacerdotalis?

R. Consistit in ardenti studio promovendi gloriam Dei, & salutem proximi; quia genius cujusque artis & conditionis est flagrans studium consequendi finem, ad quem ars illa vel conditio est instituta, v. gr. Mercatoris magnum faciendi quæstum: Atqui finis status Sacerdotalis est, ut nomen Dei sanctificetur, ut Clericus quos potest in ejus notitiam, amorem & obsequium inducat, in quibus salus proximi proprie consistit.

Ergo in eo differt genius Sacerdotis à genio Christiani Laici, quod Laicus sibi attendat, Sacerdos vero æque de aliorum, ac de sua salute timeat: ille bonis operibus merita sibi comparet, ut dignus habeatur Regno Cælorum; iste exemplo Christi pro aliis etiam sanctificet se ipsum, ut eos ad vitam æternam secum perducatur: magnum solatium est Laico culpa vacare, & mundum esse à sanguine eorum, qui pereunt: At Sacerdos aliena peccata deflet ut sua: denique Laicus cavet ne in Dei offensionem incurrat; Sacerdos vero etiam uritur, cum videt Legem Dei ab aliis indigne proculcari. Hinc nascitur animi fortitudo & audacia ad monendum, arguendum, corripiendum.

Q. II. *Quæ impedimenta remonent ab Ordinibus?*

R. Censuræ & irregularitates, de quibus seorsim dicendum.



APPEN-



A P P E N D I X

DE

C E N S U R I S.

§. I.

De notione Censuræ.

Q. I. *Quid est Censura?*

R. Describi potest, pœna spiritalis & medicinalis ob gravem culpam cum contumacia ad tempus Ecclesiastica potestate inflicta baptizatis, qua privantur directe usu communium bonorum spiritalium.

Singuli definitionis termini sunt accurate expendendi, cum ex iis solvi debeant quamplurimæ difficultates, quæ in hac materia occurrunt. Itaque

Dicitur 1. *Pœna*, ut censura distinguatur ab irregularitate, quæ ex sua ratione generica non est pœna; omnis quippe pœna supponit peccatum: Atqui plures irregularitates non supponunt peccatum, sed oriuntur ex solo defectu, puta corporis vel animi: Ergo non sunt pœnæ, nec proinde censuræ.

Dicitur 2. *Spiritalis*; quia censura est actus jurisdictionis spiritalis, afficit animam, non corpus, dire-

directeque privat bonis spiritualibus, officio Sacerdotali, & indirecte solum temporalibus, puta fructibus Beneficii; cum enim Beneficium sit propter officium, qui per censuram suspenditur ab officio, consequenter privatur fructibus Beneficii, atque ea ratione censura distinguitur à pœnis, quas Magistratus civilis imponit subditis, quæ sunt actus jurisdictionis temporalis, privantque solum bonis temporalibus.

Dicitur 3. *Ecclesiastica potestate inflicta*; quia censura est privatio bonorum spiritualium, quæ cum Laici non habeant in sua potestate, penes eos non est illa subtrahere. Hinc Abbatissæ non decernunt censuras proprie dictas, sed pœnas duntaxat æconomicas, nec Judex Laicus per decretam corporis comprehensionem directe suspendit Clericum ab Officio, à quo tamen debet abstinere saltem publice ad vitandum scandalum, sed irregularitatem non incurrit, si eo defungatur.

Dicitur 4. *Medicinalis & ad tempus inflicta*; quia censura est ad corrigendum delinquentem; & ea ratione distinguitur à depositione & degradatione quæ sunt in perpetuum, & in meram vindictam. Per depositionem quippe Clericus in perpetuum privatur omni Beneficio & officio Clericali absque spe veniæ, etiamsi ad meliorem frugem se recipiat & satisfactionem offerat; per degradationem vero privatur etiam privilegio Clericali, redigiturque ad Laicorum Ordinem.

Dicitur 5. *Baptizatis inflicta*; quia ad ferendas censuras requiritur jurisdictio. Atqui Ecclesia non habet jurisdictionem in non baptizatos.

Baptizati non subjiciuntur censuris nisi sint
adulti

adulti & ratione utantur; quia alioquin non sunt capaces peccati, quod censura necessario præsupponit.

Adulti impuberes ligari possunt censuris, ut patet ex cap. *Super eo*, & cap. *Pueris*, ubi Summi Pontifices pronuntiant impuberem, qui injuste percussit Clericum, posse absolvi ab Episcopo, quamvis absolutio ab hac censura in puberibus sit reservata Sedi Apostolicæ.

Dicitur 6. *ob gravem culpam*; quia cum censura præsertim totalis, sit gravis pœna, non debet ferri nisi ob gravem culpam; alioquin esset injusta.

Dixi: *Præsertim totalis*; quia sunt aliquæ censuræ partiales, ut excommunicatio minor, suspensio ad breve tempus & ab aliquo tantum officio, quæ non necessario supponunt gravem culpam.

Ergo qui ex ignorantia invincibili transgressus est Legem, v. g. simoniam juris Ecclesiastici commisit in Beneficio, excommunicationem in simoniacos latam non incurrit, quia ut supponitur, non peccavit; sed collatio Beneficii nulla est, nec Clericus potest illud retinere absque dispensatione.

Ut autem grave peccatum sit materia censuræ, requiritur 1. ut actus sit externus, ex cap. *Erubescant*, distinct. 32. & ex cap. *Tua nos*, Tit. *de Simonia*, in quo sic habetur, *nobis datum est de manifestis tantummodo judicare*, 2. ut actus sit completus, v. gr. simonia ex utraque parte completa, nisi tamen aliud exprimatur in Lege; namque per Bullam sancti Pii V. excommunicantur simoniaci confidentiarii, etiamsi conventionem ex utraque parte non compleverint, & per Constitutionem Cle-

Clementis VIII. in Gallia receptam, qui provocant ad duellum, vel illud acceptant, sunt ipso facto excommunicati, etiamsi conflictus non sequatur.

Porro peccatum potest esse grave per mandatum Superioris, quamvis materia secundum se spectata & soluta ab omnibus circumstantiis videatur levis, vel etiam indifferens, ut venatio, potatio etiam moderata in popinis, habere in suo famulatu mulierem etiam honestam; quando enim ista viam aperiunt multis corruptelis & scandalum generant, evadunt materia gravis, possuntque prohiberi sub censuris.

Dicitur 7. *Cum contumacia*, id est cum præcepti & pænæ Ecclesiasticæ contemptu. Ita de excommunicatione habetur expresse cap. *Constitutionem*, Tit. *de Sentent. excommunicat.* in sexto, ubi Innocentius IV. In Concilio generali Lugdunensi I. decernit irritam fore excommunicationem, nisi præcedat monitio.

Sed Lex ista spectat solummodo censuram ab homine, seu quæ fertur per modum Sententiæ, nam ad censuram, quæ fertur ipso jure, non alia requiritur monitio, quam comminatio censuræ incurrendæ, in ipso jure contenta.

Ergo non fertur censura proprie dicta ob peccatum præteritum commissum absque contumacia, hoc est absque prævia monitione.

Ergo ignorantia probabilis, seu invincibilis censuræ excusat a censura, peccavit v.g. aliquis; sed inculpate ignoravit huic peccato censuram esse annexam, non incurrit censuram, quia non fuit contumax, nec monitus. Ita expresse habetur, cap. *ut animarum*, Tit. *de Constit.* in sexto,

Ergo

Ergo lex, aut sententia cum comminatione Suspensionis, aut excommunicationis obligat sub mortali; quia ex gravi pœna colligitur legem obligare sub gravi peccato.

Dicitur 8. *Qui privantur usu communium bonorum spiritualium*, eorum scilicet quæ dispensat Ecclesia, qualia sunt Sacrificium, Sacramenta, divina Officia, Orationes publicæ, sepultura Ecclesiastica, societas & communicatio cum Fidelibus. Bona autem quæ non subsunt Ecclesiæ jurisdictioni & dispensationi; sed immediate profluunt à Christo capite, ut gratia sive actualis, sive habitualis & sanctificans, non auferuntur nec impediuntur per censuram. Unde censura excommunicationis non impedit quominus excommunicatus auxilia supernaturalia accipiat, moveatur ad perfectam contritionem, obtineatque à Deo remissionem peccatorum.

§. II.

De divisione Censuræ.

Q. 1. *Quomodo dividitur Censura?*

R. Dividitur I. In eam quæ est latæ sententiæ, & eam quæ est ferendæ sententiæ: Prima incurritur ipso facto, id est statim atque peccatum admissum est absque alia sententia iudicis: secunda vero non incurritur ipso facto ante sententiam iudicis, minusque est censura, quam censuræ incurrendæ monitio seu comminatio, quam si subditus contempserint, contumax evadit, sicque iudex absque alia monitione, censuram in illum ferre potest.

Dignoscitur autem censuram esse latæ sententiæ,

tiæ, quando Superior hisce vocibus utitur, *Ipso jure, ipso facto; latæ sententiæ, confestim, ex tunc sub-
jaceat excommunicationi, sit excommunicatus, anathema sit.* Censura vero ferendæ sententiæ his terminis solet exprimi, *sub pœna suspensionis, excommunicatio-
nis, sub interminatione anathematis, decernimus suspen-
dendum, excommunicandum, &c.* In dubio autem an censura sit latæ vel ferendæ sententiæ, judican-
dum est esse dumtaxat ferendæ sententiæ, quia odia non sunt amplianda, sed restringenda.

Dividitur 2. censura in justam & in inju-
stam.

Duplex autem est censura injusta; alia est va-
lida & servanda, de qua sanctus Gregorius Hom.
6. in Evang. sic habet: *Sententia Pastoris, sive justa,
sive injusta sit, timenda est*: alia irrita & prorsus
nulla, nec proinde timenda saltem in foro inte-
riori.

Valida est censura, licet injusta, cum adfunt
omnia ad essentiam censuræ requisita, puta cri-
men & monitio; sed desunt quædam accidenta-
ria, v. g. non procedit ex amore justitiæ, sed ex
odio; fertur sine scripto, nec in ea exprimitur
causa, ut præscribit Concilium Lugdunense I. vel
reus tantam pœnam non meretur, excommunica-
tur v. gr. cum satis esset eum suspendi.

Irrita est censura injusta, & prorsus nulla,
quando vel deficit ordo substantialis, monitio,
v. gr. non præcessit excommunicationem, vel
deest causa propter quam fertur, nempe pecca-
tum mortale, a quo immunis est, qui putatur
reus. In dubio an censura sit invalida, faven-
dum est Superiori.

Dixi,

Dixi : *Saltem in foro exteriori* ; quia si publicè non constet, censuram esse invalidam, accusatus debet exterius se gerere tamquam censura ligatum ad vitandum scandalum.

Dividitur 3. censura in eam, quæ est à jure, & eam, quæ est ab homine.

Censura à jure est ea, quæ in Canonibus Ecclesiæ, & Statutis Episcoporum exprimitur, ac per modum Legis fertur.

Censura ab homine dicitur, quæ fertur à superiore non per modum statuti, sed præcepti transitorii, & hæc duplex est; alia generalis, quæ generatim fertur, v. gr. in subditos Clericos, qui popinas frequentaverint : alia specialis, quæ fertur in certam, ac determinatam personam vel communitatem, ut si Episcopus prohibeat sub pœna suspensionis Clerico ne ingrediatur quandam domum propter scandalum, quod inde nascitur; vel Monasterio sibi subdito; ne mulieres intra sua claustra admittat.

Q. 2. *Quid observandum juxta hodiernam Ecclesiæ disciplinam circa eos, qui ligati sunt aliqua censura?*

R. Juxta Constitutionem ad vitanda scandala, ubique receptam, quam vulgò tribuunt Martino V. distinguendum est inter toleratos & non toleratos.

Tolerati dicuntur, qui quamvis publici, non sunt tamen expressè, ac nominatim publicati & denunciati auctoritate Judicis : non tolerati verò, qui sunt nominatim denunciati.

Porro ex illa Constitutione & ex hodierna Ecclesiæ disciplina excommunicati, suspensi, interdicti sive à Jure, sive ab homine per quamcumque sententiam etiam specialem validè exer-

cent, quæ sunt jurisdictionis, validè absolvunt, Beneficia conferunt, &c. nec vitandi sunt, etiam si notoriè sint excommunicati, nec Sacerdos tenetur, imò nec debet intermittere divinum officium ex eo, quòd advertat adesse excommunicatum notorium, v. gr. Calvinianum, aut Lutheranum. Contra verò non toleratorum actus, qui ex jurisdictione pendent, ut absolutio sacramentalis, electio ad Beneficia & eorundem collatio, sunt irriti ac nulli, nec licet divina Officia prosequi coram excommunicato non tolerato, ut infra dicetur.

Dixi: *actus, qui ex jurisdictione pendent*: actus enim Ordinis, ad quos absolutè non requiritur jurisdictio, sunt validi, quamvis illiciti; excommunicatus non toleratus v. g. validè baptizat, Eucharistiam conficit, &c.

Laudata Constitutio excipit publicum Clerici percussorem, quem declarat vitandum, quamvis non sit nominatim denunciatus. Sed in Gallia ad notorietatem facti debet accedere sententia Judicis declaratoria percussorem injustè percussisse; alioquin non erit vitandus, quantumcumque publicum sit ejus crimen.

Q. 3. *Laudata Constitutio favetne iis, qui censuram incurrerunt?*

R. Minimè, sed vergit solummodo in commodum aliorum, ut patet ex ejus verbis: *Per hoc tamen, inquit, hujusmodi excommunicatos, suspensos, seu prohibitos non intendit in aliquo relevare, nec eis quomodolibet suffragari.*

Ergo suspensus, aut alia censura ligatus, quantumcumque occultus peccat, si exerceat ea à quibus per censuram prohibetur, & irregula-
rita-

ritatem incurrit, si exequatur ea, quæ sunt Ordinis: similiter excommunicatus occultus, si cum aliis communicet sive in divinis, sive in civilibus, & incapax est Beneficii acquirendi, non privatur tamen ipso facto Beneficio, quod prius obtinebat, sed privari potest.

§. III.

De Excommunicatione.

Q. 1. *Quotuplex est Excommunicatio?*

R. Duplex, minor & major.

Q. 2. *Quam ob causam incurritur excommunicatio minor?*

R. Incurritur ob communicationem non criminofam cum Excommunicato non tolerato, Cap. *Nuper*, de Sententia Excommunic. Nec alia invenitur hujusce excommunicationis causa in jure novo. Dico, *in jure novo*, quia in veteri quamplurimæ leguntur excommunicationes, quas Theologi interpretantur minores, quæque jam non sunt in usu.

Q. 3. *Quid est Excommunicatio minor?*

R. Est censura, qua baptizatus privatur participatione Sacramentorum, & passiva electione ad dignitates & Beneficia Ecclesiastica. Colligitur ex Cap. *Si celebrat*. Tit. de Clerico excommunic.

Ergo duo sunt effectus minoris excommunicationis, scilicet privatio perceptionis Sacramentorum, & passivæ electionis ad Beneficia.

Ergo peccat graviter minori excommunicatione ligatus scienter recipiens Sacramenta aut.

Beneficia, quia in re gravi censuram violat. Non fit tamen irregularis, nec Beneficii provisió est irrita, sed solum irritanda, ut expresse habetur laudato Cap. *Si celebrat*.

Ergo Sacerdos ligatus minori excommunicatione non violat censuram, nec peccat præcisè ministrando Sacramenta, aut conferendo Beneficia; quia minor excommunicatio non privat activa administratione Sacramentorum, nec activa electione ad Beneficia. Peccaret tamen si scienter conferret Sacramenta, aut Beneficia Excommunicato excommunicatione minori; quia non licet indignis Sacramenta, aut Beneficia conferre.

Q. 4. *Quid est Excommunicatio major?*

R. Est censura, qua baptizatus in vindictam gravioris delicti totaliter abscinditur à corpore Ecclesiæ, habeturque sicut Ethnicus & Publicanus.

Ergo excommunicatio major est omnium censurarum gravissima, aliasque complectitur, sicut totum continet partes; in excommunicatione enim includitur suspensio, & interdictum, ut infra patebit. Majori excommunicatione percussi dicuntur 1. præcisi & abscissi tamquam rami à trunco, qui brevi arescunt; & membra à corpore, à quo spiritum vitalem haurire nequeunt, & ideo in corruptionem abeunt; nam ex sancto Augustino non vivit spiritu Christi, nisi Corpus Christi, quod est Ecclesia. 2. Satanæ traditi ex Apostolo 1. Cor. 5. quia ovis scabiosa lupo tradi censetur hoc ipso quò ex ovili ejicitur; Ecclesia quippe est Christi ovile, in quo oves sub vigilantí Pastore securè accubant: est

& arx munitissima Christi virtute circumvallata, adversus quam portæ inferi non prævalent: porro inde expelli, quid aliud est quam Satanæ tradi, qui *sicut leo rugiens quærit quem devoret?* 1. Petri 5. Unde sanctus Hieronymus Epist. 1. ait: *Nunc inobediens spiritali mucrone truncatur, aut ejectus ab Ecclesia, rabido dæmonum ore discerpitur.*

Q. 5. *Quot sunt majoris Excommunicationis effectus?*

R. Quinque vulgò numerantur.

1. Excommunicatus etiam toleratus privatur communibus Ecclesiæ Suffragiis, nimirum Sacrificiis, Orationibus, Indulgentiis, Jejuniis, & aliis operibus satisfactoriis, quæ offeruntur nomine Ecclesiæ ex Cap. *Sacris*, Tit. *de Sentent. Excommun.* Licet tamen cuilibet privato etiam Sacerdoti celebranti ex propria devotione, & suo privato nomine preces, sacrificium, & alia bona offerre pro excommunicati conversione.

2. Excommunicati etiam tolerati extorres sunt à Sacramentorum collatione sicut suspensi, & receptione quemadmodum interdicti.

Ergo absolutio ab excommunicatione præmitti debet absolutioni à peccatis, secus dicendum de absolutione à suspensione, cum enim hæc censura non privet suspensum à perfectione Sacramentorum, suspensus potest prius absolvi à peccatis, & admitti ad perceptionem Eucharistiæ, quàm per Superiorem absolvatur à suspensione.

3. Excommunicati etiam tolerati inhabiles sunt ad Beneficia & dignitates, ita ut eorum collatio sit irrita & prorsus nulla ex Cap. *Postulatis*, Tit. *de Clerico excomm.*

Isthæc juris dispositio extenditur ad pensionem Clericalem, cujus incapax est excommunicatus secundum communioem sententiam; quia excommunicatus, utpote membrorum ab Ecclesiæ corpore præcisum, nullam ab ea gratiam recipere potest.

4. Excommunicatus etiam toleratus privatur omnis spiritalis jurisdictionis usu; non potest sine gravi peccato Ministros instituere, alios excommunicare, Leges ferre, in iis vel in votis & juramentis dispensare, suam jurisdictionem alteri delegare, conferre Beneficia, ad ea eligere aut præsentare. Validi tamen sunt illi omnes actus, quamdiu est toleratus; secus, si non sit toleratus.

5. Excommunicatis interdicitur omnis communicatio cum Fidelibus; non sunt tamen vitandi, quamdiu tolerantur; secus si non tolerantur.

Actiones autem humanas, in quibus communicare non licet cum excommunicatis non toleratis sigillatim Canonistæ exprimunt versu sequenti:

Os, orare, vale, communio, mensa negatur.

Os, significat confabulationes sive verbo, sive scripto. *Orare*, denotat orationem cum excommunicato non fundendam. *Vale*, negat honorificam salutationem, v. g. aperiendo caput, &c. *Communio* prohibet omnem societatem, ut in contractibus & communi habitatione. *Mensa* significat non comedendum cum excommunicato.

Exci-

Excipiuntur tamen nonnulli casus, quos Canonistæ sic exprimunt:

Utile, lex, humile, res ignorata nec esse.

Per *utile*, intelligitur utilitas sive spiritualis, sive temporalis, propter quam fidelis potest communicare cum excommunicato non tolerato, puta ut eum ad meliorem frugem reducat ex Cap. *Cum voluntate*, Tit. *de Sentent. Excommunic.* ut debitum reposcat, ut consilium aut auxilium recipiat, si non sit alius præter excommunicatum, à quo accipere possit. Per vocem *Lex*, intelligitur Matrimonium propter quod conjuges possunt inter se communicare, licet alter eorum sit excommunicatus non toleratus. Per *humile*, significatur officium filiorum, servorum, & subditorum qui tenentur obsequi excommunicatis parentibus, dominis, & superioribus. *Res ignorata*, denotat excusandum fidelem, qui ex ignorantia, vel inadvertentia communicat cum excommunicato. *Neceffe*, designat necessitatem tam excommunicati, quam non excommunicati, propter quam Jure naturali & divino tenemur auxilium præstare proximo, v. gr. alimenta necessaria subministrare, nudum vestire, mortuum sepelire, non tamen in Ecclesia, aut Cœmeterio, si excommunicatus non erat toleratus. Plures difficultates, eæque gravissimæ proponi solent circa Monitoria, quas brevitatis Compendii non sinit expendere. Consulat Lector Tomum 7. Parte 2. cap. 9. §. 8. de *Monitoriis*.

§. I V.

De Interdicto.

Q. 1. *Quid est interdictum?*

R. Est censura privans baptizatum aliquibus Sacramentis, omnibusque officiis divinis, & sepultura Ecclesiastica. Colligitur ex Cap. *Quod in te*, Tit. de Pœnit. & Remiss.

Dixi: *Aliquibus Sacramentis*; non enim privat Baptismo, nec Sacramentis Pœnitentiæ & Matrimonii ex Cap. *Alma*, Tit. de Sentent. Excomm. in sexto.

Ergo Interdictum non privat omnibus Ecclesiæ bonis, nempe omnibus Sacramentis, & communione Fidelium in civilibus, nec interdictus, etiam nominatim denunciatus, est vitandus, nisi in Officiis divinis.

Q. 2. *Quid intelligitur nomine divinatorum Officiorum?*

R. Omnis actio ordinata ab Ecclesia ad usum Ordinum, Sacramentorum ac Sacramentalium, & preces ejus nomine fundendas, quales sunt Horæ Canonicae.

Ergo tempore interdicti potest benedici mensa etiam ab interdictis: possunt etiam tam Laici, quam Clerici fundere preces privadas; quia ista non peraguntur tamquam à Ministris Ecclesiæ. Quin Clerici interdicti tenentur sicut excommunicati privatim pensum Horarum Canoniarum persolvere: debent tamen omittere versiculum præscriptum in Breviario Romano *Dominus vobiscum*; quia brevis illa Oratio est Actus Hierarchicus.

Q. 3.

Q. 3. *Quotuplex est interdictum?*

R. Triplex: locale, personale, & mixtum.

Locale directè cadit in locum, ne in eo Officia divina celebrentur saltem publicè, neve quisquam ibidem sepeliatur.

Personale afficit ipsas personas, ita ut non solum in loco interdicto; sed in alio quovis loco Officia divina audire non possint, nec in ullo loco sacro sepeliri.

Mixtum conflatur ex locali, & personali, directèque afficit locum & personas, ac proinde omnes interdicti localis & personalis habet effectus.

Ergo si interdictum sit solummodò locale, poterunt Incolæ alibi divinis Officiis interesse, in alio loco sacro post mortem sepeliri, modò locus ille non sit quoddam accessorium Ecclesiæ interdictæ, ut cæmeterium ipsi contiguum; quia, inquit, accessorium sequitur principale; non contra, interdicto enim cæmeterio, non censetur Ecclesia interdicta.

Dixi: *Cæmeterium contiguum*: si enim ejus extrema non contingunt Ecclesiam interdictam, cæmeterium non erit interdictum.

Cætera quæ pertinent ad interdictum, vide Tomo 7. Cap. 9. Paragr. 9. *de Interdicto*.

§. V.

De Suspensione.

Q. 1. *Quid est Suspendio?*

R. Est censura, qua Clerico prohibetur usus Ordinis, Officii, & Beneficii.

Dicitur 1. *Clerico*, ut denotetur solum Clericum esse suspensioni subiectum.

Dicitur 2. *Prohibetur usus Officii & Beneficii*, ut distinguatur suspensio à depositione; per depositionem enim Clericus spoliatur potestate jurisdictionis & ipso Beneficii titulo: per suspensionem verò ipsi solum prohibetur usus jurisdictionis & Beneficii.

Q. 2. *Quotuplex est suspensio?*

R. Triplex: alia ab Ordine, alia ab Officio, alia à Beneficio.

Suspensio ab Ordine est ea, qua Clericus privatur usu suorum Ordinum, ita ut licet non possit Missam celebrare, Sacramenta ministrare, si sit Sacerdos, fungi munere Diaconi aut Subdiaconi, denique ea peragere, quæ non nisi ab Ordine initiatis ritè peragi possunt. Unde cum actus minorum Ordinum hodie promiscuè exercentur à Laicis & Clericis sola Tonsura insignitis, Diaconus aut Subdiaconus suspensus non incurreret irregularitatem, si functiones minorum Ordinum obiret; & ita secundum hodiernam disciplinam non creditur suspensionem cadere, nisi in eos, qui sunt ad majores Ordines promoti.

Suspensio ab officio est ea, qua Clerico prohibetur jurisdictionis usus, ut eligere ad Beneficia, censuras ferre, delegare ad munia Sacerdotalia obeunda.

Suspensio à Beneficio est ea, qua Clericus privatur fructibus temporalibus sui Beneficii, nec proinde potest eos administrare, Cap. *Cum Venoniensis*, Tit. de *Electione*. Verum isthæc suspensio locum non habet in Galliis, ubi Clericus, quamdiu

diù non est spoliatus Beneficii titulo, non potest sine abusu per Judicem Ecclesiasticum privari Beneficii fructibus, sed recurrendum est ad Judicem Laicum, ut probavimus Tomo 7. de Ordine par. 2. cap. 9. §. 10.

§. VI.

De Absolutione à Censuris.

Q. 1. *Quis potest absolvere à Censuris?*

R. In foro Conscientiæ solus Sacerdos; quia in illo foro nemo præter Sacerdotem potest esse Judex: in foro verò exteriori seu contentioso is qui censuram tulit, vel ejus successor, vel delegatus ab ipso, vel ejus superior in causa appellationis. Ita habetur Cap. Nuper, Tit. de Sentent. Excommun. & Cap. Verbum, Tit. de Pœnit. dist. 1. his verbis: *Dominus parjus & solvendi esse voluit & ligandi, qui utrumque pari conditione permisit.*

Sed observandum est absolutionem à censuris datam in foro conscientiæ non habere effectum nisi coram Deo; nec impedire quominus sic absolutus conveniatur coram Judice in foro externo, ibique declaretur excommunicatus, aut suspensus, ac omnem pœnam subeat nulla ratione habita absolutionis in foro interiori obtentæ.

Q. 2. *Quis Sacerdos potest absolvere à censuris in foro conscientiæ?*

R. 1. In articulo mortis quivis Sacerdos etiam excommunicatus, ac nominatim denunciatus à qualibet censura absolvere potest ex Conc. Trident. Sess. 14. c. 7. Utrum autem infirmus recuperata

perata sanitate teneatur sub pœna reincidentiae, ut ajunt, se sistere coram Superiore juxta Constitutionem Bonifacii VIII. expendimus Tomo 7. de Ordine part. 2. cap. 9. §. 12.

R. 2. Extra mortis articulum omnis Sacerdos approbatus potest absolvere à censuris non reservatis ex cit. cap. *Nuper*. Si censura sit reservata, Jure antiquo is solus potest ab ea absolvere, qui eam sibi retinuit, vel ejus successor vel delegatus, vel superior ex cit. cap. *Nuper*.

Dixi: *Jure antiquo*; nam jure novo Concilium Tridentinum Sess. 24. cap. 6. *de Reform.* permittit Episcopis absolvere à casibus & censuris summo Pontifici reservatis, modò casus illi sint occulti nec ad forum contentiosum deducti.

Q. 3. *Quæ censura censetur reservata?*

R. Excommunicatio si sit à jure, vel ab homine per modum sententiæ generalis, reservatio debet exprimi in ipsa lege vel sententia, Cap. *Nuper*. Tit. de Sentent. Excommunicat. *Quia*, inquit summus Pontifex, conditor Canonis, qui ejus absolutionem sibi specialiter non retinuit, eo ipso concessisse videtur facultatem aliis relaxandi. Si autem censura sit ab homine, per Sententiam specialem censetur reservata, etiamsi reservatio non exprimatur. Ita communiter Theologi. Hinc excommunicatus per Monitorium non potest absolvi nisi à Superiore aut ejus Delegato; quia Sententia Judicis censetur particularis, quamvis comprehendat omnes, qui non paruerunt Monitorio. Patet exemplo Sententiæ, qua Judex secularis morte damnat omnes, qui in aliquo crimine, putà homicidio participarunt; hæc quippe Sententia, quamvis generaliter enunciatur, proprie

propriè tamen particularis est , quia factum singulare spectat.

Dixi : *Censura Excommunicationis* ; de ea enim solum loquitur summus Pontifex. Unde colligunt Theologi censuram suspensionis & interdicti personalis esse reservatam , etiamsi sit à jure , nec reservatio exprimitur. Vide Navarr. man. cap. 27. num. 162. Avilam, 3. part. disp. 6. dub. 1. conclus. 1. & collationem sextam Diœcesis Agathensis.

Ergo, inquires, quilibet Sacerdos approbatus frustra absolvit ab omni vinculo non solum excommunicationis, sed etiam suspensionis & interdicti.

Nego sequelam ; hæc enim absolutio datur ad cautelam ex consensu Ecclesiæ , nec proinde frustra , si pœnitens invincibiliter ignoret se ligatum esse aliqua ex ejusmodi censuris.



APPEN-



APPENDIX

DE

IRREGULARITATE.

§. I.

De notione & divisione Irregularitatis.

Q. I. *Quid est Irregularitas?*

R. Est impedimentum canonicum, quo vir baptizatus directè & primariò interdicatur susceptione Ordinum, & consequenter eorum usu.

Dicitur I. *Impedimentum*, non verò pœna, quo distinguitur à censura, quæ, ut supponit culpam ex dictis, semper est pœna: Irregularitas verò aliquando contrahitur ex defectu & sine culpa, ut irregularitas ex cæcitate aut mutilatione, ac proinde ex suo genere non est pœna,

na, sed solum inhabilitas quædam seu impedimentum.

Dicitur 2. *Canonicum*, quo significatur irregularitatem debere esse in jure expressam, nullamque esse ab homine.

Dicitur 3. *Quo vir baptizatus*: 1. Ut denotetur subjectum irregularitatis; mulier enim sicut est subjectum incapax Ordinis, ita & irregularitatis. 2. Quia infidelis non est subditus Legibus Ecclesiæ, nec proinde Irregularitate canonica ligari potest. Subjectum ergo irregularitatis est omnis, & solus baptizatus sive sit Clericus, sive Laicus.

Dicitur 4. *Directè & primariò interdicatur susceptione Ordinum*, quo distinguitur irregularitas à suspensione, quæ primariò impedit usum Ordinis. Hinc suspensio spectat solum Clericos in sacris constitutos; unde in forma absolutionis sacramentalis omittendum est, à *vinculo suspensionis*, quando pœnitens est Laicus.

Dicitur 5. *Et consequenter eorum usu*; quia irregularis peccat graviter, si exercet Ordinis functiones, nullam tamen pœnam canonicam propterea incurrit.

Cùm autem Tonsura Clericalis in Jure vocetur Ordo, ut Cap. *Contingit*, Tit. de *Ætat. & Qualit. perficiendorum*, irregularitas est impedimentum suscipiendæ Tonsuræ.

Ergo triplex est effectus irregularitatis. 1. Impedit susceptionem Ordinum & Tonsuræ Clericalis. 2. Privat usu Ordinum omnium quidem, si sit totalis; quorundam verò, si sit partialis. 3. Inhabilem reddit ad quodlibet Beneficium recipiendum, si sit totalis ex Cap. *Si celebrat*, Tit. de *Clerico*

Clerico excommunic. & ratio est, quia Beneficium datur propter officium: Atqui irregularis prohibetur fungi Ordinis officio: Ergo non potest recipere Beneficium, quod est propter officium: Ergo tenetur dimittere Beneficium in irregularitate totali obtentum, & fructus inde perceptos restituere.

Dixi: *Ad recipiendum Beneficium*; quia propter irregularitatem, quæ supervenit Beneficio jam obtento, Beneficiarius potest quidem privari Beneficio; sed actu & de facto non privatur.

Q. 2. *Quomodo dividitur irregularitas?*

R. Dividitur 1. in totalem, qua quis privatur quolibet Ordinum usu, ut homicida; & partialem qua quis privatur aliquo duntaxat Ordinis officio, ut percussus cæcitate, cui non licet Sacrificium offerre, sed potest Confessiones excipere & concionari.

Dividitur 2. in eam, quæ est ex defectu, putà ex cæcitate, contrahiturque sine peccato; & eam, quæ est ex delicto, v. g. ex homicidio.

Q. 3. *Quot sunt Irregularitates ex defectu?*

R. Novem.

1. Ex defectu animæ.
2. Ex defectu corporis.
3. Ex defectu natalium.
4. Ex defectu ætatis, de qua diximus ubi de subiecto Ordinis.
5. Ex defectu libertatis.
6. Ex defectu obligationis.
7. Ex defectu Sacramenti.
8. Ex defectu bonæ famæ.
9. Ex defectu lenitatis.

§. II.

De Irregularitate, ex defectu animæ.

Q. I. *Quot sunt Irregularitates ex defectu animæ?*
 R. Tres.

Prima, est defectus rationis, ut in infantibus, amentibus, & furiosis, Cap. *Maritum*, distinct. 33. Energumenis, Cap. *Usque adeo*, distinct. 33. Epilepticis, Cap. *In tuis Litteris*, causa 7. qu. 5.

Ex Concilio Toletano II. Can. 13. Energumeni, Lunatici & Epileptici postquam per annum ab Episcopo probati fuerint sanati aut liberati, in susceptis Ordinibus ministrare possunt; sed ad superiores Ordines absque dispensatione promoveri nequeunt ex cit. cap. *Maritum*.

Secunda, est defectus scientiæ competentis ad officia Ordinis ritè obeunda ex Cap. *Illitteratos*, distinct. 36. Quin. Cap. *Cum in cunctis*, quod est Concilii Lateranensis 4. Paragr. *Clerici*, Tit. *de Elect. Clerici*, qui hujusmodi illitteratum scienter elegerint, per triennium à Beneficiò sunt suspensi; & Episcopus, qui iniquè electioni consenserit, pro hac vice privatur jure conferendi: *Ut quos*, inquiunt Patres, *Dei timor à malo non revocat, Ecclesiastica saltem coërceat severitas disciplinæ.*

Tertia, est defectus fidei, qua inhabiles sunt ad Ordines suscipiendos.

I. Filii Hæreticorum ex Cap. *Quicumque*, Paragr. *Hæretici*, Tit. *de Hæreticis* in sexto. Sed Canon ille non viget in Galliis, ubi non solum Hæ-
D. Habert Theolog. Tom. VIII. B b b reti-

reticorum filii , sed ipsimet Hæretici , postquam hæresim abjurarunt , ad Ordines & Beneficia absque dispensatione admittuntur.

2. Neophyti , id est , qui recens sunt baptizati ex cap. 3. v. 6. 1. ad Tim. & qui à statu Laicorum statim ad Ordines aspirant ex S. Gregorio Lib. 9. Epist. 16. novæ Editionis , referturque , dist. 48. Cap. *Sicut* , his verbis : *Sicut Neophytus tunc dicebatur , qui in initio sanctæ Fidei erat conversatione plantatus , sic modo Neophytus habendus est , qui repente in Religionis habitu plantatus , ad ambiendos honores sacros irrepsit.*

§. III.

De Irregularitate ex defectu corporis.

Q. 1. *Quot defectus corporis inducunt irregularitatem ?*

R. Quatuor.

1. Mutilatio ; nam Cap. *Presbyterum* , Tit. *de Clerico ægrotante* , celebrare non permittitur Presbyter , cui duos digitos cum medietate palmæ Prædones absciderant. Idem sentiendum de eo , qui ita tremulis est manibus , ut sine periculo subversionis Calicis non possit celebrare. Privatio tamen digiti , nisi sit pollex aut index , aut propria culpa acciderit , non facit irregularem. Cap. *Qui partem* , & Cap. *Lator* , dist. 55.

2. Defectus , qui horrorem & scandalum generat , ut lepræ macula , Cap. *de Rectoribus* , Tit. *de Clerico ægrot.*

3. Debilitas , qua quis non potest nisi indecenter & nimia cum difficultate sacras functiones
exer-

exercere, ut si quis habeat partem pollicis aut indicis amputatam, vel careat lumine oculi sinistri quamvis integri.

Observant tamen Navarrus cap. 23. Manu. num. 199. Sayrus Lib. 6. cap. 8. & Sambovius tom. 2. casu 5. quòd si tanta virtute polleat in dextero oculo, ut sine deformitate legere possit Canonem, non censetur irregularis.

4. Defectus, qui parit notabilem deformitatem ex Cap. *Cum de tua*, Tit. *de Corpore vitiat*. Hinc irregularis est, qui caret oculo sive dextero, sive sinistro, ex Cap. *Si Evangelica*, dist. 55. naso, pede, vel ita debilis est pedibus ut sine baculo ad Altare stare nequeat, qui ita surdus est ut nullo modo possit audire, qui nodum linguæ ita patitur, ut verbum integrum vix exprimere possit.

Dixi: *Qui caret oculo*; qui enim utrumque oculum habet integrum, sed caret lumine oculi dextri absque notabili macula, irregularis non est secundum communem sententiam.

Cæterum in dubio num deformitas, aut indecentia irregularitatem inducat, standum est Episcopi judicio ex cit. Cap. *Cum de tua*.

Q. 2. *Vitia corporis occulta inducuntne irregularitatem?*

R. Minimè, exceptis duobus casibus; quia tunc nulla est deformitas, nullum indecorum in exercitio Ordinum.

Dixi: *Exceptis duobus casibus*. 1. Qui Eunuchus propria culpa factus est, aut membrum sive partem membri absque justa causa sibi amputavit, irregularis est, quantumcunque occultum sit vitium ex Cap. *Maritum*, distinct. 33. 2. Hermaphroditus etiam occultus, sicut à professione

Religionis, ita & ab Ordinibus rejiciendus est secundum communem Theologorum & Canonistarum sententiam.

§. IV.

De Irregularitate ex defectu libertatis & natalium.

Q. 1. *Quidam sunt irregulares ex defectu natalium?*

R. Hoc modo irregulares sunt

1. Servi, hoc est mancipia, gallicè, *Esclaves*, nisi prius à Dominis libertate donati fuerint, sed in Gallia locum non habet isthæc irregularitas; cum in ea nulli sint servi, sed solum famuli.

2. Omnes illegitimi, id est, qui ex fornicatione, vel ex adulterio sunt procreati.

Q. 2. *Estne irregularis, qui natus est ex Matrimonio in facie quidem Ecclesiæ celebrato; sed revera nullo, ob aliquod impedimentum dirimens?*

R. Si parentes bona fide contraxerunt, vel saltem alter eorum, illegitimus non est, nec irregularis, etiamsi per sententiam Judicis separati fuerint, qui sic contraxerunt, ex cap. *Cum inter*, Tit. *Qui sunt filii legitimi*; secus si ambo parentes mala fide contraxerunt ex cap. *Referente*, eodem Tit.

Q. 3. *Expositi infantes, quorum parentes ignorantur, suntne illegitimi & irregulares?*

R. Negant nonnulli; sed sententia affirmans longè est communior, eamque amplectuntur Covarruvias in Clementinam, Si furiosus, Suarez, Avila,

la, Bonacina & alii cùm tamen subsit aliquod dubium facti Idem Covarruvias, Suarez, Bonacina & alii Canonistæ docent Episcopum posse dispensare cum exposito, ut Ordines suscipiat, & in eis bona fide ministret.

Q. 4. *Quomodo tollitur isthæc irregularitas?*

R. Quatuor modis.

1. Per subsequens Matrimonium, quando scilicet fornicarius eam in uxorem ducit, ex qua prolem suscepit, ex cap. *Tanta*, tit. *Qui sunt filii legitimi*.

2. Per legitimationem, quæ à solo Summo Pontifice emanare debet quoad effectus spirituales; & à Rege quoad effectus civiles: ita ut Notus per principem paternæ hæreditatis Jure donetur; & per Pontificem habeat, ut ad Ordines & Beneficia promoveri possit.

3. Per solemnem Religionis professionem ex cap. *Cum decorem*, tit. *de filiis Presbyt.* ubi dicitur illegitimum Professum promoveri posse ad Ordines, non verò ad Prælaturas.

4. Per dispensationem, quam Episcopus concedere potest ad minores Ordines & Beneficium simplex, solus verò Summus Pontifex ad majores Ordines & Prælaturas, seu Beneficia quibus cura animarum imminet, ex cap. *Is qui*, tit. *de filiis Presbyt.* in Sexto.

Advertes autem 1. Canonicatus hîc non comprehendi inter Beneficia simplicia ad quæ Episcopus dispensare possit, quia Canonicus tenetur promoveri ad majores Ordines ad quos Episcopus dispensare nequit. 2. Dispensationem, quæ conceditur ad suscipiendos Ordines, non exten-

di ad Beneficia, nisi de iis eorumque natura fiat expressa mentio.

§. V.

De Irregularitate ex defectu obligationis & Sacramenti.

Q. 1. *Quinam contrahunt irregularitatem ex defectu obligationis?*

R. Duo hominum genera.

1. Curiales, hoc est, qui ex officio negotiis sæcularibus implicantur, ut Procuratores, Advocati, Notarii, Milites. Ita Alexander III. in Concilio Lateranenſi III. referturque cap. *Sed nec*, tit. *de Cleric. vel Monach.*

2. Qui, dimisso curiali officio, obligantur ad ratiocinia reddenda, ex cap. *Unico*, tit. *de Oblig. ad ratio.* quia adhuc implicati censentur sæcularibus negotiis, periculumque est, ne à Judicibus sæcularibus in Ecclesiæ dedecus infamentur, si dolus aut fraus in rationibus inveniatur.

Sanctus Cyprianus scribit à se decretum in Concilio ne quis tutorem vel curatorem Clericum testamento suo constitueret, referturque causa 21. quæst. 3. cap. *Cyprianus*. Sed Concilium Chalcedonense relatum distin. 86. cap. ultimo temperavit decretum Can 6. his verbis, *Nisi fortè qui Legibus ad minorem ætatum tutelam sive curationes inexcusabiles attrahuntur.*

Q. 2. *Quid est irregularitas ex defectu Sacramenti?*

R. Est ea quæ oritur ex Bigamia, hoc est ex matrimonio pluries contracto; Apostolus enim
1. Tim. 3.

1. Timoth. 3. & Tit. 1. prohibet ordinari eum qui non sit unius uxoris vir. Ideo autem Bigamia dicitur defectus Sacramenti, quia non repræsentat unionem Christi cum Ecclesia; Christus enim in æternum unam desponsavit Ecclesiam, & vera Ecclesia vicissim uni Christo adhæret: Sacramentum hoc magnum est, quod non repræsentat qui duas uxores duxit.

Q. 3. *Quotuplex est Bigamia?*

R. Triplex, vera scilicet, interpretativa & similitudinaria.

Bigamia vera est ea, qua aliquis duas uxores legitimè duxit, & cum iis Matrimonium consummavit.

Dixi 1. *Legitimè duxit*; quia ex fornicatione vel ex adulterio non exurgit Bigamia, nec irregularitas, cap. *Quin*, tit. *de Bigamis non ordinandis*.

Dixi 2. *& cum iis Matrimonium consummavit*: quia si non consummaverit, non est irregularis ex cap. *Debitum*, tit. *de Bigamis non ordinandis*.

Bigamia interpretativa est in eo qui viduam duxit, ex Innocentio I. Epist. 2. S. Leone Epist. 87. & Can. 18. Apostolorum. Unde Bigamus declaratur Can. Concilii Neocæsariensis, qui virginem quidem duxit, sed adulteram post celebratas nuptias cognovit.

Bigamia similitudinaria est ea, qua aliquis post solemnem Religionis professionem vel post sacrum Ordinem susceptum contrahit Matrimonium sive cum virgine, sive cum corrupta, ex c. *Nuper*, tit. *de Bigamis non ordinandis*.

§. VI.

De Irregularitate ex defectu bonæ famæ.

Q. 1. *In quo differt defectus bonæ famæ ab infamia?*

R. In eo differt quod defectus bonæ famæ præcisè non oriatur ex delicto, ut videre est in eo, qui viliores exercuit artem, mimam etiam virginem duxit, aut mulierem prostitutam: infamia verò propriè non oriatur nisi ex crimine. De utraque tamen hic dicemus propter ordinem materiæ & doctrinam.

Q. 2. *Infamia inducitne irregularitatem?*

R. Affirmativè; est enim regula juris in sexto, *infamibus portæ non pateant dignitatum.*

Q. 3. *Quotuplex est infamia?*

R. Duplex, juris scilicet & facti.

Infamia juris est ea, quæ imponitur Jure Canonico, vel etiam Civili, nisi Lex Canonica Juri Civili derogaverit ex capite *Omnes*, causa 6. quæst. 1. quia Sacerdotio sunt indigni, quos Leges Canonice & Civiles declarant infames.

Dixi, *nisi Lex Canonica Juri Civili derogaverit*, sicut de facto derogaverit Legi Civili, quæ viduam pronuntiat infamem, si tempore luctus nupserit.

Infamia facti est ea, quæ oritur ex delicto, propter quod aliquis malè audit apud viros graves & sapientes, quamvis per Legem delictum illud non notetur infamia ex cap. 1. *Licet*, tit. de probationibus.

Q. 4. *Quotuplex est Juris infamia?*

R. Du-

R. Duplex; alia quæ per Legem ipso facto decernitur in eos qui nonnulla atrociora crimina patraverint, ut in usurarios & perjuros: alia quæ oritur ex Sententia, qua Judex condemnat ad pœnam infamantem, putà ad Triremes.

Q. 5. *Contrahiturne infamia ex hujusmodi criminibus, quando sunt occulta?*

R. Minimè; quia non privant bona fama.

Q. 6. *Quæ notorietas requiritur, ut quis censeatur infamis, & irregularis ob infamiam Juris?*

R. In Gallia non admittitur notorietas facti, sed requiritur Sententia declaratoria, ut quis perjurus, v. gr. aut Usurarius censeatur infamis & irregularis, quamvis ante Sententiam propter ejusmodi crimina vulgò malè audiret. Unde si juridicè non fuerit declaratus perjurus, aut Usurarius, potest absque dispensatione ordinari, vel in susceptis Ordinibus ministrare, postquam per Pœnitentiam & probatos mores malam famam deleverit.

Q. 7. *Omnis mulcta, aut pœna à Judice inflicta inducitne infamiam Juris?*

R. i. Nulla pœna à Judice Ecclesiastico inflicta præcisè, ac directè inducit infamiam, saltem quoad effectus Civiles; tum quia paternæ est & ad peccatoris emendationem tendens: tum quia sicut bona fortunæ, ita & bonum famæ directè subest Jurisdictioni Civili, non Ecclesiasticæ.

Dixi i. *Præcisè ac directè*; quia si accusatus vincatur criminis ipsum Jure infamantis, eo ipso quo Judex Ecclesiasticus eum declarat hujusce criminis reum, indirectè reddit infamem.

Dixi 2. *Quoad effectus Civiles* ; quia Ecclesia potest reddere infamem quoad effectus spirituales ; arcet enim ab Ordinibus defectu bonæ famæ , qui gradus Pœnitentiæ luctuosæ decurrerunt ex cap. *Non negamus* , dist. 61.

R. 3. Non quævis mulcta, aut pœna à Judice Sæculari imposita infamem reddit , nisi crimen propter quod reus damnatur , infamiam habeat ipso Jure annexam : Sed pœna debet esse gravis, ut ignominiosè traduci , Gallicè , *Faire amende honorable* , numellis publicis versari , Gallicè , *Etre mis au Pistoris* , virgis cædi , ad remos dari , exilio damnari , à Judice Laico juridicè reprehendi , Gallicè , *Etre blâmé* , non verò admoneri , Gallicè , *Etre admonesté*. Unde Judex Ecclesiasticus potest quidem pronuntiare Clericum à se damnatum teneri sistere se coram Tribunali , ut ibi admoneatur , non verò ut reprehendatur.

Q. 8. *Infamia facti redditne irregularem ?*

R. Affirmativè ; nam ex Apostolo 1. Tim. 3. qui ad sacrum Ministerium assumitur , *oportet illum habere bonum testimonium ab iis qui foris sunt , ut non in opprobrium incidat & in laqueum Diaboli* , hoc est , ne sit pusilli animi & quasi laqueis Diaboli irretitus non audeat arguere ubi oportet , ne propria vitia ipsi objiciantur.

Q. 9. *Quomodo tollitur irregularitas orta ex infamia ?*

R. Irregularitas ex infamia facti tollitur absque dispensatione per eam vitæ emendationem , quæ maculas prioris vitæ non solum coram Deo , sed etiam in opinione hominum deterferit , quod difficillimum est ; sicut enim vestium , ita & vitæ fordes difficilius abluuntur quàm contrahuntur.

Irregu-

Irregularitas verò Juris non tollitur per solam pœnitentiam; sed insuper requiritur dispensatio ex cap. *Cum te*, tit. *de Sent. & re Judic.*

§. VII.

De Irregularitate ex defectu lenitatis.

Q. 1. *Quis est irregularis ex defectu lenitatis?*

R. Qui concurrit voluntariè, licèt justè, ad proximi necem, aut mutilationem, ex cap. *Si quis viduam*, dist. 50. & cap. *Si furiosus*, Clementina *de Homicidio*.

Dixi 1. *Concurrit* sive physicè ut carnifex: sive moraliter vel positivè influens, ut mandans, adjuvans, &c. vel negativè, ut non obstand, si tamen ex officio & justitia teneatur, quemadmodum Magistratus & Medicus, quorum negligentia aliqui pereunt; nam si ex charitate solum obstare teneatur & non obstat, graviter quidem peccat, sed non fit irregularis.

Dixi 2. *Voluntariè*, qui enim in sui defensionem coactus occidit invasorem cum moderamine inculpatae tutelæ, Jure novo non est irregularis ex cit. cap. *Si furiosus*, in quo sic habetur: *Si furiosus aut infans (scilicet septennio minor) seu dormiens hominem mutilet, aut occidat, nullam ex hoc incurrit irregularitatem: & id etiam de illo censemus, qui mortem aliter vitare non valens, occidit aut mutilat invasorem.*

Tria in hoc Canone communiter notant Theologi. Primum, quòd ibi sermo habeatur de invasore in propriam vitam; unde cum Glossa colligunt quòd si quis cum moderamine inculpatae

patæ tutelæ occiderit infaforem patris, fiat irregularis juxta jus antiquum. Secundum quod expresse in Canone habeatur, *vitare non valens*, ex quo concludit eadem Glossa quod si fugæ etiam probrosæ locus esset, qui non fugeret, fieret irregularis. Tertium, quod ibi fiat restrictio ad proprium periculum mortis aliàs inevitabilis.

Ergo. Qui occidit propter mortem patris vitandam, bona fortunæ defendenda, est irregularis, quidquid in contrarium asserant nonnulli Moderni, quia ex cap. *Suscepimus*, tit. *de Homicidio*. *Expediebat potius rerum sustinere jacturam, quam pro conservandis vilibus & transitoriis rebus tam acriter in alios exardescere.*

Dixi 3. *Proximè*, quia si quis remotè tantum concurrat ad necem vel mutilationem, irregularitatem non contrahit.

Dixi 4. *Ad proximi necem, aut mutilationem*: quia voluntas occidendi aut mutilandi non sufficit ad irregularitatem, nisi actu & de facto homo interficiatur aut mutiletur, v. gr. si reus ad mortem damnatus aufugiat, nec Judex nec accusator sunt irregulares.

Ergo. Qui graviter vulneravit, sed non occidit, nec mutilavit, etiamsi ex vulnere membrum maneat inutile, v. gr. pes ad ambulandum, non est irregularis. Ita Navarrus, Soto, Covarruvias, Avila. Atque ob eam rationem Judex sine irregularitatis periculo damnat ad flagella, ad cauterium Liliatum, Gallicè, *fleur de lys*: quia in his pœnis nulla est mutilatio.

Ergo qui abortum infert, antequam fœtus sit animatus, irregularis non est, cap. *Sicut*, tit.

tit. de *Homicidio*, cum revera hominem non interficiat.

Q. 2. *Quid est mutilatio?*

R. Est membri truncatio, seu amputatio.

Membrum autem est illa pars corporis, quæ habet distinctum officium ab aliis partibus, ut oculus ad videndum, manus ad palpandum. Ita Covarruvias in Clementinam, *Si furiosus*, Navarrus, Avila & alii.

Ergo. Qui excutit dentem, abscindit auriculam, seu cartilaginem, quæ solum deservit ad ornatum & tutelam auris, vel qui præscindit digitum alterius etiam pollicem vel indicem, ait Covarruvias cit. loco, irregularis non est.

Dixi: *Alterius*; nam cap. *Qui partem*, dist. 55. & cap. *Quidem*, tit. de *Corpore vitiatis*, pronunciat irregularis, qui illicitè & cum culpa sibi abscidit partem digiti.

Q. 3. *Quinam censentur proximè ad mortem, aut mutilationem concurrere?*

R. Ex Jure Canonico proximè concurrunt & fiunt irregulares. 1. Judex. 2. Accusator petens vindictam, Advocatus seu Procurator, qui accusatori patrocinatur. 3. Testes. 4. Scriba, seu Notarius. 5. Qui Sententiam exequentur; ut carnifex, & qui ad ejusmodi executionem conferunt, putà Satellites, qui comitantur ad defensionem, custos carceris, qui furcam & scalam parant, denique qui damnati accelerant mortem, nisi ex inadvertentia.

Dixi 1. *Ex Jure Canonico*; nam in Gallia Testes non incurrunt irregularitatem, cum ex Sanctione Regia anno 1670. tit. omnes etiam Clerici & Mo-

& Monachi compellantur ad testimonium ferendum etiam in causa sanguinis.

Dixi 2. *Accusator vindictam petens*; si enim petat solummodo satisfactionem pro damno illato vel sibi, vel propinquis, domesticis, suæ Ecclesiæ, & iis quorum curam gerit, non fit irregularis ex cap. *Prælati*, tit. de *Homicidio*, in 6. nec in Gallia necesse est ut palàm testetur se non intendere sanguinem, si Clericus sit, quia apud nos solus Procurator Regius, aut Fiscalis tanquam persona publica potest vindictam expetere.

Ergo Clerici, qui habent jurisdictionem temporalem non fiunt irregulares, si mandent suis Officialibus, ut de criminibus inquirent, etiamsi inde mors sit secutura, nec concionatores, qui invehuntur in Scandala, & in Magistratus, qui ea non arcent, nec Confessarii, qui iisdem denegant absolutionem, quando sinunt furta, homicidia & alia scandala impunè grassari; nec Theologi, qui Judici consilium petenti aperit quid ferat Lex, ex qua Judex colligit reum esse morte plectendum; quia hi omnes remotè tantum concurrunt ad mortem, secus si determinatè dicerent, hunc pestiferum hominem esse morte damnandum.

Q. 4. *Qui pugnant in bello, fiuntne irregulares?*

R. Affirmativè, si Bellum sit injustum, & aliquis cadat in eo, aut mutiletur; quia omnes sunt causæ morales homicidii injusti, etiamsi propria manu non trucidaverint, nec mutilaverint; homicidas enim adjuvarunt & audaciores reddiderunt. Sed si Bellum sit justum, neminemque propria manu interfecerint, nec mutilaverint, non fiunt irregulares; sed in dubio num inter-

interfecerint, habendi sunt irregulares. Responsio constat ex cap. *Constat*: Tit. de *Homicidio*.

§. VIII.

De Irregularitatibus ex delicto.

Q. I. *Quotuplex est irregularitas ex delicto?*

R. Quadruplex vulgò recensetur. Prima ex homicidio. Secunda ex illicita receptione, & illicito usu Ordinis. Tertia ex iteratione Sacramenti. Quarta ex hæresi. Sed jam monuimus hæresim in Gallia non inducere irregularitatem post Hæretici conversionem.

§. IX.

De Irregularitate ex homicidio.

Nomine homicidii intelligitur injusta hominis occisio, vel mutilatio; neque enim homicidæ dicuntur Judices, qui pestiferos homines justè è medio tollunt.

Q. I. *Quotuplex est homicidium?*

R. Duplex, scilicet voluntarium, quod directè intenditur, vel in se, vel in causa; & casuale, quod præter intentionem agentis accidit, ut si quis intendens leviter percutere, manu tamen fallente, graviter vulneravit & occidit.

Q. 2. *Quotuplex est homicidium casuale?*

R. Duplex, purum & mixtum.

Homicidium purè casuale est illud, quod omninò accidit præter intentionem agentis & vacantis rei licitæ, nec periculosæ: mixtum verò dicitur

dicitur quando quis etsi mortem, aut mutilationem non intenderit, nec secuturam præviderit, debitam tamen diligentiam non adhibuit, ne mors contingeret; vel opus periculosum & sibi prohibitum temerè suscepit.

Ergo ut homicidium casuale sit purum, duo concurrant necesse est. Primum, ut prævideri nec potuerit, nec debuerit. Secundum, ut opus sit licitum & minimè periculosum. Unde si Clericus in venatione occidit hominem præter intentionem, homicidium illud non est purè casuale, sed mixtum, quia venatio quæ fit armis est periculosa & Clericis interdicta.

Q. 3. *Omne homicidium inducitne irregularitatem?*

R. 1. Voluntarium & casuale mixtum efficiunt irregularem; ita enim habetur toto titulo de homicidio voluntario & casuali, & Sess. 24. Concilii Tridentini, cap. 6. *de Reform.*

R. 2. Ex homicidio purè casuali nullus fit irregularis, idque constat ex cap. *Joannes*, cap. *Ex Litteris*, cap. *Quidam*, Tit. *de Homicidio*.

Q. 4. *Quæ debet esse negligentia, ut contrahatur irregularitas?*

R. Si opus fuit licitum, non contrahitur irregularitas, nisi ex negligentia gravi & mortali, quia cum irregularitas ex delicto sit gravis pœna, gravem quoque culpam supponit. Colligitur ex cap. *Quæsitum*, Tit. *de Pœnit. & Remiss.*

Ergo irregularis non est qui volvit infirmum, ut commodius quiescat; vel bona fide ei præbet cibum, unde mors acceleratur; quia in hujusmodi actionibus non deprehenditur culpa, nisi admodum levis: secus si contra prohibitionem Medici cibus fuisset subministratus.

Ergo

Ergo qui in ebrietate culpabili mutilat, aut occidit, irregularis efficitur. Ita Covarruvias in Cap. Si Furiosus.

§. X.

De Irregularitate ex delicto in receptione & usu Ordinis.

Q. I. *Quinam incurrunt irregularitatem ex delicto in receptione Ordinis?*

R. Incurrunt. 1. Qui furtivè ordinantur, hoc est, qui fraudulenter examen effugerunt, nec aliàs fuerunt approbati, aut admissi ex Cap. *Veniens*, Tit. *De iis, qui furtivè, &c.* 2. Qui majori excommunicatione ligati Ordinem sacrum suscipiunt ex Cap. *Cum illorum*, Tit. *de Sententia Excommunicationis*.

Dixi 1. *Excommunicatione ligati*, non verò suspensione aut interdicto: tum quia in laudato Cap. de solis excommunicatis, sermo est: tum quia suspensio non privat receptione Sacramentorum, sed solum Ordinis exercitio.

Quidquid sit de interdicto, circa quod dissentiunt Theologi num irregularitatem inducat in receptione Ordinis sacri, extra controversiam est eum, qui suspensus aut interdictus recipit Ordinem sacrum, irregularem fore si exerceat officium Ordinis sic suscepti, Diaconus v. g. solemniter legat Evangelium. Idem censet Avila de Presbytero recens inaugurato, qui cum Episcopo concelebrat.

Dixi 2. *Majori excommunicatione*; quia ligatus minori excommunicatione, licet celebrando grad.

viter peccet, non fit tamen irregularis, ex Cap. *Si celebrat*, Tit. *de Clerico excommunicato*: Ergo nec si sacrum Ordinem recipiat.

Dixi 3. *Ordinem sacrum*; quia controversia est in Scholis num excommunicatus majori excommunicatione fiat irregularis receptione minorum Ordinum? Negant Soto, Navarrus, Avila. Affirmant Sylvester, Henriquez, & alii.

Q. 2. *Quomodo incurritur irregularitas ex illicito usu Ordinis?*

R. Duobus in casibus. 1. Quando Clericus temerè usurpat officium Ordinis, quem non habet ex Cap. *Si quis*, Tit. *de Clerico non ordinato*. 2. Quando idem Clericus censura ligatus temerè, ac solemniter exercet actus sui Ordinis. Cap. *Cum illorum*, Tit. *de Sententia Excommunicationis*, & toto Tit. *de Clerico excommunicato*.

Dixi 1. *Temerè*; si quis enim ex inadvertentia sive ex ignorantia probabili, vel in casu necessitatis, putà ad vitandum scandalum officium Ordinis peragat, non fit irregularis; quia non peccat, ut supponitur: Atqui ejusmodi irregularitas non incurritur nisi ex delicto: Ergo.

Dixi 2. *Ordinis*; quia per actus Jurisdictionis non contrahitur irregularitas, etiamsi qui illos exercet, sit suspensus ab officio.

Dixi 3. *Ordinis sacri*; quia cum officia minorum Ordinum nunc promiscuè exercentur à Laicis, propter eorum exercitium suspensus, aut excommunicatus irregularitatem non contrahit.

Ergo Clericus excommunicatus, aut suspensus non fit irregularis; si cum aliis psallat in Choro, quia ejusmodi Officium non est Ordinis sacri; secus si solemniter præesset Choro, Collegiam

etiam decantaret, præmisso *Dominus vobiscum*; quia ejusmodi officium est proprium Ordinis sacri. Utrum autem concionando fiat irregularis, controvertitur: affirmat Navarrus, sed probabilius negant Sylvester, Henriquez & Avila; quia licet concionandi munus solis Presbyteris, aut Diaconis committatur, necessario tamen non sequitur esse proprium Ordinis sacri; alioquin simplex Clericus, qui absque Episcopi facultate concionaretur, irregularis foret, utpotè qui usurparet officium Ordinis, quem non habet, quod est contra communem hominum opinionem.

Dixi 4. *Solemniter*; quia si Presbyter suspensus sine solemnitate baptizat etiam extra casum necessitatis, quamvis graviter peccet, irregularitatem tamen non incurrit; quia actum Ordinis non exercet, cum Laici ita baptizare possint, & nonnunquam baptizent.

Q. 3. *Qui celebrat in Ecclesia interdicta aut polluta, vel in loco profano, sine licentia Episcopi, incurritne irregularitatem?*

R. 1. Incurrit, si in Ecclesia interdicta, quia violat censuram per actum Ordinis sacri.

R. 2. Non incurrit, licet graviter peccet celebrans in Ecclesia polluta, vel in loco profano absque licentia Episcopi; quia ejusmodi poena in nullo jure exprimitur, ut declarat Bonifacius VIII. Cap. *Is qui*, Tit. de *Sententia Excommunicationis* in sexto.

§. XI.

De Irregularitate ex iteratione Sacramenti.

Q. *Ex cujus Sacramenti iteratione contrahitur irregularitas?*

R. Ex sola iteratione Baptismi, propter quam rebaptizati & rebaptizantes sunt irregulares. De rebaptizatis expressum est Caput *Confirmando*, quod ex Concilio V. Carthaginensi refertur, dist. 50. De Rebaptizantibus habetur, Cap. *Litterarum*, Tit. *de Apostatis*. Pœna autem hujusmodi non fertur in eos, qui reordinantur, vel iterum confirmant & iterum confirmantur.

§. XII.

De dispensatione in Irregularitate.

Q. *Quis dispensare potest in irregularitate?*

R. Distinguendum est; si irregularitas sit ex defectu, solus Summus Pontifex in eo dispensat, excepto defectu natalium, in quo Episcopus potest ex dictis dispensare ad Tonsuram, minores Ordines & Beneficia simplicia: sed si irregularitas sit ex delicto, Episcopus jure novo invecro per Conc. Trid. Sess. 24. cap. 6. potest dispensare, quando crimen non est deductum ad forum contentiosum, excepto tamen homicidio voluntario, non verò casuali.



Tractatus DE SACRAMENTO MATRIMONII.

CAPUT PRIMUM.

De varia acceptione, & vera notione
Matrimonii.

Q. I. *Quotuplici modo Matrimonium considerari po-
test?*

R. Duplici, nempe in fieri & in
facto esse.

Matrimonium in fieri est actualis contrahen-
tium legitimus consensus signis exterius expref-
sus, quo sibi mutuò sua tradunt corpora.

Matrimonium in facto esse est vinculum, seu nexus, quo sibi invicem astringuntur conjuges.

Ergo Matrimonium in fieri habet esse fluens ac transiens, estque causa Matrimonii in facto esse, ut colligitur ex Decreto Eugenii IV. Matrimonium verò in facto esse est quid permanens; vinculum enim conjugale durat usque ad mortem alterutrius conjugis.

Q. 2. *Quomodo dividitur Matrimonium in facto esse?*

R. Dividitur in ratum & consummatum.

Ratum est ipse nexus conjugalis, nondum secuta copula: consummatum est idem nexus secuta carnali copula.

Q. 3. *Quotuplici modo spectari potest Matrimonium in fieri?*

Triplici. 1. Ut contractus purè naturalis. 2. Ut contractus civilis. 3. Ut Sacramentum novæ Legis; Matrimonium quippè, quatenus Sacramentum, non habet esse permanens; sed transiens, perficiturque in actuali & legitimo utriusque contrahentis consensu, & in benedictione Sacerdotali, si tamen Sacerdos sit Minister hujus Sacramenti, ut contendunt nonnulli Theologi.

Matrimonium, ut contractus naturalis, est mutuus contrahentium consensus nudè spectatus, in officium naturæ ad propagationem & conservationem generis humani necessarium.

Matrimonium, ut contractus civilis, naturalem componit, perficitque Politicis Regulis ac Legibus, quibus consulitur Reipublicæ paci ac felicitati. Si enim Reipublicæ interest ut prædia, & cæteræ res immobiles ad alios non transferantur nullo contrahentium consensu; sed cer-

tæ

tæ præscribantur Leges ac solemnitates, sine quibus irriti declarantur ejusmodi contractus: à fortiori Respublica invigilare debuit, ne vir & mulier inordinatè copularentur pecudum more, cum Matrimonii contractus sit præcipuum societatis humanæ fundamentum, maximèque ex eo pendeat illius ordo, & tranquillitas. Atque inde exurgunt impedimenta Matrimonium dirimentia.

Matrimonium, ut Sacramentum novæ Legis, est legitimus contrahentium consensus à Christo institutus, ut signum efficax Gratiæ, quæ conjuges exornat, ardorem concupiscentiæ temperat, & Ecclesiam ditat pia ac fidei prolis educatione.

Q. 4. *In quo consistit essentia Matrimonii spectati, ut est contractus naturalis, aut civilis?*

Constat ex mox dictis, essentiam Matrimonii in fieri consistere in mutuo contrahentium consensu legitimo & exterius expresso; contractus enim generatim spectatus essentialiter, est duorum vel plurium consensus vim habens obligandi. Difficultas spectat solummodò Matrimonium in facto esse.

R. Essentia Matrimonii in facto esse non consistit in usu & commixtione corporum, sed in conjunctione animorum, & nexu perpetuo, qui ex actuali consensu virum inter & mulierem resultat; nam Matth. 1. Beata Maria appellatur conjux sancti Josephi, quamvis virgo semper permanserit: *Nec perierat, nec mendax manserat conjugis appellatio*, inquit S. Augustinus Lib. 1. de Nupt. & Concup. cap. 11. *ubi nec fuerat, nec futura erat carnis commixtio*. Et ratio est, quia usus rei, de qua contrahitur, non pertinet ad essentiam contra-

ctus ; sed est quid illam consequens ; emptor v. g. etiamsi non feminet in agro quem emit, illius tamen verus est Dominus & potestatem habet eo utendi absque cujusquam injuria : Ergo eo ipso perficitur contractus Matrimonii , quo conjuges sibi mutuò tradunt potestatem in sua corpora, etsi postmodum ea nunquam usura sint. Dico : *Potestatem tradunt*, quia si ea conditione contraheret mulier ut vir potestatem aut dominium in ejus corpus non haberet, nullum esset Matrimonium.

Ergo Calvinus imponit Catholicis, dum scribit Lib. 4. Instit. cap. 19. §. 34. eos docere coitum partem esse Sacramenti, & per actum immundum ac turpem gratiam produci.

Dices : Si sola animorum conjunctio sufficit ad verum Matrimonium, frater & soror, Eunuchi, & qui laborant impotentia perpetua, poterunt contrahere inter se verum Matrimonium ; Falsum consequens : Ergo & antecedens.

Nego sequelam majoris ; quia contractus conjugalis jus tribuit ad carnalem copulam : Atqui naturæ repugnat ut jus illud habeat frater in sororem ; Eunuchi verò, & impotentes ejusmodi juris capaces non sunt.

Q. 5. *Quomodo definitur Matrimonium in facto esse quatenus est contractus naturalis & civilis ?*

R. Vulgò definitur à Canonistis & Theologis post Magistrum Sententiarum, conjunctio maritalis viri & fœminæ inter legitimas personas individuum vitæ consuetudinem retinens.

Dicitur 1. *Conjunctio*, quo nomine intelligitur vinculum & nexus, qui ex actuali consensu interno & pactione externa virum inter & mulierem resultat.

Dicitur

Dicitur 2. *Maritalis* ; tum ut distinguatur ab aliis conjunctionis speciebus, v. gr. à societate Mercatorum ; tum ut significetur finis & objectum hujusce contractus, mutua scilicet corporum traditio.

Dicitur 3. *Viri & fœminæ*, quibus verbis subiectum Matrimonii designatur, & quidem numero singulari, *Viri & fœminæ* ad excludendam Polygamiam.

Dicitur 4. *Inter legitimas personas*, id est, quæ habiles sunt ad contrahendum Matrimonium, nec ullo impedimento dirimente sunt ligatæ.

Dicitur denique *individuum vitæ consuetudinem retinens*, ut significetur vinculum Matrimonii solvi non posse partium consensu, sicut solvuntur alii contractus.

Q. *Matrimonium estne licitum & honestum?*

R. De fide est Matrimonium esse licitum & honestum ; ait enim Apostolus 1. Corinth. 7. *Si acceperis uxorem, non peccasti : & si nupserit virgo, non peccavit.* Et ratio est, quia natura humana ita à Deo est instituta, ut sine Matrimonio conservari nequeat.

Q. 7. *Extatne præceptum contrahendi Matrimonium?*

R. Extat respectu totius hominum communis, *Crescite & multiplicamini & replete terram*, Gen. 1. Sed multiplicatis hominibus, cuilibet non minus liberum est matrimonium, vel cælibatum eligere, quàm agriculturam & alias artes, sine quibus societas humana consistere nequit. Quin Christus Dominus Matth. 19. virginitatem seu cælibatum præfert Matrimonio, docetque esse singulare Dei donum.

Q. 8. *Quomodo definitur Matrimonium, ut Sacramentum novæ Legis?*

R. Definitur Sacramentum à Christo institutum, quo conjugibus confertur gratia ad mutuam dilectionem, sanctum conjugii usum, & piam liberorum educationem.

Dicitur à Christo institutum; quia ante adventum Christi Matrimonium erat solum in officium naturæ; Christus autem illud evexit vel in nuptiis Cana Joan. 2. vel Matth. 19. vel ut nonnullis placet, post Resurrectionem, ad dignitatem Sacramenti.

CAPUT II.

De Matrimonii proprietatibus.

Sanctus Augustinus Lib. 1. de Nupt. & Concup. cap. 17. & ex illo Magister Sententiarum Lib. 4. dist. 31. S. Thomas, & cæteri Theologi tria numerant bona Matrimonii propria, scilicet, fidem, prolem & Sacramentum. In fide, quam conjuges sibi mutuo servare debent, intelligitur Matrimonii unitas, id est unius cum una conjunctio: in prole fœcunditas: *Non ut proles nascatur tantum, verum etiam ut renascatur*, inquit S. Augustinus cit. cap. 17. in Sacramento, Matrimonii indissolubilitas; circa quæ nonnulla sunt elucidanda. Itaque

Q. 1. *Poligamia estne contra jus naturale & divinum positivum?*

R. 1. Poligamia simultanea, qua quis plures simul habet uxores, repugnat Legi naturali & Divinæ; sic enim habetur Gen. 2. *Relinquet homo patrem*

patrem suum & matrem, & adhærebit uxori suæ, & erunt duo in carne una. Atqui in Polygamia simultanea non duo, sed tres, quatuorve essent in carne una; *Primus Lamech duabus maritatus*, inquit Tertullianus Lib. de Castit. c. tres in unam carnem effecit.

Dices: Jacob, David, & alii sancti Patriarchæ plures habuerunt simul uxores: Ergo.

Distinguo antec. Habuerunt, Deo post diluvium dispensante, Conc. secus, Nego antecedens.

Dixi: *Post diluvium*, nam ante diluvium Patres Lamechum tanquam adulterum accusant.

R. 2. In Lege nova Christus Matth. 19. Polygamiam simultaneam prorsus exclusit, & Matrimonium ad primævam institutionem reduxit. Unde Concilium Tridentinum Sess. 24. Canon. 2. adversus Lutheranos & Anabaptistas sic habet: *Si quis dixerit licere Christianis plures habere simul uxores, & hoc nulla Lege Divina esse prohibitum, anathema sit.*

R. 3. Polygamia successiva, qua conjux post mortem alterius transit ad secundas vel tertias nuptias, nec Juri naturali, nec Legi Evangelicæ repugnat, ut olim asseruerunt Montanistæ: sic enim scribit Apostolus 1. Cor. 7. *Mulier alligata est Legi, quanto tempore vir ejus vivit: quod si dormierit vir ejus, liberata est, cui vult nubat tantum in Domino.*

Q. 2. *Matrimonium estne ex natura sua indissolubile?*

R. Matrimonium consummatum ex natura sua est indissolubile quoad vinculum tam in statu Legis naturæ, quàm in statu Legis scriptæ & Evangelicæ: *quod ergo Deus conjunxit, homo non separet*, ait Dominus Matth. 19. Unde Conc. Trident. Sess. 24. Can. 5. Lutheranos asserentes Matrimonium
nium

nium dissolvi per adulterium vel absentiam uxoris, anathemate percussit.

Dixi 1. *Matrimonium consummatum*, in quo duo facti sunt una caro; quia Matrimonium solummodò ratum dissolvitur etiam quoad vinculum per unius conjugis solemnem Religionis professionem, ita ut liceat alteri ad alias nuptias convolare; sic enim definit Concilium Trid. Sess. 24. Can. 3. præverat Alexander III. 12. sæculo, Cap. *Verum*, tit. de *Conversione conjugatorum*, & Innocentius III. 13. sæculo Cap. *Ex parte* 2. eodem Titulo.

Dixi 2. *Quoad vinculum*; quia conjuges ob graves causas, putà adulterium, possunt separari quoad thorum seu cohabitationem, ut definit Concilium Tridentinum Sess. 24. Can. 8. Christus enim Matth. 5. & 19. permittit uxorem dimitti in causa fornicationis. Hanc præ cæteris causam appellat; tum quia maximè repugnat Matrimonio: tum quia solum adulterium est causa perpetui divortii; divortium enim propter alia crimina fit solum ad tempus, donec v. gr. uxor resipiscat, aded ut innocens teneatur recipere emendatam. At propter adulterium, etiamsi adulter aut adultera resipuerit, pars innocens non tenetur ex justitia cohabitare cum illa. Dico *ex justitia*; quia si uxor verbi gratia dimissa & emendata in magno æternæ damnationis periculo versaretur non revocata, vir teneretur cedere de jure suo; ordo quippe charitatis postulat ut spirituales proximi salutem temporali nostro commodo præferamus. Ita sanctus Augustinus Lib. 2. de *Conjug. adult.* cap. 6.

Dices 1.

Dices 1. Deus Deut. 24. permittit marito dimittere uxorem per libellum repudii, & uxori sic dimissæ alteri nubere: Ergo.

R. 1. Ad antecedens, controversiam esse inter Theologos, num vinculum Matrimonii solveretur per libellum repudii? Negant sanctus Hieronymus in Caput 5. Matth. Magister Sententiarum, sanctus Bonaventura, Dominicus Soto, Estius, & alii, sanctus Thomas in Supplem. qu. 64. art. 3. ad 4. noluit quidquam hîc definire. Sed sanctus Chrysostomus aut quivis author operis imperfecti, Durandus, Paludanus, Bellarminus & alii innumeri, quibus adhærendum videtur, censent per ejusmodi libellum fuisse solutum Matrimonii vinculum, Deo ita dispensante, ne graviora orirentur mala: tum quia neque Moyses, neque Prophetæ, qui vitia populi reprehendebant, unquam objurgarunt mulieres dimissas tanquam adulteras, quòd alteri conjungerentur: tum quia Lex prohibebat, ne repudiata post mortem secundi mariti, posset unquam recipi à priori marito, cum tamen optimum & optandum fuisset, nedum prohibendum, ut rediret ad legitimum suum conjugem. Unde

R. 2. Distinguendo consequens: Ergo in Legge veteri Matrimonium consummatum solvebatur, Deo ita dispensante, Concedo: solvebatur consensu partium, vel authoritate aliqua humana, Nego consequ.

Instas 1. Ex dictis Tractatu de Legibus, dispensatio non cadit in ea, quæ sunt Juris naturalis: Ergo.

Dist.

Diff. antec. Quæ sunt Juris naturalis immutabilis, ut blasphemia, mendacium, quæ nulla circumstantia cohonestari possunt, Conc. Juris naturalis mutabilis, Nego antec. Consule dicta Tom. 3. Tract. de Legibus, cap. 8.

Instas 2. Christus Matth. 5. vers. 31. ita permittit uxorem dimittere in causa fornicationis, ut alteri liceat sic dimissam ducere: Ergo tunc solvitur Matrimonii vinculum.

Probatur antecedens ex ipsiusmet Christi verbis: *Qui dimiserit uxorem suam, excepta fornicationis causa, facit eam mæchari: & qui dimissam duxerit, adulterat.* Ergo inquit Heterodoxi adversus Catholicos, & Græci adversus Latinos; si intervernerit fornicatio, soluti sunt conjuges à Lege conjugii, nec adulterant, si novas nuptias contrahant.

Nego anteced. Et pravam illam interpretationem damnavit Concilium Tridentinum Sess. 24. Canon. 7. exceptio enim fornicationis est conjungenda cum verbis antecedentibus hoc modo: *Qui dimiserit uxorem suam (quod non licet nisi ob fornicationem) & aliam duxerit, mæchatur; non verò cum sequentibus: Et aliam duxerit; Christus quippe, qui non semel solvit hanc quæstionem, utrùm liceat uxorem dimittere, nunquam dixit: Et qui dimissam duxerit, nisi ob fornicationem, mæchatur.*

Confirmatur ex Apostolo, qui absolutè pronuntiat Rom. 7. & 1. Corinth. 7. *Quæ sub viro est mulier, vivente viro, alligata est Legi . . . Igitur vivente viro vocabitur adultera, si fuerit cum alio viro.* Quæ expendens S. Augustinus Lib. 2. de Conjug. adult. cap. 5. ait, *Hæc verba Apostoli toties repetita, toties inculcata, vera sunt, viva sunt, plana sunt.* Nul-
lius

lius viri posterioris mulier uxor esse incipit, nisi prioris esse desiverit: esse autem desinet uxor prioris, si moriatur vir ejus, non si fornicetur.

Dices 2. Apostolus 1. Cor. 7. vers. 12. & 15. concedit infideli, qui fidem amplexus est, dimittere uxorem in sua infidelitate pertinacem, & aliam uxorem ducere. Unde Innocentius III. cap. Quanto, tit. de Divortiis, sic statuit: Si alter Infidelium conjugum ad Fidem Catholicam convertatur, altero vel nullo modo, vel non sine blasphemia divini nominis, vel ut eum pertrahat ad mortale peccatum, ei cohabitare volente: qui relinquitur, ad secunda, si voluerit, vota transibit. & in hoc casu intelligimus quod ait Apostolus: Si infidelis discedit, discedat: Ergo.

R. 3. Concesso antec. Nego conf. non enim sequitur Matrimonium ex natura sua esse dissolubile, sed solum in casu proposito Deum dispensasse in gratiam Religionis Christianæ.

C A P U T I I I .

De Matrimonio, quatenus est Sacramentum.

Q. 1. *Matrimonium in Lege nova estne Sacramentum propriè dictum?*

R. Affirmativè, ita enim definiit Concilium Tridentinum Sess. 24. Can. his verbis: Si quis dixerit Matrimonium non esse verè & propriè unum ex septem Legis Evangelicæ Sacramentis à Christo Domino institutum neque gratiam conferre, anathema sit.

Probatur definitio; quia ad verum Sacramentum novæ Legis tria requiruntur & sufficiunt.

ciunt. 1. Ut sit signum sensibile & permanens rei sacræ. 2. Ut sit à Christo Domino institutum. 3. Ut sit per se efficax, & productivum gratiæ: Atqui tria ista conveniunt Matrimonio: Ergo.

1. Conjunctio conjugalis, propter quam vir debet relinquere patrem & matrem, ut adhæreat uxori suæ, procul dubio est sensibilis & in Ecclesia permanens: quod autem sit signum rei sacræ, scilicet unionis Christi cum Ecclesia, asserit Apostolus Ephes. 5. *Sacramentum hoc*, inquit, *magnum est: Ego autem dico in Christo, & in Ecclesia: Textus Græcus habet in Christum & in Ecclesiam*, ut sensus sit unio conjugalis Sacramentum magnum est, non quidem si ulla in se præcisè spectetur, sed quatenus refertur ad Christum & Ecclesiam tanquam ad terminum, & rem significatam, *ut aditus hominum in hanc vitam benediceretur*, inquit S. Cyrillus Lib. 2. in Joan. cap. 22.

2. Quodd signum illud fuerit à Christo Domino institutum, patet ex dictis nimirum Matrimonium ante Christi adventum non fuisse Sacramentum, significavit quidem futuram unionem Christi cum Ecclesia, sed signum illud fuit solum speculativum, nec practicum evasit nisi per Christum.

3. Quodd signum illud sit Gratiæ efficacis, Patres Tridentini, duce Traditione, colligunt ex laudato, cap. ad Ephes. in quo sic habet Apostolus: *Viri diligite uxores vestras, sicut Christus dilexit Ecclesiam, & seipsum tradidit pro ea ut exhiberet sibi gloriosam Sponsam . . . ita & viri diligere debent uxores suas ut sua corpora . . . sicut & Christus Ecclesiam; quia membra sumus corporis ejus (Christi) de carne*

carne ejus & de ossibus ejus. Sacramentum hoc magnum est, Ego autem dico in Christo & in Ecclesia. Ex quibus verbis Concilium Tridentinum Sess. 24. cap. unico de Matrimonio colligit meritum Passionis Christi in matrimonium novæ Legis derivari, ut non solum significet charitatem, qua Christus dilexit Ecclesiam; sed etiam gratiam conferat conjugibus, qua similiter charitate mutuo se diligant.

Dixi: *Duce Traditione*; quia Ecclesiæ tam Græcæ quàm Latinæ Traditio hancce Concilii Tridentini interpretationem confirmat; utraque enim Ecclesia Matrimonium Christianorum inter Sacramenta novæ Legis semper numeravit: *Sacramentum sunt nuptiæ, & imago dilectionis Christi, quam erga Ecclesiam declaravit*, inquit S. Chrysostomus Hom. 56. in Gen. & sanctus Augustinus Lib. de Fide & operib. cap. 7. *In civitate Domini, in monte sancto ejus, hoc est in Ecclesia, nuptiarum non solum vinculum, sed etiam Sacramentum commendatur.*

Q. 2. *Quæ gratia confertur per Sacramentum Matrimonii?*

R. Confertur 1. Gratia sanctificans, non quidem prima, qua deletur peccatum mortale, sed secunda, qua fideles contrahentes augentur ac perficiuntur in sanctitate; quia Matrimonium non est Sacramentum mortuorum peccato, sed vivorum vita gratiæ; aliàs quomodo carnales conjuges referrent purissimam Christi & Ecclesiæ unionem? Fideles igitur prius Deo per charitatem junguntur, à cunctis peccatorum sordibus mundati, ac tunc demum ad Sacramentum Matrimonii accedunt abundantio rem gratiam rece-

pturi, ut charitas in illis roborata non obruat spumantibus concupiscentiæ fluctibus; sed ad votum Apostoli Hebr. 7. honorabile sit eorum connubium in omnibus & thorus immaculatus. 2. Conferuntur spiritualia gratiæ actualis auxilia, ut conjuges sicut sunt una caro, ita & in Christo sint unus spiritus, quo intimè ac castè se diligant, sicut Christus dilexit Ecclesiam, mutuas infirmitates & benignè & amanter perferant, Ecclesiam ditent pia & fidei prolis educatione, concupiscentiam coërceant juxta castitatis & temperantiæ Leges, ac tribulationem carnis æquo animo patiantur.

Q. 3. *Tam pretiosa dona obveniuntne omnibus suscipientibus Matrimonii Sacramentum?*

R. 1. Certum est eos qui ad Sacramentum indignè accedunt, hoc est in statu aut affectu peccati mortalis, nullum ex eo percipere fructum; quia gravioris sacrilegii reos se constituunt, quod pro benedictione maledictionem Dei, tum in se, tum in familiam concitat.

R. 2. Conjuges, qui per peccatum lethale excidunt à gratia sanctificante in Sacramento collata, simul amittunt jus ad auxilia actualia mox recensita; quia jus illud fundatur in gratia sanctificante, ex qua veluti fœcunda radice exeunt cæteri effectus cuique Sacramento proprii. Unde intelligunt fideles conjuges, quàm diligenter ad Sacramentum Matrimonii se præparare debeant, quàmque studiosè peccatum vitare, aut si fortè humana fragilitate in aliquod lapsi fuerint, quàm citò illud per pœnitentiam eluere debeant, ut virtus Sacramenti in ipsis operetur, quæ fortunatum reddat eorum conjugium, illosque immunes

nes servet à peccatis qnamplurimis, quibus obnoxius est status conjugalis.

CAPUT IV.

De Materia, forma, & Ministro Sacramenti Matrimonii.

Prius inquirendum est quis sit hujus Sacramenti Minister, quàm quidquam definiamus circa ejus materiam & formam: istud enim posterius omnino ab altero pendet. Itaque

Q. *Quis est Minister Sacramenti Matrimonii?*

R. Duæ sunt circa propositam quæstionem oppositæ sententiæ, quas Concilium Tridentinum nullatenus attigit.

Prima, Quæ est Canonistarum & plurium Theologorum, præsertim veterum, ut Magistri Sententiarum, S. Thomæ, Scoti, Durandi, &c. affirmat, ipsosmet contrahentes esse Ministros hujus Sacramenti, ita ut vir mulieri, & mulier viro illud administret. Nititur autem illa sententia iis præsertim momentis. 1. Quia Matrimonium celebratur per modum contractus. Atqui soli contrahentes mutuo consensu illum efficiunt: Ergo & Sacramentum. Unde Eugenius IV. in Decreto pro Armenis sic habet: *Causa efficiens Matrimonii irregulariter est mutuus consensus.* 2. Quia Matrimonia clandestina ante Concilium Tridentinum fuerunt rata ac valida absque benedictione Sacerdotali; atque etiamnum Ecclesia rata habet Matrimonia Hæreticorum coram Pseudo-Ministro celebrata: Atqui credibile non est Ecclesiam

permisſiſſe ut Fideles ſine Sacramento contraherent, & cùm ſollicita ſit, ut conjugatì nunc redeuntēs ex hæreſi, Sacramento Confirmationis perficiantur, non curat tamen ut iidem Benedictionem nuptialem à Sacerdote accipiant; quod validiſſimum eſt argumentum, ipſam habere Matrimonia Hæreticorum ut Sacramenta.

Secunda Sententia aſſignat Sacerdotem pro Miniſtro Sacramenti Matrimonii, contenditque Matrimonia clandestina fuiſſe duntaxat contractus naturales & civiles, validos quidem & inſolubiles ante Concilium Tridentinum, ſicut hodierna Hæreticorum Matrimonia, ſed illa non fuiſſe, nec iſta eſſe vera Sacramenta. Hanc ſententiam Dominicus Soto & Vaſquez temeritatis incuſant; ſed ejus patroni notam illam temeritatem vocant, cùm plures & graves Authores ejuſmodi ſententiam propugnent, ut Guillelmus Pariſienſ. Tract. de Matrimonio: *Matrimonium, inquit, eſt ſacrum apud fideles virtute benedictionis.* Et Concilium Coloniènſe anno 1536. part. 7. cap. 4. de Matrimonio ſic habet: *Quod Sacramentum, ſi quis ſicut decet, acceperit, accedente Sacerdotali precatione, confert donum Spiritus, quo vir diligit uxorem amore caſto ſicut Chriſtus dilexit Eccleſiam.* Et in Enchir. quod mandato ejuſdem Concilii editum eſt: *Quanto magis putandum eſt Sacerdotes, qui legatione pro eo funguntur, legitimos bujus Sacramenti Miniſtros eſſe?* Eandem ſententiam amplexi ſunt Melchior Canus, Toletus, Petrus Ledefma, Maldonatus, Eſtius, Sylvius, & eſt admodum communis in Academia Pariſienſi.

Probatur 1. Quia Sacerdotes ſunt diſpenſatores myſteriorum Dei; quis ergo eis dene-
gave-

gaverit potestatem conferendi solemniter Sacramentum matrimonii, ut illam tribuat mulieri, cui nequidem permittitur in Ecclesia loqui? 1. Corinth. 4. 2. Quia sanctus Ignatius, sanctus Clemens Alexandrinus, Tertullianus, Syricius Papa, Concilium Carthagenense IV. & omnes veteres constanter docent esse verè apud nos Sacramentum, quod coram Sacerdote celebratur, & ejus benedictione sanctificatur, objurgantque eos, qui clandestinè contrahebant; *Penès nos*, inquit Tertullianus Lib. de Pudic. cap. 4. *occultæ conjunctiones, id est non prius apud Ecclesiam professæ juxta mæchiam & fornicationem judicari periclitantur.* 3. Quia sicut vera pœnitentia, quæ à solo peccatore peragi potest, non est Sacramentum, nisi accedat Sacerdotalis absolutio, & ritus à Christo institutus; ita nec consensus in Matrimonium, qui à solis contrahentibus præstari potest, evadit Sacramentum absque sacerdotali benedictione.

Ex iis sequentes solvi debent quæstiones.

Prima, quæ sit materia & forma hujus Sacramenti. Juxta enim primam opinionem materia remota sunt contrahentium corpora; materia verò proxima est ipsa corporum traditio: Forma autem mutua contrahentium acceptatio; Sacramentum enim matrimonii celebratur per modum contractus; Atqui in omni contractu res de qua contrahitur est materia remota; oblatio verò pretii pro merce inchoat contractum, & mercem venalem significat; sed contractus tunc formam accipit & perficitur, cum venditor mer-

cem acceptat eo pretio quo offertur. Sic in contractu Matrimonii, ubi vir consentit ut mulier habeat dominium corporis sui, consensus ille in quo intelligitur traditio, est materia proxima hujusce contractus; mulier autem acceptando contractum perficit, & ita viro administrat Sacramentum: & vicissim vir mulieri eo ipso quo acceptat consensum mulieris seu traditionem ejus corporis; quia uterque applicat formam materiæ, acceptionem scilicet traditionis.

Sed in secunda sententia quæ Sacerdotem Ministrum Sacramenti agnoscit, materia proxima est consensus contrahentium, forma verò sunt verba Sacerdotis, quæ evehunt consensum contrahentium ad esse Sacramentale, quemadmodum in Sacramento Pœnitentiæ absolutio, quæ est forma hujus Sacramenti, actus pœnitentis, qui habet rationem materiæ, determinat ad esse Sacramentale.

Secunda quæstio, Utrum Matrimonium Catholicorum per Procuratorem contractum coram Sacerdote, & duobus testibus sit Sacramentum? Affirmandum est juxta primam sententiam, quia est legitimus contractus: negandum verò juxta secundam, quia verba Sacerdotis in quibus consistit forma essentialis exigunt præsentiam contrahentium, non secus ac forma absolutionis, *Ego te absolvo*, quæ non potest dirigi ad absentes. Hinc qui per Procuratorem contraxerunt, solent postea cum testibus præsentibus se sistere coram Sacerdote, benedictionem ab eo accepturi.

Tertia.

Tertia. Quid sentiendum sit. 1. de Matrimonio Catholicorum contracto coram duobus testibus & Pastore in testem quæsito, sed renitente, & benedictionem denegante. 2. De Matrimonio Hæreticorum coram ipsorum Pseudo-Ministro, & aliis testibus. 3. De Matrimonio Catholicorum, sed prius irritò propter defectum consensus aut aliud impedimentum dirimens; sed postea sublato impedimento per novum consensum contrahentium confirmato. Prima sententia asserit illa Matrimonia esse vera Sacramenta; quia sunt contractus validi; negat verò secunda sententia; quia etsi contractus illi revera sint validi, illis tamen deest forma essentialis, nempe benedictio Sacerdotalis, sine qua non existit Sacramentum.

CAPUT V.

De Sponsalibus.

Q. 1. *Quomodo definiuntur Sponsalia?*

R. Definiuntur, futuri Matrimonii mutua & libera promissio obligationem pariens.

Dicitur 1. *Mutua promissio*; quia una pars non censetur velle se per promissionem obligare, nisi altera pars non solum acceptet, sed etiam vicissim repromittat.

Dicitur 2. *Libera*, ut excludatur coactio & quivis gravis metus injustus, quo Matrimonium redditur nullum, ac proinde Sponsalia.

Dicitur 3. *Obligationem pariens* ; Jure enim naturali tenemur stare promissis legitimis & acceptatis , ac quidem sub peccato mortali , si materia sit gravis : Sponsalia autem sunt in materia gravi ; peccaret ergo damnabiliter , qui sine causa ab iis resiliret. Ita communiter Theologi post S. Thomam in 4. distinct. 27. art. 1. ad 2. *Sed cum libera debeant esse Matrimonia* , inquit Lucius III. cap. *Requisivit* , Tit. de *Sponsalibus* ; *Monenda est potius , quàm cogenda* (Mulier) *cùm coactiones difficiles soleant exitus frequenter habere.*

Dixi : *Sine causa* ; quia ex causa justè dissolvuntur Sponsalia , ut si sponsa deprehendatur fuisse fornicata , aut si supervenerit notabilis mutatio , v. g. graves inimicitiae inter utramque familiam , infamia , &c. cap. *Quemadmodum* : Tit. de *Jurjurando*.

Q. 2. *Quomodo se geret Confessarius erga Sponsos , quos deprehendit ex falsa præsumptione absolutos in foro exteriori ?*

R. Observabit 1. Omnem culpam aliquando non in Sponsis , sed in eorum residere parentibus , qui non sinunt liberos stare promissis ; quia fortè offertur conjugium præstantius , cùm tamen ejusmodi exceptionem Sponsalia non admittant , nec probaret Ecclesia. Parentes igitur hîc graviter peccant , non ipsi Sponsi , quibus legitima est excusatio promissa non implendi , scilicet parentum interdictum. 2. Si ipso-
rummet desponsatorum animus à contractis Sponsalibus sit omnino aversus , Confessarius omni modo suadere adnitetur , ut promissum impleant , exponetque quàm grave sit & periculosum mutare Fidem liberè datam , ab Ecclesia acceptam

ceptam & à Deo obsignatam. Quodd si animum à Matrimonio promissio ita alienum advertat, ut flecti nequeat, absolutionis Beneficium iis concedere non gravabitur, quia ejusmodi averfio est caufa, propter quam prudenter timendum est, ne infaustos exitus Matrimonium habeat.

Q. 3. *Quare instituta sunt sponsalia?*

R. Ut Fideles quàm optimè parati accedant ad magnum Matrimonii Sacramentum. Sponsalia quippe sunt ad illud Sacramentum juxta S. Thomam & alios Theologos, quod Catechumenatus ad Baptismum, Tonsura Clericalis ad sacros Ordines, & Novitiatus ad solemnem Religionis professionem.

Ideo autem Ecclesia Baptismi, Ordinis, & Matrimonii Candidatos singulariter erudiendos & exercendos duxit; quia Fideles in perceptione hujusmodi trium Sacramentorum amplectuntur novum vitæ genus ac statum, in quo nunquam fegerent, ut decet & expedit tum privatæ, tum Reipublicæ salutis, nisi status, quem amplectuntur, officia didicerint, & ad illum probè fuerint instituti ac præparati.

Quæ verò sint Parochi partes erga sponfos, quævè docere debeant & inquirere, fusè exposuimus Tom. 7. cap. 7. de Sacramento Matrimonii §. 3. & cap. 6. ubi agimus de peccatis conjugum contra Fidem quam sibi debent, contra prolem propter quam suscipiendam & religiosè educandam institutum est istud Sacramentum, & contra sanctitatem Sacramenti quam plerique impudenter violant tum in usu, seu potius abusu conjugali, tum in individua societate quam fœde perturbant rixis & diffidiis, adeò ut eorum societas

non sit signum & imago unionis Christi cum Ecclesia; tum denique in ipsa perceptione Sacramenti, ad quod sæpè accedunt tanquam ad spectaculum profanum pompis non Christi, sed Sathanæ adornatum, hoc est luxu, choreis, conviviiis flagitiosis, à quibus pudor exulat, ubi sobrietas, & modestia vertuntur in crimen, amatoria & obscæna cantica aures demulcent, nedum feriunt, denique probrosa Gentilium bacchanalia ad tanti Sacramenti solemnitatem transferuntur.

CAPUT VI.

De Impedimentis Matrimonii.

Q. I. *Quotuplicis generis sunt impedimenta matrimonii?*

R. Duplicis: Alia sunt simplicia, quæ Matrimonium non dirimunt, nec irritum efficiunt, sed illicitum duntaxat: alia sunt dirimentia, quæ Matrimonium prorsus nullum reddunt.

Q. 2. *Quot sunt impedimenta simplicia?*

R. Jure novo quatuor tantum extant. Primum est tempus quo interdicuntur nuptiæ, nimirum ab Adventu Domini usque in diem Epiphaniæ, & à Feria quarta Cinerum usque ad Octavam Paschatis inclusivè. Ita Concilium Tridentinum Sess. 24. cap. 10. *de Reform.* –

Secundum impedimentum simplex sunt sponsalia valida, nec legitimè dissoluta, propterea sponsi cum aliis non contraherent absque gravi peccato; valeret tamen eorum Matrimonium.

Tertium est Votum simplex Religionis, aut Castitatis.

Dico,

Dico, *simplex*; quia votum solemne ex dicendis, non solum illicitum, sed nullum prorsus reddit matrimonium.

Quantum est vetitum Ecclesiæ, seu prohibitio à Superiore facta nupturientibus, ne matrimonium contrahunt, priusquam inquiratur v. g. an impedimentum, quod objicitur, revera existat. Et hæc impedimenta Canonistæ complexi sunt Versu sequenti:

Ecclesiæ vetitum, votum, sponsalia, tempus.

Ergo sublatum est impedimentum Catechismi, quod prius ligabat eos; qui infantem ritè jam baptizatum suscipiebant, ut circa eum supplerentur omissæ cæremoniæ, quæ dicuntur Catechismus.

Q. 3. *Quot sunt impedimenta dirimentia?*

R. Quindecim his versibus comprehensa:

*Error, conditio, votum, cognatio, crimen,
Cultus disparitas, vis, ordo, ligamen, honestas,
Amens, affinis, si clandestinus, & impos,
Si mulier sit rapta, loco nec reddita tuto.
Hæc facienda vetant connubia, facta retractant.*

ERROR.

Q. 1. *Quotuplex est error?*

R. Duplex: Alter personæ, quo supponitur una persona pro alia, v. g. Lia pro Rachele: alter qualitatis & circa accidentia, ut si credatur puella nobilis, dives, virgo primogenita vel unica hæres, cum tamen ejusmodi dotibus careat.

Q. 2.

Q. 2. *Uterque error dirimitne Matrimonium?*

R. Error personæ dirimit, quia tollit consensum, ac proinde contractum reddit nullum: sed error accidentalis non dirimit; quia non impedit quominus deceptus consentiat in hanc personam, licet in eam non consentiret, si sciret esse inopem, corruptam, &c. Hic operæ pretium est consulere nostrum Tom. 7. Part. 3. Tit. de Matrim. §. 2. ubi elucidantur graves difficultates, quæ circa errorem occurrunt.

CONDITIO.

Hoc impedimentum designat statum servilem, qui dirimit Matrimonium inter personam liberam & servam, si persona libera ignorabat alterius servitutem. Sed in Gallia locum non habet ejusmodi impedimentum, cum apud nos nulla sit servitus, sed solum famulatus.

VOTUM.

Cum duplex sit Votum, nempe simplex & solemne; posterius solummodo dirimit Matrimonium, ut jam monuimus. Votum autem solemne est illud, quod emittitur in professione solemni Religionis ab Ecclesia approbatæ.

Ergo qui sine illa solemni professione vovit Religionem aut Castitatem, illicitè quidem contrahit Matrimonium, sed non invalidè.

COGNATIO.

Q. 1. *Quotuplex cognatio dirimit Matrimonium?*

R. Triplex, nempe spiritualis, legalis & naturalis, quæ vulgò dicitur consanguinitas.

Q. 2. *Quid est cognatio spiritualis?*

R. Est affinitas, quæ oritur ex Baptismo vel Confirmatione.

Q. 3. *Inter quos contrahitur cognatio spiritualis?*

R. Jurè novo, scilicet ex Decreto Concilii Tridentini Sess. 24. cap. 2. *de Reform.* contrahitur tantum inter susceptores seu paternos, & baptizatum vel confirmatum, ac illius patrem & matrem; nec non inter Ministrum illorum Sacramentorum, & baptizatum vel confirmatum, ac illius patrem & matrem.

Ergo pater & mater possunt matrimonio inter se conjungi, cum ex Concilio Tridentino cognationem spirituales non contrahant.

Q. 4. *Qui in casu necessitatis infantem baptizavit, contrahitne cognationem spiritualem cum eo, & cum parentibus ejus?*

R. Si pater ipse vel mater prolem legitimam baptizet, non contrahit, alii verò contrahunt. Ita decernitur Cap. *Si vir*, Tit. *de Cognat. spirit.*

Dixi: *Prolem legitimam*; quia si pater in casu necessitatis baptizet filium, quem ex concubina suscepit, cognationem cum ea contrahit, ita ut illam in uxorem ducere nequeat, quia, inquit Fagnanus post Navarrum, nullum habet jus petendi à concubina debitum, quemadmodum à propria uxore, ac proinde nulla est ratio, cur
non

non ligetur respectu concubinæ ; quemadmodum alii ligarentur , si ejus prolem baptizarent.

Q. 5. *Quando per procuratorem sponsor infantem levat è sacro Fonte , uter contrahit cognationem spiritua-*
lem ?

R. Dissentiunt Theologi , & quamvis adhæreamus sententiæ Fagnani in Cap. *Veniens*, Tit. de *Cognat. spirit*, & Navarri Lib. 5. Consil. qui affirmant sacram Cardinalium Congregationem declarasse non procuratorem, sed ipsum sponso-rem seu patrinum, cujus nomine agit, cognationem contrahere ; in illo tamen dubio censemus recurrendum ad Episcopum.

Q. 6. *Quid est cognatio legalis ?*

R. Est propinquitas personarum ex adoptione consurgens. 1. Inter adoptantem & adoptatum & posteros adoptati usque ad quartum gradum. 2. Inter uxorem adoptantis & adoptatum, ac vicissim, inter uxorem adoptati & adoptantem. 3. Inter filios aut filias adoptantis & adoptatum vel adoptatam. Sed ista non sunt in usu apud nos, cum in Gallia non eligantur, sed nascantur hæredes.

Q. 7. *Quid est cognatio naturalis seu consanguinitas ?*

R. Est vinculum personarum ex eodem stipite descendantium carnali propagatione contractum.

Cum autem descendentes possint esse stipiti seu origini propinquiore vel remotiores, gradus in consanguinitate debent observari.

Q. 8. *Quomodo computantur gradus consanguinitatis ?*

R. Ca-

R. Canonistæ & Theologi duplicem lineam statuunt: alteram rectam, alteram transversam seu collateralem.

Linea recta est ordinata series consanguineorum, qui à se mutuò descendunt, ut à patre filius vel filia, ab iis, qui respectu avi aut aviæ dicuntur nepotes vel neptes, &c.

In hac linea pater, qui est stipes & origo totius genealogiæ, non computatur, ideoque filius, qui ab ipso immediatè procedit, est in primo gradu, nepos, qui à filio immediatè originem ducit, est in secundo gradu, pronepos in tertio, abnepos in quarto, & hujus filii in quinto.

In linea transversa seu collateralis non comparantur descendentes cum iis, à quibus gradatim descendunt, sicut in linea recta: sed omisso communi stipite, nimirum patre, inter se conferuntur ut frater cum sorore; hi autem, qui primi occurrunt in hac linea & immediatè descendunt à stipite, computantur in primo consanguinitatis gradu: filii verò fratris & sororis, quos consobrinos vocamus, in secundo; filii consobrinorum in tertio, ab his in quarto, & sic deinceps.

Q. 9. *Consanguinitas dirimitne matrimonium in quolibet gradu?*

R. 1. Dirimit in linea recta. Ita respondit Nicolaus I. ad Consulta Bulgarorum, cap. 39. *Inter eas personas, inquit, quæ parentum, liberorumve locum inter se obtinent, nuptiæ contrahi non possunt, veluti inter patrem & filium, vel avum & neptem . . . & usque in infinitum.*

R. 2. Consanguinitas in linea collateralis dirimit Matrimonium usque ad quartum gradum inclusivè

clusivè, nec ulteriùs ex Concil. Later. IV. Cap. *Non debet*, Tit. de *Consanguin. & Affinit.*

Circa lineam collateralem observandum est. 1. Consanguineos inter se conferri, vel in gradu æquali ut frater & soror, vel in gradu inæquali seu mixto, ut ajunt, sicut frater cum filia sororis respectu cujus dicitur avunculus, vel filius sororis, cum sorore matris, respectu cujus vocatur matertera. Ideo autem gradus inæqualis dicitur mixtus, quia conflatur ex gradibus diversis, avunculus v. g. est in primo gradu, & filia sororis in secundo.

Porrò si in gradu mixto remotior est quintus, nihil impedit quominus Matrimonium validè & licitè contrahatur, etiamsi alter contrahentium sit in quarto vel etiam secundo gradu. Ista definiit Gregorius IX. Cap. *Vir*; Tit. de *Consanguinit. & Affinit.*

Observandum est 2. In gradu mixto qui attingit primum, exprimi debere à supplicibus pro dispensatione obtinenda, quis sexus sit in primo gradu, an vir, an mulier; quia longè difficiliùs conceditur, ut filius sororis vel fratris in uxorem ducat amitam aut materteram, quàm patruus aut avunculus filiam fratris aut sororis; honestati enim repugnare videtur, ut amita vel matertera, quæ jure naturæ superior est, & in qua relucet autoritas paterna vel materna, per Matrimonium subdita fiat & inferior.

Nec illud omittendum in gradu mixto semper incipiendum esse à gradu masculi, quamvis sit remotior à stipite, sic relatio amitæ vel materteræ ad filium fratris vel sororis dicitur

citur à secundo ad primum, patrui verò vel avunculi ad fratris vel sororis filiam, dicitur à primo ad secundum.

C R I M E N.

Q. 1. *Quæ crimina dirimunt Matrimonium?*

R. Homicidium & Adulterium.

Q. 2. *Quot in casibus duo illa crimina dirimunt Matrimonium?*

R. In quatuor casibus.

1. Quando quis occidit conjugem conspirante vel consentiente occisi consorte; superstes enim conjux non potest Matrimonium inire cum homicida, ex Cap. *Laudabilem*, Tit. *de Convers. infid.*

2. Quando cum homicidio unius conjugum præcessit adulterium cum superstite, etiamsi superstes in homicidium non consenserit ex Cap. *Super hæc*, Tit. *De eo, qui duxit uxorem, quam polluit per adulterium.*

3. Cum adulterium commissum est accedente promissione acceptata futuri Matrimonii post obitum conjugis. Nec refert juxta Rituale Carnotense, quòd promissio adulterium præcesserit vel subsequuta fuerit.

Dixi 1. *Accedente promissione*; quia ex S. Augustino Lib. 1. *de Nupt. & Concup.* Cap. 10. *Mortuo viro, cum quo verum connubium fuit, fieri potest conjugium, cum quo præcessit adulterium.*

Dixi 2. *Acceptata*; nisi enim alter acceptaverit sive expresse, sive tacite, adulterium non irritat Matrimonium. Silentium autem non habetur pro acceptatione.

4. Cùm quis, vivente legitima conjuge, Matrimonium iniit & consummavit cum altera, conscia prioris conjugii; hanc enim non potest habere uxorem, si quæ priùs ab eo legitimè ducta fuerat, fato fungatur ex Cap. *Veniens*, Lib. 4. Tit. *De eo, qui duxit in Matrimonium*, &c.

Dixi 1. *Et consummavit*: quia ex Cap. *Si quis*, eodem Titulo. Si adulterium non commisit sive ante, sive post contractum hujusmodi Matrimonium; nullum existit impedimentum.

Dixi 2. *Altera conscia*; quia si bona fide contraxit, liberum illum existimans, nihil obstat, quominus possit cum eo legitimè conjungi post obitum prioris uxoris.

CULTUS DISPARITAS.

Q. 1. *Quid est Cultus disparitas?*

R. Est diversitas Religionis in contrahentibus.

Q. 2. *Omnes Religione dispares suntne inhabiles ad contrahendum inter se?*

R. Minimè; namque Catholici, quamvis illicitè, validè tamen contrahunt cum Hæreticis.

Ergo cultus disparitas irritat solummodò Matrimonium Christianorum cum non baptizatis, puta Paganis, Judæis, Mahumetanis.

V I S.

Vis sive violentia infertur, vel pœnis & vexationibus, vel minis quæ metum incutiunt.

Q. *Metus*

Q. *Metus irritatne Matrimonium?*

R. Irritat jure positivo, si sit gravis, & injustè incussus ex cap. *Veniens*, & ex cap. *Consultationi*, Tit. de *Sponsalibus*.

Dixi 1. *Jure positivo*; quia metus, quantumcumque gravis, nec voluntarium, nec liberum perimit, sed minuit duntaxat, adeò ut excusari omninò non possit, qui ex gravi metu pejerat. Ergo Jure naturali valeret Matrimonium ex gravi metu contractum, nisi Ecclesia injustè coactos declarasset inhabiles ad sic contrahendum.

Dixi 2. *Si metus sit gravis*; quia metus levis ratio non habetur, aliàs vix ulla esset Matrimoniorum firmitas. Quæ enim filiafamilias non obiceret se in Matrimonium consensisse aliquo timore reverentiali vel mundano?

Dixi 3. *Injustè incussus*; quia si justè incutitur, quantumcumque gravis sit, irritum non facit Matrimonium, ut si Judex eum cogat metu mortis ad ducendam puellam, quam stupravit.

ORDO.

Istud impedimentum ligat solummodò initiatos aliquo Ordine sacro, ut Subdiaconatu, Diaconatu, quos Ecclesia inhabiles reddit ad contrahendum Matrimonium.

LIGAMEN.

Q. 1. *Quid est Ligamen?*

R. Est vinculum Matrimonii legitime contracti, quod Jure naturali & divino excludit secundas nuptias, nisi solutum fuerit morte al-

terutrius conjugis, vel solemnī Religionis professione, si Matrimonium non fuit consummatum.

Ergo uxor, cujus maritus præsumitur mortuus ob longam absentiam, nubere non potest, nisi proferantur indicia moraliter certa, & ab Episcopo vel ejus Officiali examinata, ac probata, mortuum esse ejus maritum.

Q. 2. *Quid factū est opus, si omīssa ejusmodi diligentia, mulier illa ex levioribus indiciis alteri nupserit?*

R. 1. Si ex insperato redeat maritus, mulier ad eum redire tenetur, omni cunctatione seposita, essetque adultera, si cum posteriore conjugally habitaret.

R. 2. Vel certiora indicia haberi possunt, vel non: si primum, sunt inquirenda & interim abstinendum à conjugio, quando subest ratio dubitandi de validitate Matrimonii. Si secundum, habenda est ratio bonæ fidei cum qua contraxerunt, vel saltem eorum alter. Fortè mulier statum suum Parocho vel Confessario candidè aperuit, & ille auctor fuit, ut oblatas nuptias acceptaret: atque in eo casu liberè maneat in suo conjugio, quamdiu non supervenerit nova dubitandi ratio, num prior conjux superstes sit; si enim oriatur nova dubitandi ratio, abstinere debet, donec dubium prudenter deposuerit; sed debitum reddat petenti, qui illam bona fide duxit, nec simili premitur dubio. Ita decernitur Cap. *Dominus*, Tit. *de secundis Nuptiis*.

Sed si mulier mala fide nupsit, & Parochus obrepfit, debitum exigere non potest, sed reddere tenetur marito falsitatis minimè conscio; secus, si ambo obrepserint; tunc enim tenentur

tur thoro se separare, donec constet de morte prioris mariti; quia propter dubium præcedens, & malam utriusque fidem, potius præsumitur adulterium, quàm matrimonium.

HONESTAS.

Q. 1. *Quid est honestatis impedimentum?*

R. Est quædam species affinitatis, quæ oritur ex sponsalibus validis, & ex Matrimonio rato, sed non consummato.

Q. 2. *Remanetne illud impedimentum post sponsalia dissoluta, sive ex consensu partium, sive per sententiam Judicis, sive per mortem alterius sponsi?*

R. Negarunt nonnulli moderni; sed absque fundamento. Refert Fagnanus in Caput *Ad audientiam*, Tit. de *Spons. & Matrim.* quæstionem delatam ad sacram Cardinalium Congregationem, quæ declaravit die sexta Julii anno 1658. ejusmodi impedimentum non tolli per sponsalium dissolutionem, quod Summus Pontifex Alexander VII. jussit observandum.

Q. 3. *Ad quem gradum extenditur illud impedimentum?*

R. Ad quartum inclusivè, si oriatur ex Matrimonio rato: ad primum verò duntaxat ex Concil. Trident. Sess. 24. cap. 3. de *Reform.* quando exurgit ex sponsalibus validis. Dico *validis*; quia sponsalia irrita & nulla non pariunt impedimentum.

Ergo Titius post mortem Berthæ, quam desponsaverat, non potest contrahere cum sorore defunctæ, neque cum ejus matre, neque cum ejus filia, sed potest cum ejus consobrina,

A M E N T I A .

Certum est amentiam Jure naturali inhabilem reddere ad contrahendum Matrimonium, cum tollat usum rationis, ac proinde omnem consensum, sine quo non existit contractus.

A F F I N I T A S .

Q. 1. *Quid est Affinitas?*

R. Est personarum proximitas proveniens ex copula carnali, per quam duo diversæ cognationis fiunt una caro; sicque consanguinei viri evadunt affines consanguineis mulieris, & vicissim consanguinei mulieris, consanguineis viri.

Q. 2. *Ad quem gradum se extendit illa affinitas?*

R. Distinguendum est. Ex copula licita & conjugali extenditur in linea collateralis ad quartum gradum inclusivè: ex Concilio Lateranensi IV. cap. *Non debet*, Tit. de Consanguinitate: Ex copula verò illicita & fornicaria non progreditur ultra secundum gradum, ex Concilio Tridentino Sess. 24. cap. 4. de Reform.

Ergo Titius, defuncta uxore, non potest contrahere cum consanguineis defunctæ usque ad quartum gradum inclusivè; neque fornicator cum consanguineis fornicariæ primi & secundi gradus, nempe cum ejus sorore aut consobrina; potest verò cum consanguineis remotioribus. Unde si sponsus fornicetur cum matre aut sorore sponsæ, non potest sponsalia implere, quia per ejusmodi fornicationem sponsa evasit ei affinis; neque potest ejus matrem aut sororem habere in uxorem

uxorem propter publicam honestatem, ortam ex sponsalibus.

Q. 3. *Quomodo numerantur gradus affinitatis?*

R. Numerantur sicut gradus consanguinitatis, adeo ut, quemadmodum soror uxoris est in primo gradu consanguinitatis, consobrina in secundo, matertera in primo ad secundum, & sic deinceps, ita eadem soror sit in primo gradu affinitatis respectu mariti, consobrina in secundo, matertera in mixto primi & secundi.

Q. 4. *Affinitas paritne affinitatem?*

R. Jure veteri pariebat, ita ut si Maria v. g. quæ nupserat meo fratri defuncto; & ideo mihi affinis contraheret cum Petro, Petrus jure veteri esset mihi & sorori meæ affinis, nec posset post mortem Mariæ sororem meam ducere. Sed Concilium Lateranense IV. cit. cap. *Non debet*, sustulit ejusmodi affinitatem. Unde Jure novo affinitas non parit affinitatem, duo fratres licitè contrahunt cum duabus sororibus, pater quoque & filius legitimè conjunguntur, ille cum matre vidua, iste cum ejusdem viduæ filia.

CLANDESTINITAS.

Q. 1. *Quandonam Matrimonium censetur clandestinum & nullum?*

R. Quando non contrahitur coram proprio Parocho, vel alio Sacerdote, de ipsius Parochi vel Ordinarii licentia, & duobus vel tribus testibus, ex Concil. Trident. Sess. 24. cap. 1. *de Reform.*

Q. 2. *Quis censetur proprius Parochus, an originis, an domicilii?*

R. Domicilii, nisi contrahentes sint vagi, ac domicilio careant. Praxis Ecclesiæ illud demonstrat & suadet ratio; quia in loco domicilii bona proclamantur, & ibi deprehendi potest, si quæ sint impedimenta.

Dixi: *Nisi sint vagi*; hi enim contrahere possunt coram Parocho loci, in quo diversantur, obtenta prius Ordinarii licentia ex Concilio Tridentino Sess. 24. cap. 7. *de Reform.*

Q. 3. *Quamdiu extraneus commorari debet in Parœcia, ut ibi sortiatur sufficiens domicilium ad contrahendum?*

R. Juxta consuetudinem in Gallia receptam, & Edicto Regio confirmatam, extraneus, si sit ejusdem Diœceseos; per sex menses in Parœcia sedem fixisse debuit; & per annum, si diversæ Diœceseos, priusquam ibi ad Sacramentum Matrimonii admittatur.

Q. 4. *Qui metu ne parentes, aut alii se opponant eorum matrimonio, aliò demigrant, ibique commorantur per tempus Lege præscriptum, ad suos postea redituri, contrahuntne illic validè?*

R. Si sint filii familias, non debent admitti sine consensu parentum, alioquin tam Parochus, quàm contrahentes severitati Regionum Edictorum meritò subjacerent. 2. Si sint sui Juris, ratum, ac firmum est eorum Matrimonium, utpotè juxta præscriptum Legis celebratum. Ita Sylvius in Supplemento sancti Thomæ quæst. 45. art. 5. Bonacina de Proprietatibus Matrimonii, quæst. 2. puncto 8. num. 7. ubi alios
pro

pro sua Sententia appellat; & Fagnanus in Caput significavit, tit. de Parochiis, num. 36. suamque Sententiam confirmat pluribus declarationibus Cardinalium.

Q. 5. Quando contrahentes sunt diversæ Paræciæ, satisne est ad veritatem Matrimonii, ut celebretur coram Parocho alterutrius contrahentis?

R. Affirmativè, constatque ex universali Ecclesiæ disciplina. Peccaret tamen Parochus si contrahentes admitteret, non acceptis litteris testimonialibus alterius Parochi, quibus certiore illum faceret se banna sui Parochiani ter proclamasse, nemine contradicente, ipsumque Parochianum ad Sacramentum Pœnitentiæ accessisse; banna enim, etsi non sint de necessitate Sacramenti, sunt tamen de necessitate præcepti.

IMPOTENTIA.

Q. 1. Quæ impotentia impedit & irritat Matrimonium?

R. Antecedens & perpetua, sive illa sit absoluta, sive respectiva, ut habetur Cap. Fraternitatis, tit. de Frigidis, & Maleficiatis. Impotentes, ex defectu naturali, dicuntur frigidi: ex maleficio, maleficiati.

Dixi 1. Antecedens; quæ enim supervenit Matrimonio contracto & rato, licet nondum consummato, Matrimonium non dirimit.

Dixi 2. Et perpetua; quia temporalis, quæ tolli potest vel crescentibus viribus adolescentis, vel Medicorum remediis, contractum Matrimonium non solvit. Capite autem Laudabilem, cit.

Titulo de Frigidis, triennium conceditur conjugibus ad tentandum num consummare possint; quando dubitatur sitne perpetua impotentia, si enim esset certa ut in senibus, quæ quotidie evadit major, nec semel copulam attentare liceret.

Dixi 3. *Sive sit respectiva*; contingit enim aliquando ut quis sit impotens respectu unius & potens respectu alterius; unde soluto Matrimonio propter ejusmodi impotentiam respectivam, potest ille contrahere cum alia.

Q. 2. *Impotentia estne idem ac sterilitas?*

R. Minimè; ii quippe soli dicuntur impotentes, qui non possunt consummare Matrimonium, nec per copulam fieri una caro: steriles verò, qui ex copula præhabita fructum, scilicet prolem non suscipiunt, ut senes adhuc habiles ad consummandum Matrimonium, sed inhabiles ad generandum.

RAPTUS.

Quid est raptus?

R. Raptus generatim describi potest, personæ abductio vi, aut seductione ad contrahendum Matrimonium.

Ergo duplex est raptus: alius dicitur violentiæ, quando filius aut filia familias renitens, abducitur è domo paterna, alius seductionis & subornationis, cui persona rapta non repugnat, blanditiis, voluptatis illecebris, & promissis seducta: uterque autem raptus est impedimentum dirimens, nec potest consistere Matrimonium
inter

intér raptorem & raptam, nisi persona sit à raptore separata, & in loco tuto & libero constituta, ex Conc. Trid. Sess. 24. cap. 6. *de Reform.* Non censetur autem in Senatu Parisiensi puella in loco tuto & libero: nisi potestati paternæ subjaceat. S. Thom. 2. 2. quæst. 154. art. 6. *utroque rapto*, sic scribit: *Violentia quandoque infertur tam ipsi virgini quàm patri, quando autem infertur patri, sed non virgini, putà cùm ipsa consentit ut per violentiam de domo patris abstrahatur qualitercunque violentia adsit, salvatur ratio raptus.*

CAPUT VII.

De Dispensatione circa impedimenta Matrimonii.

Q. I. *Quis dispensare potest circa impedimenta Matrimonii?*

R. Ex communi Ecclesiarum consuetudine, quæ vim Legis obtinet, solius est Summi Pontificis dispensare in impedimentis dirimentibus Jure humano inductis, ubi præsertim agitur de Matrimonio contrahendo.

Dixi 1. *In impedimentis dirimentibus*; Episcopus enim dispensat in impedimentis simplicibus, exceptis tamen Votis Religionis & Castitatis perpetuæ.

Dixi 2. *Jure humano inductis*; quia in iis, quæ sunt Juris naturalis & Divini, nulla potest esse dispensatio.

Dixi 3. *Ubi præsertim agitur de Matrimonio contrahendo*; quia quando Matrimonium est bona fide

fide contractum cum impedimento occulto, nec sine scandalo, aut magno incontinentiæ periculo in contrahentibus, recurri potest ad Summum Pontificem, dispensandi facultatem penès Episcopum esse docent communiter Theologi & Canonistæ, & ita fuisse sibi responsum in Curia Romana scribit Zerola in praxi 1. par. verbo *Dispensatio*.

Quin plures Episcopi in Gallia contendunt suas Ecclesias ex diuturno usu præscripsisse adversus consuetudinem, atque eo titulo dispensant, nemine contradicente, ab aliquibus impedimentis dirimentibus etiam publicis, sive de contrahendo, sive de contracto Matrimonio agatur.

Q. 2. *Quando contrahentes sunt è diversis Diœcesibus, estne necesse ut uterque Episcopus dispense?*

R. Affirmativè; quia neuter habet jurisdictionem in incolam alterius Diœcesis.

Q. 3. *Quomodo Matrimonium prius irritum, convalescit, dispensatione impetrata?*

R. Si impedimentum sit publicum, contrahentes novum consensum præbere debent coram Parocho & testibus, si sit occultum, satis est ut contrahentes, qui prius coram proprio Parocho contraxerant, sed invalidè, mutuò consentiant occultè & sine testibus. Est communis Theologorum & Canonistarum sententia; & ita declaravit Pius V. motu proprio apud Sanchez, Lib. 2. disp. 37. observaturque.

Q. 4. *Quid observabit Confessarius, quando in conjugē pœnitente deprehendit occultum impedimentum dirimens?*

R. Ob.

R. Observabit 1. Num impedimentum illud supervenerit Matrimonio jam contracto, forte pœnitens rem habuerit cum persona consanguinea, aut affini conjugis, vel præcesserit Matrimonium; si supervenit, non irritat Matrimonium, utpotè indissolubile; sed privat duntaxat incestuosum Jure petendi debiti, (nisi cum ipso dispensetur) non verò reddendi. Si autem impedimentum præcesserit, irritum reddit Matrimonium. Sed Confessarius,

Observabit 2. Utrùm pœnitens noverit illud impedimentum, aut de eo dubitet, interrogetque vel prorsus illud ignoret.

Si primum, Confessarius declarabit Matrimonium ejus esse nullum, quærendasque occasiones, quibus thoro separetur ad vitandum fornicationis crimen, quo pœnitens reum se constitueret, non solum exigendo, sed etiam reddendo debitum, cum revera non sint conjuges, qui sic contraxerunt.

Si secundum, Confessarius non commonebit pœnitentem hujusmodi impedimenti, maxime si sit mulier, ne eam in proximam fornicationis occasionem conjiciat, nempe reddendi debitum exigenti alteri minimè conscio impedimenti, sed quem à Confessario didicit non esse sibi conjugem ut hætenus bona fide existimaverat, ac propterea maritaliter absque culpa cum eo vixerat, atque etiamnum viveret, nisi à Confessario incaute esset præmonita. Confessarius igitur non detegit ejusmodi impedimentum, sed prætexet aliam causam differendi absolutionem, putà peccati

cati gravitatem, propter quam ad Episcopum recurrat necesse est.

Plura sunt alia & quidem gravia, ac difficilia circa dispensationes discutienda, quæ cum in Compendium reduci nequeant, ab iis hîc abstinemus, Lectoremque remittimus ad Tomum nostrum 3. de Legibus cap. 10. & 12. & ad Tomum 7. de Matrimonio, cap. ultimo.

F I N I S.



16 200236

